

वीर सेवा मन्दिर  
दिल्ली

★

इ.ग.म.

क्रम संख्या

२ टोड

काल नं०

खण्ड

५७५



वीर सेवा संस्थान  
६७५



जैनहितैषीका अष्टमवर्षका उपहार ।



नमः श्रीमोक्षप्रकाशकाय ।

स्वर्गीय पंडित शिरोमणि टोडरमल्लजी  
विरचित

मोक्षमार्गप्रकाशक ।

जिसे

श्रीजैनग्रन्थरत्नाकर कार्यालय बम्बईने

निर्णयसागर प्रेसमें

बालकृष्ण रामचन्द्र घाणेकरके प्रबन्धसे मुद्रित कराया ।

( प्रथमावृत्ति )

श्री वीर नि० संवत् २४३८

नवम्बर, सन् १९११ ईस्वी.

Published by Shri Nathuram Premi, Proprietor Shri Jain-Grantha  
Ratnakar Karyalaya, Hirabag, Near C. P. Tank, Bombay.

Printed by B. R. Ghanekar, at the Nirnaya-Sagar Press,  
23, Kolbhat lane, Bombay.



## प्रकाशकका निवेदन ।

लगभग १४ वर्ष पहिले मोक्षमार्गप्रकाशकका एक संस्करण श्रीयुक्त बाबू ज्ञानचंदजी जैनी लाहोरने प्रकाशित किया था । उसमें उन्होंने ग्रन्थकी मूल जयपुरी भाषाका परिवर्तन कर दिया था । यदि यह परिवर्तन आजकलकी खड़ी हिन्दीमें कर दिया जाता तो अच्छा होता. परन्तु बाबू साहबने केवल बहुरि, जातै, जाकरि, आदि शब्द बदलकर उनके स्थानमें और, क्योंकि, जिससे, आदि खड़ी भाषाके शब्द रख दिये थे, जिससे उक्त संस्करणकी भाषा 'न इधरकी न उधरकी' एक विलक्षण ही प्रकारकी खिचड़ी कर दी थी जिससे कि पाठकोंका मन विरक्त हो जाता था । जिस समय हमारा विचार इस ग्रन्थका यह नवीन संस्करण प्रकाशित करनेका हुआ, उस समय हमने भी इसकी भाषा विशुद्ध हिन्दी कर डालनेका निश्चय किया था, परन्तु एक तो हमको इस कार्यके लिये यथेष्ट समय नहीं था, दूसरे कई मित्रोंकी राय हुई कि, एक संस्करण पं० टोडरमल्लजीकी मूल भाषामें जैसाका तैसा प्रकाशित होना चाहिये, जिससे एक नामी विद्वानकी कृतिको लोग उसके यथार्थ रूपमें देखसकें । इससे यह संस्करण मूल भाषामें किसी भी प्रकारका परिवर्तन न करके प्रकाशित किया जाता है, आशा है कि, पाठक इसको पसन्द करेंगे । हमको विश्वास है कि, परिवर्तित संस्करणकी अपेक्षा उन्हें इसमें कुछ और ही आनन्द प्राप्त होगा । इसके संशोधन करनेमें हमने भरसक प्रयत्न किया है ।

इस अद्वितीय ग्रन्थके बनानेवाले पं० टोडरमल्लजीका जीवनचरित्र इस संस्करणके साथ प्रकाशित करनेकी हमारी उत्कट अभिलाषा थी. और उसके संग्रह करदेनेके लिये जयपुरके एक सज्जनोत्तमने हमको वचन भी दिया है. परन्तु वर्तमानमें उनके अवकाशाभावसे और इसके

प्रकाशित करनेकी शीघ्रता होनेसे हमारी उक्त अभिलाषा पूर्ण नहीं हुई, तो भी हम पाठकोंको विश्वास दिलाते हैं कि, जैनहितैषीमें बहुतही शीघ्र उक्त जीवनचरित्रके प्रकाशित करनेका प्रयत्न किया जायगा ।

ग्रन्थकर्ताकी अकालमृत्यु हो जानेसे यद्यपि यह ग्रन्थ पूरा नहीं होने पाया था बल्कि यह उस महानग्रन्थकी एक भूमिका मात्र है, इससे कई गुणा पूर्ण ग्रन्थ होता तो भी जितना है इतना ही जैनधर्मका रहस्य प्रगट करनेके लिये अद्वितीय है । जैनियोंके भाषासाहित्यमें ग्रन्थोंकी कमी नहीं है—सैकड़ों भाषा वचनिकाके ग्रन्थ मौजूद हैं, तो भी मोक्षमार्गप्रकाशककी शैलीका अनुसरण करनेवाला एक भी नहीं है । जितनी सरलता, सुगमता, और उदाहरणादिकोंकी सहायतासे गहनसे गहन तत्त्वोंको समझानेका प्रयत्न इस ग्रन्थमें किया है उतना शायदही अन्य किसी ग्रन्थमें किया होगा, और इस प्रयत्नमें पं० टोडरमलजीने सफलता भी सबसे अधिक प्राप्त की है । यह देखकर हमने सोचा कि, यदि इस ग्रन्थका प्रचार जैन समाजमें अधिकताके साथ किया जाय, तो बहुत लाभ होगा और इसके लिये हमने इस संस्करणकी तीन हजार प्रतियां प्रकाशितकी हैं. साथ ही इस बातका भी उद्योग किया है कि, बहुत ही थोड़े दामोंमें यह ग्रन्थ प्रत्येक जैनीके घरमें पहुंच जावे । इति शम् ।

देवरी ( सागर )  
कार्तिकशुक्ल २  
श्रीवीरनि० सं० २४३८

निवेदक—

नाथूराम प्रेमी

## मोक्षमार्गप्रकाशक ग्रन्थकी विषय सूची ।

### प्रथम अधिकार

१ मंगलाचरण	...	...	...	...	१
अरहंतदेवका स्वरूप	...	...	...	...	२
सिद्धोंका स्वरूप	...	...	...	...	३
आचार्य उपाध्याय और साधुओंका स्वरूप					३
वर्तमान कालके चौबीस तीर्थकरोंको, विदेह क्षेत्रके तीर्थकरोंको, कृत्रिमाकृत्रिम जिनविम्बों को और जैनग्रन्थोंको नमस्कार					७
अरहंतादि इष्ट क्यों हैं? उनसे जीव का कल्याण किस प्रकार होता है?	...	...	...	...	८
मंगलाचरण करनेका कारण	...	...	...	...	११
२ यह ग्रन्थ प्रमाण क्यों है?	...	...	...	...	१३
३ कैसे शास्त्र वांचने सुनने योग्य हैं?	...	...	...	...	२०
४ वक्ताका स्वरूप	...	...	...	...	२०
५ श्रोताका स्वरूप	...	...	...	...	२४
६ मोक्षमार्गप्रकाशक ग्रन्थकी सार्थकता	...	...	...	...	२६

### द्वितीय अधिकार.

७ कर्मबन्धन रोगका निदान	...	...	...	...	२९
कर्मका सम्बन्ध अनादिकालसे है	...	...	...	...	३०
रागादि निमित्तक कर्मोंके अनादिपनेकी सिद्धि	...	...	...	...	३१
अमूर्ताक आत्मासे मूर्ताक कर्मोंका बन्ध कैसे होता है	...	...	...	...	३३
घातिया अघातिया कर्म और उनके कार्य	...	...	...	...	३४
जड़कर्म जीवके स्वभावका घात और बाह्य सामग्री का संयोग कैसे कर सकते हैं	...	...	...	...	३५
नवीन बंध कैसे होता है	...	...	...	...	३६
ज्ञान हीन जड़ परमाणु यथायोग्य प्रकृतिरूप होकर परिणमन कैसे करते हैं	...	...	...	...	४०



कर्मोंकी बंध उदय सत्ता रूप अवस्था	...	४१
द्रव्यकर्म और भावकर्म	...	४२
नोकर्मका स्वरूप और उसकी प्रवृत्ति	...	४३
नित्यनिगोद और इतरनिगोद	...	४४
८ कर्मबन्धनरूपरोगके निमित्तसे जीवकी अवस्था	...	४५
ज्ञानावरण दर्शनावरण कर्म निमित्तक अवस्था, मतिज्ञानकी परार्थीन प्रवृत्ति, श्रुतज्ञान अवधिज्ञान चक्षुदर्शन, अचक्षुदर्शनकी प्रवृत्ति, ज्ञानोपयोग दर्शनोपयोग आदिकी प्रवृत्ति	...	४५
दर्शनमोहके उदयसे जीवकी अवस्था	...	५२
चारित्रमोहके तथा अन्तरायके उदयसे जीवकी अवस्था	...	५३
वेदनीयादि अघाति कर्मजनित अवस्था	...	५८
<b>तीसरा अधिकार.</b>		
९ संसार अवस्थाके नानाप्रकारके दुःखोंका वर्णन	...	६२
दुःखके कारण मिथ्यादर्शन अज्ञान असंयम	...	६३
दुःख दूर करनेके लिये जीव क्या उपाय करता है	...	६६
वे उपाय झूठे क्यों हैं? सांचे उपाय	...	६६
एकेन्द्रिय पर्यायके दुःख	...	८७
द्वीन्द्रियादि पर्यायोंके दुःख	...	९०
नरकगतिके दुःख	...	९०
तिर्यचगतिके दुःख	...	९२
मनुष्यगतिके दुःख	...	९३
देवगतिके दुःख	...	९५
दुःखका सामान्यस्वरूप	...	९७
सिद्ध अवस्थामें दुःखोंके कारणोंका अभाव होनेसे दुःखोंका अभाव	१००	

**चौथा अधिकार.**

१० मिथ्यादर्शन मिथ्याज्ञान और मिथ्याचारित्रका स्वरूप	१०५
मिथ्यादर्शनका स्वरूप	१०६
मिथ्याज्ञानका स्वरूप	११७
मिथ्याचारित्रका स्वरूप	१२३

रागद्वेषका विधान और विस्तार ... .. १२६

### पांचवां अधिकार—

११ गृहीत मिथ्यात्वका निरूपण ... ..	१३३
अद्वैत ब्रह्मवादीके सर्वव्यापकत्वका निराकरण ... ..	१३४
सृष्टिकर्तृत्ववादका निराकरण ... ..	१३९
ब्रह्माके सृष्टिकर्तृत्व, विष्णुके रक्षकत्व, और महेशके संहारकर्तृ- त्वका निराकरण ... ..	१४७
लोकके अनादि निधनपनेकी पुष्टि ... ..	१५५
अवतार मीमांसा ... ..	१५७
यज्ञ सम्बन्धी पशुहिंसाका विचार ... ..	१६१
निर्गुण और सगुण भक्तिकी मीमांसा ... ..	१६२
ज्ञानयोगसे मुक्ति माननेका विचार ... ..	१६७
अन्यमतकल्पित मोक्षमार्गकी मीमांसा ... ..	१७३
मुसलमानोंके मत विषयक विचार ... ..	१७४
सांख्यमत निराकरण ... ..	१७६
नैयायिकमत निराकरण ... ..	१८०
वैशेषिकमत निराकरण ... ..	१८२
मीमांसकमत निराकरण ... ..	१८६
जैमिनीयमत निराकरण ... ..	१८७
बौद्धमत निराकरण ... ..	१८८
चार्वाकमत निराकरण ... ..	१९०
अन्यमतके ग्रन्थोंसे जैनमतकी समीचीनता ... ..	१९६
श्वेताम्बरमत निराकरण ... ..	२०४
हूणकमत निराकरण ... ..	२२५

### छठा अधिकार.

१२ कुदेवादिकका निरूपण और निषेध ... ..	२३८
१३ कुगुरुके श्रद्धानादिका निषेध ... ..	२४९
१४ कुधर्मका निरूपण ... ..	२६६

**सातवां अधिकार.**

१५ जैनमतानुयायी मिथ्यातियोंका स्वरूप	...	...	२७३
केवल निश्चय नयावलम्बी जैनाभासोंका निरूपण	...	...	२७३
केवल व्यवहारालम्बी जैनाभासोंका निरूपण	...	...	३०१
कुलप्रवृत्ति आदिसे जैनधर्मको धारण करनेवाले मिथ्यादृष्टियोंकी धर्मसाधना गुरुभक्ति शास्त्रभक्ति तत्त्वार्थ श्रद्धा चारित्रधारणा आदि निश्चय और व्यवहार दोनोंका अवलम्बन करनेवाले मिथ्यादृष्टियोंका निरूपण	...	...	३१०
सम्यक्तत्वके सम्मुख मिथ्यादृष्टियोंका निरूपण	...	...	३६४

**आठवाँ अधिकार.**

१६ उपदेशका स्वरूप	...	...	३७८
प्रथमानुयोगका प्रयोजन	...	...	३७९
करणानुयोगका प्रयोजन	...	...	३८०
चरणानुयोगका प्रयोजन	...	...	३८१
द्रव्यानुयोगका प्रयोजन	...	...	३८२
प्रथमानुयोगके व्याख्यानकी पद्धति	...	...	३८३
करणानुयोगके व्याख्यानकी पद्धति	...	...	३८८
चरणानुयोगके व्याख्यानकी पद्धति	...	...	३९२
द्रव्यानुयोगके व्याख्यानकी पद्धति	...	...	४०२
अनुयोगोंमें किस पद्धतिकी मुख्यता है	...	...	४०६
१७ अनुयोगोंमें जो दोष कल्पना की जातीहैं, उनका निराकरण अपेक्षादिका ज्ञान न होनेसे शास्त्रोंमें जो परस्पर विरुद्धता दिखती है, उसका निराकरण	...	...	४०९
	...	...	४१८

**नववां अधिकार.**

१८ मोक्षमार्गका स्वरूप	...	...	४३४
आत्माका हित मोक्ष ही है, इसका निश्चय	...	...	४३४
सांसारिक सुख दुःख ही है	...	...	४३७
मोक्षसाधनमें पुरुषार्थकी मुख्यता	...	...	४४०
मोक्षमार्गका स्वरूप	...	...	४४७
सम्यग्दर्शनका लक्षण	...	...	४५०



नमः सिद्धेभ्यः ।

# मोक्षमार्गप्रकाश ।

दोहा ।

मंगलमय मंगलकरण, वीतरागविज्ञान ।  
नमौं ताहि जातैं भये, अरहंतादि महान ॥ १ ॥  
करि मंगल करिहौं महा, ग्रंथकरनको काज ।  
जातैं मिलै समाज सब, पावै निजपदराज ॥ २ ॥

अथ मोक्षमार्गप्रकाशनाम शास्त्रका उदय हो है । तहां मंगल करिये है,—

णमो अरहंताणं । णमो सिद्धाणं । णमो आइरीयाणं ।  
णमो उवज्झायाणं । णमो लोए सब्वसाहूणं ।

यह प्राकृतभाषामय नमस्कारमंत्र है, सो महामंगलस्वरूप है ।  
बहुरि याका संस्कृत ऐसा हो है,—

नमोऽर्हद्भ्यः । नमः सिद्धेभ्यः । नमः आचार्येभ्यः । नमः  
उपाध्यायेभ्यः । नमो लोके सर्वसाधुभ्यः । बहुरि याका अर्थ  
ऐसा है,—नमस्कार अरहंतनिके अर्थि, नमस्कार सिद्धनिके

अर्थि, नमस्कार आचार्यनिके अर्थि, नमस्कार उपाध्यायनिके अर्थि, नमस्कार लोकविषै सर्वसाधुनिके अर्थि, ऐसं याविषै नमस्कार किया, तातैं याका नाम नमस्कारमंत्र है । अब इहां जिनकूं नमस्कार किया तिनका स्वरूप चितवन कीजिये है । तहाँ प्रथम अरहंतनिका स्वरूप विचारिये है,—

जे गृहस्थपनौ त्यागि मुनिधर्म अंगीकार करि निजस्वभावसाधनतैं च्यारि घातिया कर्मनिकौं खिपाय अनंत चतुष्टयविराजमान भये । तहां अनंतज्ञानकरि तौ अपने अपने अनंत गुणपर्याय सहित समस्त जीवादि द्रव्यनिकौं युगपत् विशेषपनैकरि प्रत्यक्ष जानै हैं । अनंतदर्शनकरि तिनकौं सामान्यपनै अवलोकै हैं । अनंतवीर्यकरि ऐसी (उपर्युक्त) सामर्थ्यकौं धारै हैं । अनंतसुखकरि निराकूल परमानंदकौं अनुभवै हैं । बहुरि जे सर्वथा सर्वरागद्वेषादिविकारभावनिकरि रहित होइ शांतरसरूप परिणए हैं । बहुरि क्षुधा त्रिषा आदिसमस्तदोषनितैं मुक्त होय देवाधिदेवपनाकौं प्राप्त भये हैं । बहुरि आयुध अंबरादिक वा अंग विकारादिक जे काम क्रोधादिक निघभावनिके चिन्ह, तिनकरि रहित जिनका परम औदारिक शरीर भया है । बहुरि जिनके वचननितैं लौकविषै धर्मतीर्थ प्रवर्तै है, ताकरि जीवनिका कल्याण हो है । बहुरि जिनकै लौकिक जीवनिकूं प्रभुत्व माननेके कारण अनेक अतिशय अरनानाप्रकार विभव तिनका संयुक्तपणा पाइये है । बहुरि जिनकौं अपना हितके अर्थि गणधर इंद्रादिक उत्तम जीव सेवै हैं । ऐसैं सर्वप्रकार पूजनै योग्य श्रीअरहंत देव हैं, तिनकौं हमारा नमस्कार होहु । अब सिद्धनिका स्वरूप ध्याइये है,—

जे गृहस्थअवस्था त्यागि मुनिधर्मसाधनतैं च्यारि घातिकर्म-  
निका नाश भये अनंतचतुष्टय भाव प्रगट करि केतेक काल पीछे  
च्यारि अघाति कर्मनिका भी भस्म हौतैं परमऔदारिक शरीरकौं  
भी छोरि ऊर्द्धगमन स्वभावतैं लोकका अग्रभागविषै जाय विराज-  
मान भये । तहां जिनकै समस्त परद्रव्यनिका संबंध छूटनेतैं मुक्त  
अवस्थाकी सिद्धि भई, बहुरि जिनकै चर्मशरीरतैं किंचित् ऊन  
पुरुषाकारवत् आत्मप्रदेशनिका आकार अवस्थित भया, बहुरि  
जिनकै प्रतिपक्षी कर्मनिका नाश भया तातैं समस्त सम्यक्त्व ज्ञान  
दर्शनादिक आत्मीक गुण संपूर्णपने स्वभावकौं प्राप्त भये हैं,  
बहुरि जिनकै नोकर्मका संबंध दूर भया तातैं समस्त अमूर्त्तत्वादिक  
आत्मीकधर्म प्रगट भये हैं । बहुरि जिनकै भावकर्मका अभाव  
भया तातैं निराकुल आनंदमय शुद्धस्वभावरूप परिणमन हो है ।  
बहुरि जिनका ध्यानकरि भव्य जीवनिकै स्वद्रव्यपरद्रव्यका अर उ-  
पाधिक भाव स्वभावनिका विज्ञान हो है, ताकरि सिद्धनिकै समान  
आप होनेका साधन हो है । तातैं साधनैयोग्य जो अपना शुद्ध-  
स्वरूप ताके दिखावनेकौं प्रतिबिंब समान हैं । बहुरि जे कृतकृत्य  
भये हैं तातैं ऐसैं ही अनंत कालपर्यंत रहैं हैं ऐसे निष्पन्न भये  
सिद्ध भगवान तिनकौं हमारा नमस्कार होहु । अब आचार्य  
उपाध्याय साधुनिका स्वरूप अवलोकिये है,—

जे विरागी होय समस्त परिग्रहकौं त्यागि शुद्धोपयोगरूप  
मुनिधर्म अंगीकार करि अंतरंगविषै तौ तिस शुद्धोपयोगकरि  
आपकौं आप अनुभवैं हैं परद्रव्यविषै अहंबुद्धि नाहीं धारै  
हैं । बहुरि अपने ज्ञानादिकस्वभावनिहीकौं अपने मानैं हैं । पर-

भावनिविषै ममत्व न करै हैं । बहुरि जे परद्रव्य वा तिनके स्वभाव ज्ञानविषै प्रतिभासै हैं तिनकों जानै तो हैं परंतु इष्ट अनिष्ट मानि तिनविषै रागद्वेष नाहीं करै हैं । शरीरकी अनेक अवस्था हो है, बाह्य नाना निमित्त बनै हैं परंतु तहां किछू भी सुखदुःख मानते नाहीं । बहुरि अपने योग्य बाह्यक्रिया जैसें बनै हैं तैसें बनै हैं, खेंचिकरि तिनकों करते नाहीं । बहुरि अपने उपयोगकों बहुत नाहीं भ्रमावै हैं । उदासीन होय निश्चल वृत्तिकों धारै हैं । बहुरि कदाचित् मंदरागके उदयतैं शुभोपयोग भी हो है तिसकरि जे शुद्धोपयोगके बाह्य साधन हैं तिनिविषै अनुराग करै हैं परंतु तिस रागभावकों हेय जानिकरि दूरि कीया चाहै हैं । बहुरि तीव्र कषायके उदयका अभावतैं हिंसादिरूप अशुभोपयोग परिणतिका तौ अस्तित्व ही रखा नाहीं । बहुरि ऐसी अंतरंग अवस्था होतैं बाह्य दिगंबर सौम्यमुद्राके धारी भये हैं । शरीरका सँवारना आदि विक्रियानिकरि रहित भये हैं । बनखंडादि विषै वसै हैं । अठाईस मूलगुणनिकों अखंडित पालै हैं । बाईस परीसहनिकों सहै हैं । बारहप्रकार तपनिकों आदरै हैं । कदाचित् ध्यानमुद्राधारि प्रतिभावत् निश्चल हो हैं । कदाचित् अध्ययनादि बाह्य धर्मक्रियानिविषै प्रवर्तैं हैं । कदाचित् मुनिधर्मका सहकारी शरीरकी स्थितिके अर्थि योग्य आहार विहारादि क्रियानिविषै सावधान हो है । ऐसे जैनी मुनि हैं तिन सबनिकी ऐसी ही अवस्था हो है । तिनिविषै जे सम्यग्ज्ञान सम्यक्चारित्रकी अधिकता करि प्रधानपदकों पाय संघविषै नायक भये हैं । बहुरि जे मुख्यपनै तौ निर्विकल्प स्वरूपाचरण विषै ही मग्न हैं अर जो कदाचित्

धर्मके लोभी अन्य जीवा<sup>दि</sup>वाचकनिकों देखि रागअंशके उदयतैं करुणाबुद्धि होय तो तिनिकों धर्मोपदेश देते हैं । जे दीक्षाग्राहक हैं तिनिकों दीक्षा देते हैं जे अपने दोष प्रगट करै हैं तिनिकों प्रायश्चित्त विधिकरि शुद्ध करै हैं । ऐसैं आचार अचरावनवाले आचार्य तिनिकों हमारा नमस्कार होहु । बहुरि जे बहुत जैन-शास्त्रनिके ज्ञाता होय संघविषै पठन पाठनके अधिकारी भये हैं, बहुरि जे समस्त शास्त्रनिका प्रयोजनभूत अर्थ जानि एकाग्र होय अपने स्वरूपकौ ध्यावै हैं । अर जो कदाचित् कषाय अंश-उदयतैं तहां उपयोग नाही थंभै है तौ तिन शास्त्रनिकों आप पढ़ै हैं वा अन्य धर्मबुद्धीनिको पढ़ावै हैं । ऐसैं समीपवर्ती भव्यनिको अध्ययन करावनहारे उपाध्याय तिनिकों हमारा नमस्कार होहु । बहुरि इन दोय पदवीधारक विना अन्य समस्त जे मुनिपदके धारक हैं बहुरि जे आत्मस्वभावकौ साधै हैं । जैसे अपना उपयोग परद्रव्यनिविषै इष्ट अनिष्टपनों मानि फसै नाही वा भागै नाही तैसैं उपयोगको सधावै हैं । बहुरि बाह्यताके साधनभूत तपश्चरण आदि क्रियानिविषै प्रवर्तै हैं वा कदाचित् भक्तिवंदनादि कार्यनिविषै प्रवर्तै हैं । ऐसे आत्मस्वभावके साधक साधु हैं तिनिकों हमारा नमस्कार होहु । ऐसैं इन अरहंतादिकनिका स्वरूप है सो वीतराग विज्ञानमय है । तिसहीकरि अरहंतादिक स्तुति योग्य महान भये हैं तातैं जीव तत्त्वकरि तौ सर्व जीव समान हैं परंतु रागादिक विकारनिकरि वा ज्ञानकी हीनताकरि जीव निंदा योग्य हो हैं । बहुरि रागादिककी हीनताकरि वा ज्ञानकी विशेषताकरि स्तुति योग्य हो हैं । सो अरहंत सिद्धनिकै तौ संपूर्ण रागादिककी



हीनता अर ज्ञानकी विशेषता होनैकरि संपूर्ण वीतरागविज्ञान-  
 भाव संभवै है । अर आचार्य उपाध्याय साधुनिकै एकोदेश रागा-  
 दिककी हीनता अर ज्ञानकी विशेषता होनैकरि एकोदेश वीतरा-  
 गविज्ञान भाव संभवै है । ताँतें ते अरहंतादिक स्तुतियोग्य महान  
 जानने । बहुरि ए अरहंतादिक पद हैं तिनविषै ऐसा जानना जो  
 मुख्यपनै तौ तीर्थकरका अर गौणपनै सर्वकेवलीका प्राकृतभाषाविषै  
 अरहंत अर संस्कृतविषै अर्हत् ऐसा नाम जानना । बहुरि चौद-  
 हवां गुणस्थानकै अनंतर समयतै लगाय सिद्ध नाम जानना । बहुरि  
 जिनकाँ आचार्यपद भया होय ते संघविषै रहौ वा एकाकी  
 आत्मध्यान करौ वा एकाविहारी होहु वा आचार्यनिविषै भी  
 प्रधानताकाँ पाय गणधर पदवीके धारक होहु तिन सबनिका नाम  
 आचार्य कहिये है । बहुरि पठनपाठन तौ अन्यमुनि भी करै हैं परंतु  
 जिनकै आचार्यनिकरि उपाध्यायपद भया होय सो आत्मध्यानादिक  
 कार्य करतै भी उपाध्याय ही नाम पावै हैं । बहुरि जे पदवीधारक  
 नाहीं ते सर्व मुनि साधुसंज्ञाके धारक जानने । इहां ऐसा नियम  
 नाहीं है जो पंचाचारनिकरि आचार्यपद हो है, पठनपाठनकरि  
 उपाध्यायपद हो है, मूलगुण साधनकरि साधुपद हो है । जातें ए  
 तो क्रिया सर्व मुनिनिकै साधारण हैं परंतु शब्द नयकरि तिनका  
 अक्षरार्थ तैसैं करिये है । समभिरूढनयकरि पदवीकी अपेक्षा ही  
 आचार्यादिक नाम जानने । जैसैं शब्द नयकरि गमन करै सो  
 गऊ कहिये सो गमन तौ मनुष्यादिक भी करै हैं परंतु समभिरूढ-  
 नयकरि पर्याय अपेक्षा नाम है । तैसैं ही इहां समजना । इहां  
 सिद्धनिकै पहिलै अरहंतनिकाँ नमस्कार किया सो कौन कारण  
 ऐसा संदेह उपजै है । ताका समाधान,—

प्रश्नकार  
 है।

नमस्कार करिये है सो अपने प्रयोजन सधनेकी अपेक्षातैं करिये है सो अरहंतनितैं उपदेशादिकका प्रयोजन विशेष सिद्धि हो है तातैं पहले नमस्कार किया है । या प्रकार अरहंतादिकनिका स्वरूप चितवन किया । जातैं स्वरूप चितवन किये विशेष कार्य-सिद्धि हो है । बहुरि इनि अरहंतादिकनिकौं पंचपरमेष्ठी कहिये है । जातैं जो सर्वोत्कृष्ट होय ताका नाम परमेष्ठी है । पंच जो परमेष्ट तिनिका समाहार समुदायका नाम पंचपरमेष्ठी जानना । बहुरि वृषभ, अजित, शंभव, अभिनंदन, सुमति, पद्मप्रभ, सुपार्श्व, चंद्र-प्रभ, पुष्पदंत, शीतल, श्रेयान्, वासुपूज्य, विमल, अनंत, धर्म, शांति, कुंथु, अर, मल्लि, मुनिसुव्रत, नमि, नेमि, पार्श्व, वर्द्धमान नामधारक चौबीस तीर्थंकर इस भरतक्षेत्रविषै वर्त्तमान धर्मतीर्थके नायक भये, गर्भ जन्म तप ज्ञान निर्वाण कल्याणकनिविषै इन्द्रादि-कनिकरि विशेष पूज्य होइ अब सिद्धालयविषै विराजै हैं तिनकौं हमारा नमस्कार होहु । बहुरि सीमंधर, युगंधर, बाहु, सुबाहु, संजातक, स्वयंप्रभ, वृषभानन, अनंतवीर्य, सूरप्रभ, विशालकीर्त्ति, वज्रधर, चंद्रानन, चंद्रबाहु, भुजंगम, ईश्वर, नेमिप्रभु, वीरसेन, महाभद्र, देवयश, अजितवीर्य नामधारक वीस तीर्थंकर पंचमेरु संबंधी विदेहक्षेत्रनिविषै अबार केवलज्ञानसहित विराजमान हैं तिनकौं हमारा नमस्कार होहु । यद्यपि परमेष्ठी पदविषै इनका गर्भितपना है तथापि विद्यमान कालविषै इनकौं विशेष जानि जुदा नमस्कार किया है । बहुरि त्रिलोकविषै जे अकृत्रिम जिनबिब विराजै हैं मध्यलोकविषै विधिपूर्वक कृत्रिम विराजै हैं जिनिके दर्शनादिकतैं एक धर्मोपदेश विना अन्य अपने हितकी सिद्धि जैसे तीर्थंकर

स्वप्न प्रेक्ष विज्ञान होले, कथायमंड होय शान भाव होहे ।

केवलीके दर्शनादिकतै होय तैसैं ही हो है, तिनि जिनबिनिबकौं हमारा नमस्कार होहु । बहुरि केवलीका दिव्यध्वनिकरि दिया उपदेश ताके अनुसार गणधरिकरि रचित अंगप्रकीर्णक तिनके अनुसार अन्य आचार्यादिकनिकरि रचे ग्रंथादिक हैं ते सर्व जिनवचन हैं स्याद्वादचिन्हकरि पहचानने योग्य हैं न्यायमार्गतै अविरुद्ध है तातैं प्रमाणीक हैं जीवनिकौं तत्त्वज्ञानके कारण हैं तातैं उपकारी हैं तिनिकौं हमारा नमस्कार होहु । बहुरि चैत्यालय, अर्जिका, उत्कृष्ट श्रावक आदि द्रव्य, अर तीर्थक्षेत्रादि क्षेत्र, अर कल्याणककाल आदि काल, रत्नत्रय आदि भाव, जे मुझकरि नमस्कार करने योग्य हैं तिनकौं नमस्कार करौं हौं । अर जे किंचित् विनय करने योग्य हैं तिनिका यथायोग्य विनय करौं हौं । ऐसैं अपने इष्टनिका सन्मानकरि मंगल किया है । अब ए अरहंतादिक इष्ट कैसैं हैं सो विचार करिए हैं,—

जा करि सुख उपजै वा दुःखविनसै तिस कार्यका नाम प्रयोजन है । बहुरि तिस प्रयोजनकी जाकरि सिद्धि होय सो ही अपना इष्ट है । सो हमारै इस अवसरविषै वीतरागविशेष ज्ञानका होना सो ही प्रयोजन है जातैं याकरि निराकुल सांचे सुखकी प्राप्ति हो है । अर सर्व आकुलतारूप दुःखका नाश हो है । बहुरि इस प्रयोजनकी सिद्धि अरहंतादिकनिकरि हो है । कैसैं सो विचारिए हैं,—

आत्माके परिणाम तीनप्रकार हैं, संक्लेश, विशुद्ध, शुद्ध । तहां तीव्रकषायरूप संक्लेश हैं, मंदकषायरूप विशुद्ध हैं, कषायरहित शुद्ध हैं । तहां वीतरागविशेष ज्ञानरूप अपने स्वभावके घातक

जो हैं ज्ञानावरणादि घातियाकर्म, तिनिका संक्लेश परिणामकरि तौ तीव्रबंध हो है अर विशुद्ध परिणामकरि मंदबंध हो है वा विशुद्ध परिणाम प्रबल होय तौ पूर्वे जो तीव्र बंध भया था ताकौ भी मंद करै है । अर शुद्धपरिणामकरि बंध न हो है । केवल तिनकी निर्जरा ही हो है । सो अरहंतादिविषै स्तवनादि रूप भाव हो है सो कषायकी मंदता लिये हो है तातैं विशुद्ध परिणाम हैं । बहुरि समस्त कषायभाव मिटावनैका साधन है, तातैं शुद्धपरिणामका कारण है सो ऐसा परिणाम करि अपना घातक घातिकर्मका हीनपनाके होनेतैं सहज ही वीतराग विशेषज्ञान प्रगट हो है । जितने अंशनिकरि वह हीन होष तितने अंशनिकरि यह प्रगट हो है । ऐसैं अरहंतादिक करि अपना प्रयोजन सिद्ध हो है । अथवा अरहंतादिकका आकार अवलोकना वा स्वरूप विचार करना वा वचन सुनना वा निकटवर्त्ती होना वा तिनकै अनुसार प्रवर्त्तना इत्यादि कार्य तत्काल ही निमित्तभूत होय रागादिकनिकौ हीन करै है । जीव अजीवादिकका विशेषज्ञानकौ उपजावै है तातैं ऐसैं भी अरहंतादिक करि वीतराग विशेषज्ञानरूप प्रयोजनकी सिद्धि हो है । इहां कोऊ कहै कि इनिकरि ऐसे प्रयोजनकी तौ सिद्धि ऐसैं हो है परंतु जाकरि इंद्रियजनित सुख उपजै दुःख विनशै ऐसे हू प्रयोजनकी सिद्धि इनिकरि हो है कि नाहीं । ताका समाधान,—

जो अरहंतादिविषै स्तवनादिरूप विशुद्ध परिणाम हो है ताकरि अघातिया कर्मनिकी साता आदि पुण्यप्रकृतिनिका बंध हो है । बहुरि जो वह परिणाम तीव्र होय तौ पूर्वे असाताआदि पापप्रकृति बंधी थीं तिनिकौ भी मंद करै है अथवा नष्ट करि पुण्यप्रकृतिरूप

परिणमावै है । बहुरि तिस पुण्यका उदय होतैं स्वयमेव इन्द्रिय-सुखकौं कारणभूत सामग्री मिलै है । अर पापका उदय दूरि होतैं स्वयमेव दुःखकौं कारणभूत सामग्री दूर हो है । ऐसं इस प्रयोजनकी भी सिद्धि तिनकरि हो है । अथवा जैनशासनके भक्त-देवादिक हैं ते तिस भक्तपुरुषकै अनेक इन्द्रियसुखकौं कारणभूत सामग्रीनका संयोग करावै हैं । दुःखकौं कारणभूत सामग्रीनिकौं दूरि करै हैं । ऐसैं भी इस प्रयोजनकी सिद्धि तिन अरहंतादिकनि-करि हो है । परंतु इस प्रयोजनतैं किल्लू अपना हित होता नाही जातैं यह आत्मा कषायभावनिताैं बाह्य सामग्रीनविषै इष्टअनिष्टपनौं मानि आप ही सुखदुःखकी कल्पना करै है । विना कषाय बाह्य सामग्री किल्लू सुखदुःखकी दाता नाही । बहुरि कषाय हैं सो सर्व आकुलतामय हैं तातैं इंद्रियजनितसुखकी इच्छा करनी दुःखतैं डरना सो यह भ्रम है । बहुरि इस प्रयोजनके अर्थि अरहंतादि-ककी भक्ति किए भी तीव्रकषाय होनेकरि पापबंध ही हो है तातैं आपकौं इस प्रयोजनका अर्थी होना योग्य नाही । जातैं अरहंता-दिककी भक्ति करतैं ऐसे प्रयोजन तौ स्वयमेव ही सधै हैं । ऐसैं अरहंतादिक परम इष्ट मानने योग्य हैं । बहुरि ए अरहंतादिक ही परममंगल हैं । इनविषै भक्तिभाव भये परममंगल हो है । जातैं 'मंग' कहिये सुख ताहि 'लाति' कहिये देवै अथवा 'मं' कहिये पाप ताहि 'गाल्यति' कहिये गालै ताका नाम मंगल है सो तिनकरि पूर्वोक्त प्रकार दोऊ कार्यनिकी सिद्धि हो है । तातैं तिनकै परम-मंगलपना संभवै है । इहां कोऊ पूछै कि प्रथम ग्रंथकी आदिविषै मंगल कीया सौ कौन कारण ? ताका उत्तर,—

जो सुखस्यौं ग्रंथकी समाप्तिता होइ पापकरि कोऊ विघ्न न होइ या कारण इहां प्रथम मंगल कीया है। इहां तर्क—जो अन्यमती ऐसैं मंगल नाहीं करै हैं तिनकै भी ग्रंथकी समाप्तिता अरि विघ्नका नाश होना देखिये है तहाँ कहा हेतु है। ताका समाधान,—

जो अन्यमती ग्रंथ करै हैं तिसविषैं मोहका तीव्र उदयकरि मिथ्यात्व भावनिकौं पौषते विपरीत अर्थनिकौं धरै हैं तातैं ताकी निर्विघ्न समाप्तिता तौ ऐसैं मंगल किये विना ही' होइ। जो ऐसे मंगलनिकरि मोह मंद होजाय तौ वैसा विपरीत कार्य कैसें बनै ?। बहुरि हम यह ग्रंथ करै हैं तिसविषै मोहकी मंदता करि वीतराग तत्त्वज्ञानकौं पौषते अर्थनिकौं धरैगे ताकी निर्विघ्न समाप्तिता ऐसैं मंगल किये ही होय। जो ऐसैं मंगल न करै तौ मोहका तीव्रपना रहै, तब ऐसा उत्तम कार्य कैसें बनै ? बहुरि वह कहै है जो ऐसैं तौ मानैगे परंतु ऐसा मंगल न करै ताकै भी सुख देखिए है पापका उदय न देखिए है। अर कोऊ ऐसा मंगल करै है ताकै भी सुख न देखिये है पापका उदय देखिये है तातैं पूर्वोक्त मंगलपना कैसें बनै ? ताकौं कहिये है,—

जो जीवनिकै संक्लेश विशुद्ध परिणाम अनेक जातिके हैं तिनिकरि अनेक कालनिविषै पूर्वैं बंधे कर्म एक कालविषै उदय आवै हैं। तातैं जैसें जाकै पूर्वैं बहुत धनका संचय होय ताकै विनाकुमाए भी धन देखिए अर देणा न देखिये है। अर जाकै पूर्वैं ऋण बहुत होय ताकै धन कुमावतै भी देणा देखिये है धन न देखिए है परंतु विचार कीएतैं कुमावना धन होनैहीका कारण है ऋणका कारण नाहीं। तैसें ही जाकै पूर्वैं बहुत पुण्य बंध्या होइ ताकै

इहां ऐसा मंगल विना किए भी सुख देखिए है । पापका उदय न देखिए है । बहुरि जाकै पूर्वे बहुत पाप बंध्या होइ ताकै इहां ऐसा मंगल किये भी सुख न देखिए है पापका उदय देखिए है । परंतु विचार किएतैं ऐसा मंगल तौ सुखका ही कारण है पाप-उदयका कारण नाहीं । ऐसैं पूर्वोक्त मंगलका मंगलपना बनै है । बहुरि वह कहै है कि यह भी मानी परंतु जिनशासनके भक्त देवादिक हैं तिनि तिस मंगल करनेवालेकी सहायता न करी मंगल न करनेवालेको दंड न दीया सो कौन कारन ? ताका समाधान,—

जो जीवनि कै सुख दुख होनेका कारण अपना कर्मका उदय है ताहीकै अनुसारि बाह्य निमित्त बनै है तातैं पापका जाकै उदय होइ ताकै सहायताका निमित्त न बनै है । अर जाकै पुण्यका उदय होइ ताकै दंडका निमित्त न बनै है । यह निमित्त कैसं बनै है सो कहिये है,—

जे देवादिक हैं ते क्षयोपशम ज्ञानतैं सर्वकौं युगपृति जानि सकते नाहीं तातैं मंगल करनेवालेका जानना किसी देवादिककै काहू कालविषै हो है तातैं जो तिनिका जानपना न होइ तौ कैसैं सहाय करै वा दंड दे । अर जानपना होय तब आपके जो अति मंदकषाय होइ तौ सहाय करनेके वा दंड देनेके परिणाम ही न होइ । अर तीव्रकषाय होइ तौ धर्मानुराग होइ सकै नाहीं । बहुरि मध्य कषायरूप तिस कार्य करनेके परिणाम भये अर अपनी शक्ति नाहीं तौ कहा करै ? ऐसैं सहाय करने वा दंड देनेका निमित्त नाही बनै है । जो अपनी शक्ति होय अर आपके धर्मानुरागरूप मध्यकषायका उदयतैं तैसे ही परिणाम होइ अर तिस

समय अन्य जीविका धर्म अधर्मरूप कर्त्तव्य जानै तब कोई देवादिक किसी धर्मात्माकी सहाय करै वा किसी अधर्मीकौ दंड दे है । ऐसै कार्य होनेका किछू नियम तौ है नाहीं । ऐसै समाधान कीया । इहां इतना जानना कि सुख होनेकी दुख होनेकी सहाय करावनेकी दुख घावनेकी जो इच्छा है सो कषायमय है तत्काल विषै वा आगामी कालविषै दुखदायक है । तातैं ऐसी इच्छाकूं छोरि हम तौ एक वीतराग विशेष ज्ञान होनेके अर्थी होइ अरहं-तादिककौ नमस्कारादिरूप मंगल कीया है । ऐसै मंगलाचरण करि अब सार्थक मोक्षमार्गप्रकाश नाम ग्रंथका उद्योत करै हैं । तहां यह ग्रंथ प्रमाण है ऐसी प्रतीति अज्ञानके अर्थि पूर्व अनुसारका स्वरूप निरूपण करै हैं,—

अकारादि अक्षर हैं ते अनादिनिधन हैं काहूके किए नाहीं इनिका आकार लिखना तौ अपनी इच्छाके अनुसारि अनेक प्रकार है परंतु बोलनेमें आवै हैं ते अक्षर तौ सर्वत्र सर्वदा ऐसै ही प्रवर्तैं हैं सोई कहा है,—सिद्धो वर्णसमाम्नायः । याका अर्थ यह जो अक्षरनिका संप्रदाय है सो स्वयंसिद्ध है । बहुरि जिन अक्षरनिकरि निपजे सत्यार्थके प्रकाशक पद तिनके समूहका नाम श्रुत है सो भी अनादिनिधन है । जैसे 'जीव' ऐसा अनादिनिधन पद है सो जीवका जनावनहारा है । ऐसै अपने अपने सत्य अर्थके प्रकाशक अनेक पद तिनका जो समुदाय सो श्रुत जानना । बहुरि जैसे मोती तौ स्वयंसिद्ध हैं तिनविषै कौऊ थोरे मोतीनके कोऊ घने मोतीनके कोऊ किसी प्रकार कोऊ किसी प्रकार गूथिकरि



गहना बनावै है । तैसें पद तौ स्वयंसिद्ध हैं तिनविषै कोऊ थोरे पदनिकों कोऊ घने पदनिकों कोऊ किसीप्रकार कोऊ किसीप्रकार गूथि' ग्रंथ बनावै है यहां में भी तिनि सत्यार्थ पदनिकों मेरी बुद्धि अनुसारि गूथि ग्रंथ बनाऊं हूं सो में मेरी मतिकरि कल्पित झूटे अर्थके सूचक पद याविषै नाहीं गूथूं हूं । तातैं यह ग्रंथ प्रमाण जानना । इहां प्रश्न—जो तिनि पदनिकी परंपराय इस ग्रंथ पर्यंत कैसें प्रवर्तै है—ताका समाधान,—

अनादितैं तीर्थकर केवली होते आये हैं तिनिंकै सर्वका ज्ञान हो है तातैं तिनि पदनिका वा तिनिके अर्थनिका भी ज्ञान हो है । बहुरि तिनि तीर्थकर केवलीनिका जाकरि अन्य जीवनिंकै पदनिका अर्थनिका ज्ञान होय ऐसा दिव्यध्वनिकरि उपदेश हो है । ताके अनुसारि गणधरदेव अंग प्रकीर्णकरूप ग्रंथ गूथै हैं । बहुरि तिनिंकै अनुसारि अन्य आचार्यादिक नाना प्रकार ग्रंथादिककी रचना करै हैं । तिनिंकू केई अभ्यासैं हैं केई कहै हैं केई सुनै हैं ऐसें परंपराय मार्ग चल्या आवै है । सो अब इस भरत-क्षेत्रविषै वर्तमान अवसर्पिणी काल है । तिसविषै चौवीस तीर्थकर भए तिनविषै श्रीवर्द्धमान नामा अंतिम तीर्थकर देव भया । सो केवलज्ञान विराजमान होइ जीवनिंकों दिव्यध्वनिकरि उपदेश देत भया । ताके सुननेका निमित्त पाय गौतम नामा गणधर अगम्य अर्थनिकों भी जानि धर्मानुरागके वशतैं अंग प्रकीर्णकनिकी रचना करता भया । बहुरि वर्द्धमान स्वामी तौ मुक्त भए तहां पीछैं इस पंचम कालविषै तीन केवली भए गौत्तम १,

सुधर्माचार्य २, जंबूस्वामी ३। तहां पीछें कालदोषतैं केवलज्ञानी होनेका तौ अभाव भया। बहुरि केतेक काल ताई द्वादशांगके पाठी श्रुतकेवली रहे पीछें तिनिका भी अभाव भया। बहुरि केतेक काल ताई थोरे अंगनिके पाठी रहे पीछें तिनिका भी अभाव भया। तब आचार्यादिकनिकरि तिनिके अनुसारि बनाए ग्रंथ वा अनुसारी ग्रंथनिके अनुसारि बनाए ग्रंथ तिनिहीकी प्रवृत्ति रही। तिनिविषै कालदोषतैं दृष्टनिकरि कितेक ग्रंथनिकी व्युच्छित्ति भई वा महान् ग्रंथनिका अभ्यासादि न होनेतैं व्युच्छित्ति भई। बहुरि कितेक महान् ग्रंथ पाइए हैं तिनिका बुद्धिकी मंदतातैं अभ्यास होता नाहीं। जैसे दक्षिणमें गोमट्ट-स्वामीके निकटि मूलविद्री नगरविषै धवल महाधवल जयधवल पाइए है। परंतु दर्शन मात्र ही हैं। बहुरि कितेक ग्रंथ अपनी बुद्धिकरि अभ्यास करने योग्य पाइए है। तनि विषै भी कितेक ग्रंथनिका ही अभ्यास बनै है। ऐसैं इस निकृष्ट कालविषै उत्कृष्ट जैनमतका घटना तौ भया परंतु इस परंपरायकरि अब भी जैन शास्त्रविषै सत्य अर्थके प्रकाशनहारे पदनिका सद्भाव प्रवर्तै है। बहुरि हम इस कालविषै इहां अब मनुष्यपर्याय पाया सो इसविषै हमारै पूर्व संस्कारतैं वा भला होनहारतैं जैनशास्त्रनिविषै अभ्यास करनेका उद्यम होत भया। तातैं व्याकरण न्याय गणित आदि उपयोगी ग्रंथनिका किंचित् अभ्यास करि टीकासहित समयसार पंचास्तिकाय प्रवचनसार नियमसार गोमट्टसार लब्धिसार त्रिलोकसार तत्त्वार्थसूत्र इत्यादि शास्त्र अर क्षपणासार पुरुषार्थसिद्धयुपाय अष्टपाहुड आत्मानुशासन आदि शास्त्र अर श्रावक मुनिका आचा-

रके प्ररूपक अनेक शास्त्र अर सुष्टुकथासहित पुराणादि शास्त्र इत्यादि अनेक शास्त्र हैं तिनिविषै हमारै बुद्धि अनुसारि अभ्यास वतै है । तिसकरि हमारै हू किंचित् सत्यार्थ पदनिका ज्ञान भया है । बहुरि इस निकृष्ट समयविषै हम सारिखे मंदबुद्धीनितै भी हीनबुद्धिके धारक घने जन अवलोकिए है । तिनिकों तिनि पदनिके अर्थका ज्ञान होनेके अर्थि धर्मानुरागके वशतै देशभाषा-मय ग्रंथ करनेकी हमारै इच्छा भई है ताकरि हम यह ग्रंथ बनावै हैं सो याविषै भी अर्थसहित तिन ही पदनिका प्रकाशन हो है । इतना तौ विशेष है जैसे प्राकृत संस्कृत शास्त्रनिविषै प्राकृत संस्कृत पद लिखिए है तैसें इहां अपभ्रंश लिए वा यथार्थपनेकूलिए देशभाषारूप पद लिखिए है परंतु अर्थविषै व्यभिचार किछू नाहीं है । ऐसै इस ग्रंथपर्यन्त तिनि सत्यार्थ पदनिकी परंपराय प्रवतै है । इहां कोऊ पूछै कि परंपराय तौ हम ऐसै जानी परन्तु इस परंपरायविषै सत्यार्थ पदनिहीकी रचना होती आई असत्यार्थ पद न मिले ऐसी प्रतीति हमकों कैसें होय । ताका समाधान—

असत्यार्थ पदनिकी रचना अति तीव्र कषाय भए विना बनै नाहीं । जातै जिस असत्य रचनाकरि परंपराय अनेक जीवनिका महाबुरा होय आपकों ऐसी महा हिंसाका फलकरि नर्क निगोद-विषै गमन करना होइ सो ऐसा महाविपरीत कार्य तौ क्रोध मान माया लोभ अत्यन्त तीव्र भए ही होय । सो जैन धर्मविषै तौ ऐसा कषायवान होता नाहीं । प्रथम मूल उपदेशदाता तौ तीर्थकर केवली भये सो तौ सर्वथा मोहके नासतै सर्व कषायनि करि रहित ही हैं । बहुरि ग्रन्थकर्त्ता गणधर वा आचार्य ते मोहका

मन्द उदयकरि सर्व बाह्य अभ्यन्तर परिग्रहकौं त्यागि महा मंद-  
 कषायी भए हैं, तिनिकै तिस मंदकषायकरि किंचित् शुभोपयोग-  
 हीकी प्रवृत्ति पाइए है और किछू प्रयोजन है नाहीं । बहुरि  
 श्रद्धानी गृहस्थ भी कोऊ ग्रन्थ बनावै है सो भी तीव्रकषायी  
 नाहीं है जो वाकै तीव्रकषाय होय तौ सर्वकषायनिका जिस तिस  
 प्रकार नाश करणहारा जो जिनधर्म तिसविषै रुचि कैसैं होय  
 अथवा जो मोहके उदयतैं अन्य कार्यनिकरि कषाय पोषै है तौ  
 पोषौ परन्तु जिनआज्ञा भंगकरि अपना कषाय पोषै तौ जैनीपना  
 रहता नाहीं ऐसैं जिनधर्मविषै ऐसा तीव्रकषायी कोऊ होता  
 नाहीं जो असत्य पदनिकी रचनाकरि परका अर अपना पर्याय  
 पर्यायविषै बुरा करै । इहां प्रश्न,—जो कोऊ जैनाभास तीव्रकषायी  
 होय असत्यार्थ पदनिकौं जैन शास्त्रनिविषै मिलावै पीछैं ताकी  
 परंपरा चली जाय तौ कहा करिये । ताका समाधान —

जैसैं कोऊ सांचे मोतीनिके गहनेविषै झूठे मोती मिलावै  
 परंतु झलक मिलै नाहीं तातैं परीक्षाकरि पारखी ठिगावै भी नाहीं  
 कोई भोला होय सो ही मोती नामकरि ठिगावै है । बहुरि ताकी  
 परंपरा भी चलै नाहीं शीघ्र ही कोऊ झूठे मोतीनिका निषेध करै  
 है । तैसैं कोऊ सत्यार्थ पदनिके समूहरूप जैनशास्त्रनिविषै  
 असत्यार्थ पद मिलावै परंतु जिनशास्त्रके पदनिविषै तौ कषाय  
 मिटावनेका वा लौकिककार्य घटावनेका प्रयोजन है अर उस  
 पापीनै जे असत्यार्थ पद मिलाए हैं तिनिविषै कषाय पोषनेका  
 वा लौकिक कार्य साधनेका प्रयोजन है ऐसैं प्रयोजन मिलता  
 नाहीं तातैं परीक्षाकरि ज्ञानी ठिगावते भी नाहीं कोई मूर्ख होय

सो ही जैनशास्त्र नामकरि ठिगावै है बहुरि ताकी परंपरा भी चालै नाहीं शीघ्र ही कोऊ तिनि असत्यार्थ पदनिका निषेध करै है । बहुरि ऐसे तीव्रकषायी जैनाभास इहां इस निकृष्ट कालविषै ही होय हैं उत्कृष्ट क्षेत्र काल बहुत हैं तिस विषै तौ ऐसे होते नाहीं । तातैं जैनशास्त्रनिविषै असत्यार्थ पदनिकी परंपरा चलै नाहीं ऐसा निश्चय करना । बहुरि वह कहै है कि कषायनिकरि तौ असत्यार्थ पद न मिलावै परंतु ग्रन्थ करनेवालैकै क्षयोपशम ज्ञान है तातैं कोई अन्यथा अर्थ भासै ताकरि असत्यार्थ पद मिलावै ताकी तौ परंपरा चलै; ताका समाधान,—

मूल ग्रंथकर्ता तौ गणधरदेव हैं ते आप च्यारिज्ञानके धारक हैं अर साक्षात् केवलीका दिव्यध्वनिउपदेश सुनै हैं ताका अति-शयकरि सत्यार्थ ही भासै है । अर ताहीके अनुसारि ग्रन्थ बनावै हैं । सो उन ग्रन्थनिविषै तौ असत्यार्थ पद कैसें गूथे जाय अर अन्य आचार्यादिक ग्रन्थ बनावै हैं ते भी यथायोग्य सम्यग्ज्ञानके धारक हैं । बहुरि ते तिनि मूल ग्रन्थनिका परंपराकरि ग्रन्थ बनावै हैं । बहुरि जिन पदनिका आपकों ज्ञान न होइ तिनकी तौ आप रचना करै नाहीं अर जिन पदनिका ज्ञान होय तिनिकौं सम्यग्ज्ञान प्रमाणतैं ठीक गूथै है सो प्रथम तौ ऐसी सावधानीविषै असत्यार्थ पद गूथे जाय नाहीं, अर कदाचित् आपकों पूर्व ग्रन्थनिके पदनिका अर्थ अन्यथा ही भासै अर अपने प्रमाणतामैं भी तैसें ही आय जाय तौ याका किछू सारा नहीं । परंतु ऐसें कोईकौं भासै सबहीकौं तौ न भासै । तातैं जिनकौं सत्यार्थ भास्या होय

ते ताका निषेधकरि परंपरा चलने देते नाहीं । बहुरि इतना जानना जिनकाँ अन्यथा जाने जीवका बुरा होय ऐसा देव गुरु धर्मादिक वा जीवादिक तत्त्वनिकाँ तौ श्रद्धानी जैनी अन्यथा जानै ही नाहीं इनिका तौ जेनशास्त्रनिविषै प्रसिद्ध कथन है अर जिनिकाँ भ्रमकरि अन्यथा जाने भी जिनकी आज्ञा माननेतैं जीवका बुरा न होय ऐसा कोई सूक्ष्म अर्थ हो तिनिविषै किसीकाँ कोई अर्थ अन्यथा प्रमाणतामें ल्यावै तौ भी ताका विशेष दोष नाहीं सो गोमट्टसारविषै कह्या है,—

**सम्माइट्टी जीवो उवइट्टं पवयणं तु सहहदि ।**

**सहहदि असब्भावं अजाणमाणो गुरुणियोगा ॥१॥**

याका अर्थ—सम्यग्दृष्टी जीव उपदेश्या सत्य प्रवचनकाँ श्रद्धान करै है अर अजाणमाण गुरुके नियोगतैं असत्यकाँ भी श्रद्धान करै है ऐसा कह्या है । बहुरि हमारै भी विशेष ज्ञान नाहीं है । अर जिनआज्ञा भंग करनेका बहुत भय है परन्तु इसही विचारके बलतैं ग्रन्थ करनेका साहस करते हैं सो इस ग्रंथविषै जैसेँ पूर्व ग्रन्थनिमें वर्नन है तैसेँ ही वर्नन करैंगे । अथवा कहीं पूर्व ग्रन्थ-निविषै सामान्य गूढ़ वर्नन है ताका विशेष प्रगटकरि वर्नन इहां करैंगे सो ऐसेँ वर्नन करनेविषै में तौ बहुत सावधानी राखूंगा अर सावधानी करते भी कहीं सूक्ष्म अर्थका अन्यथा वर्नन होय जाय तौ विशेष बुद्धिमान् होय सो सँवारिकरि शुद्ध करियौ । यह मेरी प्रार्थना है । ऐसेँ शास्त्र करनेका निश्चय किया है । अब इहां कैसेँ शास्त्र बांचने सुनने योग्य हैं अर तिनि शास्त्रनिके वक्ता श्रोता कैसेँ चाहिए सो वर्नन करिए है ।

जे शास्त्र मोक्षमार्गका प्रकाश करै तेई शास्त्र बांचने सुनने योग्य हैं जातैं जीव संसारविषै नाना दुःखनिकरि पीड़ित है। सो शास्त्ररूपी दीपककरि मोक्षमार्गकौं पावै तौ उस मार्गविषै आप गमनकरि उन दुःखनितैं मुक्त होइ सो मोक्षमार्ग एक वीतरागभाव है तातैं जिन शास्त्रनिविषै काहूप्रकार रागद्वेष मोह भावनिका निषेध करि वीतरागभावका प्रयोजन प्रगट किया होय तिनहीं शास्त्रनिका बांचना सुनना उचित है। बहुरि जिन शास्त्रनिविषै शृंगार भोग कौतूहलादिक पोषि रागभावका अर हिंसायुद्धादिक पोषि द्वेषभावका अर अतत्त्वश्रद्धान पोषि मोहभावका प्रयोजन प्रगट किया होय ते शास्त्र नाहीं शस्त्र हैं। जातैं जिन राग द्वेष मोह भावनिकरि जीव अनादितैं दुखी भया तिनकी वासना जीवकै विना सिखाई ही थी। बहुरि इन शास्त्रनिकरि तिनहींका पोषण किया भले होनेकी कहा शिक्षा दीनी। जीवका स्वभाव घात ही किया तातैं ऐसे शास्त्रनिका बांचना सुनना उचित नाहीं है। इहां बांचना सुनना जैसे कह्या तैसैं ही जोड़ना सीखना सिखावना विचारना लिखावना आदि कार्य भी उपलक्षणकरि जानि लेनें। ऐसैं साक्षात् वा परंपरायकरि वीतरागभावकौं पोषै ऐसे शास्त्र ही अभ्यास करने योग्य हैं।

अब इनिके वक्ताका स्वरूप कहिये है। प्रथम तौ वक्ता कैसा चाहिए जो जैन श्रद्धानविषै दृढ़ होय जातैं जो आप अश्रद्धानी होय तौ औरकौं श्रद्धानी कैसें करै। श्रोता तौ आपहीतैं हीनबुद्धिके धारक हैं तिनिकौं कोऊ युक्तिकरि श्रद्धानी कैसें करै। अर श्रद्धान ही सर्व धर्मका मूल है। बहुरि वक्ता कैसा चाहिए जाकै विद्याभ्यास करनेतैं शास्त्र बांचनेयोग्य बुद्धि प्रगट भई होय

जातें ऐसी शक्ति विना वक्तापनेका अधिकारी कैसें होय । बहुरि वक्ता कैसा चाहिए जो सम्यग्ज्ञानकरि सर्व प्रकारके व्यवहार निश्चयादिरूप व्याख्यानका अभिप्राय पिछानता होय जातें जो ऐसा न होय तौ कहीं अन्य प्रयोजन लिए व्याख्यान होय ताका अन्य प्रयोजन प्रगटकरि विपरीत प्रवृत्ति करावै । बहुरि वक्ता कैसा चाहिये जाकै जिनआज्ञा भंग करनेका बहुत भय होय । जातें जो ऐसा न होय तौ कोई अभिप्राय विचारि सूत्रविरुद्ध उपदेश देय जीवनिका बुरा करै । सो ही कह्या है—

**बहुगुणविज्ञाणिलयो असुत्तभासी तहावि मुत्तव्वो ।**

**जह वरमणिजुत्तो वि हु विग्घयरो विसहरो लोए ॥१॥**

याका अर्थ—जो बहुत क्षमादिक गुण अर व्याकरण आदि विद्याका स्थान है तथापि उत्सूत्रभाषी है तौ छोड़ने योग्य ही है जैसें उत्कृष्टमणिसंयुक्त है तौ भी सर्प है सो लोकविषै विघ्नका ही करणहारा है । बहुरि वक्ता कैसा चाहिए जाकै शास्त्र बांचि आजीवका आदि लौकिक कार्य साधनेकी इच्छा न होय । जातें जो आशावान् होय तौ यथार्थ उपदेश देय सकै नाहीं वाकै तौ किछू श्रोतानिका अभिप्रायके अनुसारि व्याख्यानकरि अपने प्रयोजन साधनेका ही साधन रहै अर श्रोतानितैं वक्ताका पद ऊंचा है परंतु वक्ता लोभी होय तौ वक्ता आधीन हो जाय श्रोता ऊंचे होंय । बहुरि वक्ता कैसा चाहिए जाकै तीव्र क्रोध मान न होय जातें तीव्र क्रोधी मानीकी निंदा होय श्रोता तिसतैं उरते रहैं तब तिसतैं अपना हित कैसें करै । बहुरि वक्ता कैसा चाहिए जो आप ही नाना प्रश्न उठाय आप ही उत्तर करै अथवा अन्य जीव



अनेक प्रकारकरि बहुत विचारि प्रश्न करै तौ मिष्टवचनकरि जैसे उनका संदेह दूरि होय तैसें समाधान करै । जातैं जो आपकै उत्तर देनेकी सामर्थ्य न होय तौ या कहै याका मोकों ज्ञान नाही जातैं जो ऐसा न होय तौ श्रोतानिका संदेह दूरि न होय तब कल्याण कैसें होय अर जिनमतकी प्रभावना होय सकै नाही । बहुरि वक्ता कैसा चाहिए जाकै अनीतिरूप लोकनिघ कार्यनिकी प्रवृत्ति न होय जातैं लोकनिघ कार्यनिकरि हास्यका स्थान होय जाय तब ताका वचन कौन प्रमाण करै जिनधर्मकों लजावै । बहुरि वक्ता कैसा चाहिए जाका कुल हीन न होय अंगहीन न होय स्वरभंग न होय मिष्टवचन होय प्रभुत्व होय तातैं लोकविषै मान्य होय जातैं ऐसा न होय तौ ताकों वक्तापनाकी महंतता सोभै नाही ऐसा वक्ता होय । वक्ताविषै ये गुण तौ अवश्य चाहिए मो ही आत्मानुशासनविषै कब्या है ।

**प्राज्ञः प्राप्तसमस्तशास्त्रहृदयः प्रव्यक्तलोकस्थितिः**

**प्रास्ताशः प्रतिभापरः प्रशमवान् प्रागेव दृष्टोत्तरः ।**

**प्रायः प्रश्नसहः प्रभुः परमनोहारी परानिन्दया**

**ब्रूयाद्धर्मकथां गणी गुणनिधिः प्रस्पष्टमिष्टाक्षरः ॥ १ ॥**

याका अर्थ—बुद्धिमान होय, जानै समस्त शास्त्रनिका रहस्य पाया होय, लोकमर्यादा जाकै प्रगट भई होय, आशा जाकै अस्त भई होय, कांतिमान् होय, उपशमी होय, प्रश्न किए पहले ही जानै उत्तर देख्या होय, बाहुल्यपनै प्रश्ननिका सहनहारा होय, प्रभु होय, परकी वा परकरि आपकी निन्दारहितपनाकरि परके मनका हरनहारा होय, गुणनिधान होय, स्पष्ट मिष्ट जाके वचन होय, ऐसा सभाका नायक

धर्मकथा कहै । बहुरि वक्ताका विशेष लक्षण ऐसा है जो याकै व्याकरण न्यायादिक वा बड़े बड़े जैनशास्त्रनिका विशेष ज्ञान होय तौ विशेषपनै ताकाँ वक्तापनौ सोभै । बहुरि ऐसा भी होय अर अध्यात्मरसकरि यथार्थ अपने स्वरूपका अनुभवन जाकै न भया होय सो जिनधर्मका मर्म जानै नाहीं पद्धतिहीकरि वक्ता होय है । अध्यात्मरसमय सांचा जिनधर्मका स्वरूप वाकरि कैसै प्रगट किया जाय तातै आत्मज्ञानी होय तौ सांचा वक्तापनौ होय जातै प्रवचनसारविषै ऐसा कह्या है । आगमज्ञान तत्त्वार्थश्रद्धान संयम-भाव ये तीनों आत्मज्ञानकरि शून्य कार्यकारी नाहीं । बहुरि दोहा-पाहुडविषै ऐसा कह्या है—

पंडिय पंडिय पंडिय कण छोडि वितुस कंडिया ।

पय अत्थं तुडोसि परमत्थ ण जाणइ मूढोसि ॥ १ ॥

याका अर्थ । हे पांडे हे पांडे हे पांडे तैं कणछोडि तुस ही खोटे है नू अर्थ अर शब्दविषै संतुष्ट है परमार्थ न जानै है तातैं मूर्ख ही है ऐसा कह्या है अर चौदह विद्यानिविषै भी पहलै अध्यात्मविद्या प्रधान कही है तातैं अध्यात्मरसका रसिया वक्ता है सो जिनध-<sup>रसि</sup>र्मके रहस्यका वक्ता जानना । बहुरि जे बुद्धिबुद्धिके धारक हैं अवधिमनःपर्यय केवलज्ञानके धनी वक्ता हैं ते महावक्ता जानने । ऐसैं वक्तानिके विशेष गुण जानने । सो इन विशेष गुणनिका धारी वक्ताका संयोग मिलै तौ बहुत ही भला है अर न मिलै तौ श्रद्धानादिक गुणनिके धारी वक्तानिहीके मुखतैं शास्त्र सुनना । याप्रकार गुणके धारी मुनि वा श्रावक तिनिके मुखतैं तौ शास्त्र सुनना योग्य है अर पद्धतिबुद्धिकरि वा शास्त्र सुननेके

लोभकरि श्रद्धानादि गुणरहित पापी पुरुषनिके मुखतै शास्त्र सुनना उचित नाही । उक्तं च—

तं जिणआणपरेण धम्मो सो यच्च सुगुरुपासम्मि ।

अह उचिओ सद्धाओ तस्सुवएसस्सकहगाओ ॥ १ ॥

याका अर्थ—जो जिन आज्ञा माननेविषै सावधान है ता करि निर्ग्रन्थ सुगुरुहीके निकटि धर्म सुनना योग्य है अथवा तिस सुगुरुहीके उपदेशका कहनहारा उचित श्रद्धानी श्रावक तातै धर्म सुनना योग्य है । ऐसा जो वक्ता धर्मबुद्धिकरि उपदेशदाता होइ सो ही अपना अर अन्य जीवनिका भला करै है । अर जो कपायबुद्धिकरि उपदेश दे है सो अपना अर अन्य जीवनिका बुरा करै है ऐसा जानना । ऐसै वक्ताका स्वरूप कह्या अब श्रोताका स्वरूप कहै हैं—

भला होनहार है तातै जिस जीवकै ऐसा विचार आवै में कौन हौं मेरा कहा स्वरूप है यह चरित्र कैसें बनि रह्या है ए मेरै भाव हो हैं तिनिका कहा फल लागैगा जीव दुखी हो रहा है सो दुःख दूरि होनेका कहा उपाय है मुझका इतनी बातनिका ठीककरि किछू मेरा हित हो सो करना ऐसा विचारतै उद्यमवंत भया है । बहुरि इस कार्यकी सिद्धि शास्त्र सुननेतै होती जानि अतिप्रीतिकरि शास्त्र सुनै है किछू पूछना होइ सो पूछै है बहुरि गुरुनिकरि कह्या अर्थकाँ अपने अंतरंगविषै बारंबार विचारै है बहुरि अपने विचारतै सत्य अर्थनिका निश्चयकरि जो कर्तव्य होय ताका उद्यमी होय है ऐसा तौ नवीन श्रोताका स्वरूप जानना । बहुरि जैनधर्मके गाढ़े श्रद्धानी हैं अर नाना शास्त्र

सुननेकरि जिनकी बुद्धि निर्मल भई है बहुरि व्यवहार निश्चयादिकका स्वरूप नीकै जानि जिस अर्थकौ सुनै हैं ताकौ यथावत् निश्चय जानि अवधारै हैं । बहुरि जब प्रश्न उपजै है तब अति विनयवान होय प्रश्न करै हैं अथवा परस्पर अनेक प्रश्नोत्तरकरि वस्तुका निर्णय करै हैं शास्त्राभ्यासविषै अति आसक्त हैं धर्म-बुद्धिकरि निचकार्यनिके त्यागी भए हैं ऐसे शास्त्रनिके श्रोता चाहिए । बहुरि श्रोतानिके विशेष लक्षण ऐसे हैं । जाकै-किछू व्याकरण न्यायादिकका वा बड़े जैन शास्त्रनिका ज्ञान होइ तौ श्रोतापनौ विशेष सोभै है । बहुरि ऐसा भी श्रोता है अर वाकै आत्मज्ञान न भया होय तौ उपदेशका मरम समझि सकै नाहीं ताँतें आत्मज्ञानकरि जो स्वरूपका आस्वादी भया है सो जिनधर्मके रहस्यका श्रोता है । बहुरि जो अतिशयवंत बुद्धिकरि वा अवधिमनःपर्ययकरि संयुक्त होय तौ वह महान् श्रोता जानना । ऐसैं श्रोतानिके विशेष गुण हैं । ऐसे जिनशास्त्रनिके श्रोता चाहिए । बहुरि शास्त्र सुननेतैं हमारा भला होगा ऐसी बुद्धिकरि जो शास्त्र सुनै है परन्तु ज्ञानकी मन्दताकरि विशेष समझै नाहीं तिनिकै पुण्यबन्ध हो है । कार्य सिद्ध होता नाहीं । बहुरि जे कुलवृत्तिकरि वा सहज योग बननेकरि शास्त्र सुनै हैं वा सुनै तौ हैं परन्तु किछू अवधारण करते नाहीं तिनिकै परिणाम अनुसारि कदाचित् पुण्यबन्ध हो है । कदाचित् पापबन्ध हो है । बहुरि जे मद मत्सर भावकरि शास्त्र सुनै है वाद तर्क करनेहीका जिनिका अभिप्राय है । बहुरि जे मेहंतताकै अर्थि वा किसी लोभादिकका प्रयोजनके अर्थि शास्त्र सुनै है । बहुरि

जो शास्त्र तौ सुनै है परंतु सुहावता नाहीं ऐसे श्रोतानिके केवल पापबन्ध ही हो है । ऐसा श्रोतानिका स्वरूप जानना । ऐसैं ही यथासंभव सीखना सिखावना आदि जिनिकै पाइए तिनिका भी स्वरूप जानना । या प्रकार शास्त्रका अर वक्ता श्रोताका स्वरूप कछा सो उचित शास्त्रकौं उचित वक्ता होय बांचना उचित श्रोता होय सुनना योग्य है । अब यह मोक्षमार्गप्रकाश नाम शास्त्र रचिए है ताका सार्थकपना दिखाइए है—

इस संसार अटवीविषे समस्त जीव हैं ते कर्मनिमित्ततैं निपजे जे नानाप्रकार दुःख तिनकरि पीड़ित हो रहे हैं । बहुरि तहां मिथ्या अन्धकार व्याप्त होय रहा है । ताकरि तहांतैं मुक्त होनेका मार्ग पावते नाहीं तड़फि तड़फि तहां ही दुःखकौं सहैं हैं । बहुरि ऐसे जीवनिका भला होनेकौं कारण तीर्थकर केवली भगवान् सो ही भया सूर्य ताका भया उदय ताकी दिव्यध्वनिरूपी किरणनिकरि तहांतैं मुक्तहोनेका मार्ग प्रकाशित किया जैसे सूर्यकै ऐसी इच्छा नाहीं जो मैं मार्ग प्रकाशूं परंतु सहज ही वाकी किरण फैलै हैं ताकरि मार्गका प्रकाशन हो है तैसैं ही केवली वीतराग है तातैं ताकै ऐसी इच्छा नाहीं जो हम मोक्षमार्ग प्रगट करैं परंतु सहज ही अघातिकर्मनिका उदयकरि तिनिका शरीररूप पुद्गल दिव्यध्वनिरूप परिणमै है ताकरि मोक्षमार्गका प्रकाशन हो है । बहुरि गणधर देवनिकै यहु विचार आया जहां केवली सूर्यका अस्तपना होइ तहां जीव मोक्षमार्गकौं कैसें पावै अर मोक्षमार्ग पाए विना जीव दुःख सहेंगे ऐसी करुणाबुद्धिकरि अंग प्रकीर्णकादिरूप ग्रन्थ तेई भए महान् दीपक तिनिका उद्योत किया ।

बहुरि जैसे दीपकरि दीपक जोवनेतैं दीपकनिकी परंपरा प्रवर्तैं तैसें आचार्यादिकनिकरि तिन ग्रन्थनितैं अन्य ग्रंथ बनाए । बहुरि तिनिहूतैं किनिहू अन्य ग्रन्थ बनाए ऐसे ग्रन्थनितैं ग्रन्थ होनेतैं । ग्रन्थनिकी परंपरा वर्तैं है । मैं भी पूर्वग्रन्थनितैं इस ग्रन्थकौं बनाऊं हूं । बहुरि जैसें सूर्य वा सर्व दीपक हैं ते मार्गकौं एकरूप ही प्रकाशैं हैं तैसें दिव्यध्वनि वा सर्व ग्रंथ हैं ते मोक्षमार्गकौं एकरूप ही प्रकाशैं हैं । सो यह भी ग्रन्थ मोक्षमार्गकौं प्रकाशैं है । बहुरि जैसें प्रकाशे भी नेत्ररहित वा नेत्रविकार सहित पुरुष हैं तिनिकूं मार्ग सूझता नाही तौ दीपककै तौ मार्गप्रकाशकपनेका अभाव भया नाही तैसें प्रगट कीए भी जे मनु<sup>ष्य</sup> ज्ञान रहित हैं वा मिथ्यात्वादि विकारसहित हैं तिनिकूं मोक्षमार्ग सूझता नाही तौ ग्रन्थकै तौ मोक्षमार्गप्रकाशकपनेका अभाव भया नाही । ऐसें इस ग्रन्थका मोक्षमार्गप्रकाशक ऐसा नाम सार्थक जानना । इहां प्रश्न जो मोक्षमार्गके प्रकाशक पूर्व ग्रन्थ तौ थे ही तुम नवीन ग्रन्थ काहे कौं बनावो हौ । ताका समाधान—

जैसें बड़े दीपकनिका तौ उद्योत बहुत तैलादिकका साधनतैं रहै है जिनिकै बहुत तैलादिककी शक्ति न होइ तिनिकौं स्तोक दीपक जोइ दीजिये तौ वै उसका साधन राखि ताके उद्योततैं अपना कार्य करैं तैसें बड़े ग्रन्थनिका तौ प्रकाश बहुत ज्ञानादिकका साधनतैं रहै है जिनिकै बहुत ज्ञानादिककी शक्ति नाही तिनिकूं स्तोक ग्रन्थ बनाय दीजिये तौ वै वाका साधन राखि ताके प्रकाशतैं अपना कार्य करैं । तातैं यह स्तोक सुगम ग्रन्थ बनाइए है ।

बहुरि इहां जो मैं यह ग्रन्थ बनाऊं हूं सो कषायनितैं अपना मान बधावनेकों वा लोभ साधनेकों वा यश होनेकों वा अपनी पद्धति राखनेकों नाहीं बनावौं हौं । जिनिंकै व्याकरण न्यायादिकका वा नयप्रमाणादिकका वा विशेष अर्थनिका ज्ञान नाहीं तातैं तिनिंकै बड़े ग्रन्थनिका अभ्यास तौ बनिसकै नाहीं । बहुरि कोई छोटे ग्रन्थनिका अभ्यास बनै तौ भी यथार्थ अर्थ भासै नाहीं । ऐसैं इस समयविषै मंदज्ञानवान् जीव बहुत देखिए है तिनिंका भला होनेके अर्थ धर्मबुद्धितैं यह भाषामय ग्रन्थ बनावौं हौं, बहुरि जैसें बड़े दरिद्रीकों अवलोकनमात्र चिन्तामणिकी प्राप्ति होइ अर वही न अवलोकै बहुरि जैसें कोईकू अमृत पान करावै अर वह न करै तैसें संसारपीड़ित जीवकों सुगम मोक्षमार्गके उपदेशका निमित्त बनै अर वह अभ्यास न करै तौ वाके अभाग्यकी महिमा कौन करिसकै । वाका होनहारहीकों विचारे अपने समता आवै ।  
उक्तं च—

साहीणे गुरुजोगे जे ण सुणंतीह धम्मवयणाई ।

ते धिद्धदुट्टचित्ता अह सुहडा भवभयविहूणा ॥ १ ॥

स्वाधीन उपदेशदाता गुरुका योग जुड़ें भी जे जीव धम्म वचननिकों नाहीं सुनैं हैं ते धीठ हैं अर उनका दुष्टचित्त है अथवा जिस संसारभयतैं तीर्थंकरादिक डरे तिससंसार भयतैं रहित हैं ते बड़े सुभट हैं । बहुरि प्रवचनसारविषै भी मोक्षमार्गका अधिकार किया तहां प्रथम आगमज्ञान ही उपादेय कब्जा सो इस जीवका तौ मुख्य कर्तव्य आगमज्ञान है । याकों होतै तत्त्वनिका श्रद्धान हो है तत्त्वनिका श्रद्धान भए संयमभाव हो है

अर तिस आगमतैं आत्मज्ञानकी भी प्राप्ति हो है तब सहज ही मोक्षकी प्राप्ति हो है । बहुरि धर्मके अनेक अंग हैं तिनिविषै एक ध्यान विना यातैं ऊंचा और धर्मका अंग नाहीं है तातैं जिसतिसप्रकार आगम अभ्यास करना योग्य है । बहुरि इस ग्रन्थका तौ बांचना सुनना विचारना घना सुगम है कोऊ व्याकरणादिकका भी साधन न चाहिए तातैं अवश्य याका अभ्यासविषै प्रवर्तौ तुम्हारा कल्याण होइगा ।

इति श्रीमोक्षमार्गप्रकाशक नाम शास्त्रविषै पीठबन्ध-  
प्ररूपक प्रथम अधिकार समाप्त भया ॥ १ ॥

दोहा ।

मिथ्याभाव अभावतैं, जो प्रगटै निजभाव ॥

सो जयवंत रहौ सदा, यह ही मोक्षउपाव ॥ १ ॥

अब इस शास्त्रविषै मोक्षमार्गका प्रकाश करिए है । तहां बन्धनतैं छूटनेका नाम मोक्ष है । सो इस आत्माके कर्मका बन्धन है तिस बन्धनकरि आत्मा दुखी होय रखा है । बहुरि याकै दुःख दूरि करनेहीका निरंतर उपाय भी रहै है परंतु सांचा उपाय पाए विना दुःख दूरि होता नाहीं अर दुःख सब्हा भी जाता नाहीं तातैं यह जीव व्याकुल होय रखा है ऐसे जीवकों समस्त दुःखका मूल कारन कर्मबन्धन है ताका अभावरूप मोक्ष है सोई परम हित है । बहुरि याका सांचा उपाय करना सो ही कर्त्तव्य है तातैं इसहीका याकौ उपदेश दीजिए है । तहां जैसे वैद्य है सो रोगसहित मनुष्यकों प्रथम तौ रोगका निदान बतावै ।



ऐसैं यह रोग भया है । बहुरि उस रोगके निमित्ततैं वाकै जो जो अवस्था होती होइ सो बतावै ताकरि वाकै निश्चय होइ जो मेरै ऐसा ही रोग है । बहुरि तिस रोगके दूरि करनेका उपाय अनेक प्रकार बतावै अर तिस उपायकी प्रतीति अनावै । इतना तौ वैद्यका बतावना है बहुरि जो वह रोगी ताका साधन करै तौ रोगतैं मुक्त होय अपना स्वभावरूप प्रवर्तै सो यह रोगीका कर्तव्य है । तैसैं ही इहां कर्मबन्धनयुक्त जीवकौं प्रथम तौ कर्मबन्धनका निदान बताइए है ऐसैं यह कर्मबन्धन भया है । बहुरि उस कर्मबन्धनके निमित्ततैं याकै जो जो अवस्था होती है सो बताइए है । ताकरि जीवकै निश्चय होइ जो मेरै ऐसैं ही कर्मबन्धन है । बहुरि तिस कर्मबन्धनके दूरि होनेका उपाय अनेक प्रकार बताइए है अर तिस उपायकी याकौं प्रतीति अनाइए है इतना तौ शास्त्रका उपदेश है । बहुरि यह जीव ताका साधन करै तौ कर्मबन्धनतैं मुक्त होइ अपना स्वभावरूप प्रवर्तै सो यह जीवका कर्तव्य है सो इहां प्रथम ही कर्मबन्धनका निदान बताइए है । बहुरि कर्मबन्धन होनेतैं नाना उपाधिक भावनिविषै परिभ्रमणपनौं पाइए है एक रूप रहनौं न हो है तातैं कर्मबन्धनसहित अवस्थाका नाम संसार अवस्था है । सो इस संसार अवस्थाविषै अनन्तानन्त जीव हैं ते अनादिहीतैं कर्मबन्धन सहित हैं ऐसा नाहीं है जो जीव पहले न्यारा था अर कर्म न्यारा था पीछैं इनिका संयोग भया । तौ कैसें है—जैसैं मेरुगिरि आदि अकृत्रिम स्कंधनिविषै अनन्ते पुद्गलपरमाणु अनादितैं एक बन्धनरूप हैं । पीछैं तिनमैं केई परमाणु भिन्न हो हैं

केई नए मिलै हैं । ऐसै मिलना बिछुरना हुवा करै है । तैसै इस संसारविषै एक जीव द्रव्य अर अनन्ते कर्मरूप पुद्गलपरमाणु तिनिका अनादितै एक बंधनरूप है पीछै तिनिमै केई कर्म-परमाणु भिन्न हो हैं ऐसै मिलना बिछुरना हुवा करै है । बहुरि इहां प्रश्न—जो पुद्गलपरमाणु तौ रागादिकके निमित्ततै कर्मरूप हो हैं अनादि कर्मरूप कैसै हैं ? ताका समाधान—

निमित्त तौ नवीन कार्य होय तिसविषै ही संभवै है । अनादि अवस्थाविषै निमित्तका किल्ल प्रयोजन नाही । जैसै नवीन पुद्गल-परमाणुनिका बंधान तौ खिग्ध रूक्ष गुणके अंशनकरि ही हो है अर मेरुगिरि आदि स्कन्धनिविषै अनादि पुद्गलपरमाणुनिका-बन्धान है तहां निमित्तका कहा प्रयोजन है । तैसै नवीन परमाणुनिका कर्मरूप होना तौ रागादिकनि ही करि हो है अर अनादि पुद्गलपरमाणुनिका कर्मरूप ही अवस्था है । तहां निमित्तका कहा प्रयोजन है ? बहुरि जो अनादिविषै भी निमित्त मानिए तौ अनादिपना रहै नाही । तातै कर्मका सम्बन्ध अनादि मानना । सो तत्त्वप्रदीपिका प्रवचनसार शास्त्रकी व्याख्याविषै जो सामान्यज्ञे-याधिकार है तहां कब्बा है । रागादिकका कारण तौ द्रव्य कर्म है, अर द्रव्यकर्मका कारण रागादिक है । तब उहां तर्क करी जो ऐसै इतरेतराश्रयदोष लागै वह वाकै आश्रय वह वाकै आश्रय कहीं थंभाव नाही है, तब उत्तर ऐसा दिया है—

नैवं अनादिप्रसिद्धद्रव्यकर्मसम्बन्धस्य तत्र हेतुत्वेनो-  
पादानात् ।

याका अर्थ—ऐसै इतरेतराश्रय दोष नाही है । जातै अनादिका

स्वयंसिद्ध द्रव्यकर्मका संबंध है ताका तहां कारणपनाकरि ग्रहण किया है। ऐसैं आगममें कखा है। बहुरि युक्तितैं भी ऐसैं ही संभवै है जो कर्मनिमित्त विना पहले जीवकै रागादिक कहिए तौ रागादिक जीवका निज स्वभाव होय जाय जातैं पर-निमित्त विना होइ ताहीका नाम स्वभाव है। तातैं कर्मका संबंध अनादि ही मानना। बहुरि इहां प्रश्न जो न्यारे न्यारे द्रव्य अर अनादितैं तिनिका संबंध कैसें संभवै। ताका समाधान,—

जैसें ठेठिहीसूं जल दूधका वा सोना किट्टिकका वा तुष कणका वा तैल तिलका संबंध देखिए है नवीन इनिका मिलाप भया नाही तैसें अनादिहीसौं जीवकर्मका संबंध जानना नवीन इनिका मिलाप नाही भया। बहुरि तुम कही कैसें संभवै ? अना-दितैं जैसें केई जुदे द्रव्य हैं तैसें केई मिले द्रव्य हैं इस संभवने-विषै किछू विरोध तौ भासता नाही। बहुरि प्रश्न जो संबंध वा संयोग कहना तौ तब संभवै जब पहले जुदे होइ पीछै मिलैं। इहां अनादि मिले जीव कर्मनिका संबंध कैसें कखा है। ताका समाधान—

अनादितैं तौ मिले थे परंतु पीछैं जुदे भए तब जान्या जुदे थे तौ जुदे भए। तातैं पहले भी भिन्न ही थे। ऐसैं अनुमानकरि वा केवलज्ञानकरि प्रत्यक्ष भिन्न भासै हैं। तिसकरि तिनिका बंधान होतैं भिन्नपणा पाइए है। बहुरि तिस भिन्नताकी अपेक्षा तिनिका संबंध वा संयोग कखा है जातैं नए मिलौ वा मिले ही होहु भिन्न द्रव्यनिका मिलापविषै ऐसैं ही कहना संभवै है। ऐसैं इनि जीव-निका अर कर्मका अनादिसंबंध है। तहां जीव द्रव्य तौ देखने

जाननेरूप चैतन्यगुणका धारक है । अर इन्द्रियगम्य न होने योग्य अमूर्त्तिक है । संकोचविस्तारशक्तिकों लिए असंख्यातप्रदेशी एकद्रव्य है । बहुरि कर्म है सो चेतनागुणरहित जड़ है अर मूर्त्तिक है अनंत पुद्गल परमाणूनिका पुंज है । ताँतें एक द्रव्य नाहीं है । ऐसैं ए जीव अर कर्म हैं सो इनिका अनादिसंबंध है तौ भी जीवका कोई प्रदेश कर्मरूप न हो है अर कर्मका कोई परमाणु जीवरूप न हो है । अपने अपने लक्षणकों धरें जुदे जुदे ही रहैं हैं । जैसे सोना रूपाका एक स्कंध होइ तथापि पीतादि गुणनिकों धरें सोना जुदा रहै है खेततादि गुणनिकों धरें रूपा जुदा रहै है, तैसें जुदे जानने । इहां प्रश्न—जो मूर्त्तिक मूर्त्तिकका तौ बंधान होना बनै अमूर्त्तिक मूर्त्तिकका बंधान कैसें बनै । ताका समाधान—

जैसें अव्यक्त इन्द्रियगम्य नाहीं ऐसे सूक्ष्मपुद्गल अर व्यक्त इन्द्रियगम्य हैं ऐसे स्थूलपुद्गल तिनका बंधान होना मानिए है तैसें इन्द्रियगम्य होने योग्य नाहीं ऐसा अमूर्त्तिक आत्मा अर इन्द्रियगम्य होने योग्य मूर्त्तिककर्म इनिका भी बंधान होना मानना । बहुरि इस बंधानविषै कोऊ किसीकों करै तौ है नाहीं । यावत् बंधान रहै तावत् साथि रहै बिछुरै नाहीं अर कारणकार्यपना तिनिक्कै बन्या रहै इतना ही यहां बंधान जानना । सो मूर्त्तिक अमूर्त्तिककै ऐसें बंधान होनेविषै किछू विरोध है नाहीं । या प्रकार जैसें एक जीवकै अनादिकर्मसंबंध कह्या तैसें ही जुदा जुदा अनंत जीवनिक्कै जानना । बहुरि सो कर्म ज्ञानावरणादि भेदनिकरि आठ प्रकार है तहां च्यारि घातियाकर्मनिके निमित्ततैं

तौ जीवके स्वभावका घात हो है तहां ज्ञानावरण दर्शनावरणकरि तौ जीवके स्वभाव दर्शन ज्ञान तिनिकी व्यक्तता नाहीं हो है तिनि कर्मनिका क्षयोपशमके अनुसारि किंचित् ज्ञान दर्शनकी व्यक्तता रहै है । बहुरि मोहनीयकरि जीवके स्वभाव नाहीं ऐसे मिथ्याश्रद्धान वा क्रोध मान माया लोभादिक कषाय तिनिकी व्यक्तता हो है । बहुरि अंतरायकरि जीवका स्वभाव दीक्षा लेनेकी समर्थतारूप वीर्य ताकी व्यक्तता न हो है ताका क्षयोपशमकै अनुसारि किंचित् शक्ति रहै है ऐसा घातिकर्मनिके निमित्ततै जीवके स्वभावका घात अनादिहीतै भया है ऐसै नाहीं जो पहलै तौ स्वभावरूप शुद्ध आत्मा था पीछै कर्मनिमित्ततै स्वभाव घातकरि अशुद्ध भया । इहां तर्क,—जो घात नाम तौ अभावका है सो जाका पहलै सद्भाव होय ताका अभाव कहना बनै इहां स्वभावका तौ सद्भाव है ही नाहीं घात किसका किया । ताका समाधान—

जीवविषै अनादिहीतै ऐसी शक्ति पाइए है जो कर्मका निमित्त न होइ तौ केवलज्ञानादि अपने स्वभावरूप प्रवर्तै परंतु अनादिहीतै कर्मका संबंध पाइए है । तातै तिस शक्तिका व्यक्तपना न भया सो शक्तिअपेक्षा स्वभाव है ताका व्यक्त न होने देनेकी अपेक्षा घात किया कहिए है । बहुरि च्यारि अघा-  
तिया कर्म हैं तिनिके निमित्ततै इस आत्मकै बाह्य सामग्रीका संबंध बनै है तहां वेदनीयकरि तौ, शरीरविषै वा शरीरतै बाह्य नानाप्रकार सुख दुःखका कारण परद्रव्यनिका संयोग जुँरै है अर आयुकरि अपनी स्थितिपर्यंत पाया शरीरका संबंध नाहीं छूटि सकै है । अर नामकरि गति जाति शरीरादिक निपजै हैं । अर

गोत्रकरि ऊंचानीचा कुलकी प्राप्ति हो है ऐसैं अघातिकर्मनिकरि बाह्य सामग्री भेली होय है ताकरि मोहके उदयका सहकार होतैं जीव सुखी दुखी हो है । अर शरीरादिकनिके संबधतैं जीवकैं अमूर्त्तत्वादि स्वभाव अपने स्वार्थकौं नाहीं करैं है । जैसैं कोऊ शरीरकौं पकरै तौ आत्मा भी पकखा जाय । बहुरि यावत् कर्मका उदय रहै तावत् बर्ह्य सामग्री तैसैं ही बनी रहै अन्यथा न होय सकै ऐसा इनि अघातिकर्मनिका निमित्त जानना । इहां कोऊ प्रश्न करै कि कर्म तौ जड़ हैं किछू बलवान नाहीं तिनिकरि जीवके स्वभावका घात होना वा बाह्य सामग्रीका मिलना कैसैं संभवै है । ताका समाधान—

जो कर्म आप कर्त्ता होय उद्यमकरि जीवके स्वभावकौं घातै बाह्य सामग्रीकौं मिलावै तब तौ कर्मकै चैतन्यपनों भी चाहिए अर बलवानपनों भी चाहिए सो तौ है नाहीं सहज ही निमित्त नैमित्तिक संबध है । जब उन कर्मनिका उदयकाल होय तिस कालविषै आप ही आत्मा स्वभावरूप न परिणमै विभावरूप परिणमै वा अन्य द्रव्य हैं ते तैसैं ही संबधरूप होय परिणमैं । जैसैं काहू पुरुषकै सिरपरि मोहनधूलि परी है तिसकरि सो पुरुष बावला भया तहां उस मोहनधूलिकै ज्ञान भी न था अर बलवानपना भी न था अर बावलापना तिस मोहनधूलि ही करि भया देखिए है । मोहनधूलिका तौ निमित्त है अर पुरुष आप ही बावला हुवा परिणमै है । ऐसा ही निमित्त नैमित्तिक बनि रखा है । बहुरि जैसैं सूर्यका उदयका कालविषै चकवा चकवीनिका संयोग होय तहां रात्रिविषै किसीनै दोषबुद्धितैं जोरावरीकरि जुदे किए नाहीं । दिवसविषै

काहूँ करुणाबुद्धिकरि मिलाए नाही सूर्यउदयका निमित्तपाय आप ही मिलैं हैं ऐसा ही निमित्तनैमित्तिक बनि रखा है । तैसें ही कर्मका भी निमित्तनैमित्तिकभाव जानना । ऐसें कर्मका उदयकरि अवस्था होय है । बहुरि तहां नवीन बंध कैसें होय है सो कहिए है,—

जैसें सूर्यका प्रकाश है सो मेघपटलतैं जितना व्यक्त नाही तितनेका तौ तिसकालविषै अभाव है बहुरि तिस मेघपटलका मंदपनातैं जेता प्रकाश प्रगटै है सो तिस सूर्यके स्वभावका अंश है मेघपटलजनित नाही है । तैसें जीवका ज्ञान दर्शन वीर्य स्वभाव है सो ज्ञानावरण दर्शनावरण अंतरायके निमित्ततैं जितनें व्यक्त नाही तितनेंका तौ तिसकालविषै अभाव है । बहुरि तिन कर्मनिका क्षयोपशमतैं जेता ज्ञान दर्शन वीर्य प्रगट है सो तिस जीवके स्वभावका अंश ही है कर्मजनित उपाधिक भाव नाही है । सो ऐसे स्वभावके अंशका अनादितैं लगाय कबहूँ अभाव न हो है । याहीकरि जीवका जीवत्वपना निश्चय कीजिए है । जो यह देखनहार जाननहार शक्तिकौ धरें वस्तु है सो ही आत्मा है । बहुरि इस स्वभावकरि नवीन कर्मका बंध नाही है जातैं निज स्वभाव ही बंधका कारन होय तौ बंधका छूटना कैसें होय । बहुरि तिन कर्मनिके उदयतैं जेता ज्ञान दर्शन वीर्य अभावरूप है ताकरि भी बंध नाही है जातैं आपहीका अभाव होतै अन्यकौ कारन कैसें होय । तातैं ज्ञानावरण दर्शनावरण अंतरायके निमित्ततैं उपजे भाव नवीनकर्मबंधके कारन नाही । बहुरि मोहनीय कर्मकरि जीवकै अयथार्थश्रद्धानरूप तौ मिथ्यात्वभाव हो है वा क्रोध मान माया लोभादिक कषाय हो हैं ते यद्यपि जीवके अस्ति-

त्वमय हैं जीवतैं जुदे नाही जीव ही इनिका कर्ता है जीवके परिणमनरूप ही ये कार्य हैं तथापि इनिका होना मोहकर्मके निमित्ततैं ही है कर्मनिमित्त दूर भए इनिका अभाव ही है तातैं ए जीवके निजस्वभाव नाही उपाधिकभाव हैं । बहुरि इनि भावनिकरि नवीनबंध हो है तातैं मोहके उदयतैं निपजे भाव बंधके कारन हैं । बहुरि अघातिकर्मनिके उदयतैं बाह्य सामग्री मिलै है तिनिविषै शरीरादिक तौ जीवके प्रदेशनिसौं एक क्षेत्रावगाही होय एकबंधानरूप ही हो हैं । अर धन कुटुंबादिक आत्मातैं भिन्नरूप हैं सो ए सर्व बंधके कारन नाही हैं जातैं परद्रव्य बंधका कारन न होय । इनिविषै आत्माके ममत्वादिरूप मिथ्यात्वादिभाव हो हैं सो इसका कारन जानना । बहुरि इतना जानना जो नामकर्मके उदयतैं शरीर वा वचन वा मन निपजै है तिनिकी चेष्टाके निमित्ततैं आत्माके प्रदेशनिका चंचलपना हो है । ताकरि आत्माके पुद्गलवर्गणासौं एक बंधान होनेकी शक्ति हो है ताका नाम योग है । ताके निमित्ततैं समय समय प्रति कर्मरूप होनेयोग्य अनंत परमाणूनिका ग्रहण हो है । तहां अल्प योग होय तौ थोरे परमाणूनिका ग्रहण होय बहुत योग होय तौ घने परमाणूनिका ग्रहण होय । बहुरि एकसमय जे पुद्गलपरमाणू ग्रहे तिनिविषै ज्ञानावरणादि मूलप्रकृति वा तिनिकी उत्तर प्रकृतीनिका जैसे सिद्धांतविषै कबा है तैसे बटवारा हो है तिस बटवारा माफिक परमाणू तनि प्रकृतीनिरूप आप ही परिणमै हैं । विशेष इतना कि योग दोय प्रकार है शुभयोग अशुभयोग । तहां धर्मके अंगनिविषै मनवचनकायकी प्रवृत्ति भए तौ शुभयोग



हो है अर अधर्म अंगनिविषै तिनिकी प्रवृत्ति भए अशुभयोग हो है । सो शुभयोग होहु वा अशुभयोग होहु सम्यक्त्व पाए विना घातियाकर्मनिका तौ सर्व प्रकृतीनिका निरंतर बंध हुवा ही करै है । कोई समय किसी भी प्रकृतीका बंध हुवा विना रहता नाहीं । इतना विशेष है जो मोहनीयकी हास्य शोक युगलविषै रति अरति युगलविषै तीनों वेदनिविषै एकै काल एक एक ही प्रकृतिका बंध हो है । अघातियानिकी प्रकृतिविषै शुभोपयोग होतैं सातावेदनीय आदि पुण्यप्रकृतीनिका बंध हो है । अशुभयोग होतैं असाता-वेदनीय आदि पाप प्रकृतीनिका बंध हो है । मिश्रयोग होतैं कैई पुण्यप्रकृतीनिका कैई पापप्रकृतीनिका बंध हो है । ऐसैं योगके निमित्ततैं कर्मका आगमन हो है । तातैं योग है सो आस्रव है । बहुरि याकरिं ग्रहे कर्मपरमाणूनिका नाम प्रदेश है तिनिका बंध भया अर तिनिविषै मूल उत्तरप्रकृतीनिका विभाग भया तातैं योगनिकरि प्रदेशबंध वा प्रकृतिबंधका होना जानना । बहुरि मोहके उदयतैं मिथ्यात्व क्रोधादिक भाव हो हैं, तिनि सबनिका नाम सामान्यपनै कषाय है । ताकरिं तिनि कर्मप्रकृतिनिकी स्थिति बंधै है सो जितनी स्थिति बंधै तिसविषै आवाधा काल छोड़ि तहां पीछैं यावत् बंधी स्थिति पूर्ण होय तावत् समय समय तिस प्रकृतिका उदय आया ही करै । सो देव मनुष्य तिर्यंचायु विना अन्य सर्व-  
 अस्मात्पा घातियाप्रकृतीनिका अल्पकषाय होतैं थोरा स्थितिबंध होय बहुत कषाय होतैं घना स्थिति बंध होय । इनि तीन आयूनिका अल्पकषाय-तैं बहुत अर बहुत कषायतैं अल्प स्थितिबंध जानना । बहुरि तिस कषायहीकरि तिनि कर्मप्रकृतीनिविषै अनुभागशक्तिका विशेष

हो है सो जैसा अनुभाग बंधै तैसा ही उदयकालविषै तिनि प्रकृतीनिका घना वा थोरा फल निपजै है । तहां घाति कर्मनिको सर्व प्रकृतीनिविषै वा अघाति कर्मनिकी पाप प्रकृतीनिविषै तौ अल्पकषाय होतैं थोरा अनुभाग बंधै है । बहुत कषाय होतैं घना अनुभाग बंधै है । बहुरि पुण्यप्रकृतीनिविषै अल्पकषाय होतैं घना अनुभाग बंधै है । बहुत कषाय होतैं थोरा अनुभाग बंधै है । ऐसैं कषायनिकरि कर्मप्रकृतिनिकै स्थिति अनुभागका विशेष भया तातैं कषायनिकरि स्थितिवंध अनुभागबंधका होना जानना । इहां जैसैं बहुत भी मदिरा है अर ताविषै थोरे कालपर्यंत थोरी उन्मत्तता उपजावनेकी शक्ति है तौ वह मदिरा हीनपनाकौं प्राप्त है । बहुरि थोरी भी मदिरा है ताविषै बहुत कालपर्यंत घनी उन्मत्तता उपजावनेकी शक्ति है तौ वह मदिरा अधिकपनाकौं प्राप्त है । तैसैं घने भी कर्मप्रकृतीनिके परमाणू हैं अर तिनिविषै थोरे कालपर्यंत थोरा फल देनेकी शक्ति है तौ ते कर्मप्रकृति हीनताकौं प्राप्त हैं । बहुरि थोरे भी कर्मप्रकृतिनिके परमाणू हैं अर तिनिविषै बहुत कालपर्यंत बहुत फल देनेकी शक्ति है तौ ते कर्मप्रकृति अधिकपनाकौं प्राप्त हैं तातैं योगानेकरि भया प्रकृतिबंध ~~अनुभागबंध~~ प्रदेशबंध बलवान नाहीं । कषायनिकरि किया स्थितिवंध अनुभागबंध ही बलवान है तातैं मुख्यपनै कषाय ही बंधका कारन जानना । जिनिकौं बंध न करना होय ते कषाय मति करौ । बहुरि इहां कोऊ प्रश्न करै कि पुद्गलपरमाणू तौ जड़ हैं उनके किछू ज्ञान नाहीं कैसैं यथायोग्य प्रकृतिरूप होय परिणमैं है ताका समाधान—

जैसेँ भूखा होतेँ मुखद्वारकरि ब्रह्माहुवा भोजनरूप पुद्गलपिंड सो मांस शुक्र शोणित आदि धातुरूप परिणमै है । बहुरि तिस भोजनके परमाणूनिविषै यथायोग्य कोई धातुरूप थोरे कोई धातुरूप घने परमाणू हो हैं । बहुरि तिनिविषै कोई परमाणूनिका संबंध घने काल रहै कोईनिका थोरे काल रहै । बहुरि तिनिपरमाणूनिविषै कोई तौ अपने कार्य निपजावनेकी शक्तिकौ बहुत धारै हैं कोई स्तोकशक्तिकौ धारै हैं । सो ऐसै होनेविषै कोऊ भोजनरूप पुद्गलपिंडकै ज्ञान तौ नाहीं है जो में ऐसै परिणमों अर और भी कोऊ परिणमावनहारा नाहीं है, ऐसा ही निमित्तनैमित्तिक भाव बनि रखा है ताकरि तैसेँ ही परिणमन पाइए है । तैसेँ ही कषाय होतेँ योगद्वारकरि ब्रह्माहुवा कर्मवर्गणारूप पुद्गलपिंड सो ज्ञानावरणादि प्रकृतिरूप परिणमै है । बहुरि तिनि कर्मपरमाणूनिविषै यथायोग्य कोई प्रकृतिरूप थोरे कोई प्रकृतिरूप घने परमाणू होय हैं । बहुरि तिनिविषै कोई परमाणूनिका संबंध घने काल रहै कोईनिका थोरे काल रहै । बहुरि तिनिपरमाणूनिविषै कोऊ तौ अपने कार्य निपजावनेकी बहुत शक्ति धारै हैं कोऊ थोरी शक्ति धारै हैं सो ऐसै होनेविषै कोऊ कर्मवर्गणारूप पुद्गलपिंडकै ज्ञान तौ नाहीं है जो में ऐसै परिणमों अर और भी कोई परिणमावनहारा है नाहीं ऐसा ही निमित्तनैमित्तिकभाव बनि रखा है ताकरि तैसेँ ही परिणमन पाइए है । सो ऐसै तौ लोकविषै निमित्त नैमित्तिक घने ही बनि रहे हैं । जैसेँ मंत्रनिमित्तकरि जलादिकविषै रोगादिक दूरिकरनेकी शक्ति हो है वा कांकरी आदिविषै सर्पादि रोकनेकी शक्ति हो है तैसेँ ही जीवभावके निमित्तकरि पुद्गलपरमा-

पुनिविषै ज्ञानावरणादिरूप शक्ति हो है । इहां विचारकरि अपने उद्यमतें कार्य करै तौ ज्ञान चाहिए अर तैसा निमित्त बने स्वयमेव तैसैं परिणमन होय तौ तहां ज्ञानका किछू प्रयोजन नाहीं । या प्रकार नवीनबंध होनेका विधान जानना । अब जे परमाणू कर्मरूप परिणमैं तिनका यावत् उदयकाल न आवै तावत् जीवके प्रदेशनिसें एक क्षेत्रावगारूप बंधान रहै है । तहां जीवभावके निमित्तकरि केई प्रकृतिनिकी अवस्थाका पलटना भी होय जाय है । तहां केई अन्य प्रकृतिनिके परमाणू थे ते संक्रमणरूप होय अन्य प्रकृतीके परमाणू हो जाएँ । बहुरि केई प्रकृतीनिका स्थिति वा अनुभाग बहुत था सो अपकर्षण होयकरि थोरा हो जाय । बहुरि केई प्रकृतीनिका स्थिति वा अनुभाग थोरा था सो उत्कर्षण होयकरि बहुत हो जाय सो ऐसैं पूवैं बंधे परमाणूनिकी भी जीवभावका निमित्त पाय अवस्था पलटै है अर निमित्त न बनै तौ न पलटै जैसैके तैसे रहैं । ऐसैं सत्त्वरूप कर्म रहै हैं । बहुरि जब कर्मप्रकृतीनिका उदयकाल आवै तब स्वयमेव तिनि प्रकृतीनिका अनुभागके अनुसारि कार्य बनै । कर्म तिनिका कार्यकौं निपजावता नाहीं । याका उदयकाल आए वह कार्य बनै है । इतना ही निमित्तनैमित्तिक संबंध जानना । बहुरि जिस समय फल निपज्या तिसका अनंतर समयविषै तिनि कर्मरूप पुद्गलनिकै अनुभाग शक्तिका अभाव होनेतैं कर्मत्वपनाका अभाव हो है । ते पुद्गल अन्यपर्यायरूप परिणमै हैं । याका नाम सविपाकनिर्जरा है । ऐसैं समय समय प्रति उदय होय कर्म खिरै हैं कर्मत्वपना नास्ति भए पीछैं ते परिमाणू तिस ही स्कंधविषै रहौ वा जुदे होइ जाडु किछू

प्रयोजन नहीं। इहां इतना जानना,—इस जीवकै समय समय प्रति अनंत परमाणू बंधै हैं तहां एकसमयविषै बंधे परमाणू ते आवा-  
धाकाल छोड़ि अपनी स्थितिके जेते समय होंहिं तिनिविषै क्रमतैं उदय आवै हैं। बहुरि बहुतसमयविषै बंधे परमाणू जे एकसमय-  
विषै उदय आवने योग्य हैं ते एकठे होय उदय आवै हैं। तिनि सब परमाणूनिका अनुभाग मिले जेता अनुभाग होय तितना फल तिस कालविषै निपजै है। बहुरि अनेक समयनिविषै बंधे परमाणू बंधसमयतैं लगाय उदयसमयपर्यंत कर्मरूप अस्तित्वकौं धरें जीवसौं संबंध्यरूप रहैं। ऐसैं कर्मनिकी बंध उदय सत्त्वरूप अवस्था जाननी। तहां समय समयप्रति एक समयप्रबद्ध मात्र परमाणू बंधे हैं एक समयप्रबद्ध मात्र निर्जरै है। ब्योढगुणहानिकरि गुणित समय-  
प्रबद्ध मात्र सदा काल सत्ता रहै है। सो इनि सबनिका विशेष आगैं कर्मअधिकारविषै लिखैंगे तहां जानना। बहुरि ऐसे यह कर्म है सो परमाणुरूप अनंत पुद्गलद्रव्यनिकरि निपजाया कार्य है तातैं याका नाम द्रव्यकर्म है। बहुरि मोहके निमित्ततैं मिथ्यात्व-  
क्रोधादिरूप जीवका परिणाम हो है सो अशुद्ध भावकरि निपजाया कार्य है तातैं याका नाम भावकर्म है। सो द्रव्यकर्मके निमित्ततैं भावकर्म होय अर भावकर्मके निमित्ततैं द्रव्यकर्मका बंध होय। बहुरि द्रव्यकर्मतैं भावकर्म भावकर्मतैं द्रव्यकर्म ऐसैं ही परस्पर कारणकार्यभावकरि संसारचक्रविषै परिभ्रमण हो हैं। इतना विशेष जानना—तीव्रबंध होनेतैं वा संक्रमणादि होनेतैं वा एक काल-  
विषै बंध्या अनेककालविषै वा अनेककालविषै बंधे एककालविषै उदय आवनेतैं काहू कालविषै तीव्रउदय आवै तब तीव्रकषाय

होय तब तीव्र ही नवीनबंध होय अर काहूकालविषै मंद उदय आवै तब मंदकषाय होय तब मंद ही नवीनबंध होय । बहुरि तिनि तीव्रमंदकषायनिहीके अनुसारि पूर्वबंधे कर्मनिका भी संक्रमणादिक होय तौ होय । या प्रकार अनादितैं लगाय धाराप्रवाहरूप द्रव्यकर्म वा भावकर्मकी प्रवृत्ति जाननी बहुरि नामकर्मके उदयतैं शरीर हो है सो द्रव्यकर्मवत् किंचित् सुख दुःखकौ कारण है । तातैं शरीरकौ नोकर्म कहिए है । इहां नो शब्द ईषत्वाचक जानना । सो शरीर पुद्गलपरमाणूनिका पिंड है अर द्रव्यइंद्रिय वा द्रव्यमन अर श्वासोश्वास वचन ए भी शरीरहीके अंग हैं सो ए भी पुद्गलपरमाणूनिके पिंड जानने । सो ऐसैं शरीरकै अर द्रव्यकर्मसंबंधसहित जीवकै एक क्षेत्रावगाहरूप बंधान हो है । जो शरीरका जन्म समयतैं लगाय जेती आपकी स्थिति होय तितने काल पर्यंत शरीरका संबंध रहै है । बहुरि आयु पूरण भए मरण हो है । तब तिस शरीरका संबंध छूटै है । शरीर आत्मा जुदे जुदे हो जाय हैं । बहुरि ताके अनंतर समयविषै वा दूसरै तीसरै चौथै समय जीव कर्मउदयके निमित्ततैं नवीन शरीर धारै है तहां भी अपने आयुपर्यंत तैसैं ही संबंध रहै है । बहुरि मरण हो है तब तिससौं संबंध छूटै है । ऐसैं ही पूर्व शरीरका छोड़ना नवीनशरीरका ग्रहण करना अनुक्रमतैं हुवा करै है । बहुरि यह आत्मा यद्यपि असंख्यातप्रदेशी है तथापि संकोचविस्तारशक्तितैं शरीरप्रमाण ही रहै है, विशेष इतना,—समुद्घात होतैं शरीरतैं बाह्य भी आत्माके प्रदेश फैलै हैं । बहुरि अंतराल समयविषै पूर्व शरीर छोड़्या था तिस प्रमाण रहै हैं । बहुरि इस शरीरके अंगभूत द्रव्य इंद्रिय मन तिनिके

सहायतें जीवकै जानपनाकी प्रवृत्ति हो है । बहुरि शरीरकी अवस्थाकै अनुसारि मोहके उदयतें सुखी दुखी हो है । कबहू तौ जीवकी इच्छाकै अनुसार शरीर प्रवर्त्तै है कबहू शरीरकी अवस्थाकै अनुसार जीव प्रवर्त्तै है कबहू जीव अन्यथा इच्छारूप प्रवर्त्तै है पुद्गल अन्यथा अवस्थारूप प्रवर्त्तै है ऐसैं इस नोकर्मकी प्रवृत्ति जाननी । तहां अनादितैं लगाय प्रथम तौ इस जीवकै नित्यनिगोदरूप शरीरका संबंध पाइए है । तहां नित्यनिगोद-शरीरकौं धरि आयु पूर्ण भए मरि बहुरि नित्यनिगोदशरीरकौं धारै है । बहुरि आयु पूर्ण करि मरि नित्यनिगोदशरीरहीकौं धारै है । याही प्रकार अनंतानंत प्रमाण लिए जीवराशि हैं सो अनादितैं तहां ही जन्ममरण किया करै हैं । बहुरि तहांतैं छै महीना अर आठ समयविषै छस्सै आठ जीव निकसै हैं ते निकसि अन्य पर्यायनिकौं धारै हैं । सो पृथ्वी जल अग्नि पवन प्रत्येकवनस्पतीरूप एकेंद्रिय पर्यायनिविषै वा वेन्द्रिय तेइंद्रिय चौइंद्रियरूप पर्यायनिविषै वा नरक तिर्यच मनुष्य देवरूप पंचेंद्रिय पर्यायनिविषै भ्रमण करै हैं । बहुरि तहां कितेक काल भ्रमण-करि बहुरि निगोदपर्यायकौं पावै सो वाका नाम इतरनिगोद है । बहुरि तहां कितेक काल रहै तहांतैं निकसि अन्य पर्याय-निविषै भ्रमण करै है । तहां परिभ्रमण करनेका उत्कृष्ट काल पृथ्वी आदि स्थावरनिविषै असंख्यात कल्पमात्र है । बहुरि द्वींद्रियादि पंचेंद्रियपर्यंत त्रसनिविषै साधिक दोयहजार सागर है । अर इतरनिगोदविषै अढाई पुद्गलपरिवर्तनमात्र है सो यह अनंतकाल है । बहुरि इतरनिगोदतैं निकसि कोई स्थावरपर्याय पाय बहुरि

निगोद जाय ऐसैं एकेंद्रियपर्यायनिविषै उत्कृष्ट परिभ्रमण काल असंख्यात पुद्गलपरिवर्तन मात्र है । बहुरि जघन्य सर्वत्र एक अंत-मुहूर्तकाल है । ऐसं घना तौ एकेंद्रियपर्यायनिका ही धरना है । अन्य पर्याय पावना काकतालीय न्यायवत् जानना । याप्रकार इस जीवकै अनादिहीतै कर्मबंधनरूप रोग भया है ।

इति कर्मबंधननिदान वर्णनम् ।

अब इस कर्मबंधनरूप रोगके निमित्ततै जीवकी कैसी अवस्था होय रही है सो कहिए है । प्रथम इस जीवका स्वभाव चैतन्य है सो सबनिका सामान्यविशेषस्वरूपका प्रकाशनहारा है । जो उनका स्वरूप होय सो आपकौं प्रतिभासै है । तिसहीका नाम चैतन्य है । तहां सामान्यस्वरूप प्रतिभासनेका नाम दर्शन है । विशेष स्वरूप प्रतिभासनेका नाम ज्ञान है । सो ऐसे स्वभावकरि त्रिकालवर्ती सर्वगुणपर्यायसहित सर्व पदार्थनिकौं प्रत्यक्ष युग-पत् विना सहाय देखै जानै ऐसी आत्माविषै शक्ति सदा काल है । परंतु अनादितै ज्ञानावरण दर्शनावरणका संबंध है ताके निमित्ततै इस शक्तिका व्यक्तपना होता नाहीं तिनि कर्मनिका क्षयो-पशमतै किंचित् मतिज्ञान वा श्रुतज्ञान पाइए है । अर कदाचित् अवधिज्ञान भी पाइए है । बहुरि अचक्षुदर्शन पाइए है अर कदा-चित् चक्षुदर्शन वा अवधिदर्शन भी पाइए है । सो इनिकी भी प्रवृत्ति कैसै है सो दिखाइए है । प्रथम तौ मतिज्ञान है सो शरी-रके अंगभूत जे जीभ नासिका नेत्र कान स्पर्शन ए द्रव्यइंद्रिय अर हृदयस्थानविषै आठ पाँखडीका फूल्या कमलकै आकार द्रव्य-मन तिनिके सहायहीतै जानै है । जैसैं जाकी दृष्टिमंद होय



सो अपने नेत्रकरि ही देखै है परंतु चसमा दीए ही देखै विना चसमैके देखि सकै नाही । तैसें आत्माका ज्ञान मंद है सो अपने ज्ञानहीकरि जानै है परंतु द्रव्यइंद्रिय वा मनका संबंध भए ही जानै तिनि विना जानि सकै नाही । बहुरि जैसें नेत्र तौ जैसाका तैसा है अर चसमाविषै किछू दोष भया होय तौ देखि सकै नाही अथवा थोरा दीसै अथवा औरका और दीसै तैसें अपना क्षयो-पशम तौ जैसाका तैसा है अर द्रव्यइंद्रिय मनके परमाणु अन्यथा परिणमे होय तौ जानि सकै नाही अथवा थोरा जानै अथवा औरका और जानै । जातैं द्रव्यइंद्रिय वा मनरूप परिमाणूनिका परिणमनकै अनुसार ज्ञानका परिणमन होय है । ताका उदाहरण—जैसें मनुप्यादिककै बाल वृद्ध अवस्थाविषै द्रव्यइंद्रिय वा मन शिथिल होय तब जानपना भी शिथिल होय । बहुरि जैसें शीत वायु आदिके निमित्ततैं स्पर्शनादि इंद्रियनिके वा मनके परमाणु अन्यथा होय तब जानना न होय वा थोरा जानना होय वा अन्यथा जानना होय । बहुरि इस ज्ञानकै अर वाह्य द्रव्यनिकै भी निमित्तनैमित्तिक संबंध पाइए है ताका उदाहरण—जैसें नेत्रइंद्रिकै अंधकारके परमाणु वा फूल आदिकके परमाणु पाषाणादिके परमाणु आदि आड़े आय जाएँ तौ देखि न सकै । बहुरि लालकाच आड़ा आवै तौ सब लाल ही दीसै हरितकाच आड़ा आवै तौ हरित दीखै ऐसें अन्यथा जानना होय । बहुरि दूरबीणि चसमा इत्यादि आड़ा आवै तौ बहुत दीखने लगि जाय । प्रकाश जल काच इत्यादिकके परमाणु आड़े आवैं तौ भी जैसाका तैसा दीखै ऐसें अन्य इंद्रिय वा मनकै भी यथासंभव

जानना । बहुरि मंत्रादिक प्रयोगतैं वा मदिरापानादिकतैं वा भूता-  
दिकके निमित्ततैं न जानना वा थोरा जानना वा अन्यथा जानना  
हो है । ऐसैं यह ज्ञान बाह्यद्रव्यकै भी आधीन जानना । बहुरि  
इस ज्ञानकरि जो जानना हो है सो अस्पष्ट जानना हो है । दूरितैं  
कैसा ही जानै समीपतैं कैसा ही जानै तत्काल कैसा ही जानै  
जानतै बहुत बार होजाय तब कैसा ही जानै काहूकौं संशयलिण  
जानै काहूकौं अन्यथा जानै काहूकौं किंचित् जानैं इत्यादि रूपकरि  
निर्मल जानना होय सकै नाहीं । ऐसैं यह मतिज्ञान पराधीनतालिण  
इंद्रियमनद्वारकरि प्रवर्तैं है । तहां इंद्रियनिकरि तौ जितने क्षेत्रका  
विषय होय तितने क्षेत्रविषै जे वर्तमान स्थूल अपने जानने योग्य  
पुद्गलस्कंध होंय तिनहीकौं जानै । तिनिविषै जुदेजुदे इंद्रियनिकरि  
जुदे जुदे कालविषै कोई स्कंधके स्पर्शादिकका जानना हो है ।  
बहुरि मनकरि अपने जानने योग्य किंचिन्मात्र त्रिकालसंबंधी  
दूरिक्षेत्रवर्ती वा समीपक्षेत्रवर्ती रूपी अरूपी द्रव्य वा पर्याय  
तिनिकौं अत्यंत अस्पष्टपनै जानै है सो भी इंद्रियनिकरि जाका  
ज्ञान न भया होय वा अनुमानादिक जाका किया होय तिसहीकौं  
जानि सकै है । बहुरि कदाचित् अपनी कल्पनाहीकरि असतकौं  
जानै है । जैसैं सुपनेविषै वा जागतैं भी जे कदाचित् कहीं  
न पाइए ऐसे आकारादिक चित्तवै वा जैसैं नाहीं तैसैं मानै । ऐसैं  
मनकरि जानना होय । सो यह इंद्रिय वा मनद्वारकरि जो ज्ञान  
होय है ताका नाम मतिज्ञान है । तहां पृथ्वी जल अग्नि पवन  
वनस्पतीरूप एकेंद्रियनिकै स्पर्शहीका ज्ञान है । लट शंख आदि  
वेइंद्रिय जीवनिकै स्पर्श रसका ज्ञान है । कीड़ी मकोड़ा आदि ते-

इंद्रिय जीवनिकै स्पर्श रस गंधका ज्ञान है । अमर मक्षिका पतंगा-  
दिक चौइंद्रिय जीवनिकै स्पर्श रस गंध वर्णका ज्ञान है । मच्छ  
गऊ कबूतर इत्यादिक तिर्यच अर मनुष्य देव नारकी यह पंचे-  
द्रिय हैं तिनिकै स्पर्श रस गंध वर्ण शब्दनिका ज्ञान है । बहुरि  
तिर्यचनिविषै केई संज्ञी हैं केई असंज्ञी हैं । तहां संज्ञीनिकै  
मनजनित ज्ञान है असंज्ञीनिकै नाहीं है । बहुरि मनुष्य देव  
नारकी संज्ञी हैं तिनि सबनिकै मनजनित ज्ञान पाइए है ऐसं  
मतिज्ञानकी प्रवृत्ति जाननी । बहुरि मतिज्ञानकरि जिस अर्थको  
जान्या होय ताके संबंधतैं अन्य अर्थकाँ जाकरि जानिये सो  
श्रुतज्ञान है सो दोय प्रकार है । अक्षरात्मक १ अनक्षरात्मक २ ।  
तहां जैसे 'घट' ए दोय अक्षर सुने वा देखे सो तौ मतिज्ञान भया  
तिनिके संबंधतैं घटपदार्थका जानना भया सो श्रुतज्ञान भया ।  
ऐसैं अन्य भी जानना सो यह तौ अक्षरात्मक श्रुतज्ञान है । बहुरि  
जैसे स्पर्शकरि शीतका जानना भया सो तौ मतिज्ञान है ताके  
संबंधतैं यह हितकारी नाहीं यातैं भागि जाना इत्यादिरूप ज्ञान  
भया सो श्रुतज्ञान है । ऐसैं अन्य भी जानना । यह अनक्षरात्मक  
श्रुतज्ञान है । तहां एकेंद्रियादिक असंज्ञी जीवनिकै तौ अनक्षरा-  
त्मक ही श्रुतज्ञान है अवशेष संज्ञी पंचेद्रियकै दोऊ हैं । सो यह  
श्रुतज्ञान है, सो अनेकप्रकार पराधीन जो मतिज्ञान ताके भी  
आधीन है । वा अन्य अनेक कारणनिकै आधीन है तातैं महा-  
पराधीन जानना । बहुरि अपनी मर्यादाकै अनुसार क्षेत्रकालका  
प्रमाण लिए रूपी पदार्थनिकाँ स्पष्टपनैं जाकरि जानिये सो अव-  
धिज्ञान है सो यह देव नारकीनिकै तौ सर्वकै पाइए है । अर

संज्ञी पंचेन्द्रिय तिर्यच अर मनुष्यनिकै भी कोईकै पाइए है । असं-  
 ज्ञीपर्यंत जीवनिकै यह होता ही नहीं सो यह भी शरीरादिक पुद्ग-  
 लनिकै आधीन है । बहुरि अवधिके तीन भेद हैं देशावधि १ पर-  
 मावधि २ सर्वावधि ३ । सो इनिविषै थोरा क्षेत्रकालकी मर्यादा-  
 लिए किंचिन्मात्र रूपी पदार्थकों जाननहारा देशावधि है सो कोई  
 जीवकै होय है । बहुरि परमावधि सर्वावधि अर मनःपर्यय ए  
 ज्ञान मोक्षमार्गविषै प्रगटै हैं । केवलज्ञान मोक्षमार्गस्वरूप है । तातैं  
 इस अनादिसंसार अवस्थाविषै इनिका सद्भाव ही नहीं है ऐसैं  
 ज्ञानकी प्रवृत्ति पाइए है । बहुरि इंद्रिय वा मनके स्पर्शादिकविषय  
 तिनिका संबंध होतैं प्रथमकालविषै मतिज्ञानकै पहलै जो सत्तामात्र  
 अवलोकनेरूप प्रतिभास हो है ताका नाम चक्षुदर्शन है । तहां नेत्र  
 इंद्रियकरि दर्शन होय ताका नाम तौ चक्षुदर्शन है सो तौ चौइंद्रिय  
 पंचेन्द्रिय जीवनिहीकै हो है । बहुरि स्पर्शन रसन घ्राण श्रोत्र इन च्यारि  
 इंद्रिय अर मनकरि दर्शन होय ताका नाम अचक्षुदर्शन है सो  
 यथायोग्य एकेन्द्रियादि जीवनिकै हो है । बहुरि अवधिके विषय-  
 निका संबंध होतैं अवधिज्ञानके पहलै जो सत्तामात्र अवलोकनेरूप  
 प्रतिभास होय ताका नाम अवधिदर्शन है सो जिनिाकै अवधिज्ञान  
 संभवै तिनिहीकै यह हो है । जो यह चक्षु अचक्षु अवधिदर्शन है  
 सो मतिज्ञान अवधिज्ञानवत् पराधीन जानना । बहुरि केवलदर्शन  
 मोक्षस्वरूप है ताका यहां सद्भाव ही नहीं । ऐसैं दर्शनका सद्भाव  
 पाइए है । या प्रकार ज्ञान दर्शनका सद्भाव ज्ञानावरण दर्शनावरणका  
 क्षयोपशमके अनुसार हो है । जब क्षयोपशम थोरा हो है तब  
 ज्ञानदर्शनकी शक्ति भी थोरी हो है । जब बहुत होय तब बहुत

ज्ञानप्रचक्षुदर्शन

हो है । बहुरि क्षयोपशमतैँ शक्ति तौ ऐसी बनी रहै अर परिण-  
मनकरि एक जीवकै एक कालविषै एक विषयहीका देखना वा  
जानना हो है । इस परिणमनहीका नाम उपयोग है । तहां एक  
जीव एक कालविषै तौ ज्ञानोपयोग हो है वा दर्शनोपयोग हो है  
बहुरि एक उपयोगकी भी एक ही भेदकी प्रवृत्ति हो है जैसेँ मति-  
ज्ञान होय तब अन्यज्ञान न होय । बहुरि एक भेदविषै भी एक  
विषयविषै ही प्रवृत्ति हो है । जैसेँ स्पर्शकौँ जानै तब रसादिककौँ  
न जानै बहुरि एक विषयविषै भी ताके कोऊ एक अंगहीविषै  
प्रवृत्ति हो है जैसेँ उष्णस्पर्शकौँ जानै तब रूक्षादिककौँ न जानै  
ऐसेँ एक जीवकै एक कालविषै एक ज्ञेय वा दृश्यविषै ज्ञान वा  
दर्शनका परिणमन जानना । सो ऐसेँ ही देखिए है । जब सुनने-  
विषै उपयोग लग्या होय तब नेत्रके समीप तिष्ठता भी पदार्थ न  
दीसै ऐसेँ ही अन्य प्रवृत्ति देखिए है । बहुरि परिणमनविषै  
शीघ्रता बहुत है ताकरि काहू कालविषै ऐसा मानिए है युगपत् भी  
अनेक विषयनिका जानना वा देखना हो है सो युगपत् होता  
नाहीं क्रमहीकरि हो है संस्कारवशतैँ तिनिका साधन रहै है ।  
जैसेँ कागलेकै नेत्रके दोय गोलक हैं फूलरी एक है सो फिरै शीघ्र  
है ताकरि दोऊ गोलकनिका साधन करै है । तैसेँ ही इस जीवकै  
द्वार तौ अनेक हैं अर उपयोग एक है सो फिरै शीघ्र है ताकरि  
सर्व द्वारनिका साधन रहै है । इहां प्रश्न—जो एक कालविषै एक  
विषयका जानना वा देखना हो है तौ इतना ही क्षयोपशम भया  
कहौ बहुत काहेकौँ कहौ । बहुरि तुम कहो हौ क्षयोपशमतैँ शक्ति  
हो है तौ शक्ति तौ आत्माविषै केवलज्ञानदर्शनकी भी पाइए है  
ताका समाधान—

जैसे काहू पुरुषके बहुत ग्रामनिविषै गमनकरनेकी शक्ति है ।  
 बहुरि ताकौ काहनै रोक्खा अर यह कब्जा पांच ग्रामनिविषै जावो  
 परंतु एक दिनविषै एक ही ग्रामकौ जावो । तहां उस पुरुषके  
 बहुत ग्राम जानेकी शक्ति तौ द्रव्य अपेक्षा पाइए है अन्य काल-  
 विषै सामर्थ्य होय वर्तमान सामर्थ्यरूप नाहीं है परंतु वर्तमान  
 पांच ग्रामनिटैं अधिक ग्रामनिविषै गमन करि सकै नाहीं । बहुरि  
 पांच ग्रामनिविषै जानेकी पर्यायअपेक्षा वर्तमान सामर्थ्यरूप  
 शक्ति है तातैं इनिविषै गमन करि सकै है । बहुरि व्यक्तता एक  
 दिनविषै एक ग्रामकौ गमन करनेहीकी पाइए है तैसेँ इस जीवके  
 सर्वकौ देखनेकी जाननेकी शक्ति है । बहुरि याकौ कर्मनै रोक्खा  
 अर इतना क्षयोपशम भया कि स्पर्शादिक विषयनिकौ जानो  
 वा देखो परंतु एक कालविषै एकहीकौ जानौ वा देखौ । तहां  
 इस जीवके सर्वके देखने जाननेकी शक्ति तौ द्रव्यअपेक्षा पाइए  
 है अन्यकालविषै सामर्थ्य होय परंतु वर्तमान सामर्थ्यरूप नाहीं  
 जातैं अपनेयोग्य विषयनिटैं अधिक विषयनिकौ देखि जानि सकै  
 नाहीं । बहुरि अपने योग्य विषयनिकौ देखने जाननेकी पर्याय  
 अपेक्षा वर्तमान सामर्थ्यरूप शक्ति है तातैं इनिकौ देखि जानि  
 सकै है । बहुरि व्यक्तता एक कालविषै एकहीकौ देखनेकी वा  
 जाननेकी पाइए है । बहुरि इहां प्रश्न—जो ऐसेँ तौ जान्या परंतु  
 क्षयोपशम तौ पाइए अर बाह्य इंद्रियादिकका अन्यथा निमित्त भए  
 देखना जानना न होय वा थोरा होय वा अन्यथा होय सो ऐसेँ  
 होतैं कर्महीका निमित्त तौ न रब्बा ? ताका समाधान—

जैसेँ रोकनहारानै यह कब्जा जो पांच ग्रामनिविषै एक ग्रामकौ

एक दिनविषै जावो परंतु इन किंकरनिकों साथ लेकै जावो तहां वे किंकर अन्यथा परिणमै तौ जाना न होय वा थोरा जाना होय वा अन्यथा जाना होय तैसें कर्मका ऐसा ही क्षयोपशम भया है जो इतने विषयनिविषै एक विषयकौ एक कालविषै देखो वा जानौ परंतु इतने बाह्य द्रव्यनिका निमित्त भए देखौ जानौ । तहां वै बाह्य द्रव्य अन्यथा परिणमै तौ देखना जानना न होय वा थोरा होय वा अन्यथा होय ऐसै यह कर्मके क्षयोपशमके विशेष हैं तातै कर्महीका निमित्त जानना । जैसे काहूकै अंधकारके परमाणु आड़े आए देखना न होय । घूघू मार्जारादिकनिकै तिनिकों आड़े आए भी देखना होय सो ऐसा यह क्षयोपशमहीका विशेष है । जैसे जैसे क्षयोपशम होय तैसें तैसें ही देखना जानना होय । ऐसै इस जीवकै क्षयोपशमज्ञानकी प्रवृत्ति पाइए है । बहुरि मोक्षमार्ग-विषै अवधि मनःपर्यय हो हैं सो भी क्षयोपशमज्ञान ही हैं तिनिकी भी ऐसं ही एककालविषै एककौ प्रतिभासना वा परद्रव्यका आधीनपना जानना । बहुरि विशेष है सो विशेष जानना । या प्रकार ज्ञानावरण दर्शनावरणका उदयके निमित्ततैं बहुत ज्ञान दर्शनके अंशनिका तौ अभाव है अर तिनिके क्षयोपशमतैं थोरे अंश-निका सद्भाव पाइए है । बहुरि इस जीवकै मोहके उदयतैं मिथ्यात्व वा कषायभाव हो हैं तहां दर्शनमोहके उदयतैं तौ मिथ्यात्वभाव हो है ताकारि यह जीव अन्यथा प्रतीतिरूप अतत्त्व-श्रद्धान करै है । जैसे है तैसें तौ नाहीं मानै है अर जैसे नाहीं है तैसें मानै है । अमूर्त्तिक प्रदेशनिका पुंज प्रसिद्ध ज्ञानादिगुणनिका धारी अनादिनिधन वस्तु आप है अर मूर्त्तिक पुद्गलद्रव्यनिका

पिंड प्रसिद्ध ज्ञानादिकनिकरि रहित जिनका नवीनसंयोग भया  
 ऐसं शरीरादिक पुद्गल पर हैं इनिका संयोगरूप नानाप्रकार मनुष्य  
 तिर्यंचादि पर्याय हो हैं, तिन पर्यायनिविषै अहंबुद्धि धारै है,  
 स्वपरका भेद नाहीं करि सकै है जो पर्याय पावै तिसहीकों आप मानै  
 है । बहुरि तिस पर्यायविषै ज्ञानादिक हैं ते तौ आपके गुण हैं अर  
 रागादिक हैं ते आपके कर्मनिमित्ततैं उपाधिक भाव भए हैं अर वर्णा-  
 दिक हैं ते आपके गुण नाहीं हैं शरीरादिक पुद्गलके गुण हैं अर  
 शरीरादिकविषै वर्णादिकनिकी वा परमाणूनिकी नानाप्रकार पलटनि  
 हो है सो पुद्गलकी अवस्था है सो इन सबनिहीकों अपनौं स्वरूप जानै  
 है स्वभाव परभावका विवेक नाहीं होय सकै है । बहुरि मनुष्यादिक  
 पर्यायनिविषै कुटुंब धनादिकका संबंध हो है ते प्रत्यक्ष आपतैं  
 भिन्न हैं अर ते अपनैं आधीन होय नाहीं परणभै हैं तथापि  
 तिनिविषै ममकार करै है ए मेरे हैं वै काहू प्रकार भी अपने  
 होते नाहीं यह ही अपनी मानितैं अपने मानै है । बहुरि मनु-  
 ष्यादि पर्यायनिविषै कदाचित् देवादिकका तत्त्वनिका अन्यथा  
 स्वरूप जो कल्पित किया ताकी तौ प्रतीति करै है अर यथार्थ-  
 स्वरूप जैसें हैं तैसें प्रतीति न करै है । ऐसैं दर्शनमोहके उदय-  
 करि जीवकै अतत्त्वश्रद्धानरूप मिथ्यात्वभाव हो है । जहां तीव्र  
 उदय होय है तहां सत्यश्रद्धानसे घना विपरीत श्रद्धान होय  
 है जब मन्द उदय होय है, तब सत्यश्रद्धानतैं थोरा विपरीत-  
 श्रद्धान हो है । बहुरि चारित्रमोहके उदयतैं इस जीवकै कषा-  
 यभाव हो हैं तब यह देखता जानतासंता परपदार्थनिविषै  
 इष्ट अनिष्टपनौ मानि क्रोधादिक करै है । तहां क्रोधका उदय



होतैं पदार्थनिविषै अनिष्टपनौ वा ताका बुरा होना चाहै कोऊ मंदिरादि अचेतन पदार्थ बुरा लागै तब फोरना तोरना इत्यादि रूपकरि वाका बुरा चाहै । बहुरि शत्रुआदि अचेतन सचेतन पदार्थ बुरा लागै तब वाकौं बध बंधादिकरि वा मारनेकरि दुःख उपजाय ताका बुरा चाहै । बहुरि आप वा अन्य सचेतन अचेतन पदार्थ कोई प्रकार परिणए आपकौं सो परिणमन बुरा लागै तब अन्यथा परिणमावनेकरि तिस परिणमनका बुरा चाहै याप्रकार क्रोधकरि बुरा चाहनेकी इच्छा तौ होय बुरा होना भवितव्य आधीन है । बहुरि मानका उदय होतैं पदार्थविषै अनिष्टपनौं मानि ताकौं नीचा किया चाहै आप ऊंचा भया चाहै मल धूलिआदि अचेतन पदार्थनिविषै वृणा वा निरादरादिककरि तिनिकी हीनता आपकी उच्चता चाहै बहुरि पुरुषादिक सचेतन पदार्थानेकौं नमावना अपने आधीन करना इत्यादि रूपकरि तिनिकी हीनता आपकी उच्चता चाहै । बहुरि आप लोकावषै जैसे ऊंचा दीसै तैसे शृंगारादि करना वा धन खरचना इत्यादि रूपकरि औरनिकौं हीन दिखाय आप ऊंचा होना चाहै । बहुरि अन्य कोई आपतैं ऊंचा कार्य करै ताकौं कोई उपायकरि नीचा दिखावै अर आप नीचा कार्य करै ताकौं ऊंचा दिखावै या प्रकार मानकरि अपनी महंतताकी इच्छा तौ होय महंतता होनी भवितव्य आधीन है । बहुरि मायाका उदय होतैं कोई पदार्थकौं इष्ट मानि नानाप्रकार छलनिकरि ताकी सिद्धि किया चाहै रत्न सुवर्णादिक अचेतन पदार्थनिकी वा स्त्री दासी दासादि सचेतन पदार्थनिकी सिद्धिके अर्थि अनेक छल करै ठिगनैके अर्थि अपनी अनेक अवस्था करै वा अन्य अचेतन

सचेतन पदार्थनिकी अवस्था पलटावै इत्यादिरूप छलकरि अपना अभिप्राय सिद्ध किया चाहै या प्रकार मायाकरि इष्टसिद्धिके अर्थि छल तौ करै अर इष्टसिद्ध होना भवितव्य आधीन है । बहुरि लोभका उदय होतैं पदार्थनिकौं इष्ट मानि तिनकी प्राप्ति चाहै वस्त्राभरण धनधान्यादि अचेतन पदार्थनिकी तृष्णा होय, बहुरि स्त्री पुत्रादि सचेतन पदार्थनिकी तृष्णा होय, बहुरि आपकै वा अन्य सचेतन अचेतन पदार्थकै कोई परिणमन होना इष्ट मानि तिनिकौं तिस परिणमनरूप परिणमाया चाहै या प्रकार लोभकरि इष्टप्राप्तिकी इच्छा तौ होय अर इष्टप्राप्ति होनी भवितव्य आधीन है । ऐसैं क्रोधादिकका उदयकरि आत्मा परिणमै है, तहां एकएक कषाय च्यार च्यार प्रकार हैं अनंतानुबंधी १, अप्रत्याख्यानावरण २, प्रत्याख्यानावरण ३, संज्वलन ४, तहां जिनका उदयतैं आत्माकै सम्यक्त्व न होय स्वरूपपाचरण चारित्र न होय सकै ते अनंतानुबंधीकषाय हैं । जिनिका उदय होतैं देशचारित्र न होय तातैं किंचित् त्याग भी न होय सकै ते अप्रत्याख्यानावरण कषाय हैं । बहुरि जिनिका उदय होतैं सकलचारित्र न होय तातैं सर्वका त्याग न होय सकै ते प्रत्याख्यानावरण कषाय हैं । बहुरि जिनिका उदय होतैं सकलचारित्रकौं दोष उपज्या करै तातैं यथाख्यातचरित्र न होय सकै ते संज्वलन कषाय हैं । सो अनादि संसारअवस्थाविषै इनि च्यारचूं ही कषायनिका निरंतर उदय पाइए है । परम कृष्णलेश्यारूप तीव्रकषाय होय तहां भी अर शुक्रलेश्यारूप मंदकषाय होय तहां भी निरंतर च्यारचौंहीका उदय रहै है । जातैं तीव्रमंदकी अपेक्षा अनंतानुबंधी भेदआदि भेद नाहीं हैं

सम्यक्त्वादि घातनेकी अपेक्षा ए भेद हैं इनकी प्रकृतिनिका तीव्र अनुभाग उदय होतैं तीव्र क्रोधादिक हो हैं मंद अनुभाग उदय होतैं मंद उदय हो है । बहुरि मोक्षमार्ग भए इनि च्यारौविषै तीन दोय एकका उदय हो है पीछै च्यारचौका अभाव हो है बहुरि क्रोधादि च्यारचौ कषायनिविषै एकैकाल एकहीका उदय हो है । इनि कषायनिकै परस्पर कारणकार्यपनौ है । क्रोधकरि मानादिक हो जाय मानकरि क्रोधादिक हो जाय तातैं काहूकाल भिन्नता भासै काहूकाल न भासै है ऐसैं कषायरूप परिणमन जानना । बहुरि चारित्रमोहहीके उदयतैं नोकषाय होय है तहां हास्यका उदयकरि कहीं इष्टपनो मानि प्रफुल्लित हो है हर्ष मानै है बहुरि रतिका उदयकरि काहूकौं इष्ट मानि प्रीति करै है तहां आसक्त हो है । बहुरि अरतिका उदयकरि काहूकौं अनिष्ट मानि अप्रीति करै है तहां उद्वेगरूप हो है । बहुरि शोकका उदयकरि कहीं अनिष्टपनौ मानि दिलगीर हो है विषाद मानै है । बहुरि भयका उदयकरि किसीकौं अनिष्ट मानि तिसतैं डरै है वाका संयोग न चाहै है । बहुरि जुगुप्साका उदयकरि काहू पदार्थकौं अनिष्ट मानि ताकी घृणा करै है वाका वियोग चाहै है । ऐसैं ए हास्यादिक छह जानने । बहुरि वेदके उदयतैं याकै कामपरिणाम हो है तहां स्त्रीवेदके उदयकरि पुरुषसौं रमनेकी इच्छा हो है पुरुषवेदके उदयकरि स्त्रीसौं रमनेकी इच्छा हो है नपुंसकवेदके उदयकरि युगपत् दोऊनिसौं रमनेकी इच्छा हो है ऐसैं ए नव तौ नो कषाय हैं । क्रोधादिसारिखे बलवान ए नाही तातैं इनिकौं ईषत्कषाय कहैं हैं । यहां नोशब्द ईषत्वाचक जानना । इनिका उदय तिनि

क्रोधादिकनिकी साथि यथासंभव हो है। ऐसैं मोहके उदयतैं मिथ्यात्व वा कषायभाव हो हैं सो एही संसारके मूल हैं। इनि-हीकरि वर्तमानकालविषै जीव दुखी है अर अगामी कर्मबंधनके भी कारन एही हैं। बहुरि इनिहीका नाम राग द्वेष मोह है। तहां मिथ्यात्वका नाम मोह है जातैं तहां सावधानीका अभाव है। बहुरि मायालोभकषाय अर हास्य रति तीन वेदनिका नाम राग है। जातैं तहां इष्टबुद्धिकरि अनुराग पाइए है। बहुरि क्रोधमान-कषाय अर अरति शोक भय जुगुप्सानिका नाम द्वेष है जातैं तहां अनिष्टबुद्धिकरि द्वेष पाइए है। बहुरि सामान्यपनै सबहीका नाम मोह है। जातैं इनिविषै सर्वत्र असावधानी पाइए है। बहुरि अंतरायके उदयतैं जीव चाहै सो न होय। दान दिया चाहै देय न सकै। वस्तुकी प्राप्ति चाहै सो न होय। भोग किया चाहै सो न होय। उपभोग किया चाहै सो न होय। अपनी ज्ञानादि शक्तिकौं प्रगट किया चाहै सो प्रगट न होय—ऐसैं अंतरायके उदयतैं चाहै सो होय नाहीं। बहुरि तिसहीका क्षयोपशमतैं किंचिन्मात्र चाह्या भी हो है चाहिये तौ बहुत है परंतु किंचिन्मात्र चाह्या हुआ होय है। बहुत दान देना चाहै है, परन्तु थोड़ा ही दान देय सकै है। बहुत लाभ चाहै है परन्तु थोड़ा ही लाभ हो है। ज्ञानादिक शक्ति प्रगट हो है तहां भी अनेक बाह्य कारन चाहिए। या प्रकार घातिकर्मनिके उदयतैं जीवकै अवस्था हो है। बहुरि अघातिकर्मनिविषै वेदनीयके उदयकरि शरीरविषै बाह्य सुख दुःखका कारन निपजै है। शरीरविषै आरोग्यपनौ रोगीपनौ शक्तिवानपनौ दुर्बलपनौ इत्यादि अर क्षुधा तृषा रोग खेद

पीड़ा इत्यादि सुख दुःखनिके कारन हो हैं । बहुरि बाह्यविषै सुहावना ऋतु पवनादिक वा इष्टस्त्री पुत्रादिक वा मित्र धनादिक असुहावना ऋतु पवनादिक वा अनिष्टस्त्री पुत्रादिक वा शत्रु दरिद्र बध बंधनादिक सुखदुःखके कारन हो हैं । ए बाह्यकारन कहे तिनिविषै केई कारन तौ ऐसे हैं जिनिके निमित्तसौं शरीरकी अवस्था ही सुखदुःखकौं कारन हो है अर वै ही सुखदुःखकौं कारण हो है । बहुरि केई कारन ऐसे हैं जे आप ही सुखदुःखकौं कारन हो हैं ऐसे कारनका मिलना वेदनीयके उदयतैं हो है । तहां सातावेदनीयतैं सुखके कारन हो हैं अर असातावेदनीयतैं दुःखके कारन मिलैं । सो यहां ऐसा जानना—ए कारन ही तौ सुखदुःखकौं उपजावै नाहीं आत्मा मोहकर्मका उदयतैं आप सुखदुःख मानै है । तहां वेदनीयकर्मका उदयकै अर मोहकर्मका उदयकै ऐसा ही संबंध है । जब सातावेदनीयका निपजाया बाह्य कारन मिलै तब तौ सुखमाननेरूप मोहकर्मका उदय होय अर जब असातावेदनीयका निपजाया बाह्यकारन मिलै तब दुःखमाननेरूप मोहकर्मका उदय होय । बहुरि एक ही कारन काहूकौं सुखका काहूकौं दुःखका कारन हो है । जैसे काहूकै सातावेदनीयका उदय होतैं मिल्या जैसा वस्त्र सुखका कारन हो है तैसा ही वस्त्र काहूकौं असातावेदनीयका उदय होतैं मिल्या सो दुःखका कारन हो है । तातैं बाह्यवस्तु सुखदुःखका निमित्तमात्र ही है । सुख दुःख हो है सो मोहके निमित्ततैं हो है । निर्मोही मुनिनिकै अनेक ऋद्धिआदि परीसहादि कारन मिलैं तौ भी सुख दुःख न उपजै । मोही जीवकै कारन मिले वा विनाकारन मिले भी अपने

संकल्पहीतै सुखदुःख हुवा ही करै है । तहां भी तीव्रमोहीकै जिस कारनकौ मिले तीव्र सुखदुःख होय तिसही कारनकौ मिले मंदमोहीकै मंद सुखदुःख होय । तातै सुखदुःखका मूल बलवान कारन मोहका उदय है । अन्यवस्तु हैं सो बलवान कारन नाही । परंतु अन्यवस्तुकै अर मोही जीवकै परिणामनिके निमित्तनैमित्तिककी मुख्यता पाइए है । ताकरि मोहीजीव अन्य वस्तुहीकौ सुखदुःखका कारन मानै है । ऐसै वेदनीयकरि सुखदुःखका कारन निपजै है बहुरि आयुकर्मके उदयकरि मनुष्यादिपर्यायनिकी स्थिति रहै है । यावत् आयुका उदय रहै तावत् अनेक रोगादिक कारन मिलौ शरीरसौ संबंध न छूटै । बहुरि जब आयुका उदय न होय तब अनेक उपाय किए भी शरीरसौ संबंध रहै नाही, तिसहीकाल आत्मा अर शरीर जुदा होय । इस संसारविषै जन्म जीवन मरनका कारन आयुकर्म ही है । जब नवीन आयुका उदय होय तब नवीनपर्यायविषै जन्म हो है । बहुरि यावत् आयुका उदय रहै तावत् तिस पर्यायरूप प्राणनिके धारनतै जीवना हो है । बहुरि आयुका क्षय होय तब तिस पर्यायरूप प्राण छूटनतै मरण हो है । सहज ही ऐसा आयुकर्मका निमित्त है और कोई उपजावनहारा क्षपावनहारा रक्षाकरनेहारा है नाही ऐसा निश्चय करना । बहुरि जैसे नवीन वस्त्र पहरे कितेक काल पहरे रहै पीछे ताकौ छोड़ि अन्यवस्त्र पहरे तैसं जीव नवीन शरीर धरे कितेक काल धरे रहै पीछे ताकौ छोड़ि अन्य शरीर धरे है । तातै शरीरसंबंधअपेक्षा जन्मादिक हैं जीव जन्मादिरहित नित्य ही है । तथापि मोही जीवकै अतीत अनागतका विचार नाही तातै पर्याय-

पर्याय मात्र ही अपना अस्तित्व मानि पर्यायसंबंधी कार्यनिविधै ही तत्पर होय रह्या है । ऐसैं आयुकरि पर्यायकी स्थिति जाननी । बहुरि नामकर्मकरि यह जीव मनुष्यादिगतिनिविधै प्राप्त हो है तिस पर्यायरूप अपनी अवस्था हो है । बहुरि तहां त्रस स्थावरादि विशेष निपजै हैं । बहुरि तहां एकेंद्रियादि जातिकौ धारै है । इस जातिकर्मका उदयकै अर मतिज्ञानावरणका क्षयोपशमकै निमित्तनै-मित्तिकपना जानना जैसा क्षयोपशम होय तैसी जाति पावै । बहुरि शरीरका संबंध हो है तहां शरीरके परमाणू अर आत्माके प्रदेश-निका एक बंधान हो है अर संकोच विस्ताररूप होय शरीरप्रमाण आत्मा रहै है । बहुरि नोकर्मरूप शरीरविधै अंगोपागादिकका योग्य स्थान परिमाण लिए हो है । इसहीकरि स्पर्शन रसन आदि द्रव्यइंद्रिय निपजै हैं वा हृदयस्थानविधै आठ पांखड़ीका फूल्या-कमलकै आकार द्रव्यमन हो है । बहुरि तिस शरीरहीविधै आका-रादिकका विशेष होना अर वर्णादिकका विशेष होना अर स्थूल-सूक्ष्मत्वादिकका होना इत्यादि कार्य निपजै है सो ए शरीररूप परणए परमाणु ऐसैं परिणमै है । बहुरि श्वासोच्छ्वास वा स्वर निपजै हैं सो ए भी पुद्गलके पिंड हैं अर शरीरकौ एक बंधानरूप हैं । इनविधै भी आत्माके प्रदेश व्याप्त हैं । तहां श्वासोच्छ्वास तौ पवन है सो जैसैं आहारकौ ग्रहै नीहारकौ निकासै तब ही जीवनौ होय तैसैं बाह्यपवनकौ ग्रहै अर अभ्यंतरपवनकौ निकासै तब ही जीवितव्य रहै । तातैं श्वासोच्छ्वास जीवितव्यका कारन है । इस शरीरविधै जैसैं हाड़ मांसादिक हैं तैसैं ही पवन जानना । बहुरि जैसैं हस्तादिकसौ कार्य करिए तैसैं ही पवनतैं कार्य करिए है ।

मुखमें ग्रास धरचा ताकौं पवनतैं निगलिए है मलादिक पवनतैं ही बाहरि काढ़िए है तैसैं ही अन्य जानना । बहुरि नाड़ी वा वायुरोग वा बायगोला इत्यादि ए पवनरूप शरीरके अंग जानने । बहुरि खर है सो शब्द है, सो जैसैं बीणाकी तांतिकूं हलाए भाषारूपहोने योग्य पुद्गलस्कंध हैं ते साक्षर वा अनक्षर शब्दरूप परिणमै हैं तैसैं तालवा होठ इत्यादि अंगनिकौं हिलाए भाषापर्याप्तिविषै ग्रहे पुद्गलस्कंध हैं ते साक्षर वा अनक्षर शब्दरूप परिणमै हैं । बहुरि शुभ अशुभ गमनादिक हो हैं । इहां ऐसा जानना जैसैं दोगपुरुषनिकै इकदंडी बेड़ी है । तहां एक पुरुष गमनादि किया चाहै अर दूसरा भी गमनादि करै तौ गमनादि होय सक । दोऊनिविषै एक बैठि रहै तौ गमनादि होय सकै नाहीं अर दोऊनिविषै एक बलवान होय तौ दूसरेकौं भी घीसि ले जाय तैसैं आत्माकै अर शरीरादिकरूप पुद्गलकै एकक्षेत्रावगाहरूप बंधान है तहां आत्मा हलनचलनादि किया चाहै अर पुद्गल तिस शक्तिकरि रहित हुवा हलनचलन न करै वा पुद्गलविषै शक्ति पाइए है आत्माकी इच्छा न होय तौ हलनचलनादि न होय सकै । बहुरि इनिविषै पुद्गल बलवान होय हालै चालै तौ ताकी साथि विना इच्छा भी आत्मा आदि हालै चालै । ऐसैं हलन चलनादि होय सकै । बहुरि याका अपजसआदि (?) बाह्य निमित्त बनै है । ऐसैं ए कार्य निपजै हैं, तिनिकरि मोहके अनुसार आत्मा सुखी दुःखी भी हो है । नामकर्मके उदयतैं स्वयमेव ऐसे नानाप्रकार रचना हो है और कोई करनहारा नाहीं है । बहुरि तीर्थकरादि प्रकृति यहां हैं ही नाहीं । बहुरि गोत्रकर्मकरि ऊंचा नीचाकुलविषै उपजना हो है तहां अपना



अधिकहीनपना प्राप्त हो है मोहके निमित्ततैं तिनिकरि आत्मा सुखी दुखी भी हो है । ऐसैं अघातिकर्मनिका निमित्ततैं अवस्था हो है । या प्रकार इस अनादि संसारविषै घाति अघातिक कर्मनिका उदयकै अनुसार आत्मकै अवस्था हो है सो हे भव्य अपने अंत-रंगविषै विचारि देखि ऐसैं ही है कि नाहीं सो ऐसा विचार किए ऐसा ही प्रतिभासै है । बहुरि जो ऐसैं है तौ तू यह मानि भेरै अनादि संसाररोग पाइए है, ताके नाशका मोकों उपाय करना । इस विचारतैं तेरा कल्याण होगा ।

इति श्रीमोक्षमार्गप्रकाशक नाम शास्त्रविषै संसार अवस्थाका  
निरूपक द्वितीय अधिकार सम्पूर्ण भया ॥ १ ॥

दोहा ।

सो निजभाव सदा सुखद, अपनों करो प्रकाश ॥

जो बहुविधि भवदुखनिकौ, करि है सत्तानाश ॥ १ ॥

अथ इस संसारअवस्थाविषै नानाप्रकार दुःख हैं तिनिका वर्णन करिए है—जातैं जो संसारविषै भी सुख होय तौ संसारतैं मुक्त होनेका उपाय काहेकों करिए । इस संसारविषै अनेक दुःख हैं, तिसहीतैं संसारतैं मुक्त होनेका उपाय कीजिए है । बहुरि जैसैं वैद्य है सो रोगका निदान अर ताकी अवस्थाका वर्णनकरि रोगीकों संसाररोगका निश्चय कराय पीछैं तिसका इलाज करनेकी रुचि करावै है तैसैं यहां संसारका निदान वा ताकी अवस्थाका वर्णनकरि संसारीकों संसार रोगका निश्चय कराय अब तिनिका उपायकरनेकी रुचि कराइए है । जैसैं रोगी रोगतैं दुखी होय रक्षा है परंतु ताका मूलकारण जानैं नाहीं सांचा उपाय जानैं नाहीं

अर दुःख भी सखा जाय नाही तब आपकों भासे सो ही उपाय करै तातैं दुःख दूरि होय नाही । तब तड़फि तड़फि परवशहुवा तिनि दुःखनिकों सहै है । याकों यहां दुःखका मूलकारन बताइए अर दुःखका स्वरूप बताइए अर तिनि उपायनिकूं झूठे दिखाइए तौ सांचे उपाय करनेकी रुचि होय तातैं यह वर्णन इहां करिये है । वहां सर्व दुःखनिका मूलकारन मिथ्यादर्शन अज्ञान असंयम है । जो दर्शनमोहके उदयतैं भया अतत्त्वश्रद्धान मिथ्यादर्शन ताकरि वस्तुस्वरूपकी यथार्थ प्रतीति न होय सकै है अन्यथा प्रतीति हो है । बहुरि तिस मिथ्यादर्शनहीके निमित्ततैं क्षयोपशमरूपज्ञान है सो अज्ञान हो रखा है । ताकरि यथार्थ वस्तुस्वरूपका जानना न हो है अन्यथा जानना हो है । बहुरि चरित्रमोहके उदयतैं भया कषायभाव ताका नाम असंयम है ताकरि जैसा वस्तुका स्वरूप है तैसा नाही प्रवर्त्तै है अन्यथा प्रवर्त्तै है । ऐसैं ये मिथ्यादर्शनादिक हैं तेई सर्व दुःखनिका मूलकारन हैं । कैसैं सो दिखाइए है—मिथ्यादर्शनादिककरि जीवकै स्वपरविवेक नाही होय सकै है एक आप आत्मा अर अनंत पुद्गलपरमाणुमय शरीर इनिका संयोगरूप मनुष्यादिपर्याय निपजै है तिस पर्यायहीकों आपो मानै है । बहुरि आत्माका ज्ञानदर्शनादि स्वभाव है ताकरि किंचित् जानना देखना हो है । अर कर्मउपाधितैं भए क्रोधादिक-भाव तिनिरूप परिणाम पाइए है । बहुरि शरीरका स्पर्श रस गंध वर्ण स्वभाव है सो प्रगट है अर स्थूल कृषादिक होना वा स्पर्शादिकका पलटना इत्यादि अनेक अवस्था हो है । इन सबनिकों अपना स्वरूप जानै है । तहां ज्ञानदर्शनकी प्रवृत्ति इंद्रिय मनके

द्वारा हो है ताँतै यह मानै है त्वचा जीभ नासिका नेत्र कान मन ए मेरे अंग हैं । इनिकरि मैं देखौ जानौ हौं ऐसी मानितैं इंद्रियनिविषै प्रीति पाइए है । बहुरि मोहके आवेशतैं तिनि इंद्रियनिकै द्वारा विषम ग्रहणकरनेकी इच्छा हो है । बहुरि तिनिविषै इनिका ग्रहण भए तिस इच्छाके मिटनेतैं निराकुल हो है तब आनंद मानै है । जैसे कूकरा हाड़ चावै ताकरि अपना लोही निकसै ताका स्वाद लेय ऐसे मानै यह हाड़का स्वाद है । तैसेँ यह जीव विषयनिकौ जानै ताकरि अपना ज्ञान प्रवर्तै ताका स्वाद लेय ऐसे मानै यह विषयका स्वाद है सो विषयमें तौ स्वाद है नाहीं, आप ही इच्छाकरी थी आप ही जानि आप ही आनंद मान्या । परंतु मैं अनादि अनंत ज्ञानस्वरूप आत्मा हौं, ऐसा निःकेवल-ज्ञानका तौ अनुभवन है नाहीं । बहुरि मैं नृत्य देख्या राग सुन्या फूल सूंध्या ~~संस्कार~~ जान्या मोकौ यह जानना इस प्रकार ज्ञेयमिश्रित ज्ञानका अनुभवन है ताकरि विषयनिकरि ही प्रधानता भासै है । ऐसेँ इस जीवके मोहके निमित्ततैं विषयनिकी इच्छा पाइए है सो इच्छा तौ त्रिकालवर्ती सर्वविषयनिके ग्रहण करनेकी है मैं सर्वकौं स्पर्शौं सर्वकौं स्वादौं सर्वकौं सूंधौं सर्वकौं देखौं सर्वकौं सुनौं सर्वकौं जानौं सो इच्छा तौ इतनी है अर शक्ति इतनी ही है जो इंद्रियनिकै सन्मुख भया वर्तमान स्पर्श रस गंध वर्ण शब्द तिनिविषै काहूकौं किंचिन्मात्र ग्रहै वा स्मरणादिकतैं मनकरि किछू जानै सो भी बाह्य अनेक कारन मिले सिद्ध होय । ताँतैं इच्छा कबहूँ पूरन होय नाहीं । ऐसी इच्छा तौ केवलज्ञान भए संपूर्ण होय । क्षयो-पशमरूप इंद्रियकरि तौ इच्छा पूर्ण होय नाहीं ताँतैं मोहके

निमित्ततैं इंद्रियनिकै अपने अपने विषय ग्रहणकी निरंतर इच्छा रहिबो ही करै ताकरि आकुलित हुवा दुःखी हो रखा है । ऐसा दुःखी हो रखा है जो एक कोई विषयका ग्रहणकै अर्थि अपना मरनको भी नाहीं गिनै है । जैसे हाथीकै कपटकी हथनीका शरीर स्पर्शनेकी अर मच्छकै बड़सीकै लग्या मांस खादनेकी अर अमरकै कमलसुगंध सूंघनेकी अर पतंगकै दीपकका वर्ण देखनेकी अर हिरणकै राग सुननेकी इच्छा ऐसी हो है जो तत्काल मरन भासै तौ भी मरनकौ गिनै नाहीं विषयनिका ग्रहण करै । जातैं मरण होनैतैं इंद्रियनिकरि विषयसेवनकी पीड़ा अधिक भासै है । इनि इंद्रियनिकी पीड़ाकरि सर्व जीव पीड़ितरूप निर्विचार होय जैसे कोऊ दुखी पर्वततैं गिरि पड़ै तैसें विषयनिविषै झंपापात ले हैं । नानाकष्टकरि धनकौ उपजावैं ताकौ विषयके अर्थि खोवैं । बहुरि विषयनिके अर्थि जहां मरन होता जानै तहां भी जाय नरकादिककौ कारण जे हिंसादिक कार्य तिनिकौ करैं वा क्रोधादि कषायनिकौ उपजावैं सो कहा करैं इंद्रियनिकी पीड़ा सही न जाय तातैं अन्य विचार किछू आवता नाहीं । इस पीड़ाहीकरि पीड़ित भए इंद्रादिक हैं ते भी विषयनिविषै अति आसक्त हो रहे हैं । जैसे खाजि रोगकरि पीड़ित हुवा पुरुष आसक्त होय खुजावै है पीड़ा न होय तौ काहेकौ खुजावै, तैसें इंद्रियरोगकरि पीड़ित भए इंद्रादिक आसक्त होय विषय सेवन करैं हैं । पीड़ा न होय तौ काहेकौ विषय सेवन करैं ? ऐसें ज्ञानावरण दर्शनावरणका क्षयो-पशमतैं भया इंद्रियादिजनित ज्ञान है सो मिथ्यादर्शनादिकके निमित्ततैं इच्छासहित होय दुःखका कारण भया है । अब इस दुःख दूर होनेका उपाय यह जीव कहा करै है सो कहिए है,—

इंद्रियनिकरि विषयनिका ग्रहण भए मेरी इच्छा पूरन होय  
 ऐसा जानि प्रथम तौ नानाप्रकार भोजनादिकनिकरि इन्द्रियनिकौं  
 प्रबल करै है अर ऐसे ही जानै है जो इंद्रिय प्रबल रहैं मेरै विषय  
 ग्रहणकी शक्ति विशेष हो है । बहुरि तहां अनेक बाह्यकारन  
 चाहिए है तिनिका निमित्त मिलावै है । बहुरि इंद्रिय हैं ते विष-  
 यकौं सन्मुख भए ग्रहैं तातैं अनेक बाह्य उपायकरि विषयनिका  
 अर इंद्रियनिका संयोग मिलावै है नानाप्रकार वस्त्रादिकका वा  
 भोजनादिकका वा पुष्पादिकका वा मंदिर आभूषणादिकका वा  
 गायक वादित्रादिकका संयोग मिलावनेके अर्थि बहुत खेदखिन्न  
 हो है । बहुरि इन इंद्रियनिके सन्मुख विषय रहै तावत् तिस-  
 विषयका किंचित्स्पष्ट जानपना रहै । पीछैं मनद्वारै सरणमात्र रहता  
 जाय । कालव्यतीत होते सरण भी मंद होता जाय तातैं तनि-  
 विषयनिकौं अपने आधीन राखनेका उपाय करै । अर शीघ्र शीघ्र  
 तिनिका ग्रहण किया करै बहुरि इंद्रियनिकै तौ एककालविषै एक  
 विषयहीका ग्रहण होय अर यह बहुत बहुत ग्रहण किया चाहै,  
 तातैं आखता होय शीघ्र शीघ्र एक विषयकौ छोड़ि औरकौं ग्रहै ।  
 बहुरि वाकौं छोड़ि औरकौं ग्रहै । ऐसे हापटा मारै है । बहुरि जो  
 उपाय याकौं भासै है सो करै है सो यह उपाय झूठा है । जातैं  
 प्रथम तो इनि सबनिका ऐसे ही होना अपने आधीन नाहीं,  
 महाकठिन है । बहुरि कदाचित् उदयअनुसारि ऐसे ही विधि मिलै  
 तौ इंद्रियनिकौं प्रबल किए किछू विषयग्रहणकी शक्ति बधै नाहीं ।  
 यह शक्ति तौ ज्ञानदर्शन बंधे बंधै । सो यह कर्मका क्षयोपशमकै

आधीन है। किसीका शरीर पुष्ट है ताकै ऐसी शक्ति घाटि देखिए है। काहूकै शरीर दुर्बल है ताकै अधिक देखिए है। तातैं भोजनादिककरि इंद्रिय पुष्ट किए किछू सिद्धि है नाहीं। कषायादि घटनेतैं कर्मका क्षयोपशम भए ज्ञानदर्शन बधै तब विषयग्रहणकी शक्ति बधै है। बहुरि विषयनिका संयोग मिलवै सो बहुतकाल-ताई रहता नाहीं अथवा सर्व विषयनिका संयोग मिलता ही नाहीं। तातैं यह आकुलता रहिबो ही करै। बहुरि तिनिविषयनिकौं अपने आधीन राखि शीघ्र शीघ्र ग्रहण करै सो वे आधीन रहते नाहीं। वे तौ जुदे द्रव्य अपने आधीन पारिणमै हैं, वा कर्मोदयके आधीन हैं। सो ऐसा कर्मका बंध यथायोग्य शुभभाव भए होय। फिर पीछे उदय आवै सो प्रत्यक्ष देखिए है। अनेक उपाय करतैं भी कर्मका निमित्त विना सामग्री मिलै नाहीं। बहुरि एक विषयकौं छोड़ि अन्यका ग्रहणकौं ऐसैं हापटा मारै है सो कहा सिद्ध हो है। जैसे मणकी भूखवालेकौं कण मित्या तौ भूख कहा मिटै, तैसें सर्वका ग्रहणकी जाकै इच्छा ताकै एक विषयका ग्रहण भए इच्छा कैसें मिटै? इच्छा मिटे विना सुख होता नाहीं। तातैं यह उपाय झूठा है। कोऊ पूछै कि इस उपायतैं केई जीव सुखी होते देखिए है सर्वथा झूठ कैसें कहो हौ ताका समाधान,—

सुखी तौ न हो है भ्रमतैं सुख मानै है। जो सुखी भया तौ अन्य विषयनिकी इच्छा कैसें रहैगी। जैसे रोग मिटे अन्य औषध काहेकौं चाहै तैसें दुःखमिटे अन्य विषयकौं काहेकौं चाहै। तातैं विषयका ग्रहणकरि इच्छा थँभि जाय तौ हम सुख मानै, सो तौ यावत् जो विषय ग्रहण न होय तावत् काल तौ तिसकी इच्छा

रहै अर जिससमय ताका ग्रहण भया तिस ही समय अन्यविषय ग्रहणकी इच्छा होती देखिए है तौ यह सुख मानना कैसैं है जैसे कोऊ महा क्षुधावान् रंक ताकौं एक अन्नका कण मिल्या ताका भक्षणकरि चैन मानैं तैसैं यह महातृष्णावान् याकौं एक विषयका निमित्त मिल्या ताका ग्रहणकरि सुख मानै है । परमार्थतैं सुख है नाहीं । कोऊ कहै जैसे कणकणकरि अपनी भूख भेटै तैसैं एक एक विषयका ग्रहणकरि अपनी इच्छा पूरण करै तौ दोष कहा ? ताका समाधान,—

जो कण भेले होंय तौ ऐसैं ही मानै, परंतु जब दूसरा कण मिलै तब तिस कणका निर्गमन होय जाय तौ कैसैं भूख भिटै । तैसैं ही जाननेविषै विषयनिका ग्रहण भेले होता जाय तौ इच्छा पूरण होय जाय परंतु जब दूसरा विषय ग्रहण करै तब पूर्वविषय ग्रहण क्रिया था ताका जानना रहै नाहीं, तौ कैसैं इच्छा पूरण होय ? इच्छा पूरण भए विना आकुलता भिटै नाहीं । आकुलता भिटै विना सुख कैसैं कब्हा जाय । बहुरि एक विषयका ग्रहण भी मिथ्यादर्शनादिकका सद्भावपूर्वक करै है । तातैं आगामी अनेक दुखका कारन कर्म बंधै है । जातैं यह वर्तमानविषै सुख नाहीं आगामी सुखका कारन नाहीं तातैं दुःख ही है । सोई प्रवचनसार-विषै कब्हा है,—

“सपरं बाधासहिदं बुच्छीणं बंधकारणं विसमं ।

जं इंदिएहिं लद्धं तं सोक्खं दुक्खमेव वद्धाधा(?) ॥१॥

जो इंद्रियनिकरि पाया सुख सो पराधीन है बाधासहित है विनाशीक है बंधका कारण है सो ऐसा सुख तैसा दुःख ही है ।

विवमरै

ऐसैं इस संसारीकरि किया उपाय झूठा जानना । तौ सांचा उपाय कहा ? जब इच्छा तौ दूरि होय अर सर्व विषयनिका युगपत् ग्रहण रखा करै तब यह दुख मिटै । सो इच्छा तौ मोह गए मिटै और सबका युगपत्ग्रहण केवलज्ञान भए होइ । सो इनका उपाय सम्यग्दर्शनादिक है सोई सांचा उपाय जानना । ऐसैं तौ मोहके निमित्ततैं ज्ञानावरण दर्शनावरणका क्षयोपशम भी दुःख-दायक है ताका वर्णन किया । इहां कोऊ कहै, ज्ञानावरण दर्श-नावरणका उदयतैं जानना न भया ताकूं दुःखका कारण कहौ क्षयोपशमकौं काहेकौं कहौ । ताका समाधान,—

जो जानना न होना दुःखका कारन होय तौ पुद्गलकै भी दुःख ठहरै । तातैं दुःखका मूलकारण तौ इच्छा है सो इच्छा क्षयोपशमहीतैं हो है, तातैं क्षयोपशमकौं दुःखका कारन कखा है परमार्थतैं क्षयोपशम भी दुःखका कारन नाहीं । जो मोहतैं विषयग्रहणकी इच्छा है सोई दुःखका कारन जानना । बहुरि मोहका उदय है सो दुःखरूप ही है । कैसैं सो कहिए है,—

प्रथम तौ दर्शनमोहके उदयतैं मिथ्यादर्शन हो है ताकरि जैसें याकै श्रद्धान है, तैसें तौ पदार्थ है नाहीं जैसें पदार्थ है तैसें यह मानै नाहीं, तातैं याकै आकुलता ही रहै । जैसें बाउलाकौं काहनै बख पहराया । वह बाउला तिस बखकौं अपना अंग जानि आपकूं अर शरीरकौं एक मानै । वह बख पहरावनेवालैकै आधीन है, सो वह कबहू फारै, कबहू जोरै, कबहू खोंसै, कबहू नवा पहरावै इत्यादि चरित्र करै । यह बाउला तिसकौं अपनैं आधीन मानैं बाकी पराधीन क्रिया होइ तातैं महाखेदखिन्न होय तैसें इस जीवकौं कर्मोदयनैं



शरीरसंबंध कराया । यह जीव तिस शरीरकों अपना अंग जानि आपकों अर शरीरकों एक मानै, सो शरीर कर्मके आधीन कबहू कृष होय कबहू स्थूल हांय कबहू नष्ट होय कबहू नवीन निपजै इत्यादि चरित्र होय । यह जीव तिसकों आपके आधीन जानै बाकी पराधीन क्रिया होय ताँ महाखेदखिन्न हो है । बहुरि जैसेँ जहां बाउला तिष्ठै था तहां मनुष्य घोटक धनादिक कहींतैं आनि उतरैं यह बाउला तिनकों अपने जानै । वे तौ उनहीके आधीन कोऊ आवै कोऊ जावै कोऊ अनेक अवस्थारूप परिणमै । यह बाउला तिनकों अपने आधीन मानै उनकी पराधीन क्रिया होइ तब खेदखिन्न होइ । तैसेँ यह जीव जहां पर्याय धरै तहां स्वयमेव पुत्र घोटक धनादिक कहींतैं आनि प्राप्त भएँ, यह जीव तिनकों अपने जानै सो वे तौ उनहीके आधीन कोऊ आवै कोऊ जावै कोऊ अनेक अवस्थारूप परिणमै । यह जीव तिनकों अपने आधीन मानै उनकी पराधीन क्रिया होइ तब खेदखिन्न होय । इहां कोऊ कहै काहूकालविषै शरीरकी वा पुत्रादिककी इस जीवके आधीन भी तौ क्रिया होती देखिए है तब तो सुखी हो है । ताका समाधान,—

शरीरादिककी भवितव्यकी अर जीवकी इच्छाकी विधि मिलै कोई एक प्रकार जैसेँ यह चाहै तैसेँ परिणमै ताँ काहू कालविषै वाहीका विचार होतै सुखकी सी आभासा होइ परंतु सर्व ही तौ सर्वप्रकार यह चाहै तैसेँ न परिणमै । ताँ अभिप्राय-विषै तौ अनेक आकुलता सदाकाल रहबो ही करै । बहुरि कोई कालविषै कोई प्रकार इच्छाअनुसारि परिणमता देखिकरि

यह जीव शरीर पुत्रादिकविषै अहंकार ममकार करै है । सो इस बुद्धिकरि तिनिके उपजावनेकी वा बधावनेकी वा रक्षा करनेकी चिंताकरि निरंतर व्याकुल रहै है । नानाप्रकार कष्ट सहकरि भी तिनिका भला चाहै है । बहुरि जो विषयनिकी इच्छा हो है कषाय हो है बाह्य सामग्रीविषै इष्ट अनिष्टपनों मानै है उपाय अन्यथा करै है सांचा उपायकों न श्रद्धहै है अन्यथा कल्पना करै है सो इनि सबनिका मूलकारन एक मिथ्यादर्शन है । याका नाश भए सबनिका नाश होइ जाय तातैं सब दुखनिका मूल यह मिथ्यादर्शन है । बहुरि इस मिथ्यादर्शनके नाशका उपाय भी नाहीं करै है । अन्यथा श्रद्धानकों सत्यश्रद्धान मानै उपाय काहेकों करै । बहुरि संज्ञी पंचेंद्रिय कदाचित् तत्त्वनिश्चय करनेका उपाय विचारै । तहां अभाग्यतैं कुदेव कुगुरु कुशास्त्रका निमित्त बनै तौ अतत्त्वश्रद्धान पुष्ट होइ जाय । यह तौ जानै इनतैं मेरा भला होगा, वे ऐसा उपाय करैं जाकरि यह अचेत होय जाय । वस्तु-स्वरूपका विचार करनेका उद्यमी भया सो विपरीत विचारविषै दृढ होइ जाय । तब विषयकषायकी वासना बधनैतैं अधिक दुःखी होय । बहुरि कदाचित् सुदेव सुगुरु सुशास्त्रका भी निमित्त बनि जाय तौ तहां तिनिका निश्चय उपदेशकों तौ श्रद्धहै नाहीं व्यवहारश्रद्धानकरि अतत्त्वश्रद्धानी ही रहै । तहां मंदकषाय वा विषय इच्छा घटै तौ थोरा दुखी होय पीछैं बहुरि जैसाका तैसा होइ जाय । तातैं यह संसारी उपाय करै सो भी झूठा ही होय । बहुरि इस संसारीके एक यह उपाय है जो आपकै जैसा श्रद्धान है तैसैं पदार्थनिकों परिणमाया चाहै सो वै परिणमै तौ याका सांचा

श्रद्धान होइ जाय । परंतु अनादिनिधन वस्तु जुदे जुदे अपनी मर्यादा लिये परिणमै हैं । कोऊ कोऊकै आधीन नाहीं । कोऊ किसीका परिणमाया परिणमै नाहीं । तिनिकों परिणमाया चाहै सो उपाय नाहीं । यह तौ मिथ्यादर्शन ही है । तौ सांचा उपाय कहा है? जैसे पदार्थनिका स्वरूप है तैसें श्रद्धान होइ तौ सर्व दुःख दूर होइ जाय । जैसे कोऊ मोहित होय मुरदाकौ जीवता मानै वा जिवाया चाहै सो आप ही दुखी हो है । बहुरि वाकौ मुरदा मानना अर यह जिवाया जीवैगा नाहीं ऐसा मानना सो ही तिस दुःख दूर होनेका उपाय है । तैसें मिथ्यादृष्टी होइ पदार्थनिकों अन्यथा मानै अन्यथा परिणमाया चाहै तौ आप ही दुखी हो है । बहुरि उनकौ यथार्थ मानना, अर ए परिणमाए अन्यथा परिणमैगे नाहीं; ऐसा मानना सो ही तिस दुःखके दूर होनेका उपाय है । भ्रमजनित दुःखका उपाय भ्रम दूर करना ही है । सो भ्रम दूर होनैतैं सम्यक्श्रद्धान होय सो ही सत्य उपाय जानना । बहुरि चारित्रमोहके उदयतैं क्रोधादि कषायरूप वा हास्यादि नोकषायरूप जीवके भाव हो हैं । तब यह जीव क्लेशवान् होइ दुखी होता संता विह्वल होइ नाना कुकार्यनिविधै प्रवर्तै है । सोई दिखाइए है—जब याकै क्रोधकषाय उपजै, तब अन्यका बुरा करनेकी इच्छा होइ । बहुरि ताकेअर्थि अनेक उपाय विचारै । मरमच्छेद गालीप्रदानादिरूप वचन बोलै । अपने अंगनिकरि वा शस्त्रपाषाणादिकरि घात करै । अनेक कष्ट सहनेकरि वा धनादि खर्चनेकरि वा मरणादिकरि अपना भी बुरा करि अन्यका बुरा करनेका उद्यम करै अथवा औरनिकरि बुरा होता जानै तौ औरनिकरि बुरा करावै । वाका स्वयमेव बुरा

होय तौ अनुमोदना करै। वाका बुरा भए अपना किछू भी प्रयोजन-सिद्धि न होय तौ भी वाका बुरा करै। बहुरि क्रोध होतैं कोई पूज्य वा इष्ट भी बीचि आवै तौ उनकौं भी बुरा कहै। मारने लगि जाय, किछू विचार रहता नाहीं। बहुरि अन्यका बुरा न होइ तौ अपने अंतरंगविषै आप ही बहुत संतापवान होइ वा अपने ही अंगनिका घात करै वा विषादिकरि मरि जाय ऐसी अवस्था क्रोध होतैं हो है। बहुरि जब याकै मानकषाय उपजै तब औरनिकौं नीचा वा आपकौं ऊंचा दिखावनेकी इच्छा होइ। बहुरि ताके अर्थि अनेक उपाय विचारै अन्यकी निंदा करै आपकी प्रशंसा करै। वा अनेक प्रकारकरि औरनिकी महिमा मिटावै आपकी महिमा करै। महाकष्टकरि धनादिकका संग्रह किया ताकौं विवाहादि कार्यनिविषै खरचै वा देना करि भी खचैं। मूए पीछैं हमारा जस रहैगा ऐसा विचारि अपना मरन करिकैं भी अपनी महिमा बधावै। जो अपना सन्मानादि न करै ताकौं भयादिक दिखाय दुःख उपजाय अपना सन्मान करावै। बहुरि मान होतैं कोई पूज्य बड़े होहिं तिनिका भी सन्मान न करै किछू विचार रहता नाहीं। बहुरि अन्य नीचा आप ऊंचा न दीसै तौ अपने अंतरंगविषै आप बहुत संतापवान् होय वा अपने अंगनिका घात करै वा विषादिकरि मरि जाय ऐसी अवस्था मान होतैं हो है। बहुरि जब याकै मायाकषाय उपजै, तब छलकरि कार्य सिद्ध करनेकी इच्छा होय। बहुरि ताके अर्थि अनेक उपाय विचारै, नानाप्रकार कपटके वचन कहै, कपटरूप शरीरकी अवस्था करै, बाह्य वस्तुनिकौं अन्यथा दिखावै, बहुरि जिनविषै अपना मरन जानै

ऐसे भी छल करै बहुरि कपट प्रगट भए अपना बहुत बुरा होइ मरनादिक होइ तिनिकौं भी न गिनै । बहुरि माया होतैं कोई पूज्य वा इष्टका भी संबन्ध बनें तौ उनस्यौं भी छल करै, किछू विचार रहता नाहीं । बहुरि छलकरि कार्यसिद्धि न होइ तौ आप-बहुत संतापवान होय, अपने अंगनिका घात करै, वा विषादिकरि मरि जाय । ऐसी अवस्था माया होतैं हो है । बहुरि जब याकै लोभ कषाय उपजै तब इष्टपदार्थका लाभकी इच्छा होय ताकै अर्थ अनेक उपाय विचारै । ताके साधनरूप वचन बोलै । शरीरकी अनेक चेष्टा करै । बहुत कष्ट सहै । सेवा करै विदेशगमन करै जाकरि मरन होता जानै सो भी कार्य करै । घना दुःख जिन-विषै उपजै ऐसा प्रारंभ करै । बहुरि लोभ होतैं पूज्य वा इष्टका भी कार्य होय तहां भी अपना प्रयोजन साधै किछू विचार रहता नाहीं । बहुरि तिस इष्टवस्तुकी प्राप्ति भई है ताकी अनेकप्रकार रक्षा करै है । बहुरि इष्ट वस्तुकी प्राप्ति न होइ वा इष्टका वियोग होइ तौ आप बहुत संतापवान होइ अपने अंगनिका घात करै वा विषादिकरि मरि जाय । ऐसी अवस्था लोभ होतैं हो है । ऐसैं कषायनिकरि पीड़ित हूवा इन अवस्थानिविषै प्रवर्त्तै है । बहुरि इनि कषायनिकी साथि नोकषाय हो हैं । जहां जब हास्य कषाय होइ तब आप विकसित होइ प्रफुल्लित होइ सो यह ऐसा जानना जैसा बायवालेका हंसना नाना रोगकरि आप पीड़ित है, कोई कल्पनाकरि हंसने लागि जाय है । ऐसैं ही यह जीव अनेक पीड़ासहित है कोई झूठी कल्पनाकरि आपका सुहावताकार्य मानि हर्ष मानै है । परमार्थतैं दुखी ही है । सुखी तौ कषायरोग

मिटै होगा। बहुरि जब रति उपजै है, तब इष्ट वस्तुविषै अतिआसक्त हो है। जैसें बिल्ली मूंसाकों पकरि आसक्त हो है। कोऊ मारै तौ भी न छोरे। सो इहां इष्टपना है। बहुरि वियोग होनेका अभिप्रायलिये आसक्तता हो है तातैं दुःख ही है। बहुरि जब अरति उपजै तब अनिष्ट वस्तुका संयोग पाय महा व्याकुल हो है। अनिष्टका संयोग भया सो आपकूं सुहावता नाहीं। सो यह पीड़ा सही न जाय तातैं ताका वियोग करनेको तड़फड़ै है सो यह दुःख ही है। बहुरि जब शोक उपजै है तब इष्टका वियोग वा अनिष्टका संयोग होतैं अतिव्याकुल होइ संताप उपजावै रोवै पुकारै असावधान होइ जाय अपना अंगघात करै मरि जाय। किछू सिद्धि नाहीं तौ भी आप ही महादुःखी हो है। बहुरि जब भय उपजै है तब काहूको इष्टवियोग अनिष्टसंयोगका कारन जानि डरै अतिविह्वल होइ भागै वा छिपै वा सिथिल होइ जाइ कष्ट होनेके ठिकानै प्राप्त होइ वा मरि जाय सो यह दुःखरूप ही है। बहुरि जुगुप्सा उपजै है तब अनिष्ट वस्तुकों वृणा करै। ताका तौ संयोग भया आप वृणाकरि भाग्या चाहै खेदखिन्न होइ महादुःखकों पावै है। बहुरि तीनूं वेदनिकरि जब काम उपजै है तब पुरुषवेदकरि स्त्रीसहित रमनेकी अर स्त्रीवेदकरि पुरुषसहित रमनेकी अर नपुंसकवेदकरि दोऊनिस्यौं रमनेकी इच्छा हो है। तिसकरि अति व्याकुल हो है। आताप उपजै है। निर्लज्ज हो है धन खचै है। अपजसकों न गिनै है। परंपरा दुःख होइ वा दंडादिक होइ ताकों न गिनै है। काम पीड़तैं बाउल्ल हो है। मरि जाय है। सो रसग्रंथनिविषै कामकी दश दशा कही हैं।

तहां बाउला होना मरन होना लिख्या है । वैद्यकशास्त्रनिमें ज्वरके भेदनिविषै कामज्वर मरनका कारन लिख्या है । प्रत्यक्ष कामकरि मरनपर्यंत होते देखिए है । कामांधकै किछू विचार रहता नहीं । पिता, पुत्री वा मनुष्य तिर्यंचणी इत्यादितैं रमने लागि जाय है । ऐसी कामकी पीड़ा महादु खरूप है । या प्रकार कषाय वा नोकषायनिकरि अवस्था हो है । इहां ऐसा विचार आवै है जो इनि अवस्थानिविषै न प्रवर्तै तौ क्रोधादिक पीड़ें अर इनि अवस्थानिविषै प्रवर्तै तौ मरनपर्यंत कष्ट होइ । तहां मरनपर्यंत कष्ट तौ कबूल करिए है, अर क्रोधादिककी पीड़ा सहनी कबूल न करिए है । तातैं यह निश्चय भया जो मरनादिकतैं भी कषायनिकी पीड़ा अधिक है । बहुरि जब याकै कषायका उदय होइ, तब कषाय किए विना रह्या जाता नहीं । बाह्य कषायनिके कारन आय मिलैं तौ उनकै आश्रय कषाय करै । न मिलैं तौ आप कारन बनावै । जैसे व्यापारादि कषायनिका कारन न होइ तौ जूआ खेलना वा अन्य क्रोधादिकके कारन अनेक ख्याल खेलना वा दुष्टकथा कहनी सुननी इत्यादिक कारन बनावै है । बहुरि काम क्रोधादि पीड़ें शरीरविषै तिनिरूप कार्य करनेकी शक्ति न होइ तौ औषधि बनावै अन्य अनेक उपाय करै । बहुरि कोई कारन बनै नहीं तौ अपने उपयोगविषै कषायनिकौ कारणभूत पदार्थनिका चिंतवनि- करि आप ही कषायरूप परिणमैं । ऐसैं यह जीव कषायभावनिकरि पीड़ित हुवा महान् दुःखी हो है । बहुरि जिस प्रयोजनकौ लिये कषायभाव भया है तिस प्रयोजनकी सिद्धि होय तौ यह मेरा दुख दूर होय अर मोकूं सुख होइ । ऐसैं विचारि तिस प्रयोजनकी

सिद्धि होनेके अर्थि अनेक उपाय करना सो तिस दुःख दूर होनेका उपाय मानै है । सो इहां कषायभावनितैं जो दुःख हो है, सो तो सांचा ही है । प्रत्यक्ष आप ही दुखी हो है । बहुरि यह उपाय करै है सो झूठा है । काहेतैं सो कहिए हैं—क्रोधविषै तौ अन्यका बुरा करना, मानविषै औरनिकूं नीचा करि आप ऊंचा होना, मायाविषै छलकरि कार्यसिद्धि करना, लोभविषै इष्टका पावना, हास्यविषै विकसित होनेका कारन बन्धा रहना, रतिविषै इष्टसंयोगका बन्धा रहना, अरतिविषै अनिष्टका दूरि होना, शोकविषै शोकका कारन मिटना, भयविषै भयका मिटना, जुगुप्साविषै जुगुप्साका कारन दूरि होना, पुरुषवेदविषै स्त्रीस्थों रमना, स्त्रीवेदविषै पुरुषस्थों रमना, नपुंसकवेदविषै दोऊनिस्थों रमना, ऐसैं प्रयोजन पाइए है । सो इनिकी सिद्धि होय तौ कषाय उपशमनेतैं दुःख दूरि होइ जाइ सुखी होइ परंतु इनिकी सिद्धि इनके किए उपायनिके आधीन नाहीं, भवितव्यके आधीन है । जातैं अनेक उपाय करते देखिये है अर सिद्धि न हो है । बहुरि उपाय बनना भी अपने आधीन नाहीं, भवितव्यके आधीन है । जातैं अनेक उपाय करना विचारै और एक भी उपाय न होता देखिए है । बहुरि काकतालीय न्यायकरि भवितव्य ऐसा ही होइ जैसा आपका प्रयोजन होइ तैसा ही उपाय होइ अर तातैं कार्यकी सिद्धि भी होइ जाइ, तौ तिस कार्यसंबंधी कोई कषायका उपशम होइ परंतु तहां थंभाव होता नाहीं । यावत् कार्यसिद्ध न भया तावत् तौ तिसकार्यसंबंधी कषाय था । जिस समय कार्यसिद्ध भया तिस ही समय अन्य कार्यसंबंधी कषाय होइ जाय । एक समयमात्र भी



निराकुल रहै नहीं । जैसें कोऊ क्रोधकरि काहूका बुरा विचारै था वाका बुरा होय चुक्या, तब अन्यस्यौं क्रोधकरि वाका बुरा चाहनै लग्या अथवा थोरी शक्ति थी तब छोटेनिका बुरा चाहै था, घनी शक्ति भई तब बड़ेनिका बुरा चाहने लग्या । ऐसैं ही मानमायालोभादिककरि जो कार्य विचारै था सो सिद्ध होइ चुक्या, तब अन्यविषै मानादिक उपजाय तिसकी सिद्धि किया चाहै । थोरी शक्ति थी तब छोटे कार्यकी सिद्धि किया चाहै था, घनी शक्ति भई तब बड़े कार्यकी सिद्धि करनेका अभिलाष भया । कषायनिविषै कार्यका प्रमाण होइ तौ तिसकार्यकी सिद्धि भए सुखी होइ जाय, सो प्रमाण है नाहीं । इच्छा बधती ही जाय । सोई आत्मानुशासनविषै कह्या है—

“आशागर्तः प्रतिप्राणि यस्मिन्विश्वमणूपमम् ।

कस्मिन् किं कियदायाति वृथा यो विषयैषिता ॥ १ ॥”

याका अर्थ—आशारूपी खाड़ा प्राणी प्राणी प्रति पाइए है । अनंतानंत जीव हैं तिनि सबनिकै ही आशा पाइए है । बहुरि वह आशारूपी खाड़ा कैसा है, जिस एक ही खाड़ेविषै समस्तलोक अणुसमान है । अर लोक एक ही, सो अब इहां कौन कौनकै कहा कितना बटवारै आवै । तुम्हारै यह विषयनिकी इच्छा है सो वृथा ही है । इच्छा पूर्ण तौ होती ही नाहीं । तातैं कोई कार्य-सिद्धि भए भी दुःख दूरि न होय अथवा कोई कषाय मिटै तिस ही समय अन्य कषाय होइ जाय । जैसें काहूकौं मारनेवाले बहुत होय जब कोई वाकूं न मारै तब अन्य मारने लगि जाय । तैसें

जीवकों दुःख घावनेवाले अनेक कषाय हैं। जब क्रोध न होय, तब मानादिक होइ जाय। जब मान न होइ, तब क्रोधादिक होइ जाय। ऐसैं कषायका सद्भाव रखा ही करै। कोई एक समय भी कषायरहित होय नाहीं। तातैं कोई कषायका कोई कार्य सिद्ध भए भी दुःख दूर कैसैं होइ। बहुरि याकै अभिप्राय तौ सर्वकषायनिका सर्व प्रयोजन सिद्ध करनेका है। सो होइ तौ सुखी होइ। सो तो कदाचित् होइ सकै नाहीं। तातैं अभिप्रायविषै शास्त्रता दुःखी ही रहै है। तातैं कषायनिका प्रयोजनकों साधि दुःख दूर करि सुखी भया चाहै है, सो यह उपाय झूठा ही है। तौ सांचा उपाय कहा है? सम्यग्दर्शनज्ञानतैं यथावत् श्रद्धान वा जानना होइ, तब इष्ट अनिष्टबुद्धि मिटै। बहुरि तिनहीके बलकरि चारित्रमोहका अनुभाग हीन होइ। ऐसैं होते कषायनिका अभाव होइ, तब तिनिकी पीड़ा दूर होय तब प्रयोजन भी किछू रहै नाहीं। निराकुल होनेतैं महासुखी होइ। तातैं सम्यग्दर्शनादिक ही इस दुःख भेटनेका सांचा उपाय है। बहुरि अंतरायका उदयतैं जीवके मोहकरि दान लाभ भोग उपभोग वीर्य शक्तिका उत्साह उपजै, परंतु होइ सकै नाहीं। तब परम आकुलता होइ सो यह दुःखरूप है ही। याका उपाय यह करै है, जो विघ्नके बाह्य कारन सूझैं तिनिके दूर करनेका उद्यम करै सो यह झूठा उपाय है। उपाय किये भी अंतरायका उदय होतैं विघन होता देखिए है। अंतरायका क्षयोपशम भए, विना उपाय भी विघन न हो है। तातैं विघनका मूलकारन अंतराय है। बहुरि जैसैं कूकराकै पुरुषकरि बाही हुई लाठीकी लागी। वह कूकरा लाठीस्यौ वृथा ही द्वेष करै

है। तैसैं जीवकै अंतरायकरि निमित्तभूत किया बाह्य चेतन अचेतन द्रव्यकरि विघन भया। यह जीव तिनि बाह्य द्रव्यनिस्यौं वृथा खेद करै है। अन्य द्रव्य याकै विघन किया चाहै अर याकै न होइ। बहुरि अन्य द्रव्य विघन किया न चाहै अर याकै होइ। तातैं जानिए है अन्यद्रव्यका किछू वश नाहीं, तिनिस्स्यौं काहेको लरिये। तातैं यह उपाय झूठा है। तौ सांचा उपाय कहा है? मिथ्यादर्शनादिकतैं इच्छाकरि उत्साह उपजै था सो सम्यग्दर्शनादिककरि दूरि होय। अर सम्यग्दर्शनादिकहीकरि अंतरायका अनुभाग घटै तब इच्छा तौ मिटि जाय शक्ति बधि जाय तब वह दुःख दूरि होइ निराकुलसुख उपजै। तातैं सम्यग्दर्शनादिक ही सांचा उपाय है। बहुरि वेदनीयके उदयतैं दुखसुखके कारनका संयोग हो है। तहां केई तौ शरीरविषै ही अवस्था हो है। केई शरीरकी अवस्थाकौं निमित्तभूत बाह्य संयोग हो है। केई बाह्य ही वस्तूनिका संयोग हो है। तहां असाताके उदयकरि शरीरविषै तौ क्षुधा तृषा उल्लास पीड़ा रोग इत्यादि हो है। बहुरि शरीरकी अनिष्ट अवस्थाकौं निमित्तभूत बाह्य अतिशीत उष्ण पवन बंधनादिकका संयोग हो है। बहुरि बाह्य शत्रु कुपुत्रादिक वा कुवर्णादिक सहित स्कंधनिका संयोग हो है। सो मोहकरि इनिविषै अनिष्ट-बुद्धि हो है। जब इनिका उदय होय तब मोहका उदय ऐसा ही आवै जाकरि परिणामनिमें महाव्याकुल होइ इनिको दूर किया चाहै। यावत् ए दूरि न होंय तावत् दुखी हो है सो इनिकौं होतैं तौ सर्व ही दुख मानै हैं। बहुरि साताके उदयकरि शरीर-विषै आरोग्यवानपनौ बलवानपनौ इत्यादि हो है। बहुरि शरीरकी

इष्ट अवस्थाकौ निमित्तभूत बाह्य खानपानादिक वा सुहावना पवना-  
दिकका संयोग हो है । बहुरि बाह्य मित्र सुपुत्र स्त्री किंकर हस्ती  
घोटक धन धान्य मंदिर वस्त्रादिकका संयोग हो है सो मोहकरि  
इनिविषै इष्टबुद्धि हो है । जब इनिका उदय होय तब मोहका  
उदय ऐसा ही आवै जाकरि परिणामनिभै चैन मानै । इनिकी  
रक्षा चाहै । यावत् रहै तावत् सुख मानै । सो यह सुख मानना  
ऐसा है जैसें कोऊ घनें रोगनिकरि बहुत पीड़ित होय रक्षा था  
ताकै कोई उपचारकरि कोई एक रोगकी कितेक काल किछू  
उपशांतता भई तब वह पूर्व अवस्थाकी अपेक्षा आपकौ सुखी  
कहै, परमार्थतैं सुख है नाहीं । बहुरि याकौ असाताका उदय होतैं  
जो होय ताकरि तौ दुख भासै है । तातैं ताके दूरि करनेका  
उपाय करै है । अर साताका उदय होतैं जो होइ ताकरि सुख भासै  
है तातैं ताकौ होनेका उपाय करै है । सो यह उपाय झूठा है ।  
प्रथम तौ याका उपाय याकै आधीन नाहीं वेदनीयकर्मका उदयकै  
आधीन है । असाताके मेटनैके अर्थ साताकी प्राप्तिके अर्थ तौ  
सर्वहीकै यत्न रहै है परंतु काहूकै थोरा यत्न किए भी वा न  
किए भी सिद्धि होइ जाय, काहूके बहुत यत्न किए भी सिद्धि  
न होइ तातैं जानिए है याका उपाय याकै आधीन नाहीं । बहुरि  
कदाचित् उपाय भी करै अर तैसा ही उदय आवै तौ थोरै काल  
किंचित् काहू प्रकारकी असाताका कारन मिटै अर साताका कारन  
होइ तहां भी मोहके सद्भावतैं तिनिकौ भोगनेकी इच्छाकरि  
आकुलित होइ । एक भोग्यवस्तुकौ भोगनेकी इच्छा होइ, वह  
यावत् न मिलै तावत् तौ वाकी इच्छाकरि आकुल होइ । अर

वह मिल्या अर उसही समय अन्यकों भोगनेकी इच्छा होइ जाय, तब ताकरि आकुल होइ । जैसें काहूकों स्वाद लेनेकी इच्छा भई थी वाका आखाद जिस समय भया तिस ही समय अन्य वस्तुका स्वाद लेनेकी वा स्पर्शनादि करनेकी इच्छा उपजै है । अथवा एक ही वस्तुकों पहिले अन्य प्रकार भोगनेकी इच्छा होइ वह यावत् न मिलै तावत् वाकी आकुलता रहै । अर वह भोग भया अर उस ही समय अन्यप्रकार भोगनेकी इच्छा होइ । जैसें स्त्रीको देख्या चाहै था जिस समय अवलोकन भया उस ही समय रमनेकी इच्छा हो है । बहुरि ऐसैं भोग भोगतैं भी तिनिके अन्य उपाय करनेकी आकुलता हो है तौ तिनिकों छोरि अन्य उपाय करनेकों लागै है । तहां अनेक प्रकार आकुलता हो है । देखो एक धनका उपाय करनेमें व्यापारादिक करतैं बहुरि वाकी रक्षा करनेमें सावधानी करतैं केती आकुलता हो है । बहुरि क्षुधा तृषा शीत उष्ण मल श्लेष्मादि असाताका उदय आया ही करै ताका निराकरणकरि सुख मानै सो काहेका सुख है । यह तौ रोगका प्रतीकार है । यावत् क्षुधादिक रहै तावत् तिनिका मिटावनेकी इच्छाकरि आकुलता होइ, वह मिटै तब कोई अन्य इच्छा उपजै ताकी आकुलता होइ । बहुरि क्षुधादिक होइ तब उनकी आकुलता होइ आवै । ऐसैं याकै उपाय करतैं कदाचित् असाता मिटि साता होइ तहां भी आकुलता रखा ही करै तातैं दुख ही रहै है । बहुरि ऐसैं भी रहना तौ होता नाहीं आपकों उपाय करतैं करतैं ही कोई असाताका उदय ऐसा आवै ताका किछू उपाय बनि सकै नाहीं । अर ताकी पीड़ा बहुत होय सही जाय नाहीं । तब ताकी आकु-

लताकरि विह्वल होइ जाइ तहां महादुखी होय । सो इस संसारमें साताका उदय तौ कोई पुण्यका उदयकरि काहूकै कदाचित् ही पाइए है घणे जीवनिकै बहुत काल असाताहीका उदय रहै है । तातैं उपाय करै सो झूठा है । अथवा बाह्य सामग्रीतैं सुख दुख मानिए है सो ही भ्रम है । सुख दुख तौ साता असाताका उदय होतैं मोहका निमित्ततैं हो है । सो प्रत्यक्ष देखिये है । लक्षधनका धनीकै सहस्रधनका व्यय भया तब वह तौ दुखी हो है । अर शत धनका धनीकै सहस्रधन भया तब वह सुख मानै है । बाह्य सामग्री तौ वाकै यातैं निन्याणवैं गुणी है । अथवा लक्षधनका धनीकै अधिक धनकी इच्छा है तो वह दुखी है अर शत धनका धनीकै संतोष है तौ वह सुखी है । बहुरि समान वस्तु मिले कोऊ सुख मानै है कोऊ दुख मानै है । जैसे काहूकौं मोटा वस्त्रका मिलना दुखकारी होइ काहूकौं सुखकारी होइ । बहुरि शरीरविषै क्षुधा आदि पीड़ा वा बाह्य इष्टका वियोग अनिष्टका संयोग भए काहूकै बहुत दुख होइ काहूकै थोरा होइ काहूकै न होइ । तातैं सामग्रीकै आधीन सुख दुख नाही । साता असाताका उदय होतैं मोहपरिणामनके निमित्ततैं ही सुखदुख मानिए है । इहां प्रश्न—जो बाह्य सामग्रीकी तौ तुम कहौ हो, तैसें ही है परंतु शरीरविषै तौ पीड़ा भए दुखी ही होइ अर पीड़ा न भए सुखी होइ सो यह तौ शरीरअवस्थादिकै आधीन सुख दुख भासै है । ताका समाधान,—

आत्माका तौ ज्ञान इन्द्रियाधीन है । अर इंद्रिय शरीरका अंग है । सो यामैं जो अवस्था वीतै ताका जाननैरूप ज्ञान परिणमैं ताकी साथि ही मोहभाव होइ । ताकरि शरीर अवस्थाकरि सुख-

दुख विशेष जानिए है । बहुरि पुत्रधनादिकस्यौ अधिक मोह होइ तौ अपना शरीरका कष्ट सहै ताका थोरा दुख मानै उनकौ दुःख भए वा संयोग मिटै बहुत दुःख मानै । अर मुनि हैं सो शरीरका पीड़ा होतैं भी किछु दुख मानते नाहीं । तातैं सुख दुख मानना तौ मोहहीकै आधीन है । मोहकै अर वेदनीयकै निमित्तनैमित्तिक संबंध है, तातैं साता असाताका उदयतैं सुख दुखका होना भासै है । बहुरि मुख्यपनै केतीक सामग्री साताके उदयतैं हो है केतीक असाताका उदयतैं हो है तातैं सामग्रीनिकरि सुख दुख भासै है । परंतु निर्द्धार किए मोहहीतैं सुख दुखका मानना हो है औरनिकरि सुख दुख होनेका नियम नाहीं । केवलीकै साता असाताका भी उदय है अर सुख दुखकौ कारण सामग्रीका भी संयोग है । परंतु मोहका अभावतैं किंचिन्मात्र भी सुख दुख होता नाहीं । तातैं सुख दुख मोहजनित ही मानना । तातैं तू सामग्रीके दूरकरनेका वा होनेका उपायकरि दुःख मेढ्या चाहै सुखी भया चाहै सो यह उपाय झूठा है, तौ सांचा उपाय कहा है? सम्यग्दर्शनादिकतैं भ्रम दूरि होय तब सामग्रीतैं सुख दुख भासै नाहीं अपने परिणामहीतैं भासै । बहुरि यथार्थ विचारका अभ्यासकरि अपने परिणाम जैसैं सामग्रीके निमित्ततैं सुखी दुखी न होइ तैसैं साधन करै । बहुरि सम्यग्दर्शनादि भावनाहीतैं मोह मंद होइ जाय तब ऐसी दशा होइ जाय जो अनेक कारण मिलो आपकौ सुख-दुख होइ नाहीं । जब एक शांतदशारूप निराकुल होइ सांचा सुखकौ अनुभवै तब सर्व दुख मिटै सुखी होइ । यह सांचा उपाय है । बहुरि आयुर्कर्मके निमित्ततैं पर्यायका धारना सो जीवितव्य है

पर्याय झूटना सो मरन है । बहुरि यह जीव मिथ्यादर्शनादिकतैं पर्यायहीकौ आपो अनुभवै है । तातैं जीवितव्य रहै अपना अस्तित्व मानै है । मरन भये अपना अभाव होना मानै है । इसही कारणतैं सदाकाल याकै मरनका भय रहै है । तिस भयकरि सदा आकुलता रहै है । जिनि कौ मरनका कारन जानै तिनिस्यौं बहुत डरै । कदाचित् उनका संयोग बणै तौ महाविह्वल होइ जाय । ऐसैं महा दुखी रहै है । ताका उपाय यह करै है जो मरनके कारननिकौ दूर राखै है वा उनस्यौं आप भागै है । बहुरि औषधादिकका साधन करै है गढ़ कोट आदिक बनावै है इत्यादि उपाय करै है । सो यह उपाय झूठा है जातैं आयु पूर्ण भए तौ अनेक उपाय करै है अनेक सहाई होय तौ भी मरन होइ ही होइ । एक समयमात्र भी न जीवै । अर यावत् आयु पूर्ण न होइ तावत् अनेक कारन मिलौ सर्वथा मरन न होइ तातैं उपाय किए मरन मिटता नाही । बहुरि आयुकी स्थिति पूर्ण होइ ही होइ । तातैं मरन भी होइ ही होइ । याका उपाय करना झूठा ही है । तौ सांचा उपाय कहा है ? सम्यग्दर्शनादिकतैं पर्यायविषै अहंबुद्धि झूटै अनादिनिधन आप चैतन्यद्रव्य है तिसविषै अहंबुद्धि आवै । पर्यायकौं स्वांग समान जानै तब मरनका भय रहै नाही । बहुरि सम्यग्दर्शनादिकहीतैं सिद्धपद पावै तब मरनका अभाव ही होइ । तातैं सम्यग्दर्शनादिक ही सांचा उपाय है ।

बहुरि नामकर्मके उदयतैं गति जाति शरीरादिक निपजै हैं तिनिविषै पुण्यके उदयतैं जे हो हैं ते तौ सुखके कारन हो हैं । पापके उदयतैं हो हैं ते दुखके कारण हो हैं । सो इहां सुख



मानना भ्रम है। बहुरि यह दुखके कारन मिटावनेका सुखके कारन होनेका उपाय करै सो झूठा है। सांचा उपाय सम्यग्दर्शनादिक हैं। सो जैसे वेदनीयका कथन करतैं निरूपण किया तैसे ही इहां भी जानना। वेदनीय अर नामके सुख दुखका कारनपनाकी समानतातैं निरूपणकी समानता जाननी। बहुरि गोत्र कर्मके उदयतैं नीच ऊंच कुलविषै उपजै है। तहां ऊंच कुलविषै उपजैं आपकों ऊंचा मानै है अर नीच कुलविषै उपजैं आपकों नीचा मानै है। सो कुल पलटनेका उपाय तौ याकूं भासै नाहीं। तातैं जैसा कुल पाया तैसा ही कुलविषै आपो मानै है। सो कुल अपेक्षा आपकों ऊंचा नीचा मानना भ्रम है। ऊंचा कुलका कोई निद्य कार्य करै तौ वह नीचा होइ जाय। अर नीचा कुलविषै कोई श्लाघ्य कार्य करै तौ वह ऊंचा होइ जाय। लोभादिकतैं नीच कुलवालेकी उच्चकुलवाला सेवा करने लगि जाय। बहुरि कुल कितेक काल रहै? पर्याय छूटैं कुलकी पलटनि होइ जाय। तातैं ऊंचा नीचा कुलकरि आपकूं ऊंचा नीचा मानै। ऊंचाकुलवालाकों नीचा होनेके भयका अर नीचाकुलवालाकों पाएहुए नीचपनैका दुख ही है। तो याका सांचा उपाय कहा है? सो कहिए है। सम्यग्दर्शनादिकतैं ऊंच नीच कुलविषै हर्ष विषाद न मानै। बहुरि तिनिहीतैं जाकी बहुरि पलटनि न होय ऐसा सर्वतैं ऊंचा सिद्ध पद पावै तब सर्व दुख मिटै सुखी होइ। या प्रकार कर्मके उदयकी अपेक्षा मिथ्यादर्शनादिकके निमित्ततैं संसारविषै दुख ही दुख पाइए है ताका वर्नन किया। अब इस दुःखकों पर्याय अपेक्षाकरि वर्नन करिए है—

इस संसारविषै बहुत काल तौ एकेन्द्रिय पर्यायहीविषै बीतै है । तातैं अनादिहीतैं तौ नित्यनिगोदविषै रहना, बहुरि तहांतैं निकसना ऐसा जैसें भारभूनतैं चणाका उछटि जाना सो तहांतैं निकसि अन्य पर्याय धरै तौ त्रसविषै तौ बहुत थोरे ही काल रहै । एकेद्रीहीविषै बहुत काल व्यतीत करै है । तहां इतरनिगोद-विषै बहुत रहना होइ । अर कितेक काल पृथिवी अप तेज वायु प्रत्येक वनस्पतीविषै रहना होय । नित्यनिगोदतैं निकसे पीछैं त्रसविषै तौ रहनेका उत्कृष्ट काल साधिक दोहजार सागर ही है । एकेन्द्रियविषै उत्कृष्ट रहनेका काल ऐसा है जाके अनंतवाँ भागविषै भी अनंते सागर हो हैं । तातैं इस संसारीकै मुख्यपनैं एकेन्द्रिय पर्यायविषै ही काल व्यतीत हो है । तहां एकेन्द्रियकै ज्ञानदर्शनकी शक्ति तौ किंचिन्मात्र ही रहै है । एक स्पर्शन इंद्रियके निमित्ततैं भया मतिज्ञान अर ताके निमित्ततैं भया श्रुतज्ञान अर स्पर्शनइंद्रियजनित अचक्षुदर्शन जिनकर शीत उष्णादिकको किंचित् जानै देखै है । ज्ञानावरण दर्शनावरणके तीव्र उदयकरि यातैं अधिक ज्ञानदर्शन न पाइए है । अर विषयनिकी इच्छा पाइए है तातैं महा दुखी है । बहुरि दर्शनमोहके उदयतैं मिथ्या-दर्शन हो है तातैं पर्यायहीकौं आपो श्रद्धहै है । अन्यविचार करनेकी शक्ति ही नाही । बहुरि चारित्रमोहके उदयतैं तीव्र क्रोधादि कषायरूप परिणमै हैं जातैं उनकै केवली भगवानने कृष्ण नील कापोत ए तीन अशुभ लेश्या ही कही हैं । सो ए तीव्र कषाय होतैं ही हो हैं सो कषाय तौ बहुत अर शक्ति सर्वप्रकारकरि महा हीन तातैं बहुत दुखी होय रहे हैं । किछू उपाय कर सकते

नाहीं । इहां कोऊ कहै—ज्ञान तौ किंचित् मात्र ही रखा है वै  
कहा कषाय करै ? ताका समाधान—

जो ऐसा तौ नियम है नाहीं जेता ज्ञान होइ तेता ही कषाय  
होय । ज्ञान तौ क्षयोपशम जेता होय तेता हो है । सो जैसे कोऊ  
आंधा बहरा पुरुषकै ज्ञान थोरा होतै भी बहुत कषाय होते  
देखिए है तैसे एकेन्द्रियकै ज्ञान थोरा होतै भी बहुत कषायका  
होना माना है । बहुरि बाह्य कषाय प्रगट तब हो है जब कषायकै  
अनुसार किछू उपाय करै सो वै शक्तिहीन हैं तातैं उपाय करि  
सकते नाहीं । तातैं उनकी कषाय प्रगट नाहीं हो है । जैसे कोऊ  
पुरुष शक्तिहीन है ताकै कोई कारणतैं तीव्र कषाय होइ परंतु  
किछू करि सकै नाहीं । तातैं वाका कषाय बाह्य प्रगट नाहीं  
होय यूं ही अतिदुखी होइ । तैसे एकेन्द्रिय जीव शक्तिहीन  
हैं । तिनिकै कोई कारणतैं कषाय हो है परंतु किछू कर सकते  
नाहीं तातैं उनका कषाय बाह्य प्रगट नाहीं हो है वै ही आप  
दुखी हो हैं । बहुरि ऐसा जानना जहां कषाय बहुत होय अर  
शक्तिहीन होय तहां घना दुख हो है बहुरि जैसे कषाय घटता  
जाय शक्ति वधती जाय तैसे दुःख घटता हो है । सो एकेन्द्रियनिकै  
कषाय बहुत अर शक्ति हीन तातैं एकेन्द्रिय जीव महा दुखी हैं ।  
उनके दुख वै ही भोगवै हैं । अर केवली जानै हैं । जैसे सन्नि-  
पातीका ज्ञान घटि जाय अर बाह्य शक्तिके हीनपनैतैं अपना  
दुख प्रगट भी न करि सकै परंतु वह महादुखी है, तैसे एकेन्द्रि-  
यका ज्ञान थोरा है अर बाह्य शक्तिहीनपनातैं अपना दुखकौ प्रगट  
भी न करि सकै है परंतु महादुखी है । बहुरि अंतरायके तीव्र

उदयकरि चाहा होता नाही । तातें भी दुखी ही है । बहुरि अघातिकर्मनिविषै विशेषपनै पापप्रकृतिका उदय है तहां असाता-वेदनीयका उदय होतें तिसके निमित्ततें महादुखी हो है । पवनतें टूटै है । बहुरि वनस्पती है सो शीत उष्णकरि सूकि जाय है, जल न मिलें सूकि जाय है, अगनिकरि बलै है ताकों कोऊ छेदै है भेदै है मसलै है खाय है तोरै है इत्यादि अवस्था हो है । ऐसैं ही यथासंभव पृथ्वी आदिविषै अवस्था हो है । तिनि अवस्थाकों होतें वै महादुखी हो हैं जैसे मनुष्यकै शरीरविषै ऐसी अवस्था भए दुख हो है तैसैं ही उनके हो है । जातें इनिका जानपना स्पर्शन इंद्रियतें होइ सो वाकै स्पर्शनइंद्रिय है ही, ताकरि उनकों जानि मोहके वशतें महाव्याकुल हो है । परंतु भागनैकी वा लरनैकी वा पुकारनैकी शक्ति नाही तातें अज्ञानीलोक उनके दुखकों जानते नाही । बहुरि कदाचित् किंचित् साताका उदय होइ सो वह बलवान् होता नाही । बहुरि आयुकर्मतें इनि एकेंद्रिय जीवनिविषै जे अपर्याप्त हैं तिनिकै तौ पर्यायकी स्थिति उश्वासके अठारहवें भाग मात्र ही है । अर पर्याप्तनिकी अंतर्मुहूर्त्त आदि कितेकवर्ष पर्यंत है । सो आयु थोरा तातें जन्ममरण हुवा ही करै ताकरि दुखी है । बहुरि नामकर्म-विषै तिर्यचगति आदि पापप्रकृतिनिका ही उदय विशेषपनै पाइए है । कोई ही पुण्यप्रकृतिका उदय होइ ताका बलवानपना नाही तातें तिनिकरि भी मोहके वशतें दुखी हो है । बहुरि गोत्रकर्म-विषै नीच गोत्रहीका उदय है ताकरि महंतता होय नाही । तातें भी दुखी ही है । ऐसैं एकेंद्रिय जीव महादुःखी है अर इस संसार-विषै जैसे पाषाण आधारविषै तौ बहुत काल रहै है निराधार

आकाशविषै तौ कदाचित् किंचिन्मात्रकाल रहै, तैसें जीव एकेंद्रिय पर्यायविषै बहुतकाल रहै है अन्य पर्यायविषै तौ कदाचित् किंचिन्मात्र काल रहै है । तातैं यह जीव संसारविषै महादुखी है । बहुरि वेन्द्रिय तेन्द्रिय चौइंद्रिय असंगीपंचेंद्रिय पर्यायनिकाँ जीव धरै तहां भी एकेंद्रियवत् दुख जानना । विशेष इतना—इहां क्रमतैं एक एक इंद्रियजनित ज्ञानदर्शनकी वा किछू शक्तिकी अधिकता भई है बहुरि बोलने चालनेकी शक्ति भई है । तहां भी जे अपर्याप्त हैं वा पर्याप्त भी हीनशक्तिके धारक हैं छोटे जीव हैं. तिनिकी शक्ति प्रगट होती नाही । बहुरि केई पर्याप्त बहुत शक्तिके धारक बड़े जीव हैं, तिनिकी शक्ति प्रगट हो है । तातैं ते जीव विषयनिका उपाय करै हैं दुख दूर होनैका उपाय करै हैं क्रोधादिककरि काटना मारना लरना छलकरना अन्नादिका संग्रह करना भागना इत्यादि कार्य करै हैं । दुखकरि तड़फड़ाट करना पुकारना इत्यादि क्रिया करै हैं । तातैं तिनिका दुख किछू प्रगट भी हो है । सो लट कीड़ी आदि जीवनिकै शीत उष्ण छेदन भेदनादिकतैं वा भूख तृषा आदितैं परम दुख देखिए है । जो प्रत्यक्ष दीसै ताका विचार करि लैना इहां विशेष कहा लिखैं । ऐसैं वेन्द्रियादिक जीव भी महादुखी ही जानने ।

बहुरि संज्ञीपंचेंद्रियनिविषै नारकी जीव हैं ते तौ सर्व प्रकार घने दुखी हैं । ज्ञानादिकी शक्ति किछू है परंतु विषयनिकी इच्छा बहुत अर इष्टविषयनिकी सामग्री किंचित् भी न मिलै तातैं तिस शक्तिके होनैकरि भी घने दुखी हैं । बहुरि क्रोधादि कषायका अति तीव्रपना पाइए है । जातैं उनकै कृष्णादि अशुभ-

लेश्या ही हैं । तहां क्रोधमानकरि परस्पर दुख देनेका निरंतर कार्य पाइए है । जो परस्पर मित्रता करें तौ यह दुख मिटि जाय । अर अन्यकौं दुख दिए किछू उनका कार्य भी होता नाहीं परंतु क्रोधमानका अति तीव्रपना पाइए है ताकरि परस्पर दुख देनेहीकी बुद्धि रहै । विक्रियाकरि अन्यकौं दुखदायक शरीरके अंग बनावैं वा शस्त्रादि बनावैं तिनिकरि अन्यकौं आप पीड़ैं अर आपकौं कोई अन्य पीड़ै । कदाचित् कषाय उपशांत होय नाहीं । बहुरि माया लोभकी भी अति तीव्रता है परंतु कोई इष्टसामग्री तहां दीखै नाहीं । तातैं तिनिकषायनिका कार्य प्रगट करि सकते नाहीं । तिनिकरि अंतरंगविषै महादुखी हैं । बहुरि कदाचित् किंचित् कोई प्रयोजन पाइ तिनिका भी कार्य हो है । बहुरि हास्य रति कषाय हैं परंतु बाह्यनिमित्त नाहीं तातैं प्रगट होते नाहीं कदाचित् किंचित् किंचित् किसी कारणतैं हो हैं । बहुरि अरति शोक भय जुगुप्सा इनिके बाह्य कारण बनि रहे हैं तातैं ए कषाय प्रगट तीव्र होइ हैं । बहुरि वेदनिविषै नपुंसक वेद है । सो इच्छा तौ बहुत और स्त्री पुरुषस्यौं रमनेका निमित्त नाहीं तातैं महापीड़ित हैं । ऐसैं कषायनिकरि अति दुखी हैं । बहुरि वेदनीयविषै असाताहीका उदय है ताकरि तहां अनेक वेदनाका निमित्त है । शरीरविषै कोढ़ कास खासादि अनेक रोग युगपत् पाइए है अर क्षुधा तृषा ऐसी है जो सर्वका भक्षण पान किया चाहै हैं । अर तहांकी माटीका भोजन मिलै है सो माटी भी ऐसी है जो इहां आवै तो ताकी दुर्गंधतैं केई क्रोशनिके मनुष्य मरि जाएं । अर शीत उष्ण तहां ऐसा है जो लक्षयोजनका लोहका गोला होइ सो भी तिनिक-

करि भस्म होइ जाय । कहीं शीत है कहीं उष्ण है । बहुरि पृथिवी तहां शस्त्रनिर्तें भी महातीक्ष्ण कंटकनिकरि सहित है । बहुरि तिस पृथिवीविषै वन हैं सो शस्त्रकी धार समान पत्रादि सहित हैं । नदी है सो ताका स्पर्श भए शरीर खंड खंड होइ जाय ऐसे जल सहित है । पवन ऐसा प्रचंड है जाकरि शरीर दग्ध हुवा जाय है । बहुरि नारकी नारकीकौं अनेक प्रकार पीड़ें घाणीमें पेलैं खंड खंड करैं हांडीमें रांधैं कोरडा मारैं तप्त लोहा-दिकका स्पर्श करावैं । इत्यादि वेदना उपजावैं । तीसरी पृथिवी पर्यंत असुरकुमार देव जाएं ते आप पीड़ा दें वा परस्पर लरावैं । ऐसी वेदना होतैं शरीर छूटै नाहीं पारावत् खंड खंड होइ जाइ तौ भी मिलि जाय । ऐसी महा पीड़ा है । बहुरि साताका निमित्त तौ किञ्चु है नाहीं । कोई अंश कदाचित् कोईकै अपनी मानितैं कोई कारण अपेक्षा साताका उदय है सो बलवान् नाहीं । बहुरि आयु तहां बहुत, जघन्य दशहजार वर्ष उत्कृष्ट तेतीस सागर । इतने काल ऐसे दुख तहां सहनै होंय । बहुरि नामकर्मकी सर्वपापप्रकृति-निहीका उदय है एक भी पुन्यप्रकृतिका उदय नाहीं तिनिकरि महादुखी हैं । बहुरि गोत्रविषै नीच गोत्रहीका उदय है ताकरि महंतता न होइ तातैं दुखी ही हैं । ऐसं नरकगतिविषै महादुख जाननै ।

बहुरि तिर्यचगतिविषै बहुत लब्धि अपर्याप्त जीव हैं तिनिका तौ उश्वासकै अठारवैं भाग मात्र आयु है । बहुरि केई पर्याप्त भी छोटे जीव हैं । सो इनिकी शक्ति प्रगट भासै नाहीं । तिनिकै दुख एकेंद्रियवत् जानना । ज्ञानादिकका विशेष है सो विशेष जानना । बहुरि बड़े पर्याप्त जीव केई सम्मूर्छन हैं । केई गर्भज

हैं। तिनिविषै ज्ञानादिक प्रगट हो है सो विषयनिकी इच्छाकरि आकुलित हैं। बहुतकौं तौ इष्टविषयकी प्राप्ति नाही है। काहूकौं कदाचित् किंचित् हो है। बहुरि मिथ्यात्व भावकरि अतस्त्व-श्रद्धानी होय रहे हैं। बहुरि कषाय मुख्यपनै तीव्र ही पाइए है। क्रोध मानकरि परस्पर लरै हैं भक्षण करै हैं दुख दे हैं माया लोभ-करि छल करै हैं वस्तुकौं चुनै हैं हास्यादिककरि तिनिकषायनिका <sup>रावे</sup> कार्यनिविषै प्रवर्त्तै हैं। बहुरि काहूकै कदाचित् मंदकषाय हो है परंतु थोरे जीवनिकै हो है तातैं मुख्यता नाही। बहुरि वेदनीयविषै मुख्य असाताका उदय है ताकरि रोग पीड़ा क्षुधा तृषा छेदन भेदन बहुत भारवहन शीत उष्ण अंगभंगादि अवस्था हो है ताकरि दुखी होते प्रत्यक्ष देखिए है। तातैं बहुत न कछा है। काहूकै कदाचित् किंचित् साताका भी उदय हो है परंतु थोरे जीवनिकै हो है। मुख्यता नाही। बहुरि आयु अंत-मुहूर्त्त आदि कोटिवर्ष पर्यंत है। तहां घने जीव स्तोक आयुके धारक हो हैं, तातैं जन्म मरनका दुःख पावै हैं। बहुरि भोगभूमि-यांकी बड़ी आयु है। अर उनकै साताका भी उदय है सो वै जीव थोरे हैं। बहुरि नामकर्मकी मुख्यपनै तौ तिर्यचगति आदि पापप्रकृतिनिका ही उदय है। काहूकै कदाचित् केई पुण्यप्रकृति-निका भी उदय हो है परंतु थोरे जीवनिकै थोरा हो है मुख्यता नाही। बहुरि गोत्रविषै नीचगोत्रहीका उदय है तातैं हीन होय रहे हैं। ऐसैं तिर्यचगतिविषै महादुःख जाननै। बहुरि मनुष्य-गतिविषै असंख्याते जीव तौ लब्धिअपर्याप्त हैं ते सम्मूर्छन ही हैं तिनिकी तौ आयु उश्वासके अठारवै भागमात्र है। बहुरि केई



जीव गर्भमें आय थोरै ही कालमें मरन पावै हैं । तिनिकी तौ शक्ति प्रगट भासै नाहीं है । तिनिकै दुख एकेंद्रियवत् जानना । विशेष है सो विशेष जानना । बहुरि गर्भजनिके कितेक काल गर्भमें रहना पीछें बाह्य निकसना हो है । सो तिनिका दुखका वर्नन कर्मअपेक्षा पूर्वे वर्नन किया है तैसें जानना । वह सर्व वर्नन गर्भज मनुष्यनिकै संभवै है अथवा तिर्यचनिका वर्णन किया है तैसें जानना । विशेष यह है इहां कोई शक्तिविशेष पाइए है वा राजादिकनिकै विशेष साताका उदय है वा क्षत्रियादिकनिकै उच्चगोत्रका भी उदय हो है । बहुरि धन कुटुंबादिकका निमित्त विशेष पाइए है इत्यादि विशेष जानना । अथवा गर्भ आदि अवस्थाके दुख प्रत्यक्ष भासै हैं । जैसें विष्टाविषै लट उपजै तैसें गर्भमें शुक्र शोणितका बिंदुकों अपना शरीररूपकरि जीव उपजै । पीछें तहां क्रमतै ज्ञानादिककी वा शरीरकी वृद्धि होइ । गर्भका दुःख बहुत है । संकोचरूप अधोमुख क्षुधातृषादिसहित तहां काल पूरण करै । बहुरि बाह्य निकसै तब बाल्यअवस्थामें महा-दुख हो है । कोऊ कहै बाल्यअवस्थामें दुख थोरा है, सो नाहीं है । शक्ति थोरी है तातै व्यक्त न होय सकै है । पीछें व्यापारादि वा विषयइच्छा आदि दुखनिकी प्रगटता हो है । इष्ट अनिष्ट-जनित आकुलता रहबो ही करै । पीछें वृद्ध होइ तब शक्तिहीन होइ जाइ । तब परमदुखी हो है । सो ए दुख प्रत्यक्ष होते देखिए है । हम बहुत कहा कहैं । प्रत्यक्ष जाकों न भासै सो कबा कैसें सुनै । काहूकै कदाचित् किंचित् साताका उदय हो है सो आकुलतामय है । अर तीर्थकरादि पद मोक्षमार्ग पाए विना हांय

नाहीं । ऐसैं मनुष्य पर्यायविषै दुख ही हैं । एक मनुष्य पर्यायविषै कोई अपना भला होनैका उपाय करै तौ होय सकै है । जैसे कांणा सांठाकी जड़ वा बांडे तौ चूसने योग्य ही नाहीं । अर बीचिकी पेली कांणी सो भी चूसी जाय नाहीं । कोई स्वादका लोभी वाकू विगारौ तो विगारौ । अर जो वाकौ वोड़ दे तौ वाके बहुत सांठे होंइ तिनिका स्वाद बहुत मीठा आवै । तैसें मनुष्य-पर्यायका बालवृद्धपना तौ सुख भोगने योग्य नाहीं । अर बीचिकी अवस्था सो रोग क्लेशादिकरि युक्त तहां सुख होइ सकै नाहीं । कोई विषयसुखका लोभी याकौ विगारौ तौ विगारो । अर जो याकौ धर्मसाधनविषै लगावै तौ बहुत ऊंचे पदकौ पावै । तहां सुख बहुत निराकुल पाइए । तातैं इहां अपना हित साधना, सुख होनैका अमकरि वृथा न खोवना । बहुरि देवपर्यायविषै ज्ञानादिककी शक्ति किछू औरनितैं विशेष है । मिथ्यात्वकरि अतत्त्वश्रद्धानी होय रहे हैं । बहुरि तिनिकै कषाय किछू मंद हैं । तहां भवनवासी व्यंतर ज्योतिष्कनिकै कषाय बहुत मंद नाहीं अर उपयोग तिनिका चंचल बहुत अर किछू शक्ति भी है सो कषायनिके कार्यनिविषै प्रवर्तैं हैं । कुतूहल विषयादि कार्यनिविषै लगि रहे हैं । सो तिस आकुलताकरि दुखी ही हैं । बहुरि वैमानिकनिकै ऊपरिऊपरि विशेष मंदकषाय है अर शक्ति विशेष है तातैं आकुलता घटनैतैं दुख भी घटता है । इहां देवनिकै क्रोधमान कषाय है परंतु कारन थोरा है । तातैं तिनिके कार्यकी गौणता है । काहूका बुरा करना काहूकौ हीन करना इत्यादि कार्य निकृष्ट

देवनिर्कै तौ कौतूहलादिकरि हो है । अर उत्कृष्ट देवनिर्कै थोरा हो है मुख्यता नाहीं । बहुरि माया लोभ कषायनिके कारण पाइए हैं । तातैं तिनिके कार्यकी मुख्यता है । तातैं छल करना विषय-सामग्रीकी चाहि करनी इत्यादि कार्य विशेष हो है । सो भी ऊंचे ऊंचे देवनिर्कै घाँटि है । बहुरि हास्य रति कषायके कारन घने पाइए है । तातैं इनिके कार्यनिकी मुख्यता है । बहुरि अरति शोक भय जुगुप्सा इनिके कारन थोरे हैं तातैं इनिके कार्यनिकी गौणता है । बहुरि स्त्रीवेद पुरुषवेदका उदय है अर रमनेका भी निमित्त है सो कामसेवन करै हैं । ए भी कषाय ऊपरि ऊपरि मंद हैं । अहमिंद्रनिके वेदनिकी मंदताकरि कामसेवनका अभाव है । ऐसैं देवनिर्कै कषायभाव हैं सो कषायहीतैं दुख है । अर इनिकै कषाय जेता थोरा है तितना दुख भी थोरा है तातैं और-निकी अपेक्षा इनिकों सुखी कहिए है । परमार्थतैं कषायभाव जीवै है ताकरि दुखी ही हैं । बहुरि वेदनीयविषै साताका उदय बहुत है । तहां भवनत्रिककै थोरा है । वैमानिकनिकै ऊपरि ऊपरि विशेष है । इष्ट शरीरकी अवस्था स्त्रीमंदिरादि सामग्रीका संयोग पाइए है । बहुरि कदाचित् किंचित् असाताका भी उदय कोई कारणकरि हो है । तहां निकृष्टदेवनिर्कै किछू प्रगट भी है । अर उत्कृष्ट देवनिर्कै विशेष प्रगट नाहीं है । बहुरि आयु बड़ी है । जघन्य दशहजारवर्ष उत्कृष्ट तेतीस सागर है । यातैं अधिक आयुका धारी मोक्षमार्ग पाए विना होता नाहीं । सो इतना काल विषयसुखमें मगन रहै हैं । बहुरि नामकर्मकी देवगति आदि सर्व

पुण्यप्रकृतिनिहीका उदय है । तातैं सुखका कारन है । अर गोत्र-विषै उच्चगोत्रहीका उदय है तातैं महंतपदकों प्राप्त हैं ऐसैं इनिकै पुण्यउदयकी विशेषताकरि इष्ट सामग्री मिली है । अर कषायनिकरि इच्छा पाइए है । तातैं तिनिके भोगवनेविषै आसक्त होइ रहे हैं । परंतु इच्छा अधिक ही रहै है तातैं सुखी होते नाहीं । ऊंचे देवनिकै उत्कृष्ट पुण्यका उदय है कषाय बहुत मंद है तथापि तिनिकै भी इच्छाका अभाव होता नाहीं तातैं परमार्थतैं दुखी ही हैं । ऐसैं सर्वत्र संसारविषै दुख ही दुख पाइए है । ऐसैं पर्यायअपेक्षा दुख वर्नन किया, अब इस सर्व दुखका सामान्य-रूप कहिए है—दुखका लक्षण आकुलता है सो आकुलता इच्छा होतैं हो है । सोई संसारीकै इच्छा अनेक प्रकार पाइए है । एक तौ इच्छा विषयग्रहणकी है सो देख्या जान्या चाहै । जैसे वर्ण देखनेकी राग सुननेकी अव्यक्तकों जानने इत्यादिकी इच्छा हो है सो तहां अन्य किछू पीड़ा नाहीं । परंतु यावत् देखै जानै नाहीं तावत् महाव्याकुल होइ । इस इच्छाका नाम विषय है । बहुरि एक इच्छा कषायभावनिके अनुसारि कार्य करनेकी है सो कार्य किया चाहै । जैसे बुरा करनेकी हीन करनेकी इत्यादि इच्छा हो है । सो इहां भी अन्य कोई पीड़ा नाहीं । परंतु यावत् वह कार्य न होइ तावत् महा व्याकुल होय । इस इच्छाका नाम कषाय है । बहुरि एक इच्छा पापके उदयतैं शरीरविषै वा बाह्य अनिष्ट कारण मिलैं तब उनके दूर करनेकी हो है । जैसे रोग पीड़ा क्षुधा आदिका संयोग भए उनके दूर करनेकी इच्छा हो है सो इहां यह ही पीड़ा मानै है । यावत् वह दूर न होइ तावत् महाव्याकुलता

रहै । इस इच्छाका नाम पापका उदय है । ऐसैं इनि तीनप्रकारकी इच्छा होतैं सर्व ही दुख मानै हैं सो दुख ही है । बहुरि एक इच्छा बाह्य निमित्ततै बनै है सो इनि तीनप्रकार इच्छानिके अनुसारि प्रवर्तनेकी इच्छा हो है । सो तीनि प्रकार इच्छा-निविषै एक एक प्रकारकी इच्छा अनेक प्रकार है । तहां केई प्रकारकी इच्छा पूरन करनेका कारन पुण्यउदयतैं मिलै । तिनिका साधन युगपत् होइ सकै नाहीं । तातैं एककौं छोड़ि अन्यकौं लागै आगैं भी वाकौं छोड़ि अन्यकौं लागै । जैसे काहूकै अनेक सामग्री मिली है । वह काहूकौं देखै है वाकौं छोड़ि राग सुनै है वाकौं छोड़ि काहूका बुरा करने लगि जाय वाकौं छोड़ि भोजन करै है अथवा देखनेविषै ही एककौं देखि अन्यकौं देखै है । ऐसैं ही अनेक कार्यनिकी प्रवृत्तिविषै इच्छा हो है सो इस इच्छाका नाम पुण्यका उदय है । याकौं जगत सुख मानै है सो सुख है नाहीं दुख ही है । काहेतैं—प्रथम तौ सर्वप्रकार इच्छा पूरन होनेके कारन काहूकै भी न बनै । अर केई प्रकार इच्छा पूरन करनेके कारन बनै तौ युगपत् तिनिका साधन न होइ । सो एकका साधन जावत् न होइ तावत् वाकी आकुलता रहै वाका साधन भए उसही समय अन्यका साधनकी इच्छा हो है तब वाकी आकुलता हो है । एक समय भी निराकुल न रहै, तातैं दुखी ही है । अथवा तीनप्रकारके इच्छारोग मिटावनेका किंचित् उपाय करै है तातैं किंचित् दुख घाटि हो है सर्व दुखका तौ नाश न होइ तातैं दुख ही है । ऐसैं संसारी जीवनिकै सर्व प्रकार दुख ही है । बहुरि इहां इतना जानना,—तीनप्रकार इच्छानिकरि सर्व

जगत पीड़ित है अर चौथी इच्छा है सो पुण्यका उदय आए होइ सो पुण्यका बंध धर्मानुरागतें होइ अर धर्मानुरागविषै जीव थोरा लागै । जीव तौ बहुत पापक्रियानिविषै ही प्रवर्तै है । तातें चौथी इच्छा कोई जीवकै कदाचित् कालविषै हो है । बहुरि इतना जानना,—जो समान इच्छावान् जीवनिकी अपेक्षा तौ चौथी इच्छा-वालाकै किछू तीनप्रकार इच्छाके घटनैतें सुख कहिए है । बहुरि चौथी इच्छावालाकी अपेक्षा महान् इच्छावाला चौथी इच्छा होतें भी दुखी ही है । काहूकै बहुत विभूति है अर वाकै इच्छा बहुत है तौ वह बहुत आकुलतावान् है । अर जाकै थोरी विभूति है अर वाकै इच्छा थोरी है तौ वह थोरा आकुलतावान् है । अथवा कोऊकै अनिष्ट सामग्री मिली है वाकै उसके दूर करनेकी इच्छा थोरी है तौ वह थोरा आकुलतावान् है । बहुरि काहूकै इष्ट सामग्री मिली है परंतु ताकै उनके भोगवनेकी वा अन्य सामग्रीकी इच्छा बहुत है तौ वह जीव घना आकुलतावान् है । तातें सुखी दुखी होना इच्छाके अनुसार जानना बाह्य कारनकै आधीन नाहीं है । नारकी दुखी अर देव सुखी कहिए है सो भी इच्छाहीकी अपेक्षा कहिए है । जातें नारकीनिकै तीव्रकषायतें इच्छा बहुत है । देवनिकै मंद कषायतें इच्छा थोरी है । बहुरि मनुष्य तिर्यच भी सुखी दुखी इच्छाहीकी अपेक्षा जानना । तीव्रकषायतें जाकै इच्छा बहुत ताकौं दुखी कहिए है । मंदकषायतें जाकै इच्छा थोरी ताकौं सुखी कहिए है । परमार्थतें दुख ही घना वा थोरा है सुख नाहीं है । देवादिककौं भी सुखी मानै हैं सो भ्रम ही है । उनकै चौथी इच्छाकी मुख्यता है तातें आकुलित हैं । या

प्रकार जो इच्छा है सो मिथ्यात्व अज्ञान असंयमतेँ हो है । बहुरि इच्छा है सो आकुलतामय है अर आकुलता है सो दुख है । ऐसैँ सर्व जीव संसारी नानाप्रकारके दुखनिकरि पीड़ित ही होइ रहे हैं । अब जिन जीवनिकों दुखनितेँ छूटना होय सो इच्छा दूरि करनेका उपाय करो । बहुरि इच्छा दूरि तब ही होइ जब मिथ्यात्व अज्ञान असंजमका अभाव होइ अर सम्यग्दर्शनज्ञानचारित्रकी प्राप्ति होय । ताँतैँ इस ही कार्यका उद्यम करना योग्य है । ऐसा साधन करतैँ जेती जेती इच्छा मिटैँ तेता ही दुख दूरि होता जाय । बहुरि जब मोहके सर्वथा अभावतैँ सर्वथा इच्छाका अभाव होइ तब सर्व दुख मिटैँ सांचा सुख प्रगतैँ । बहुरि ज्ञानावरण दर्शनावरण अंतरायका अभाव होइ तब इच्छाका कारण क्षयोपशम ज्ञान दर्शनका वा शक्तिहीनपनाका भी अभाव होइ अनंतज्ञानदर्शनवीर्यकी प्राप्ति होइ । बहुरि केतेक काल पीछैँ अघाति कर्मनिका भी अभाव होइ तब इच्छाके बाह्य कारन तिनिका भी अभाव होइ । सो मोह गए पीछैँ एकै काल किछू इच्छा उपजावनेकों समर्थ थे नाहीं मोह होतैँ कारण थे ताँतैँ कारन कहे हैं सो इनिका भी अभाव भया । तब सिद्धपदकों प्राप्त हो हैं । तहां दुखका वा दुखके कारननिका सर्वथा अभाव होनेतैँ सदाकाल अनौपम्य अखंडित सर्वोत्कृष्ट आनंदसहित अनंतकाल विराजमान रहै हैं । सोई दिखाइए है— ज्ञानावरण दर्शनावरणका क्षयोपशम होतैँ वा उदय होतैँ मोहकरि एक एक विषय देखने जाननेकी इच्छाकरि महाव्याकुल होता था सो अब मोहका अभावतैँ इच्छाका भी अभाव भया । ताँतैँ दुखका अभाव भया है । बहुरि ज्ञानावरण दर्शनावरणका क्षय

होनैतं सर्व इन्द्रियनिकौ सर्वविषयनिका युगपत् ग्रहण भया तातै  
दुखका कारन भी दूर भया है सोई दिखाइए है—जैसे नेत्रकरि  
एक विषयकौ देख्या चाहै था अब त्रिकालवर्ती त्रिलोकके सर्व  
वर्णनिकौ युगपत् देखै है । कोऊ विना देख्या रखा नाही जाके  
देखनेकी इच्छा उपजै । ऐसै ही स्पर्शनादिककरि एक एक विषयकौ  
ग्रह्या चाहै था अब त्रिकालवर्ती त्रिलोकके सर्व स्पर्श रस गंध  
शब्दनिकौ युगपत् ग्रहै है कोऊ विना ग्रह्या रखा नाही जाके  
ग्रहणकी इच्छा उपजै । इहां कोऊ कहै शरीरादिक विना ग्रहण  
कैसे होइ ? ताका समाधान—

इन्द्रियज्ञान होतै तौ द्रव्यइन्द्रियादिविना ग्रहण न होता था ।  
अब ऐसा स्वभाव प्रगट भया जो विना ही इन्द्रिय ग्रहण हो है ।  
इहां कोऊ कहै जैसे मनकरि स्पर्शादिककौ जानिए है तैसे जानना  
होता होगा त्वचा जीभ आदिकरि ग्रहण हो है तैसे न होता  
होगा । सो ऐसै नाही है । मनकरि तौ स्मरणादि होतै अस्पष्ट  
जानना किल्लू हो है । इहां तौ स्पर्शरसादिककौ जैसे त्वचा जीभ  
इत्यादिकरि स्पर्श स्वाद सूँघ देखै मुनै जैसा स्पष्ट जानना हो है  
तिसतै भी अनंत गुणा स्पष्ट जानना तिनिकै हो है । विशेष  
इतना भया है—वहां इन्द्रियविषयका संयोग होतै ही जानना होता  
था इहां दूर रहे भी वैसा ही जानना हो है । सो यह शक्तिकी  
महिमा है । बहुरि मनकरि किल्लू अतीत अनागतकौ अव्यक्तकौ  
जान्या चाहै था अब सर्व ही अनादितै अनंतकालपर्यंत जे सर्व  
पदार्थनिके द्रव्यक्षेत्र काल भाव तिनिकौ युगपत् जानै है । कोऊ  
विना जान्या रखा नाही जाके जाननेकी इच्छा उपजै । ऐसै इन



दुख और दुखनिके कारण तिनिका अभाव जानना । बहुरि मोहके उदयतैं मिथ्यात्व वा कषायभाव होते थे तिनिका सर्वथा अभाव भया तातैं दुखका अभाव भया । बहुरि इनिके कारणनिका अभाव भया तातैं दुखके कारणका भी अभाव भया । सो कारणका अभाव दिखाइए है—

सर्व तत्त्व यथार्थ प्रतिभासैं अतत्त्वश्रद्धानरूप मिथ्यात्व कैसें होइ । कोऊ अनिष्ट रखा नाहीं निंदक स्वयमेव अनिष्ट पावै ही हैं आप क्रोध कौनसौं करै ? सिद्धनितैं ऊंचा कोई है नाहीं । इंद्रादिक आपहीतैं नमै हैं इष्ट पावैं हैं कौनस्यौं मान करै ? सर्व भवितव्य भास गया कार्य रखा नाहीं काहूस्यौं प्रयोजन रखा नाहीं काहेका लोभ करै ? कोऊ अन्य इष्ट रखा नाहीं । कौन कारनतैं हास्य होइ ? कोऊ अन्य इष्ट प्रीतिकरने योग्य है नाहीं । इहां कहा रति करै ? कोऊ दुखदायक संयोग रखा नाहीं, कहां अरति करै ? कोऊ इष्टअनिष्ट संयोगवियोग होता नाहीं, काहेकौं शोक करै ? कोऊ अनिष्ट करनेवाला कारन रखा नाहीं, कौनका भय करै ? सर्व वस्तु अपने स्वभाव लिए भासै आपकौं अनिष्ट नाहीं कहां जुगुप्सा करै ? कामपीड़ा दूर होनैतं स्त्रीपुरुष उभयस्यौं रमनेका किछू प्रयोजन रखा नाहीं, काहेकौं पुरुष स्त्री नपुंसक-वेद रूप भाव होइ ? ऐसैं मोह उपजनैका कारणनिका अभाव जानना । बहुरि अंतरायके उदयतैं शक्ति हीनपनाकरि पूरन न होती थी । अब ताका अभाव भया तातैं दुखका अभाव भया । बहुरि अनंत शक्ति प्रगट भई तातैं दुःखके कारणका भी अभाव भया । इहां कोऊ कहै, दान लभ भोग उपभोग करते नाहीं इनकी शक्ति कैसें प्रगट भई । ताका समाधान,—

ए कार्य रोगके उपचार थे । जब रोग ही नहीं तब उपचार काहेकौं करै । तातैं इनकार्यनिका सद्भाव तौ नहीं । अर इनिका रोकनहारे कर्मका अभाव भया तातैं शक्ति प्रगटी कहिए है । जैसें कोऊ नहीं गमन किया चाहै ताकौ काहनै रोक्या था तब दुखी था । जब वाकै रोकना दूरि भया अर जिह कार्यकै अर्थि गया चाहै था सो कार्य न रखा तब गमन भी न किया । तब वाकै गमन न करतै भी शक्ति प्रगटी कहिए । तैसें ही इहां जानना । बहुरि ज्ञानादिका शक्तिरूप अनंतवीर्य प्रगट उनकै पाइए है । बहुरि अघाति कर्मनिविषै मोहतैं पापप्रकृतिनिका उदय होतैं दुख मानै था । पुण्यप्रकृतिनिका उदयकौं सुख मानै था । परमार्थतैं आकुलताकरि सर्व दुख ही था । अब मोहके नाशतैं सर्व आकुलता दूरि होनेतैं सर्व दुःखका नाश भया । बहुरि जिन कारननिकरि दुख मानै था ते तौ कारन सर्व नष्ट भये । अर जिनिकरि किंचित् दुख दूरि होनेतैं सुख मानै था सो अब मूलहीमें दुख रखा नहीं । तातैं तिनि दुखके उपचारनिका किल्लू प्रयोजन रखा नहीं जो तिनिकरि कार्यकी सिद्धि किया चाहै । ताकी स्वयमेव ही सिद्धि होइ रही है । इसहीका विशेष दिखाइए है—वेदनीयविषै असाताके उदयतैं दुखके कारन शरीरविषै रोग क्षुधादिक होते थे । अब शरीर ही नहीं तब कहां होय । अर शरीरकी अनिष्ट अवस्थाकौं कारन आतापादिक थे सो अब शरीर विना कौनकौं कारन होय ? अर बाह्य अनिष्ट निमित्त बनै था सो अब इनिकै अनिष्ट रखा नहीं । ऐसें दुखका कारनका तौ अभाव भया । बहुरि साताके उदयतैं किंचित् दुख भेटनेके कारन औषधि भोज-

नादिक थे तिनिका प्रयोजन रखा नाही । अर इष्ट कार्य पराधीन रखा नाही ताँ बाह्य भी मित्रादिककौं इष्ट माननेका प्रयोजन रखा नाही । इनिकरि दुख भेट्या चाहै था वा इष्ट किया चाहै था सो अब संपूर्ण दुख नष्ट भया अर संपूर्ण इष्ट पाया । बहुरि आयुके निमित्ततै मरण जीवन था तहां मरणकरि दुःख मानै था सो अविनाशी पद पाया ताँ दुखका कारन रखा नाही । बहुरि द्रव्य प्राणनिकौं धरै कितेक काल जीवनै मरनेतै सुख मानै था तहां भी नरकपर्यायविषै दुःखकी विशेषताकरि तहां जीवना न चाहै था सो अब इस सिद्धपर्यायविषै द्रव्यप्राणविना ही अपने चैतन्य प्राणकरि सदाकाल जीवै है । अर तहां दुखका लवलेश भी न रखा है । बहुरि नामकर्मतै अशुभ गति जाति आदि होतै दुख मानै था सो अब तिनि सबनिका अभाव भया, दुख कहाँतै होय ? अर शुभगति जाति आदि होतै किंचित् दुख दूर होनेतै सुख मानै था, सो अब तिनि विना ही सर्व दुखका नाश अर सर्वसुखका प्रकाश पाइए है । ताँ तिनिका भी किछू प्रयोजन रखा नाही । बहुरि गोत्रके निमित्ततै नीचकुल पाए दुख मानै था सो ताका अभाव होनेतै दुखका कारन रखा नाही । बहुरि उच्चकुल पाए सुख मानै था सो अब उच्चकुल विना ही त्रैलोक्यपूज्य उच्चपदकौं प्राप्त है । या प्रकार सिद्धनिकै सर्व कर्मके नाश होनेतै सर्व दुखका नाश भया है । दुखका तौ लक्षण आकुलता है सो आकुलता तब ही हो है जब इच्छा होइ । सो इच्छाका वा इच्छाके कारणनिका सर्वथा अभाव भया ताँ निराकुल होय सर्व दुखरहित अनंत सुखकौं अनुभवै है । जाँ निराकुलपना ही

सुखका लक्षण है। संसारविषै भी कोऊ प्रकार निराकुल होइ तब ही सुख मानिए है। जहां सर्वथा निराकुल भया तहां सुख संपूरन कैसे न मानिए ? या प्रकार सम्यग्दर्शनादि साधनैतें सिद्धपद पाए सर्व दुखका अभाव हो है। सर्व सुख प्रगट हो है।

अब इहां उपदेश दीजिए है—हे भव्य हे भाई जो तोकूं संसारके दुख दिखाए ते तुझविषै बीतैं हैं कि नाहीं सो विचारि। अर तू उपाय करै है ते झूठे दिखाए सो ऐसैं ही है कि नाहीं सो विचारि। अर सिद्धपद पाए सुख होइ कि नाहीं सो विचारि। जो तेरै प्रतीति जैसे कहिए है तैसे ही आवै है तौ तूं संसारतैं छूटि सिद्धपद पावनेका हम उपाय कहै हैं सो करि। विलंब मति करै। इह उपाय किए तेरा कल्याण होगा।

इति श्रीमोक्षमार्गप्रकाशक नाम शास्त्रविषै संसारदुखका वा मोक्षसुखका निरूपक तृतीय अधिकार सम्पूर्ण भया ॥३॥

दोहा।

इस भवके सब दुखनिके, कारन मिथ्याभाव।

तिनिकी सत्ता नाश करि, प्रगटै मोक्षउपाव ॥ १ ॥

अब इहां संसार दुखनिके बीजभूत मिथ्यादर्शन मिथ्याज्ञान मिथ्याचारित्र हैं तिनिका स्वरूप विशेष निरूपण कीजिए है। जैसे वैद्य है सो रोगके कारननिका विशेष कहै तौ रोगी कुपथ्य सेवन न करै तब रोगरहित होय, तैसे इहां संसारके कारननिका विशेष निरूपण करिए है। जातैं संसारी मिथ्यात्वादिकका सेवन न करै तब संसाररहित होय तातैं मिथ्यादर्शनादिकनिका विशेष कहिए है,—

यह जीव अनादितै कर्मसंबंधसहित है। याकै दर्शनमोहके उदयतै भया जो अतत्त्वश्रद्धान ताका नाम मिथ्यादर्शन है। जातै तद्भाव जो श्रद्धान करने योग्य अर्थ है ताका जो भाव स्वरूप ताका नाम तत्त्व है। अर तत्त्व नाहीं ताका नाम अतत्त्व है। अर अतत्त्व है सो असत्य है तातै इसहीका नाम मिथ्या है। बहुरि यह ऐसै ही है, ऐसा प्रतीतिभाव ताका नाम श्रद्धान है। इहां श्रद्धानहीका नाम दर्शन है। यद्यपि दर्शनशब्दका अर्थ सामान्य अवलोकन है तथापि इहां प्रकरणके वशतै इस ही धातुका अर्थ श्रद्धान जानना। सो ऐसै ही सर्वार्थसिद्धिनाम सूत्रकी टीका-विषै कहा है। जातै सामान्यअवलोकन संसारमोक्षकौ कारण होइ नाहीं। श्रद्धान ही संसार मोक्षकौ कारण है तातै संसारमोक्षका कारणविषै दर्शनका अर्थ श्रद्धान ही जानना। बहुरि मिथ्यारूप जो दर्शन कहिए श्रद्धान ताका नाम मिथ्यादर्शन है। जैसे वस्तुका स्वरूप नाहीं तैसेँ मानना, जैसेँ है तैसेँ न मानना ऐसा विपरीता-भिनिवेश कहिए विपरीत अभिप्राय ताकौ लिए मिथ्यादर्शन हो है। इहां प्रश्न,—जो केवलज्ञान विना सर्वपदार्थ यथार्थ भासै नाहीं अर यथार्थ भासे विना यथार्थ श्रद्धान न होइ। तातै मिथ्या-दर्शनका त्याग कैसेँ बनै ? ताका समाधान,—

पदार्थनिका जानना न जानना अन्यथा जानना तौ ज्ञानावरणके अनुसारि है। बहुरि प्रतीति हो है सो जाने ही हो है। विना जाने प्रतीति कैसेँ आवै ? यह तौ सत्य है। परंतु जैसेँ कोऊ पुरुष है सो जिनस्यौ प्रयोजन नाहीं तिनिकौ अन्यथा जानै वा यथार्थ जानै बहुरि जैसेँ जानै तैसेँ ही मानै, किछू वाका बिगार.

सुधार है नहीं, तातैं बाउला स्याणा नाम पावै नहीं । बहुरि जिनस्यौं प्रयोजन पाइए है तिनिकौं जो अन्यथा जानै अर तैसें ही मानै तौ बिगाड़ होइ तातैं वाकौं बाउला कहिए । बहुरि तिनिकौं जो यथार्थ जानै अर तैसें ही मानै तौ सुधार होइ । तातैं वाकौं स्याणा कहिए । तैसें ही जीव है सो जिनस्यौं प्रयोजन नहीं तिनिकौं अन्यथा जानौ वा यथार्थ जानौ । बहुरि जैसें जानौ तैसें श्रद्धान करो किछू याका बिगार सुधार नहीं । तातैं मिथ्यादृष्टी सम्यग्दृष्टी नाम पावै नहीं । बहुरि जिनस्यौं प्रयोजन पाइए है तिनिकौं जो अन्यथा जानै अर तैसें ही श्रद्धान करै तौ बिगाड़ होइ । तातैं याकौं मिथ्यादृष्टी कहिए । बहुरि तिनिकौं जो यथार्थ जानै अर तैसें ही श्रद्धान करै तौ सुधार होइ । तातैं याकौं सम्यग्दृष्टी कहिए । इहां इतना जानना कि अप्रयोजनभूत वा प्रयोजनभूत पदार्थनिका न जानना वा यथार्थ अयथार्थ जानना जो होइ तामैं ज्ञानकी हीनता अधिकता होना इतना जीवका बिगार सुधार है । ताका निमित्त तौ ज्ञानावरण कर्म है । बहुरि तहां प्रयोजनभूत पदार्थनिकौं अन्यथा वा यथार्थ श्रद्धान किए जीवका किछू और भी बिगार सुधार हो है । तातैं याका निमित्त दर्शनमोह नामा कर्म है । इहां कोऊ कहै कि जैसा जानै तैसा श्रद्धान करै तातैं ज्ञानावरणहीकै अनुसारि श्रद्धान भासै है इहां दर्शनमोहका विशेष निमित्त कैसें भासै ? ताका समाधान,—

प्रयोजनभूत जीवादि तत्त्वनिका श्रद्धान करनेयोग्य ज्ञानावरणका क्षयोपशम तौ सर्व संज्ञी पंचेन्द्रियनिकै भया है । परंतु द्रव्यलिंगी मुनि ग्यारह अंग पर्यंत पढ़ैं वा त्रैवैयक देव अवधिज्ञानादियुक्त हैं

तिनिकै ज्ञानावरणका क्षयोपशम बहुत होतैं भी प्रयोजनभूत जीवा-  
दिकका श्रद्धान न होइ । अर तिर्यचादिककै ज्ञानावरणका क्षयो-  
पशम थोरा होतैं भी प्रयोजनभूत जीवादिकका श्रद्धान होइ तातैं  
जानिए है ज्ञानावरणहीकै अनुसारि श्रद्धान नाहीं । कोऊ जुदा कर्म  
है सो दर्शनमोह है । याकै उदयतैं जीवकै मिथ्यादर्शन हो है,  
तब प्रयोजनभूत जीवादितत्त्वनिका अन्यथा श्रद्धान करै है । इहां  
कोऊ पूछै कि प्रयोजनभूत अप्रयोजनभूत तत्त्व कौन हैं? ताका  
समाधान,—

इस जीवके प्रयोजन तौ एक यह ही है कि दुख न होय सुख  
होय । अन्य किछू भी कोई ही जीवकै प्रयोजन है नाहीं । बहुरि  
दुखका न होना सुखका होना एक ही है जातैं दुखका अभाव सोई  
सुख है । सो इस प्रयोजनकी सिद्धि जीवादिकका सत्य श्रद्धान  
किए हो है । कैसें सो कहिए है,—

प्रथम तौ दुख दूरि करनेविषै आपापरका ज्ञान अवश्य चाहिए ।  
जो आपापरका ज्ञान नाहीं होय तौ आपकौ पहिचाने विना  
अपना दुख कैसें दूरि करै । अथवा आपापरकौ एक जानि अपना  
दुखदूरि करनेकै अर्थि परका उपचार करै तौ अपना दुख दूरि  
कैसें हो । अथवा आपतैं पर भिन्न अर यह परविषै अहंकार  
ममकार करै तातैं दुख ही होय । आपापरका ज्ञान भए दुख दूरि  
हो है । बहुरि आपापरका ज्ञान जीव अजीवका ज्ञान भए ही होइ ।  
तातैं आप जीव है शरीरादिक अजीव हैं । जो लक्षणादिककरि जीव  
अजीवकी पहिचान होइ तौ आपापरकौ भिन्नपनौ भासै । तातैं जीव  
अजीवकौ जानना अथवा जीव अजीवका ज्ञान भए जिन पदार्थ-

निका अन्यथा श्रद्धानतै दुख होता था तिनिका यथार्थ ज्ञान होनेतै दुख दूर होय । तातै जीव अजीवकौ जानना । बहुरि दुखका कारन तौ कर्मबंधन है । अर ताका कारन मिथ्यात्वादिक आसव है । सो इनिकौ न पहिचानै इनिकौ दुखका मूलकारन न जानै तौ इनिका अभाव कैसै करै । अर इनिका अभाव न करै तब कर्मबंध होइ तातै दुख ही होइ । अथवा मिथ्यात्वादिक भाव हैं सो ए दुखमय हैं । सो इनिकौ जैसेके तैसे न जानै, तौ इनिका अभाव न करै । तब दुख ही रहै । तातै आसवकौ जानना । बहुरि समस्त दुखका कारण कर्मबंधन है सो याकौ न जानै तब यातै मुक्त होनेका उपाय न करै । तब ताके निमित्ततै दुखी होइ । तातै बंधकौ जानना । बहुरि आसवका अभाव करना सो संवर है । याका स्वरूप न जानै तौ याविषै न प्रवर्त्तै तब आसव ही रहै तातै वर्त्तमान वा आगामी दुख ही होइ । तातै संवरकौ जानना । बहुरि कथंचित् किंचित्कर्मबंधका अभाव ताका नाम निर्जरा है सो याकौ न जानै तब याकी प्रवृत्तिका उद्यमि न होइ । तब सर्वथा बंध ही रहै तातै दुख ही होइ । तातै निर्जराकौ जानना । बहुरि सर्वथा सर्व कर्मबंधका अभाव होना ताका नाम मोक्ष है । सो याकौ न पहिचानै तौ याका उपाय न करै तब संसारविषै कर्मबंधतै निपजे दुखनिहीकौ सहै तातै मोक्षकौ जानना । ऐसै जीवादि सप्त तत्त्व जानने । बहुरि शास्त्रादिकरि कदाचित् तिनिकौ जानै अर ऐसै ही है ऐसी प्रतीति न आई तौ जानै कहा होय तातै तिनिका श्रद्धान करना कार्यकारी है । ऐसै जीवादि तत्त्वनिका सत्यश्रद्धान किए ही दुख होनेका अभावरूप प्रयोजनकी सिद्धि हो है । तातै



जीवादिक पदार्थ हैं ते ही प्रयोजनभूत जानने । बहुरि इनिके विशेषभेद पुण्यपापादिकरूप तिनिका भी श्रद्धान प्रयोजनभूत है । जातैं सामान्यतैं विशेष बलवान् है । ऐसैं ये पदार्थ तौ प्रयोजनभूत हैं तातैं इनका यथार्थ श्रद्धान किए तौ दुख न होइ सुख होय । अर इनिकौं यथार्थ श्रद्धान किए विना दुख हो है सुख न हो है । बहुरि इनि विना अन्य पदार्थ हैं ते अप्रयोजनभूत हैं । जातैं तिनिकौं यथार्थश्रद्धान करो वा मति करो उनका श्रद्धान किछू सुखदुखकौं कारन नाहीं । इहां प्रश्न उपजै है, जो पूर्वै जीव अजीव पदार्थ कहे तिनिविषै तौ सर्व पदार्थ आय गए तिति विना अन्य पदार्थ कौन रहे जिनिकौं अप्रयोजनभूत कहे । ताका समाधान,—

पदार्थ तौ सर्व जीव अजीवविषै ही गर्भित हैं परंतु तिन जीव अजीवके विशेष बहुत हैं । तिनिविषै जिन विशेषनिकरि सहित जीव अजीवको यथार्थ श्रद्धान किए स्वपरका श्रद्धान होय रागादिक दूर करनेका श्रद्धान होय तातैं सुख उपजै । अयथार्थ श्रद्धान किए स्वपरका श्रद्धान न होइ रागादिक दूर करनेका श्रद्धान न होइ तातैं दुख उपजै । तिनिविशेषनिकरि सहित जीव अजीव पदार्थ तौ प्रयोजनभूत जानने । बहुरि तिन विशेषनिकरि सहित जीव अजीवकौं यथार्थ श्रद्धान किए स्वपरका श्रद्धान न होय वा होय अर रागादिक दूर करनेका श्रद्धान होइ वा न होइ किछू नियम नाहीं । तिनिविशेषनिकरि सहित जीव अजीव पदार्थ अप्रयोजनभूत जानने । जैसैं जीव अर शरीरका चैतन्य मूर्त्त्वादिविशेषनिकरि श्रद्धान करना तौ प्रयोजनभूत है । अर मनुष्यादि पर्यायनिका वा घटपटादिका अवस्था आकारादिविशेषनिकरि श्रद्धान करना अप्रयोजनभूत

है। ऐसै ही अन्य जानने। याप्रकार कहे जे प्रयोजनभूत जीवा-  
दिक तत्त्व तिनिका अयथार्थ श्रद्धान ताका नाम मिथ्यादर्शन  
जानना। अब संसारी जीवनिकै मिथ्यादर्शनकी प्रवृत्ति कैसै पाइए  
है सो कहिए है। इहां वर्णन तौ श्रद्धानका करना है परंतु जानै  
तब श्रद्धान करै तातै जाननेकी मुख्यताकरि वर्णन करिए है।

अनादितै जीव है सो कर्मके निमित्ततै अनेक पर्याय धरै है  
तहां पूर्व पर्यायकौ छोड़ै नवीन पर्याय धरै। बहुरि वह पर्याय  
है सो एक तौ आप आत्मा अर अनंत पुद्गलपरमाणुमय शरीर  
तिनिका एक पिंड बंधानरूप है। बहुरि जीवकै तिसपर्यायविषै  
यह भै हों ऐसै अहंबुद्धि हो है। बहुरि आप जीव है ताका  
स्वभाव तौ ज्ञानादिक है अर विभाव क्रोधादिक हैं। अर पुद्गल  
परमाणुनिके वर्ण गंध रस स्पर्शादि स्वभाव हैं तिनिसबनिकौ  
अपना स्वरूप मानै है। ए मेरे हैं ऐसै ममबुद्धि हो है। बहुरि  
आप जीव है ताकौ ज्ञानादिककी वा क्रोधादिककी अधिकहीन-  
तारूप अवस्था हो है। अर पुद्गलपरमाणुनिकी वर्णादि पलटनेरूप  
अवस्था हो है तिनिसबनिकौ अपनी अवस्था मानै है। ए मेरी  
अवस्था है। ऐसै ममबुद्धि करै है। बहुरि जीवकै अर शरीरकै  
निमित्तनैमित्तिक संबंध है तातै जो क्रिया हो है ताकौ अपनी  
मानै है। अपना दर्शनज्ञानस्वभाव है ताकी प्रवृत्तिकौ निमित्त मात्र  
शरीरका अंगरूपस्पर्शनादि द्रव्यइंद्रिय हैं। यह तिनिकौ एकमानि  
ऐसै मानै है जो हस्तादि स्पर्शनकरि भै स्पर्शा, जीभकरि चाख्या,  
नासिकाकरि सूंध्या, नेत्रकरि देख्या, कानकरि सुन्या, ऐसै मानै  
है। मनोवर्गणारूप आठपांखुड़ीका फूल्या कमलकै आकारि हृदय-

स्थानविषै द्रव्य मन है दृष्टिगम्य नाही ऐसा है सो शरीरका अंग है ताका निमित्त भए सरणादिरूप ज्ञानकी प्रवृत्ति हो है । यह द्रव्य मनकों अर ज्ञानकों एक मानि ऐसैं मानै है कि मैं मनकरि जान्या । बहुरि अपने बोलनेकी इच्छा हो है तब अपने प्रदेश-निकों जैसैं बोलना बनै तैसैं हलावै तब एकक्षेत्रावगाहसंबंधतैं शरीरके अंग ~~है~~ ताके निमित्ततैं भाषावर्णारूप पुद्गलवचनरूप परिणमै । यह सबकों एक मानि ऐसैं मानै जो मैं बोलौं हों । बहुरि अपने गमनादिक क्रियाकी वा वस्तुग्रहणादिककी इच्छा होय तब अपने प्रदेशनिकों जैसैं कार्य बनै तैसैं हलावै तब एक क्षेत्रा-वगाहतैं शरीरके अंग हालैं तब वह कार्य बनै । अथवा अपनी इच्छाविना शरीर हालै तब अपने प्रदेश भी हालैं । यह सबकों एक मानि ऐसैं मानै, मैं गमनादिकार्य करौं हों वा वस्तु ग्रहौं हों । वा मैं किया है इत्यादिरूप मानै है । बहुरि जीवकै कषायभाव होय तब शरीरकी चेष्टा ताकै अनुसार होय जाय । जैसैं क्रोधा-दिक भए रक्तनेत्रादि हो जांय । हास्यादि भए प्रफुल्लित वदनादि होय जाय । पुरुषवेदादि भए लिंगकाठिन्यादि होय जाय । यह सबकों एक मानि ऐसा मानै कि ए कार्य सर्व मैं करौं हों । बहुरि शरीरविषै शीतउष्ण क्षुधा तृषा रोग आदि अवस्था हो है ताके निमित्ततैं मोहभावकरि आप सुखदुख मानै इन सबनिकों एक जानि शीतादिककों वा सुखदुखकों अपने ही भए मानै है बहुरि शरीरका परमाणूनिका मिलना विह्वरनादि होनेकरि वा तिनिकी अवस्था पलटनेकरि वा शरीरस्कंधका खंडादि होनेकरि स्थूल कृशादिक वा बाल वृद्धादिक वा अंगहीनादिक होय । अर

ताकै अनुसार अपने प्रदेशनिका संकोच विस्तार होइ यह सबकों एक मानि मैं स्थूल हौं मैं कृश हौं मैं बालक हौं मैं वृद्ध हौं मेरे इनि अंगनिका भंग भया है इत्यादि रूप मानै है । यह शरीरकी अपेक्षा गतिकुलादिक होइ तिनिकों अपने मानि मैं मनुष्य हौं मैं तिर्यच हौं मैं क्षत्रिय हौं मैं वैश्य हौं इत्यादिरूप मानै है । बहुरि शरीर संयोग होने छूटनेकी अपेक्षा जन्म मरण होय तिनिकों अपना जन्म मरण मानि मैं उपज्या, मैं मरुंगा ऐसा मानै है । बहुरि शरीरहीकी अपेक्षा अन्यवस्तुनिस्यों नाता मानै है । जिनकरि शरीर निपज्या तिनिकों आपके माता पिता मानै है । जो शरीरकूं रमावै ताकों अपनी रमणी मानै है । जो शरीरकरि निपज्या ताकों अपना पुत्र मानै है । जो शरीरकों उपगारी ताकों मित्र मानै है । जो शरीरका बुरा करै ताकों शत्रु मानै है इत्यादिरूप मानि हो है । बहुत कहा कहिए जिसतिसप्रकारकरि आप अर शरीरकों एक ही मानै है । इंद्रियादिकका नाम तौ इहां कछा है । याकूं तौ किञ्चु गम्य नाही । अचेत हुवा पर्यायविषै अहंबुद्धि धारै है । सो कारन कहा है, सो कहिए है,—इस आत्मकै अनादितैं इंद्रियज्ञान है ताकरि आप अमूर्त्तिक है सो तौ भासै नाही अर शरीर मूर्त्तिक है सो ही भासै । अर आत्मा काहूकों आपौ जानि अहंबुद्धि धारै ही धारै सो आप जुदा न भास्या तब तिनिका समुदायरूप पर्यायविषै ही अहंबुद्धि धारै है । बहुरि आपके अर शरीरकै निमित्त नैमित्तिक संबंध घना ताकरि भिन्नता भासै नाही । बहुरि जिसविचारकरि भिन्नता भासै सो मिथ्यादर्शनके जोरतैं होइ सकै नाही । तातैं पर्यायहीविषै अहंबुद्धि पाइए है । बहुरि

मिथ्यादर्शनकरि यह जीव कदाचित् बाह्यसामग्रीका संयोग होतैं तिनिकौं भी अपनी मानै है । पुत्र स्त्री धन धान्य हाथी घोरे मंदिर किंकरादिक प्रत्यक्ष आपतैं भिन्न अर सदाकाल अपने आधीन नाहीं ऐसे आपकौं भासैं तौ भी तिनविषै ममकार करै है । पुत्रादिकविषै ए हैं, सो मैं ही हौं ऐसी भी कदाचित् भ्रमबुद्धि हो है । बहुरि मिथ्यादर्शनतैं शरीरादिकका स्वरूप अन्यथा ही भासै है । अनित्यकौं नित्य मानै है भिन्नकौं अभिन्न मानै दुखके कारनकौं सुखके कारन मानै दुखकौं सुख मानै इत्यादि विपरीत भासै है । ऐसैं जीव अजीवतत्त्वनिका अयथार्थ ज्ञान होतैं अयथार्थ श्रद्धान हो है । तिनकौं अपना स्वभाव मानै है । कर्म उपाधितैं भए न जानै है । दर्शन ज्ञान उपयोग अर ए आस्रवभाव तिनकौं एक मानै है । जातैं इनका आधारभूत तौ एक आत्मा अर इनिका परिणमन एकै काल होइ तातैं याकौं भिन्नपनौ न भासै अर भिन्नपनौ भासनेका कारन जो विचारै है सो मिथ्यादर्शनके बलतैं होइ सकैं नाहीं । बहुरि ए मिथ्यात्व कषायभाव आकुलतालिए हैं, तातैं वर्त्तमान दुखमय हैं । अर कर्मबंधके कारन हैं, तातैं आगामी दुख उपजावैंगे तिनिकौं ऐसैं न मानै है आप भला जानि इन भावनिरूप होइ प्रवर्त्तै है । बहुरि यह दुखी तौ अपने इन मिथ्यात्वकषायभावनितैं होइ अर वृथा ही औरनिकौं दुख उपजावनहारे मानै । जैसैं दुखी तौ मिथ्यात्वश्रद्धानतैं होइ अर अपने श्रद्धानके अनुसार जो पदार्थ न प्रवर्त्तै ताकौं दुखदायक मानै । बहुरि दुखी तौ क्रोधतैं हो है अर जासौं क्रोध किया होय ताकौं दुखदायक मानै । दुखी तौ लोभतैं होइ अर इष्ट वस्तुकी

अप्राप्तिको दुखदायक मानै ऐसै ही अन्यत्र जानना । बहुरि इनि भावनिका जैसा फल लागै तैसा न भासै है इनकी तीव्रताकरि नरकादिक हो है । मंदताकरि स्वर्गादिक हो है । तहां घनी थोरी आकुलता हो है सो भासै नाहीं तातैं बुरे न लागै हैं । कारन कहा है कि ए आपके किए भासैं तिनको बुरे कैसें मानै । बहुरि ऐसै ही आस्रव तत्त्वका अयथार्थ ज्ञान होतैं अयथार्थ श्रद्धान हो है । बहुरि इनि आस्रवभावनिकरि ज्ञानावरणादिकर्मनिका बंध हो है । तिनिका उदय होतैं ज्ञानदर्शनका हीनपना होना, मिथ्यात्वकषायरूप परिणमनि, चाह्या न होना, सुखदुखका कारन मिलना, शरीरसंयोग रहना, गतिजातिशरीरादिकका निपजना, नीचा ऊंचा कुल पावना होइ । सो इनिके होनेविषै मूलकारन कर्म है । ताको तौ पहिचानै नाहीं जातैं वह सूक्ष्म है याको सूझता नाहीं । अर आपको इनि कार्यानिका कर्त्ता दीसै नाहीं तातैं इनिके होनेविषै कै तौ आपको कर्त्ता मानै कै काहू औरको कर्त्ता मानै । अर आपका वा अन्यका कर्त्तापना न भासै तौ गहलरूप होय भवितव्य मानै । ऐसै ही बंधतत्त्वका अयथार्थ ज्ञान होतैं अयथार्थ श्रद्धान हो है । बहुरि आस्रवका अभाव होना सो संवर है । जो आस्रवको यथार्थ न पहिचानै ताके संवरका यथार्थश्रद्धान कैसें होइ ? जैसै काहूके अहित आचरण है । वाको वह अहित न भासै तौ ताके अभावको हितरूप कैसें मानै । तैसै ही जीवके आस्रवकी प्रवृत्ति है । याको यह अहित न भासै तौ ताके अभावरूप संवरको कैसें हित मानै । बहुरि अनादितैं इस जीवके आस्रवभाव ही भया संवर कबहू न भया तातैं संवरका होना भासै नाहीं । संवर

होतैं सुख हो है सो भासै नाहीं । संवरतैं आगामी दुख न होसी सो भासै नाहीं । तातैं आस्रवका तो संवर करै नाहीं, वृथा ही खेद-खिन्न होय । ऐसैं संवरतत्त्वका अयथार्थ ज्ञान होतैं अयथार्थ श्रद्धान हो है । बहुरि बंधका एकदेश अभाव होना सो निर्जरा है । जो बंधकों यथार्थ न पहिचानै ताकै निर्जराका यथार्थ श्रद्धान कैसें होय ? जैसें भक्षण किया हुवा विषआदिकतैं दुख होता न जानै तौ ताकै उषालका उपायकों कैसें भला जानै । तैसें बंधनरूप किए कर्मनितैं दुख होना न जानै तौ तिस निर्जराका उपायकों कैसें भला जानै । बहुरि इस जीवकै इंद्रियनितैं सूक्ष्मरूप कर्मनिका तौ ज्ञान होता नाहीं । बहुरि तिनविषै दुखकों कारनभूत शक्ति है ताका ज्ञान नाहीं तातैं अन्य पदार्थनिहीके निमित्तकों दुखदायक जानि तिनिकेई अभाव करनेका उपाय करै है । सो अपने आधीन नाहीं । बहुरि कदाचित् दुख दूरि करनेके निमित्त कोई इष्ट संयोगादि कार्य बनै है सो वह भी कर्मके अनुसार बनै है । तातैं तिनिका उपायकरि वृथा ही खेद करै है । ऐसैं निर्जरातत्त्वका अयथार्थ ज्ञान होतैं अयथार्थ श्रद्धान हो है । बहुरि सर्व कर्मबंधका अभाव ताका नाम मोक्ष है । जो बंधकों वा बंधजनित सर्व दुखनिकों नहीं पहिचानै ताकै मोक्षका यथार्थ श्रद्धान कैसें होइ । जैसें काहूकै रोग है वह तिस रोगकों वा रोगजनित दुखनिकों न जानै तौ सर्वथा रोगके अभावकों कैसें भला जानै ? बहुरि इस जीवकै कर्मका वा तिनकी शक्तिका तौ ज्ञान नाहीं तातैं बाह्यपदार्थनिकों दुखका कारन जानि तिनकै सर्वथा अभाव करनेका

उपाय करै है । अर यह तौ जानै सर्वथा दुख दूर होनेका कारन इष्ट सामग्रीनिकौं मिलाय सर्वथा सुखी होना सो कदाचित् होय सकै नाहीं । यह वृथा ही खेद करै है । ऐसैं मिथ्यादर्शनतैं मोक्ष-तत्त्वका अयथार्थ ज्ञान होनेतैं अयथार्थ श्रद्धान हो है । या प्रकार यह जीव मिथ्यादर्शनतैं जीवादि सप्त तत्त्वप्रयोजनभूत हैं तिनिका अयथार्थ श्रद्धान करै है । बहुरि पुण्यपाप हैं ते इनिके विशेष हैं । सो इन पुण्य पापनिकी एक जाति है तथापि मिथ्यादर्शनतैं पुण्यकौं भला जानै है । पापकौं बुरा जानै है । पुन्यकरि अपनी इच्छाके अनुसार किंचित् कार्य बनै है, ताकौं भला जानै है । पापकरि इच्छाके अनुसार कार्य न बनै ताकौं बुरा जानै है सो दोन्यौं ही आकुलताके कारन हैं तातैं बुरे ही हैं । बहुरि यह अपनी मानितैं तहां सुखदुख मानै है । परमार्थतैं जहां आकुलता है तहां दुख ही है । तातैं पुण्यपापके उदयकौं भला बुरा जानना भ्रम ही है । बहुरि केई जीव कदाचित् पुण्यपापके कारन जे शुभ अशुभ भाव तिनिकौं भले बुरे जानै हैं सो भी भ्रम है । जातैं दोऊ ही कर्मबंधके कारन हैं । ऐसैं पुण्यपापका अयथार्थज्ञान होतैं अयथार्थश्रद्धान हो है । या प्रकार अतत्त्वश्रद्धानरूप मिथ्यादर्शनका स्वरूप कह्या । यह असत्यरूप है तातैं याहीका नाम मिथ्यात्व है । बहुरि यह सत्यश्रद्धानतैं रहित है तातैं याहीका नाम अदर्शन है । अब मिथ्याज्ञानका स्वरूप कहिए है,—

प्रयोजनभूत जीवादि तत्त्वनिका अयथार्थ जानना ताका नाम मिथ्याज्ञान है । ताकरि तिनिके जाननेविषै संशय विपर्यय अनध्य-वसाय हो है । तहां 'ऐसैं है कि ऐसैं है' ऐसा जो परस्पर विरुद्धता



लिए दोयरूप ज्ञान ताका नाम संशय है। जैसे 'मैं आत्मा हों कि शरीर हों' ऐसा जानना। बहुरि 'ऐसैं ही है' ऐसा वस्तुस्वरूपतैं विरुद्धतालिए एकरूप ज्ञान ताका नाम विपर्यय है। 'जैसैं मैं शरीर हों' ऐसा जानना। बहुरि 'किडू है' ऐसा निर्द्वाररहित विचार ताका नाम अनध्यवसाय है। जैसे 'मैं कोई हों' ऐसा जानना। याप्रकार प्रयोजनभूत जीवादि तत्त्वनिविषै संशय विपर्यय अनध्यवसायरूप जो जानना होय ताका नाम मिथ्याज्ञान है। बहुरि अप्रयोजनभूत पदार्थनिकों यथार्थ जानै ताकी अपेक्षा मिथ्याज्ञान सम्यग्ज्ञान नाम नाहीं है। जैसे मिथ्यादृष्टि जेवरीकों जेवरी जानै तौ सम्यग्ज्ञान नाम न होय। अर सम्यग्दृष्टी जेवरीकों सांप जानै तौ मिथ्याज्ञान नाम न होय। इहां प्रश्न,—जो प्रत्यक्ष सांचा झूठा ज्ञानकों सम्यग्ज्ञान मिथ्याज्ञान कैसैं न कहिए? ताका समाधान,—

जहां जाननेहीका—सांच झूठ निर्द्वार करनेहीका प्रयोजन होय तहां तौ कोई पदार्थ ताका सांचा झूठा जाननेकी अपेक्षा ही मिथ्याज्ञान सम्यग्ज्ञान नाम पावै है। जैसे प्रत्यक्ष परोक्षप्रमाणका वर्णनविषै कोई पदार्थ होय ताका सांचा जाननेरूप सम्यग्ज्ञानका ग्रहण किया है। संशयादिरूप जाननेकों अप्रमाणरूप मिथ्याज्ञान कहा है। बहुरि इहां संसार मोक्षके कारणभूत सांचा झूठा जाननेका निर्द्वार करना है सो जेवरी सर्पादिकका यथार्थ वा अन्यथा ज्ञान संसार मोक्षका कारन नाहीं। तातैं तिनकी अपेक्षा इहां मिथ्याज्ञान सम्यग्ज्ञान न कहा। इहां प्रयोजनभूत जीवादिक तत्त्वनिहीका जाननेकी अपेक्षा मिथ्याज्ञान सम्यग्ज्ञान कहा है। इस ही अभिप्रायकरि सिद्धांतविषै मिथ्यादृष्टीका तौ सर्व जानना

मिथ्याज्ञान ही कहा अर सम्यग्दृष्टीका सर्व जानना सम्यग्ज्ञान कहा । इहां प्रश्न,—जो मिथ्यादृष्टीकै जीवादि तत्त्वनिका अयथार्थ जानना है ताकौं मिथ्याज्ञान कहौ । जेवरी सर्पादिकके यथार्थ जाननेकौं तौ सम्यग्ज्ञान कहौ । ताका समाधान—

मिथ्यादृष्टी जानै है तहां वाकै सत्ता असत्ताका विशेष नाही है । तातैं कारणविपर्यय वा स्वरूपविपर्यय वा भेदाभेदविपर्ययकौं उपजावै है । तहां जाकौं जानै है ताका मूल कारनकौं न पहिचानै । अन्यथा कारण मानै सो तो कारणविपर्यय है । बहुरि जाकौं जानै ताका मूलवस्तुस्वरूप स्वरूप ताकौं न पहिचानै अन्यथास्वरूप मानै सो स्वरूपविपर्यय है । बहुरि जाकौं जानै ताकौं ए इनतैं भिन्न हैं ए इनतैं अभिन्न हैं ऐसा न पहिचानै अन्यथा भिन्न अभि-  
 जेदा नपनौ मानै सो भेदविपर्यय है । ऐसैं मिथ्यादृष्टीकै जाननेविषै विपरीतता पाइए है । जैसैं मतवाला माताकौं भार्या मानै भार्याकौं माता मानै तैसैं मिथ्यादृष्टीकै अन्यथा जानना है । बहुरि जैसैं काहूकालविषै मतवाला माताकौं माता वा भार्याकौं भार्या भी जानै तौ भी वाकै निश्चयरूप निर्द्धारकरि श्रद्धान लिए जानना न हो है । तातैं ताकै यथार्थज्ञान न कहिए । तैसैं मिथ्यादृष्टी काहू-  
 कालविषै किसी पदार्थकौं सत्य भी जानै तौ भी वाकै निश्चयरूप निर्द्धारकरि श्रद्धानलिए जानना न हो है । अथवा सत्य भी जानै परंतु तिनकरि अपना प्रयोजन जो अयथार्थ ही साधै है तातैं वाकै सम्यग्ज्ञानन कहिए । ऐसा मिथ्यादृष्टीकै ज्ञानकौं मिथ्याज्ञान कहिए है । इहां प्रश्न,—जो इस मिथ्यातका कारन कौन है? ताका समाधान,—

मोहके उदयतैं जो मिथ्यात्वभाव होय सम्यक्त्व न होय सो इस मिथ्याज्ञानका कारण है । जैसे विषके संयोगतैं भोजन भी विषरूप कहिए तैसें मिथ्यात्वके संबन्धतैं ज्ञान है सो मिथ्याज्ञान नाम पावै । इहां कोऊ कहै ज्ञानावरणका निमित्त क्यों न कहौ ? ताका समाधान,—

ज्ञानावरणके उदयतैं तौ ज्ञानका अभावरूप अज्ञानभाव हो है । बहुरि क्षयोपशमतैं किंचित् ज्ञानरूप मतिज्ञानआदि ज्ञान हो हैं । जो इनिविषै काहूकौं मिथ्याज्ञान काहूकौं सम्यग्ज्ञान कहिए तौ दोऊंहीका भाव मिथ्यादृष्टी वा सम्यग्दृष्टीकै पाइए है तातैं तिनि दोऊंनिकै मिथ्याज्ञान वा सम्यग्ज्ञानका सद्भाव होय जाय सो सिद्धांतविरुद्ध है । तातैं ज्ञानावरणका निमित्त बनै नाहीं । बहुरि इहां कोऊ पूछै कि जेवरी सर्पादिकका अयथार्थज्ञानका कौन कारन है तिसहीकौं जीवादितत्त्वनिका अयथार्थ यथार्थज्ञानका कारन कहौ, ताका उत्तर,—

जो जाननेविषै जेता अयथार्थपना हो है तेता तौ ज्ञानावरणका उदयतैं हो है । अर यथार्थपना हो है तेता ज्ञानावरणके क्षयोपशमतैं हो है । जैसें जेवरीकौं सर्प जान्या सो अयथार्थ जाननेकी शक्तिका कारन उदय है तातैं अयथार्थ जानै है । बहुरि जेवरीकौं जेवरी जानी सो यथार्थ जाननेकी शक्तिका कारन क्षयोपशम है तातैं यथार्थ जानै है । तैसें ही जीवादि तत्त्वनिका यथार्थ जाननेकी शक्ति न होने वा होनेविषै ज्ञानावरणहीका निमित्त है परंतु जैसें काहूपुरुषकै क्षयोपशमतैं दुखकौं वा सुखकौं कारणभूत पदार्थनिकौं यथार्थ जाननेकी शक्ति होय तहां जाकै

असातावेदनीका उदय होय सो दुखकों कारनभूत जो होय तिसहीकों वेदै सुखका कारनभूत पदार्थनिकों न वेदै अर जो वेदै तौ सुखी हो जाय । सो असाताका उदय होतैं होय सकै नाही । तातैं इहां दुखकों कारनभूत अर सुखकों कारनभूत पदार्थ वेदनैविषै ज्ञानावरणका निमित्त नाही असाता साताका उदय ही कारणभूत है । तैसें ही जीवकै प्रयोजनभूत जीवादिकतत्त्व अप्रयोजनभूत अन्य तिनिकै यथार्थ जाननेकी शक्ति होइ । तहां जाकै मिथ्यात्वका उदय होइ सो जे अप्रयोजनभूत होइ तिनिहीकों वेदै जानै प्रयोजनभूतकों न जानै । जो प्रयोजनभूतकों जानै तौ सम्यग्ज्ञान होय जाय सो मिथ्यात्वका उदय होतैं होय सकै नाही । तातैं इहां प्रयोजनभूत अप्रयोजनभूत पदार्थ जाननेविषै ज्ञानावरणका निमित्त नाही । मिथ्यात्वका उदय अनुदय ही कारनभूत है । इहां ऐसा जानना—जहां एकेंद्रियादिककै जीवादि तत्त्वनिका यथार्थ जाननेकी शक्ति ही न होय तहां तौ ज्ञानावरणका उदय अर मिथ्यात्वका उदयतैं भया मिथ्यादर्शन इन दोऊनिका निमित्त है । बहुरि जहां संज्ञी मनुष्यादिकै क्षयोपशमादि लब्धि होतैं शक्ति होय अर न जानै तहां मिथ्यात्वके उदयहीका निमित्त जानना । याहीतैं मिथ्याज्ञानका मुख्य कारण ज्ञानावरण न कछा मोहका उदयतैं भया भाव सो ही कारन कछा है । बहुरि इहां प्रश्न—जो ज्ञान भए श्रद्धान हो है तातैं पहिलै मिथ्याज्ञान कहौ पीछैं मिथ्यादर्शन कहौ ? ताका समाधान,—

है तौ ऐसें ही, जाने विना श्रद्धान कैसें होय परंतु मिथ्या अर सम्यक् ऐसी संज्ञा ज्ञानकै मिथ्यादर्शन सम्यग्दर्शनके निमि-

त्तै हो है । जैसे मिथ्यादृष्टी वा सम्यग्दृष्टी सुवर्णादि पदार्थकों जानै तौ समान है परंतु सो ही जानना मिथ्यादृष्टिकै मिथ्याज्ञान नाम पावै सम्यग्दृष्टिकै सम्यग्ज्ञान नाम पावै । ऐसं ही सर्व मिथ्याज्ञान सम्यग्ज्ञानकों कारन मिथ्यादर्शन सम्यग्दर्शन जानना । तातैं जहां सामान्यपनै ज्ञान श्रद्धानका निरूपण होय तहां तौ ज्ञान कारणभूत है ताकों पहिले कहना अर श्रद्धान कार्यभूत है ताकों पीछैं । बहुरि जहां मिथ्या सम्यग्ज्ञान श्रद्धानका निरूपण होय तहां श्रद्धान कारनभूत है ताकों पहिले कहना, ज्ञान कार्यभूत है ताकों पीछैं कहना । बहुरि प्रश्न—जो ज्ञान श्रद्धान तौ युगपत् हो हैं इनविषै कारण कार्यपना कैसें कहौ हौ ? ताका समाधान,—

वह होय तौ वह होय इस अपेक्षा कारणकार्यपना हो है । जैसे दीपक अर प्रकाश युगपत् हो है तथापि दीपक होय तौ प्रकाश होय तातैं दीपक कारण है प्रकाश कार्य है । तैसें ही ज्ञान श्रद्धान है वा मिथ्यादर्शन मिथ्याज्ञानकै वा सम्यग्दर्शन ज्ञानकै कारणकार्यपना जानना । बहुरि प्रश्न,—जो मिथ्यादर्शनके संयोगतैं ही मिथ्याज्ञान नाम पावै है तौ एक मिथ्यादर्शन ही संसारका कारण कहना इहां मिथ्याज्ञान जुदा काहेकों कखा ? ताका समाधान,—

ज्ञानहीकी अपेक्षा तौ मिथ्यादृष्टी वा सम्यग्दृष्टीकै क्षयोपशमतैं भया यथार्थ ज्ञान तामैं किछू विशेष नाहीं । परंतु क्षयोपशम ज्ञान जहां लागै तहां एक ज्ञेयविषै लागै सो यह मिथ्यादर्शनके निमित्ततैं अन्य ज्ञेयनिविषै तौ ज्ञान लागै अर प्रयोजनभूत जीवादि

तत्त्वनिकां यथार्थ निर्णय करनेविषै न लागै सो यह ज्ञानविषै दोष भया । याकौ मिथ्याज्ञान कखा । बहुरि जीवादितत्त्वनिका यथार्थ श्रद्धान न होय सो यह श्रद्धानविषै दोष भया । याकौ मिथ्यादर्शन कखा । ऐसैं लक्षणभेदतैं मिथ्यादर्शन मिथ्याज्ञान जुदा कखा । या प्रकार मिथ्याज्ञानका स्वरूप कखा । इसहीकौ तत्त्वज्ञानके अभावतैं अज्ञान कहिए है । अपना प्रयोजन न सधै तातैं याहीकौ कुज्ञान कहिए है । अब मिथ्याचारित्रका स्वरूप कहिए है,—

झूठी परस्वभावरूप प्रवृत्ति किया चाहै सो बनै नाहीं तातैं याका नाम मिथ्याचारित्र है । सो दिखाइए है—अपना स्वभाव तौ दृष्टा ज्ञाता है सो आप केवल देखनहारा जाननहारा तौ रहै नाहीं । जिन पदार्थनिकौ देखै जानै तिनविषै इष्ट अनिष्टपनौ मानै तातैं रागी द्वेषी होय काहूका सद्भावकौ चाहै काहूका अभावकौ चाहै । सो उनका सद्भाव अभाव याका किया होता नाहीं । जातैं कोई द्रव्य कोई द्रव्यका कर्ता है नाहीं । सर्व द्रव्य अपने अपने स्वभावरूप परिणमै हैं । यह वृथा ही कषायभावकरि आकुलित हो है । बहुरि कदाचित् जैसे आप चाहै तैसे ही पदार्थ परिणमैं तौ अपना परिणमाया तौ परिणम्या नाहीं । जैसे गाड़ा चलै है अर वाकौं बालक धकोयकरि ऐसा मानै कि याकौं मैं चलाऊं हूं सो वह असत्य मानै है । जो वाका चलाया चलै है तौ वह न चलै तब क्यों न चलावै ? तैसे पदार्थ परिणमैं हैं अर उनकौं यह जीव अनुसारि होयकरि ऐसा मानै जो याकौं मैं ऐसैं परिणमावौं हौं सो यह असत्य मानै है । जो याका परिण-

माया परिणमै तौ वै तैसैं न परिणमैं तब क्यों न परिणमावै ? सो जैसे आप चाहै तैसें तौ पदार्थका परिणमन कदाचित् ऐसें ही बनाव बनै तब हो है । बहुतपरिणमन तौ आप न चाहै तैसें ही होते देखिए है । तातैं यह निश्चय है अपना किया काहूका सद्भाव अभाव होता नाहीं । कषायभाव करनेतैं कहा होय ? केवल आप ही दुखी होय । जैसें कोऊ विवाहादि कार्यविषै जाका किछू कछ्वा न होय अर वह आप कर्त्ता होय कषाय करै तौ आपही दुखी होय तैसें जानना । तातैं कषायभाव करना ऐसा है जैसा जलका विलोचना किछू कार्यकारी नाहीं । तातैं इनि कषायनिकी प्रवृत्तिकौं मिथ्याचारित्र कहिए है । जातैं कोई पदार्थ इष्ट अनिष्ट है नाहीं । कैसें सो कहिए है—

उपशामक

आपकौं दुखदायक अनुपकारी होय ताकौं अनिष्ट कहिए । सो लोकमें सर्व पदार्थ अपने २ स्वभावके कर्त्ता हैं । कोऊ काहूकौं सुखदायक उपकारी अनुपकारी है नाहीं । यह जीव अपने परिणामनिविषै तिनिकौं सुखदायक उपकारी जानि इष्ट जानै अथवा दुखदायक अनुपकारी जानि अनिष्ट मानै है । जातैं एक ही पदार्थ काहूकौं इष्ट लागै है काहूकौं अनिष्ट लागै है । जैसें जाकौं वस्त्र न मिलै ताकौं मोटा वस्त्र इष्ट लागै अर जाकौं महीन वस्त्र मिलै ताकौं अनिष्ट लागै हैं । सूकरादिककौं विष्टा इष्ट लागै है । देवादिककौं अनिष्ट लागै है । काहूकौं मेघवर्षा इष्ट लागै है काहूकौं अनिष्ट लागै है । ऐसें ही अन्य जनिने । बहुरि याही प्रकार एक जीवकौं भी एक ही पदार्थ काहूकालविषै इष्ट लागै है काहूकालविषै अनिष्ट लागै है । बहुरि यह जीव जाकौं मुख्यपनै

इष्ट मानै सो भी अनिष्ट होता देखिए है । इत्यादि जानने । जैसे शरीर इष्ट है सो रोगादिसहित होय तब अनिष्ट होइ जाय । पुत्रादिक इष्ट हैं सो कारनपाय अनिष्ट होते देखिए है । इत्यादि जानने । बहुरि यह जीव जाकौं मुख्यपनै अनिष्ट मानै सो भी इष्ट होता देखिये है । जैसे गाली अनिष्ट लागै है सो सासरैमें इष्ट लागै है । इत्यादि जानने । ऐसैं पदार्थनिविषै इष्ट अनिष्ट-पनौ है नाहीं । जो पदार्थविषै इष्ट अनिष्टपनौ होतौ, तौ जो पदार्थ इष्ट होता सो सर्वको इष्ट ही होता । जो अनिष्ट होता सो अनिष्ट ही होता । सो है नाहीं । यह जीव आप ही कल्पनाकरि तिनकौं इष्ट अनिष्ट मानै है । सो यह कल्पना झूठी है । बहुरि पदार्थ है सो सुखदायक उपकारी वा दुखदायक अनुपकारी हो है सो आपहीतैं नाहीं हो है पुण्यपापका उदयके अनुसारि हो है । जाकै पुण्यका उदय हो है ताकै पदार्थनिका संयोग सुखदायक उपकारी हो है । जाकै पापका उदय हो है ताकै पदार्थनिका संयोग दुखदायक अनुपकारी हो है । सो प्रत्यक्ष देखिये है । काहूकै स्त्रीपुत्रादिक सुखदायक हैं काहूकै दुखदायक हैं । व्यापार कीए काहूकै नफा हो है काहूकै टोटा हो है । काहूकै शत्रु भी किंकर हो है । काहूकै पुत्र भी अहितकारी हो है । तातैं जानिए है पदार्थ आप ही इष्ट अनिष्ट होते नाहीं । कर्म उदयके अनुसारि प्रवर्तैं हैं । जैसे काहूकै किंकर अपने स्वामीके अनुसारि किसी पुरुषकौं इष्ट अनिष्ट उपजावैं तौ किञ्च किंकरनिका कर्त्तव्य नाहीं उनके स्वामीका कर्त्तव्य है । जो किंकरनिहीकौं इष्ट अनिष्ट मानै सो झूठ है । तैसें कर्मके उदयतैं प्राप्त भए पदार्थ कर्मके अनुसार



जीवकों इष्ट अनिष्ट उपजावें तो किछू पदार्थनिका कर्तव्य नहीं । जो पदार्थनिकों इष्ट अनिष्ट माने सो झूठ है । ताँतें यह बात सिद्ध भई कि पदार्थनिकों इष्ट अनिष्ट मानि तिनविषै राग द्वेष करना मिथ्या है । इहां कोऊ कहै कि बाह्य वस्तूनिका संयोग कर्मनिमित्ततैं बने है तौ कर्मनिविषै तौ राग द्वेष करना । ताका समाधान,—

कर्म तौ जड़ हैं उनकै किछू सुखदुख देनैकी इच्छा नहीं । बहुरि वै स्वयमेव कर्मरूप परिणमै नहीं । याके भावनिका निमित्ततैं कर्मरूप हो हैं । जैसे कोऊ अपने हाथ भाँटा लेय अपना सिर फोरै तौ भाटाका कहा दोष है? तैसें ही जीव अपना रागादिक भावनिकरि पुद्गलकों कर्मरूप परिणमाय अपना बुरा करै तौ कर्मके कहा दोष है । ताँतें कर्मसों भी रागद्वेष करना मिथ्या है । या प्रकार परद्रव्यनिकों इष्ट अनिष्ट मानि रागद्वेष करना मिथ्या है । अर यह इष्ट अनिष्ट मानि रागद्वेष करै ताँतें इनि परिणामनिकों मिथ्या कहा है । मिथ्यारूप जो परिणमन ताका नाम मिथ्याचारित्र है । अब इस जीवकै रागद्वेष होय है, ताका विधान वा विस्तार दिखाइए है—

प्रथम तौ इस जीवकै पर्यायविषै अहंबुद्धि है सो आपको वा शरीरकों एक जानि प्रवर्तै है । बहुरि इस शरीरविषै आपको सुहावै ऐसी इष्ट अवस्था हो है, तिसविषै राग करै है । आपको न सुहावै ऐसी अनिष्ट अवस्था है तिसविषै द्वेष करै है । बहुरि शरीरकी इष्ट अवस्थाके कारणभूत बाह्य पदार्थनिविषै तौ राग

करै है अर ताके घातकनिविषै द्वेष करै है । बहुरि शरीरकी अनिष्ट अवस्थाके कारणभूत बाह्य पदार्थनिविषै तौ द्वेष करै है अर ताके घातकनिविषै राग करै है । बहुरि इनिविषै जिन बाह्य पदार्थनिसौं राग करै है तिनिके कारनभूत अन्य पदार्थनिविषै राग करै है तिनिके घातकनिविषै द्वेष करै है । बहुरि जिन बाह्य पदार्थनिसौं राग करै है तिनिके कारनभूत अन्य पदार्थनिविषै द्वेष करै है तिनिके घातकनिविषै राग करै है । बहुरि इनिविषै भी जिनसौं राग करै है तिनिके कारण वा घातक अन्य पदार्थनिविषै राग वा द्वेष करै है । अर जिनसौं द्वेष है तिनिके कारण वा घातक अन्यपदार्थनिविषै द्वेष वा राग करै है । ऐसैं ही राग द्वेषकी परंपरा प्रवर्तै है । बहुरि केई बाह्यपदार्थ शरीरकी अवस्थाकौं कारण नाहीं तिनिविषै भी रागद्वेष करै है । जैसे गऊ आदिके पुत्रादिकतैं किछू शरीरका इष्ट होय नाहीं तथापि तहां राग करै है । जैसे कूकरा आदिककै बिलाई आवतैं किछू शरीरका अनिष्ट होय नाहीं तथापि तहां द्वेष करै है । बहुरि केई वर्ण गंध शब्दादिकके अवलोकनादिकतैं शरीरका इष्ट होता नाहीं तथापि तिनिविषै राग करै हैं । केई वर्णादिकके अवलोकनादिकतैं शरीरका अनिष्ट होता नाहीं तथापि तिनिविषै द्वेष करै है । ऐसैं भिन्न <sup>भिन्न</sup> बाह्य पदार्थनिविषै रागद्वेष हो है । बहुरि इनिविषै भी जिनिसौं राग करै है तिनिके कारण अर घातक अन्यपदार्थनिविषै राग वा द्वेष करै है । अर जिनस्यौं द्वेष करै है तिनिके कारणे वा घातक अन्यपदार्थ तिनिविषै द्वेष वा राग करै है । ऐसैं ही इहां भी रागद्वेषकी परंपरा प्रवर्तै है । इहां प्रश्न—जो अन्यपदार्थनिविषै

तौ रागद्वेष करनेका प्रयोजन जान्या परंतु प्रथम तौ मूलभूत शरीरकी अवस्थाविषै वा शरीरकी अवस्थाकौं कारण नाहीं तिन पदार्थनिविषै इष्ट अनिष्ट माननेका प्रयोजन कहा है ? ताका समाधान,—

जो प्रथम मूलभूत शरीरकी अवस्था आदिक हैं तिनिविषै भी प्रयोजन विचारि राग करै तौ मिथ्याचारित्र काहेकौं नाम पावै । तिनिविषै विना ही प्रयोजन रागद्वेष करै है । अर तिनिहीके अर्थ अन्यसौं रागद्वेष करै तातैं सर्व रागद्वेषपरिणतिका नाम मिथ्या-चारित्र कखा है । इहां प्रश्न—जो शरीरकी अवस्था वा बाह्यपदार्थ-निविषै इष्ट अनिष्ट माननेका प्रयोजन तौ भासै नाहीं अर इष्ट अनिष्ट मानेविना रखा जाता नाहीं, सो कारण कहा है । ताका समाधान,—

इस जीवकै चारित्रमोहका उदयतैं रागद्वेष भाव होय सो ए भाव कोई पदार्थका आश्रयविना होय सकैं नाहीं । जैसे राग होय सो कोई पदार्थविषै होय । द्वेष होय सो कोई पदार्थविषै ही होय । ऐसैं तिनिपदार्थनिकै अर रागद्वेषके निमित्तनैमित्तिक संबंध है । तहां विशेष इतना जो केई पदार्थ तौ मुख्यपनै रागकौं कारन हैं । केई पदार्थ मुख्यपनै द्वेषकौं कारण हैं । केई पदार्थ काहूकौं काहूकालविषै रागके कारन हो हैं काहूकौं काहूकालविषै द्वेषके कारण हो हैं । इहां इतना जानना,—एक कार्य होनैविषै अनेक कारण चाहिए सो रागादिक होनैविषै अंतरंग कारण मोहका उदय है, सो बलवान् है । अर बाह्य कारण पदार्थ है सो बलवान् नाहीं है । महामुनिकै मोह मंद होतैं बाह्य पदार्थनिका

निमित्त होते भी रागद्वेष उपजते नहीं । पापी जीवनिकै मोह तीव्र होते बाह्यकारण न होते भी तिनिका संकल्पहीकरि रागद्वेष हो है । तातैं मोहका उदय होते रागादिक हो हैं । तहां जिस बाह्यपदार्थका आश्रयकरि रागभाव होना होय तिसविषै विना ही प्रयोजन वा किञ्च प्रयोजनलिए इष्टबुद्धि हो है । बहुरि जिस पदार्थका आश्रयकरि द्वेषभाव होना होय तिसविषै विना ही प्रयोजन वा किञ्च प्रयोजनलिए अनिष्टबुद्धि हो है । तातैं मोहका उदयतैं पदार्थनिकौं इष्ट अनिष्ट माने विना रखा जाता नहीं । ऐसैं पदार्थनिकैविषै इष्टअनिष्टबुद्धि होते रागद्वेषरूप परिणमन होय ताका नाम मिथ्याचारित्र जानना । बहुरि इनि रागद्वेषनिहीके विशेष क्रोध, मान, माया, लोभ, हास्य, रति, अरति, शोक, भय, जुगुप्सा, स्त्रीवेद, पुरुषवेद, नपुंसकवेदरूप कषायभाव हैं ते सर्व इस मिथ्याचारित्रके भेद जानने । इनिका वर्णन पूर्वे किया ही है । बहुरि इस मिथ्याचारित्रविषै स्वरूपाचरणरूप चारित्रका अभाव है तातैं याका नाम अचारित्र भी कहिए । बहुरि इहां परिणाम भिटै नहीं अथवा विरक्त नहीं तातैं याहीका नाम असंयम कहिए है वा अविरत कहिए है । जातैं पांच इंद्रिय अर मनके विषयनि-विषै बहुरि पंचस्थावर त्रसकी हिंसाविषै स्वच्छंदपना हो है अर इनिके त्यागरूप भाव न होय सो ही असंयम वा अविरत बारह प्रकार कखा है । सो कषायभाव भए ऐसे कार्य हो हैं । तातैं मिथ्याचारित्रका नाम असंयम वा अविरत जानना । बहुरि इस-हीका नाम अव्रत जानना । जातैं हिंसा अनृत स्तेय अब्रह्म परिग्रह इनि पापकार्यनिविषै प्रवृत्तिका नाम अव्रत है । सो इनिका

मूलकारण प्रमत्तयोग कहा है। प्रमत्तयोग है सो कषायमय है तातैं मिथ्याचारित्रका नाम अव्रत भी कहिए है। ऐसैं मिथ्या-चारित्रका स्वरूप कहा। या प्रकार इस संसारी जीवकै मिथ्यादर्शन मिथ्याज्ञान मिथ्याचारित्ररूप परिणमन अनादितैं पाइए है। सो ऐसा परिणमन एकेंद्रिय आदि असंज्ञीपर्यंत तौ सर्व जीवनिकै पाइए है। बहुरि संज्ञी पंचेंद्रियनिविषै सम्यग्दृष्टी विना अन्य सर्व जीवनिकै ऐसा ही परिणमन पाइए है। परिणमनविषै जैसा जहां संभवै तैसा तहां जानना। जैसैं एकेंद्रियादिककै इंद्रियादि-कनिकी हीनता अधिकता पाइए है वा धन पुत्रादिकका संबंध मनुष्यादिककै ही पाइए है सो इनिकै निमित्ततैं मिथ्यादर्शनादिकका वर्णन किया है। तिसविषै जैसा विशेष संभवै तैसा जानना। बहुरि एकेंद्रियादिक जीव इंद्रिय शरीरादिकका नाम जानै नाहीं है। परंतु तिस नामका अर्थरूप जो भाव है तिसविषै पूर्वोक्त प्रकार परिणमन पाइए है। जैसैं मैं स्पर्शकरि स्पर्सों हौं शरीर मेरा है ऐसा नाम न जानै है तथापि इसका अर्थरूप जो भाव है तिस रूप परिणमै है। बहुरि मनुष्यादिक केई नाम भी जानै हैं अर ताके भावरूप परिणमै हैं। इत्यादि विशेष संभवै सो जान लेना। ऐसैं ए मिथ्यादर्शनादिकभाव जीवकै अनादितैं पाइए है नवीन ग्रहे नाहीं। देखो याकी महिमा कि जो पर्याय धरै है तहां विना ही <sup>सि</sup>खाए मोहके उदयतैं स्वयमेव ऐसा ही परिणमन हो है। बहुरि मनुष्यादिककै सत्य विचार होनैके कारण मिलैं तौ भी सम्यक् परिणमन होय नाहीं। श्रीगुरुके उपदेशका निमित्त बनै वह वारंवार समझावैं यह किळू विचार

करै नहीं। बहुरि आपकों भी प्रत्यक्ष भासै सो तौ न मानै अर अन्यथा ही मानै। कैसैं, सो कहिए है—मरण होतैं शरीर आत्मा प्रत्यक्ष जुदा हो है। एक शरीरकों छोरि आत्मा अन्य शरीर धरै है सो व्यंतरादिक अपने पूर्व भवका संबंध प्रगट करते देखिए है। परंतु याकै शरीरतैं भिन्नबुद्धि न होय सकै। स्त्रीपुत्रादिक अपने स्वार्थके सबै प्रत्यक्ष देखिए है। उनका प्रयोजन न सधै तब ही विपरीत होते देखिए है। यह तिनिविषै ममत्व करै है। अर तिनिक्कै अर्थ नरकादिकविषै गमनकों कारण नाना पाप उपजावै है। धनादिक सामग्री अन्यकी अन्यकै होती देखिए है यह तिनकों अपनी मानै है। बहुरि शरीरकी अवस्था वा बाह्यसामग्री स्वयमेव होती विनशती देखिए है। यह वृथा आप कर्ता हो है। तहां जो अपने मनोरथ अनुसारि कार्य होय ताकों तौ कहै मैं किया। अर अन्यथा होय ताकों कहै मैं कहा करौं ? ऐसैं ही होना था वा ऐसैं क्यों भया। ऐसा मानै, सो कै तौ सर्वका कर्ता ही होना था कै अकर्ता रहना था। सो विचार नहीं। बहुरि मरण अवश्य होगा ऐसा जानै परंतु मरणका निश्चयकरि किछू कर्तव्य करै नहीं। इस पर्यायसंबंधी ही जतन करै है। बहुरि मरणका निश्चयकरि कबहू तौ कहै, मैं मरूंगा शरीरकों जलावैगे। कबहू कहै मोकों जलावैगे। कबहू कहै जस रखा तौ हम जीवते ही हैं। कबहू कहै पुत्रादिक रहैगे तौ मैं ही जीवौंगा। ऐसैं बाउलाकीसी नाई बकै है किछू सावधानी नहीं। बहुरि आपकों परलोकविषै प्रत्यक्ष जाता जानै ताका तौ इष्ट अनिष्टका किछू उपाय नहीं। अर इहां पुत्र पोता आदि मेरी संततिविषै घनेकाल

ताई इष्ट रक्षा करै अनिष्ट न होय । ऐसैं अनेक उपाय करै है । काहूका परलोक भए पीछैं इस लोककी सामग्रीकरि उपकार भया देख्या नाही परंतु याकै परलोक होनेका निश्चय भए भी इस लोककी सामग्रीहीका यतन रहै है । बहुरि विषयकषायकी प्रवृत्तिकरि वा हिंसादि कार्यकरि आप दुखी होय, खेदखिन्न होय, औरनिका वैरी होय, इस लोकविषै निंद्य होय, परलोकविषै बुरा जुद्ध होय सो प्रत्यक्ष आप जानै तथापि तिनिहीविषै प्रवर्तै । इत्यादि अनेक प्रकार प्रत्यक्ष भासै ताकौं भी अन्यथा श्रद्धहै जानै आचरै सो यह मोहका माहात्म्य है । ऐसैं यह मिथ्यादर्शनज्ञान-चारित्ररूप अनादितैं जीव परिणमै है । इस ही परिणमनकरि संसारविषै अनेक प्रकार दुख उपजावनहारे कर्मनिका संबंध पाइए है । एई भाव दुःखनिके बीज हैं अन्य कोई नाही । तातैं हे भव्य जो दुखतैं मुक्त भया चाहै तौ इनि मिथ्यादर्शनादिक विभावनिका अभाव करना यह ही कार्य है इस कार्यके किए तेरा परम कल्याण होगा ।

इति श्रीमोक्षमार्गप्रकाशक नाम शास्त्रविषै मिथ्यादर्शनज्ञान चारित्रका निरूपणरूप/अधिकार सम्पूर्ण भया ॥ ४ ॥

चौथा —  
दोहा ।

बहुविधि मिथ्यागहनकरि, मलिन भए निज भाव ।  
ताकौ हेतु अभाव है, सहजरूप दरसाव ॥ १ ॥

अथ यह जीव पूर्वोक्त प्रकारकरि अनादितैं मिथ्यादर्शन-ज्ञानचारित्ररूप परिणमै है ताकरि संसारविषै दुख सहतो संतो

कदाचित् मनुष्यादिपर्यायनिविषै विशेष श्रद्धानादि करनेकी शक्तिकौं पावै । तहां विशेष मिथ्याश्रद्धानादिकके कारणनिकरि तिनि मिथ्याश्रद्धानादिककौं पोषै तौ तिस जीवका दुखतैं मुक्त होना अति दुर्लभ हो है । जैसे कोई पुरुष रोगी है किछू सावधानीकौं पाय कुपथ्य सेवै तौ उस रोगीका सुलजना कठिन ही होय । तैसें यह जीव मिथ्यात्वादि सहित है सो किछू ज्ञानादि शक्तिकौं पाय विशेष विपरीत श्रद्धानादिकके कारणनिका सेवन करै तौ इस जीवका मुक्त होना कठिन ही होय । तातैं जैसें वैद्य कुपथ्यनिका विशेष दिखाय तिनिके सेवनकौं निषैधै, तैसें ही इहां विशेष मिथ्याश्रद्धानादिकके कारणनिका विशेष दिखाय तिनिका निषेध करिए है । इहां अनादितैं जे मिथ्यात्वादि भाव पाइए है ते तौ अगृहीतमिथ्यात्वादि जानने । जातैं ते नवीन ग्रहे नाहीं । बहुरि इनके पुष्ट करनेके कारणनिकरि विशेष मिथ्यात्वादि भाव होय ते गृहीतमिथ्यात्वादि जानने । तहां अगृहीतमिथ्यात्वादिकका वर्णन तौ पूवैं किया है सो ही जानना अर गृहीतमिथ्यात्वादिकका अब निरूपण करिए है सो जानना,—

कुदेव कुगुरु कुधर्म अर कल्पित तत्त्वनिका श्रद्धान सो तौ मिथ्यादर्शन है । बहुरि जिनिक्वैविषै विपरीत निरूपणकरि रागादि पोषे होय ऐसे कुशास्त्र तिनिविषै श्रद्धानपूर्वक अभ्यास सो मिथ्याज्ञान है । बहुरि जिस आचरणविषै कषायनिका सेवन होय अर ताकौं धर्मरूप अंगीकार करै सो मिथ्याचारित्र है । अब इनका विशेष दिखाइए है,—इंद्र लोकपालइत्यादि । अद्वैतब्रह्म राम कृष्ण महादेव बुद्ध पीर पैगंबर इत्यादि । बहुरि हनुमान



भैरू क्षेत्रपाल देवी दिहाड़ी सती इत्यादि । बहुरि शीतला चौथि सांझी गणगोरि होली इत्यादि । बहुरि सूर्य चंद्रमा ग्रह ऊत पितर व्यंतर इत्यादि । बहुरि गऊ सर्प इत्यादि । बहुरि अग्नि जल वृक्ष इत्यादि । बहुरि शास्त्र दवात बासण इत्यादि अनेक तिनिका अन्यथा श्रद्धानकरि तिनकाँ पूजै । बहुरि तिनकरि अपना कार्य सिद्ध किया चाहै सो वै कार्य सिद्धिके कारन नाहीं तातैं ऐसे श्रद्धानकाँ गृहीतमिथ्यात्व कहिए है । तहां तिनिका अन्यथा श्रद्धान कैसेँ हो है सो कहिए है,—

अद्वैतब्रह्मकाँ सर्वव्यापी सर्वका कर्ता मानै सो कोई है नाहीं । मिथ्या कल्पना करै हैं । प्रथम वाकाँ सर्वव्यापी मानै सो सर्व पदार्थ तौ न्यारे न्यारे प्रत्यक्ष हैं वा तिनिके स्वभाव न्यारे न्यारे देखिए है इनिकाँ एक कैसेँ मानिए है । एक मानना तौ इनि प्रकारनिकरि है—एक प्रकार तौ यह है जो सर्व न्यारे न्यारे हैं तिनिके समुदायकाँ कल्पनाकरि ताका किछू नाम धरिए । जैसेँ घोटक हस्ती इत्यादि भिन्न भिन्न हैं तिनिके समुदायका नाम सेना है । तिनिताँ जुदा कोई सेना वस्तु नाहीं । सो इस प्रकार सर्वपदार्थनिका नाम ब्रह्म है तौ ब्रह्म कोई जुदा वस्तु तौ न ठहस्या कल्पना मात्र ही ठहस्या । बहुरि एक प्रकार यह है—जो व्यक्ति अपेक्षा तौ न्यारे न्यारे हैं तिनिकाँ जाति अपेक्षा कल्पनाकरि एक कहिए है । जैसेँ सौ घोटक (घोड़ा) हैं ते व्यक्तिअपेक्षा तौ जुदे जुदे सौ ही हैं तिनिके आकारादिककी समानता देखि कल्पनाकरि एक जाति कहैं सो वह जाति तिनताँ जुदी तौ कोई है नाहीं । सो इस प्रकारकरि जो सबनिकी कोई एक

जाति अपेक्षा एक ब्रह्म मानिए है तौ ब्रह्म जुदा तौ कोई न ठहखा । इहां भी कल्पनामात्र ही ठहखा । बहुरि एक प्रकार यह है जो पदार्थ न्यारे न्यारे हैं तिनिके मिलापतैं एक स्कंध होय ताकौं एक कहिए । जैसें जलके परमाणु न्यारे न्यारे हैं तिनका मिलाप भए समुद्रादि कहिए अथवा जैसें पृथिवीके परमाणुनिका मिलाप भए घट आदि कहिए । सो यहां समुद्रादि वा घटादिक हैं ते तिन परमाणुनितैं भिन्न कोई जुदा तौ वस्तु नाहीं । सो इस प्रकारकरि जो सर्व पदार्थ न्यारे न्यारे हैं परंतु कदाचित् मिलि एक हो जाय हैं सो ब्रह्म है, ऐसें मानिए तौ इनितैं जुदा तौ कोई ब्रह्म न ठहखा । बहुरि एक प्रकार यह है कि अंग तौ न्यारे न्यारे हैं अर जाके अंग है सो अंगी एक है । जैसें नेत्र हस्त पादादिक भिन्न भिन्न हैं अर जाकैं ए हैं सो मनुष्य एक है । सो इस प्रकार जो सर्व पदार्थ तौ अंग हैं अर जाकैं ए हैं सो अंगी ब्रह्म है । यह सर्व लोक विराटस्वरूप ब्रह्मका अंग है, ऐसें मानिए तौ मनुष्यकै हस्तपादादिक अंगनिकै परस्पर अंतराल भए तौ एकपना रहता नाहीं । जुड़े रहे ही एक शरीर नाम पावै । सो लोकविषै तौ पदार्थनिकै अंतराल परस्पर भासै है । याका एकत्वपना कैसें मानिए ? अंतराल भए भी एकत्व मानिए तौ भिन्नपना कहां मानिए । इहां कोऊ कहै कि समस्त पदार्थनिके मध्यविषै सूक्ष्मरूप ब्रह्मके अंग हैं तिनिकरि सर्व पदार्थ जुड़ि रहे हैं ताकौं कहिए है,—

जो अंग जिस अंगतैं जुखा है तिसहीतैं जुखा रहै है कि दृष्टि दृष्टि अन्य अन्य अंगनिसौं जुखा करै है । जो प्रथम पक्ष

ग्रहण करैगा तौ सूर्यादिक गमन करै हैं, तिनिके साथि जिन सूक्ष्म अंगनितैं वे जुरे रहैं ते भी गमन करैं । बहुरि तिनिकौं गमन करते सूक्ष्म अंग अन्य स्थूल अंगनितैं जुरे रहैं ते भी गमन करै हैं सो ऐसैं सर्व लोक अस्थिर हो जाय । जैसें शरीरका एक अंग खींचे सर्व अंग खींचे जाय, तैसं एक पदार्थकौं गमनादि करतैं सर्व पदार्थनिका गमनादि होय सो भासै नाहीं । बहुरि जो द्वितीय पक्ष ग्रहैगा, तौ अंग टूटनैतैं भिन्नपना होय जाय तब एकपना कैसैं रखा ? तातैं सर्वलोकका एकत्वकौं ब्रह्म मानना भ्रम ही है । बहुरि एक प्रकार यह है जो पहिले एक था पीछैं अनेक भया बहुरि एक होय जाय तातैं एक है । जैसें जल एक था सो वासणनिमें जुदा जुदा भया । बहुरि मिलै तब एक होय जाय तातैं एक है । वा जैसें सोनाका गंदा एक था सो कंकण कुंडलादिरूप भया बहुरि मिलिकरि सोनाका एक गदा होय जाय । तैसें ब्रह्म एक था पीछैं अनेकरूप भया बहुरि एक होयगा तातैं एक ही है । इस प्रकार एकत्व मानै है तौ जब अनेकरूप भया तब जुस्था रखा कि भिन्न भया । जो जुस्था कहैगा तौ पूर्वोक्त दोष आवैगा । भिन्न भया कहैगा तौ तिसकाल तौ एकत्व न रखा । बहुरि जल सुवर्णादिककौं भिन्न भए भी एक कहिए है सो तौ एकजातिअपेक्षा कहिए है । सर्व पदार्थनिकी एक जाति भासै नाहीं । कोऊ चेतन है कोऊ अचेतन है इत्यादि अनेकरूप हैं तिनकी एक जाति कैसैं कहिए । बहुरि जातिअपेक्षा एकत्व मानना कल्पनामात्र पूर्वै कखा ही है । बहुरि पहिले

एक था पीछें भिन्न भया मानै है तौ जैसेँ एक पाषाणादि फूटि डुकड़े होय जाय हैं तैसेँ ब्रह्मके खंड होय गए बहुरि तिनिका एकठा होना मानै है तौ तहां तिनिका स्वरूप भिन्न रहै है कि एक होय जाय है । जो भिन्न रहै है तौ तहां अपने अपने स्वरूपकरि भिन्न ही है । अर एक होय जाय तौ जड़ भी चेतन होय जाय वा चेतन जड़ होय जाय । तहां अनेक वस्तुनिका एक वस्तु भया तब काहू कालविषै अनेक वस्तु काहू कालविषै एक वस्तु ऐसा कहना बनै । अनादि अनंत एक ब्रह्म है ऐसा कहना बनै नाहीं । बहुरि जो कहैगा लोकरचना होतैं वा न होतैं ब्रह्म जैसाका तैसा ही रहै है तातैं ब्रह्म अनादि अनंत है । सो हम पूछैं हैं लोकविषै पृथिवी जलादिक देखिए है ते जुदे नवीन उत्पन्न भए हैं कि ब्रह्म ही इन स्वरूप भया है ? जो जुदे नवीन उत्पन्न भए हैं तो ए न्यारे भए ब्रह्म न्यारा रहा सर्वव्यापी अद्वैतब्रह्म न ठहखा । बहुरि जो ब्रह्म ही इन स्वरूप भया तौ कदाचित् लोक भया कदाचित् ब्रह्म भया तौ जैसाका तैसा कैसेँ रखा ? बहुरि वै कहै हैं जो सब ही ब्रह्म तौ लोकस्वरूप न हो है वाका कोई अंश ही है । ताकों कहिए है,—जैसेँ समुद्रका एक बिंदु विषरूप भया तहां स्थूलदृष्टिकरि तौ गम्य नाहीं परंतु सूक्ष्मदृष्टि दिए तौ एकबिंदुअपेक्षा समुद्रकै अन्यथापना भया । तैसेँ ब्रह्मका एक अंश भिन्न होय लोकरूप भया । तहां स्थूलविचारकरि तौ किछू गम्य नाहीं परंतु सूक्ष्मविचार किया तौ एकअंशअपेक्षा ब्रह्मकै अन्यथापना भया । यह अन्यथापना और तौ काहूकै भया नाहीं । ऐसेँ सर्वरूप ब्रह्मकों मानना भ्रम ही है ।

बहुरि एक प्रकार यह है,—जैसे आकाश सर्वव्यापी है तैसें सर्व व्यापी है। सो इसप्रकार मानै है तौ आकाशवत् बड़ा ब्रह्मकौं मानि वा जहां घटपटादिक हैं तहां जैसे आकाश है तैसें तहां ब्रह्म भी है ऐसा भी मानि। परंतु जैसे घटपटादिककौं अर आकाशकौं एक ही कहिए तौ कैसें बनें तैसें लोककौं अर ब्रह्मकौं एक मानना कैसें संभवै ? बहुरि आकाशका तौ लक्षण सर्वत्र भासै है तातैं ताका तौ सर्वत्र सद्भाव मानिए है। ब्रह्मका तौ लक्षण सर्वत्र भासता नाहीं तातैं ताका सर्वत्र सद्भाव कैसें मानिए ? ऐसें या प्रकारकरि भी सर्वरूप ब्रह्म नाहीं है। ऐसें ही विचारकरतैं किसी भी प्रकारकरि एक ब्रह्म संभवै नाहीं। सर्व पदार्थ भिन्न भिन्न ही भासैं हैं। इहां प्रतिवादी कहै है—जो सर्व एक ही है परंतु तुम्हारै भ्रम है तातैं तुमकौं एक भासै नाहीं। बहुरि तुम युक्ति कही सो ब्रह्मका स्वरूप युक्तिगम्य नाहीं। वचन अगोचर है। एक भी है अनेक भी है। जुदा भी है मिल्या भी है। वाकी महिमा ऐसी ही है। ताकौं कहिए है,—

जो प्रत्यक्ष तुजकौं वा सबनिकौं भासै ताकौं तौ तू भ्रम कहै। अर युक्तिकरि अनुमान करिए सो तू कहै है कि सांचा स्वरूप युक्तिगम्य है नाहीं। बहुरि कहै सांचास्वरूप वचनअगोचर है तौ वचन विना कैसें निर्णय करै ? बहुरि तू कहै एक भी है अनेक भी है जुदा भी है मिल्या भी है सो तिनकी अपेक्षा बतावै नाहीं बाउलेकीसी नाई ऐसें भी है ऐसें भी है ऐसा कहि याकौं महिमा बतावै सो जहां न्याय न होय है तहां झूठे ऐसें ही वाचालपना करै हैं सो करो। न्याय तौ जैसें सांच है तैसें ही

होगा । बहुरि अब तिस ब्रह्मकौ लोकका कर्ता मानै है ताकौ मिथ्या दिखाइए है,—

प्रथम तौ ऐसा मानै है जो ब्रह्मकै ऐसी इच्छा भई कि—‘एकोऽहं बहुस्यां’ कहिए मैं एक हौं सो बहुत होस्यो । तहां पूछिए है—पूर्व अवस्थामैं दुखी होय, तब अन्य अवस्थाकौ चाहै । सो ब्रह्म एकरूप अवस्थामैं बहुरूप होनेकी इच्छा करी सो तिस एकरूप अवस्थाविषै कहा दुख था ? तब वह कहै है जो दुख तौ न था ऐसा ही कौतूहल उपज्या । ताकौ कहिए है—जो पूर्वे थोरा सुखी होय अर कुतूहल किए घना सुखी होय सो कुतूहल करना विचारै । सो ब्रह्मकै एक अवस्थामैं बहुत अवस्थारूप भए घना सुख होना कैसें संभवै ? बहुरि जो पूर्वे ही संपूर्ण सुखी होय, तौ अवस्था काहेकौ पलटै । प्रयोजन विना तौ कोई किछु कर्तव्य करै नाहीं । बहुरि पूर्वे भी सुखी होयगा इच्छा अनुसार कार्य भए भी सुखी होगा परंतु इच्छा भई तिसकाल तौ दुखी होय । तब वह कहै है ब्रह्मकै जिसकाल इच्छा हो है तिसकाल ही कार्य हो है तातैं दुखी न हो है । तहां कहिए है,—स्थूल-कालकी अपेक्षा तौ ऐसैं मानौ परंतु सूक्ष्मकालकी अपेक्षा तौ इच्छाका और कार्यका होना युगपत् संभवै नाहीं । इच्छा तौ तब ही होय, जब कार्य न होय । कार्य होय, तब इच्छा न होय । तातैं सूक्ष्मकालमात्र इच्छा रही तब तौ दुखी भया होगा । जातैं इच्छा है सो ही दुःख है और कोई दुःखका स्वरूप है नाहीं । तातैं ब्रह्मकै इच्छाकी कल्पना करिए है सो मिथ्या है ।

बहुरि वह कहै है इच्छा होतैं ब्रह्मकी माया प्रगट भई सो

ब्रह्मके माया भई तब ब्रह्म भी मायावी भया शुद्धस्वरूप कैसेँ रखा । बहुरि ब्रह्मके अर मायाके दंडी दंडवत् संयोगसंबंध है कि अग्नि उष्णवत् समवायसंबंध है । जो संयोगसंबंध है तौ ब्रह्म भिन्न है माया भिन्न है अद्वैत ब्रह्म कैसेँ रखा ? बहुरि जैसेँ दंडी दंडकों उपकारी जानि ग्रहै है तैसेँ ब्रह्म मायाकौ उपकारी जानै है तौ ग्रहै है, नाही तौ काहेकों ग्रहै ? बहुरि जिस मायाकों ब्रह्म ग्रहै ताका निषेध करना कैसेँ संभवै वह तौ उपादेय भई । बहुरि जो समवायसंबंध है तौ जैसेँ अग्निका उष्णत्व स्वभाव है तैसेँ ब्रह्मका मायास्वभाव ही भया । जो ब्रह्मका स्वभाव है ताका निषेध करना कैसेँ संभवै । यह तौ उत्तम भई ।

बहुरि वह कहै है कि—ब्रह्म तौ चैतन्य है माया जड़ है सो समवायसंबंधविषै ऐसे दौय स्वभाव संभवै नाही । जैसेँ प्रकाश और अंधकार एकत्र कैसेँ संभवै ? बहुरि वह कहै है,—माया-करि ब्रह्म आप तौ अमरूप होता नाही ताकी मायाकरि जीव अमरूप हो है । ताकौ कहिए है,—जैसेँ कपटी अपने कपटकों आप जानै सो आप अमरूप न होय वाके कपटकरि अन्य अमरूप होय जाय । तहां कपटी तौ वाहीकों कहिए जानै कपट किया । ताके कपटकरि अन्य अमरूप भए तिनिकों तौ कपटी न कहिए । तैसेँ ब्रह्म अपनी मायाकौ आप जानै सो आप तौ अमरूप न होय वाकी मायाकरि अन्य जीव अमरूप होय हैं । तहां मायावी तौ ब्रह्मकों कहिए ताकी मायाकरि अन्य जीव अमरूप भए तिनकों मायावी काहेकों कहिए ।

बहुरि पूछिए है कि वे जीव ब्रह्मतेँ एक हैं कि न्यारे हैं ।

जो एक हैं तौ जैसे कोऊ आप ही अपने अंगनिकों पीड़ा उपजावै तौ ताकौ बाउला कहिए है । तैसें ब्रह्म आप ही आपतें भिन्न नहीं ऐसे अन्य जीवनिकों मायाकरि दुखी करै है तौ याकौ कहा कहोगे, बहुरि जो न्यारे हैं तौ जैसे कोऊ भूत विना ही प्रयोजन औरनिकों भ्रम उपजावै पीड़ा देवै तौ ताकौ निकृष्ट ही कहिए । तैसें ब्रह्म विना ही प्रयोजन अन्य जीवनिकों माया उपजाय पीड़ा उपजावै तौ वाकौ कहा कहोगे । ऐसें माया ब्रह्मकी कहिए है, सो भी भ्रम ही है ।

बहुरि वै कहै हैं— जुदे जुदे बहुत पात्रनिविषै जल भख्या है तिन सबनिविषै चंद्रमाका प्रतिबिंब जुदा जुदा पड़ै है । चंद्रमा एक है । तैसें जुदे जुदे बहुत शरीरनिविषै ब्रह्मका चैतन्य प्रकाश जुदा जुदा पाइए है । ब्रह्म एक है । तातें जीवनिकै चेतना है सो ब्रह्महीकी है । सो ऐसा कहना भी भ्रम ही है । जातें शरीर जड़ है याविषै ब्रह्मका प्रतिबिंबतें चेतना भई तौ घटपटादि जड़ है तिनविषै ब्रह्मका प्रतिबिंब क्यों न पड़्या अर चेतना क्यों न भई । बहुरि वै कहै है शरीरकौ तौ चैतन्य नहीं करै है जीवकौ करै है । तव वाकौ पूछिए है कि जीवका स्वरूप चेतन है कि अचेतन है । जो चेतन है तौ चेतनका चेतन कहा करैगा । जो अचेतन है तौ शरीरकी वा घटादिककी वा जीवकी एक जाति भई । बहुरि वाकौ पूछिए है—ब्रह्मकी अर जीवनीकी चेतना एक है कि भिन्न है । जो एक है तौ ज्ञानका अधिक हीनपना कैसें देखिए है । बहुरि ए जीव परस्पर वह वाकी जानीकौ न जानै वह वाकी जानीकौ न जानै सो कारण कहा ? जो तू कहैगा यह



घट उपाधिका भेद है तो चेतना भिन्न भिन्न ठहरी । घट उपाधि मिटै याकी चेतना ब्रह्ममें मिलैगी कै नाश हो जायगी ? जो नाश हो जायगी तौ यह जीव अचेतन रह जायगा अर तू कहैगा जीव ही ब्रह्ममें मिलि जाय है तौ तहां ब्रह्मविषै मिलै याका अस्तित्व रहै है कि नाहीं रहै है । जो अस्तित्व रहै है तौ यह रखा याकी चेतना वाकै रही ब्रह्मविषै कहा मिल्या ? अर जो अस्तित्व न रहै है तौ याका नाश भया ब्रह्मविषै कौन मिल्या ? बहुरि जो तू कहैगा ब्रह्मकी अर जीवकी चेतना भिन्न भिन्न है तौ ब्रह्म अर सर्वजीव आप ही भिन्न भिन्न ठहरे । ऐसैं जीवनिकै चेतना है सो ब्रह्मकी है ऐसा मानना भ्रम है ।

शरीरादि मायाके कहो सो माया ही हाड मांसादिरूप हो है कि मायाके निमित्ततैं और कोई तिनरूप हो है । जो माया ही होय है तौ मायाकै वर्ण गंधादिक पूर्वे ही थे कि नवीन भए । जो पूर्वे थे तौ पूर्वे तौ माया ब्रह्मकी थी अर ब्रह्म अमूर्त्तिक है तहां वर्णादि कैसैं संभवैं । बहुरि जो नवीन भए तौ अमूर्त्तिकका मूर्त्तिक भया तब अमूर्त्तिक स्वभाव शाश्वता न ठहख्या । बहुरि जो कहैगा मायाके निमित्ततैं और कोई हो है तौ और पदार्थ तौ तू ठहरावता ही नाहीं भया कौन । जो तू कहैगा नवीन पदार्थ निपजे । तौ ते मायातैं भिन्न निपजे कि अभिन्न निपजे । मायातैं भिन्न निपजे तौ मायामयी शरीरादिक काहेकौं कहौ । ते तौ तिनपदार्थमय भये । अर अभिन्न निपजे तौ माया ही तद्रूप भई नवीन पदार्थ निपजे काहेकौं कहौ । ऐसैं शरीरादिक माया-स्वरूप हैं ऐसा कहना भ्रम है ।

बहुरि वह कहै है मायातैं तीन गुण निपजे—राजस तामस सात्विक । सो यह भी कहना मिथ्या है । जातैं मानादि कषायरूप भावकों राजस कहिए है, क्रोधादिकषायरूप भावकों तामस कहिए है, मंदकषायरूप भावकों सात्विक कहिए है । सो ए तौ भाव चेतनामई प्रत्यक्ष देखिए है । अर मायाका स्वरूप जड़ कहो हौ, सो जड़तैं ए भाव कैसें निपजैं । जो जड़कैं भी होय तौ पाषाणादिकके भी होय । सो तो चेतनास्वरूप जीव तिनिहीकै ए भाव दीसै हैं । तातैं ए भाव मायातैं निपजे नाहीं । जो मायाकों चेतन ठहरावै तौ मानैं । सो मायाकों चेतन ठहराए शरीरादिक मायातैं भिन्न भिन्न निपजे कहैगा तौ न मानेंगे । तातैं निर्द्धार कर, भ्रमरूप मानैं नफा कहा है ।

बहुरि वह कहै है तिनिगुणनितैं ब्रह्मा विष्णु महेश ए तीन देव प्रगट भए सो यह भी मिथ्या ही है । जातैं गुणीतैं तौ गुण होय गुणतैं गुणी कैसें निपजै । पुरुषतैं तौ क्रोध होय क्रोधतैं पुरुष कैसें निपजै । बहुरि इनि गुणनिकी तौ निंदा करिए है । इनिकरि निपजे ब्रह्मादिक तिनिकों पूज्य कैसें मानिए है । बहुरि गुण तौ मायामय अर इनकों ब्रह्मके अवतार कहिए है सो ए तौ मायाके अवतार भए इनकों ब्रह्मके अवतार कैसें कहिए है । बहुरि ए गुण जिनभैं थोरे भी पाइए तिनिकों तौ लुड़ावनेका उपदेश दीजिए अर जो इनिहीकी मूर्ति तिनिकों पूज्य मानिए । यह तौ बड़ा भ्रम है । बहुरि तिनिका कर्तव्य भी इनमयी भासै है । कुतूहल-दिक वा युद्धादिक वा स्त्रीसेवनादिक कार्य करै हैं सो तिनि राजसादि गुणनिकरि ही ए क्रिया हो हैं । सो इनिकै राजसादिक

पाइए है ऐसं कहौ । इनिकौं पूज्य कहना परमेश्वर कहना तौ बनै नाहीं । जैसें अन्य संसारी हैं तैसें ए भी हैं । बहुरि कदाचित् तू कहैगा संसारी तौ मायाके आधीन हैं सो विना जाने तिन कार्यनिकौं करै हैं । ब्रह्मादिकके माया आधीन है सो ए जानकर इनि कार्यनिकौं करै हैं । सो यह भी भ्रम है । जातैं मायाके आधीन भए तौ काम क्रोधादि निपजै हैं और कहा हो है । सो इन ब्रह्मादिकनिकै तो कामक्रोधादिककी तीव्रता पाइए है । कामकी तीव्रताकरि स्त्रीनिके वशीभूत भए नृत्य गानादि करते भए, विह्वल होते भए, नानाप्रकार कुचेष्टा करते भए, बहुरि क्रोधके वशीभूत भए अनेक युद्धादि कार्य करते भए, मानके वशीभूत भए आपकी उच्चता प्रगट करनेके अर्थ अनेक उपाय करते भए, मायाके वशीभूत भए अनेक छल करते भए, लोभके वशीभूत भए परिग्रहका संग्रहकरते भए इत्यादि बहुत कहा कहिए । ऐसें वशीभूत भए चीरहरणादि निर्लज्जनिकी क्रिया और दधि लूटनादि चौरनिकी क्रिया अरु रुंडमाला धारणादि बाउलेनिकी क्रिया, बहुरूपधारणादि भूतनिकी क्रिया, गौचरावणादि नीच कुलवालोंकी क्रिया इत्यादि जे निंघक्रिया तिनिकौं तौ करत भए, यातैं अधिक मायाके वशीभूत भए कहा क्रिया हो है सो जानी न परी । जैसें कोऊ मेघपटलसहित अमावस्याकी रातकौं अंधकार रहित मानै तैसें बाह्य कुचेष्टासहित तीव्र काम क्रोधादिकनिके धारी ब्रह्मादिकनिकौं मायारहित मानना है ।

बहुरि वह कहै कि इनिकौं कामक्रोधादि व्याप्त नहीं होता यह भी परमेश्वरकी लीला है । ताकौं कहिए है—ऐसे कार्य करै

हैं ते इच्छाकरि करै हैं कि विना इच्छा करै हैं । जो इच्छा-  
करि करै हैं तौ स्त्रीसेवनकी इच्छाहीका नाम काम है युद्ध  
करनेकी इच्छाहीका नाम क्रोध है इत्यादि ऐसैं ही जानना ।  
बहुरि जो विना इच्छा हो है तौ आप जाकों न चाहै ऐसा  
कार्य तौ परवश भए ही होय सो परवशपना कैसैं संभवै । बहुरि  
तू लीला बतावै है सो परमेश्वर अवतार धरि इन कार्यनिविषै  
लीला करै है तौ अन्य जीवनिकों इनि कार्यनितैं छुड़ाय मुक्त  
करनेका उपदेश काहेकों दीजिए है । क्षमा संतोष शील  
संयमादिकका उपदेश सर्व झूठा भया ।

बहुरि वै कहैं हैं कि परमेश्वरकों तौ किछु प्रयोजन नाही ।  
लोकरीतिकी प्रवृत्तिके अर्थि वा भक्तनिकी रक्षा दुष्टनिका निग्रह  
तिनिके अर्थि अवतार धरै है । याकों पूछिए है—प्रयोजन विना  
चिंवटी हू कार्य न करै परमेश्वर काहेकों करै । बहुरि प्रयोजन  
भी कहा लोकरीतिकी प्रवृत्तिके अर्थि करै है । सो जैसें कोई  
पुरुष आप कुचेष्टाकरि अपने पुत्रनिकों सिखावै बहुरि वै तिस  
चेष्टारूप प्रवर्तैं तब उनकों मारै तौ ऐसे पिताकों भला कैसैं  
कहिए । तैसैं ब्रह्मादिक आप कामक्रोधरूप चेष्टाकरि अपने  
निपजाए लोकनिकै प्रवृत्ति करावैं । बहुरि वे लोक तैसैं प्रवर्तैं  
तब उनकों नरकादिकविषै डारैं । नरकादिक इनिही भावनिका  
फल शास्त्रविषै लिख्या है सो ऐसे प्रभुकों भला कैसैं मानिए ।  
बहुरि तैं यह प्रयोजन कह्या कि भक्तनिकी रक्षा दुष्टनिका निग्रह  
करना सो भक्तनिकों दुखदायक जे दुष्ट भए ते परमेश्वरकी  
इच्छाकरि भए कि विना इच्छाकरि भए । जो इच्छाकरि

भए तौ जैसें कोऊ अपने सेवककौ आप ही काहूकौ कहकरि मरावै बहुरि तिस मारनेवालैकौ आप मारै सो ऐसे स्वामीकौ भला कैसें कहिए । तैसें ही जो अपने भक्तनिकौ आप ही इच्छाकरि दुष्टनिकरि पीड़ित करावै । अर पीछैं तिनि दुष्टनिकौ आप अवतार धारि मारै तौ ऐसे ईश्वरकौ भला कैसें मानिए । बहुरि जो तू कहैगा कि विना इच्छा दुष्ट भए तौ कै तौ परमेश्वरकै ऐसा आगामी ज्ञान न होगा जो दुष्ट मेरे भक्तनिकौ दुख देवैगे कै पहिले ऐसे शक्ति न होगी जो इनिकौ ऐसे न होनै देता । बहुरि वाकौ पूछिए है जो ऐसे कार्यके अर्थ अवतार धास्या, सो कहा विना अवतार धारे शक्ति थी कि नाहीं । जो थी तौ अवतार काहेकौ धारे अर न थी तौ पीछैं सामर्थ्य होनेका कारण कहा भया । तब वह कहै है जैसें किए विना परमेश्वरकी महिमा कैसें प्रगट होय । वाकौ पूछिये है कि—अपनी महिमाके अर्थ अपने अनुचरनिका पालन करै प्रतिपक्षीनिका निग्रह करै सो ही रागद्वेष है । सो रागद्वेष तो संसारी जीवका लक्षण है । जो परमेश्वरकै भी रागद्वेष पाइए है तौ अन्य जीवनिकौ रागद्वेष छोरि समता भाव करनेका उपदेश काहेकौ दीजिए । बहुरि रागद्वेषके अनुसार कार्य करना विचास्या सो कार्य थोरे वा बहुत काल लागे विना होय नाहीं तावत् काल आकुलता भी परमेश्वरकै होती होसी । बहुरि जैसें जिस कार्यकौ छोटा आदमी ही कर सकै तिस कार्यकौ राजा आप करै तौ किछू राजाकी महिमा होती नाहीं निंदा ही होय । तैसें जिस कार्यकौ राजा वा व्यंतरदेवादिक

करि सकैं तिस कार्यकौं परमेश्वर आप अवतार धारि करै ऐसा मानिए तौ किछू परमेश्वरकी महिमा होती नाहीं निंदा ही है । बहुरि महिमा तौ कोई और होय ताकौं दिखाइए है । तू तौ अद्वैत ब्रह्म मानै है कौनकौं महिमा दिखावै है । अर महिमा दिखानैका फल तौ स्तुति करावना है तौ कौनपै स्तुति कराया चाहै है । बहुरि तू तौ कहै है सर्व जीव परमेश्वरकी इच्छा अनुसार प्रवर्तैं हैं अर आपके स्तुति करावनेकी इच्छा है तौ सबकौं अपनी स्तुतिरूप प्रवर्त्तावै तौ काहेकौं अन्य कार्य करना परै । तातैं महिमाके अर्थि भी कार्य करना न बने ।

बहुरि वै कहै है—परमेश्वर इनि कार्यनिकौं करता संता भी अकर्त्ता है याका निर्द्धार होता नाहीं । याकौं कहिए है—तू कहैगा इह मेरी माता भी है अर बांझ भी है तो तेरा कब्जा कैसें मानैगे । जो कार्य करै ताकौं अकर्त्ता कैसें मानिए । अर तू कहै निर्द्धार होता नाहीं सो निर्द्धार विना मान लेना ठहस्या तौ आकाशके फूल गधेके सींग भी मानौ सो ऐसा कहना युक्त नाहीं । ऐसें ब्रह्मा विष्णु महेशका होना कहै हैं, सो मिथ्या जानना ।

बहुरि वै कहै हैं—ब्रह्मा तौ सृष्टिकौं उपजावै है, विष्णु रक्षा करै है, महेश संहार करै है । सो ऐसा कहना भी मिथ्या है । जातैं इनि कार्यनिकौं करतैं कोऊ किछू कीया चाहै कोऊ किछू क्रिया चाहै तब परस्पर विरोध होय । अर जो तू कहैगा ए तौ एक परमेश्वरका ही स्वरूप है विरोध काहेकौं होय । तौ आप ही उपजावै आप ही क्षिपावै ऐसे कार्यमें कौन फल है । जो सृष्टि

आपकों अनिष्ट है तौ काहेकों उपजाई । अर इष्ट है तौ काहेकों स्वपाई । जो पहिले इष्ट लागी तब उपजाई पीछैं अनिष्ट लागी तब स्वपाई ऐसैं है तौ परमेश्वरका स्वभाव अन्यथा भया कि सृष्टिका स्वरूप अन्यथा भया । जो प्रथम पक्ष ग्रहैगा तौ परमेश्वरका एक स्वभाव न ठहखा । सो एक स्वभाव न रहनेका कारण कौन है सो बताय, विनाकारण स्वभावकी पलटनि काहेकों होय । अर द्वितीय पक्ष ग्रहैगा तौ सृष्टि तौ परमेश्वरके आधीन थी वाकौं ऐसी काहेकों होनै दीनी जो आपकों अनिष्ट लागै ।

बहुरि हम पूछै हैं—ब्रह्मा सृष्टि उपजावै है सो कैसें उपजावै है । एक तौ प्रकार यह है जैसें मंदिर चुननेवाला चूनापत्थर आदि सामग्री एकठीकरि आकारादि बनावै है । तैसें ही ब्रह्मा सामग्री एकठीकरि सृष्टि रचना करै है तौ ए सामग्री जहातैं ल्याय एकठी करी सो ठिकाना बताय । अर एक ब्रह्मा ही एती रचना बनाई सो पहिले पीछै बनाई होगी कै अपने शरीरकै हस्तादि बहुत किए होंगे सो कैसें है सो बताय । जो बतावैगा तिसहीमें विचार किए विरुद्ध भासैगा ।

बहुरि एकप्रकार यह है जैसें राजा आज्ञा करै ताके अनुसार कार्य होय तैसें ब्रह्माकी आज्ञाकरि सृष्टि निपजै है तौ आज्ञा कौनकों दई । अर जिनिकों यह आज्ञा दई वै कहांतै सामग्री ल्याय कैसें रचना करै हैं, सो बताय ।

बहुरि एक प्रकार यह है जैसें ऋद्धिधारी इच्छा करै ताके अनुसारि कार्य स्वयमेव बनै । तैसें ब्रह्मा इच्छा करै ताके अनुसारि सृष्टि निपजै है, तौ ब्रह्मा तौ इच्छाहीका कर्ता भया । लोक तौ

स्वयमेव ही निपज्या । बहुरि इच्छा तौ परमब्रह्म कीन्ही थी ब्रह्माका कर्त्तव्य कहा भया जातैं ब्रह्माकौ सृष्टिका निपजावनहारा कब्बा । बहुरि तू कहैगा परमब्रह्म भी इच्छा करी अर ब्रह्मा भी इच्छा करी तब लोक निपज्या तौ जानिए है केवल परमब्रह्मकी इच्छा कार्यकारी नाहीं । तहां शक्तिहीनपना आया ।

बहुरि हम पूछैं हैं जो केवल बनाया हुवा लोक बनै है तौ बनावनहारा तौ सुखके अर्थि बनावै सो इष्ट ही रचना करै । इस लोकविषै तौ इष्ट पदार्थ थोरे देखिए है अनिष्ट घने देखिए है । जीवनिविषै देवादिक बनाए सो तौ रमनेके अर्थि वा भक्ति करावनेके अर्थि बनाए परंतु लट कीड़ी कूकरे सूअर सिंहादिक बनाये सो किस अर्थि बनाए । ए तौ रमणीक नाहीं । सर्व प्रकार अनिष्ट ही हैं । बहुरि दरिद्री दुखी नारकीनिकौ देखे आपकौ जुगुप्सा ग्लानि आदि दुख उपजे ऐसे अनिष्ट काहेकौ बनाए । तहां वह कहै है,—ए जीव अपने पापकरि लट कीड़ी दरिद्री नारकी आदि पर्याय भुगतै है । याकौ पूछिए है कि पीछैं तौ पापहीका फलतैं ए पर्याय भए कहो परंतु पहिले लोकरचना करते ही इनकौ बनाए सो किस अर्थि बनाए । बहुरि जीव पीछैं पापरूप परिणए तौ कैसै परिणए । जो आप ही परिणए कहोगे तौ जानिए है ब्रह्मा पहिलै तौ निपजाए पीछैं वाकै आधीन न रहे इसकारणतैं ब्रह्माकौ दुख ही भया । बहुरि कहोगे—ब्रह्माके परिणमाए परिणमै हैं तौ तिनिकौ पापरूप काहेकौ परिणमाए । जीव तौ आपके निपजाए थे उनका बुरा किस अर्थि किया । तातैं ऐसै भी न बनै । बहुरि अजीवनिविषै सुवर्ण सुगंधादि वस्तुसहित बनाए,



सो तौ रमणैके अर्थि बनाए कुवर्ण दुर्गधादिसहित दुखदायक वस्तु बनाए सो किस अर्थि बनाए । इनिका दर्शनादिकरि ब्रह्माकै किछु सुख तौ नाहीं उपजता होगा । बहुरि तू कहैगा, पापी जीवनिकौं दुख देनेके अर्थि बनाए, तौ आपहीके निपजाए जीव तिनिस्यौं ऐसी दुष्टता काहेकौं करी जो तिनिकौं दुखदायक सामग्री पहिले ही बनाई । बहुरि धूलि पर्वतादिक केतीक वस्तु ऐसी हैं जे रमणीक भी नाहीं अर दुखदायक भी नाहीं । तिनिकौं किस अर्थि बनाए । स्वयमेव तौ जैसें तैसें ही होय अर बनावनहारा बनावै सो प्रयोजनलिए ही बनावै । तातैं 'ब्रह्म सृष्टिका कर्ता है ।' यह मिथ्यावचन है ।

बहुरि विष्णुकौं लोकका रक्षक कहै हैं सो भी मिथ्या है । जातैं रक्षक होय सो तौ दोग ही कार्य करै । एक तौ दुख उपजावनेके कारण न होनै दे अर एक विनसनेका कारण न होनै दे । सो तौ लोकविषै दुखहीके उपजनैके कारण जहां तहां देखिए है । अर तिनिकरि जीवनिकौं दुख ही देखिए है । क्षुधा तृषादिक लग रहे हैं । शीत उष्णादिक करि दुख हो है । जीव परस्पर दुख उपजावै हैं । शस्त्रादि दुखके कारण बनि रहे हैं । बहुरि विनसनेके कारण अनेक बनि रहे हैं । जीवनिकै रोगादिक वा अग्नि विष शस्त्रादिक पर्यायके नाशके कारण देखिए है । अर जीवनिकै भी परस्पर विनसनेका कारण देखिए है । सो ऐसैं दोग प्रकारहीकी रक्षा की नाहीं तौ विष्णु रक्षक होय कहा किया । वै कहै हैं,—विष्णु रक्षक ही है । देखो क्षुधा तृषादिकके अर्थि अन्न जलादिक किए हैं । कीड़ीकौं कण

कुंजरकों मण पहुचावै है । संकटमें सहाय करै है । मरणके कारण बने टीटोड़ीकी नाई उबारै है । इत्यादि प्रकारकरि विष्णु रक्षा करै है । याकों कहिए है,—ऐसैं है तौ जहां जीवनिकों क्षुधातृषादिक बहुत पीड़ैं अर अन्न जलादिक मिलै नाहीं संकट पड़ै सहाय न होय किंचित् कारण पाय मरण होय जाय, तहां विष्णुकी शक्ति ही न भई कि वाकों ज्ञान न भया । लोकविषै बहुत ऐसैं ही दुखी हो हैं मरण पावै हैं विष्णु रक्षा काहेकों न करी । तब वै कहै हैं, यह जीवनिके अपने कर्तव्यका फल है । तब वाकों कहिए है कि, जैसें शक्तिहीन लोभी झूठा वैद्य काहूकै किहू भला होइ ताकों तौ कहै मेरा किया भया है । अर जहां बुरा होय मरण होय, तब कहै याका ऐसा ही होनहार था । तैसें ही तू कहै है कि, भला भया तहां तौ विष्णुका किया भया अर बुरा भया सो जीवनिके कर्तव्यका फल भया । ऐसैं झूठी कल्पना काहेकों कीजिए । कै तौ बुरा भला दोऊ विष्णुका किया कहौ कै अपने कर्तव्यका फल कहो । जो विष्णुका किया भया तौ घने जीव दुखी अर शीघ्र मरते देखिए है सो ऐसा करै ताकों रक्षक कैसें कहिए । वहुरि अपने कर्तव्यका फल है तौ करैगा सो पावैगा विष्णु कहा रक्षा करैगा । तब वै कहै हैं, जे विष्णुके भक्त हैं तिनिकी रक्षा करै है । वाकों कहिए है कि जो ऐसा है तौ कीड़ी कुंजर आदि

१ (टिटहरी) एक प्रकारका पक्षी एक समुद्र किनारे रहती थी । उसके अंडे समुद्र बहा ले जाता था, सो उसने दुखी होकर गरुड़ पक्षीकी मारफत विष्णुसे अर्ज की, तौ उन्हांने समुद्रसे अंडे दिलवा दिये । ऐसी पुराणोंमें कथा है ।

भक्त नहीं उनके अन्नादिक पहुचावनैविषै वा संकटमें सहाय होनैविषै वा मरण होनैविषै विष्णुका कर्त्तव्य मानि सर्वका रक्षक काहेकौं मानै । भक्त भक्तहीका रक्षक मानि । सो भक्तनिका भी रक्षक दीसता नहीं । जातैं अभक्त भी भक्त पुरुषनिकौं पीड़ा उपजावते देखिए है । तब वह कहै है,—घनी ही जायगा (जगह) प्रह्लादादिककी सहाय करी है । वाकौं कहै है,—जहां सहाय करी तहां तौ तू तैसें ही मानि । परंतु हम तौ प्रत्यक्ष म्लेच्छ मुसलमान आदि अभक्त पुरुषनिकरि भक्त पुरुष पीड़ित होते देखि वा मंदिरादिकौं विघ्न करते देखि पूछै हैं कि इहां सहाय न करै है सो विष्णुकी शक्ति ही नहीं कि खबरि नहीं । जो शक्ति नहीं तौ इनितैं भी हीनशक्तिका धारक भया । जो खबरि नहीं तौ जाकौं एती भी खबर नहीं, सो अज्ञान भया । अर जो तू कहैगा, शक्ति भी है अर जानै भी है इच्छा ऐसी ही भई, तौ फिर भक्तवत्सल काहेकौं कहै । ऐसैं विष्णुकौं लोकका रक्षक मानना मिथ्या है ।

बहुरि वै कहै है—महेश संहार करै है, सो भी मिथ्या है । प्रथम तौ महेश संहार करै है सो सदा ही करै है कि महाप्रलय हो है तब ही करै है । जो सदा करै है तौ जैसें विष्णुकी रक्षा करनेकरि स्तुति कीनी तैसें याकी संहार करनेकरि निंदा करो । जातैं रक्षा अर संहार प्रतिपक्षी हैं । बहुरि यह संहार कैसें करै है । जैसें पुरुष हस्तादिककरि काहूकौं मारै वा काहूकरि मरावै तैसें महेश अपने अंगनिकरि संहार करै है वा काहूकौं आज्ञाकरि मरावै है । क्षण क्षणमें संहार तौ घने जीवनिका सर्व लोकमें

हो है यह कैसे अंगनिकरि वा कौन कौनका आज्ञा देय युगपत् कैसे संहार करै है । जो कहै कि महेश तौ इच्छा ही करै अर याहीकी इच्छातैं स्वयमेव उनका संहार हो है । तौ याकै सदा काल मारनेरूप दुष्टपरिणाम ही रखा करते होंगे । अर अनेकजीवनिकों युगपत् मारनेकी इच्छा कैसे होती होगी । बहुरि जो महा प्रलय होतैं संहार करै है तौ परमब्रह्मकी इच्छा भए करै है कि वाकी विना इच्छा ही करै है । जो इच्छा भए करै है तौ परमब्रह्मकै ऐसा क्रोध कैसे भया जो सर्वका प्रलय करनेकी इच्छा भई । जातैं कोई कारण विना नाश करनेकी इच्छा होय नहीं । अर नाश करनेकी इच्छा ताहीका नाम क्रोध है, सो कारन बताय । बहुरि विनाकारण इच्छा हो है, तौ बावले-कीसी इच्छा भई । बहुरि तू कहैगा परमब्रह्म यह ख्याल (खेल) बनाया था बहुरि दूर किया कारन किछू भी नहीं, तौ ख्याल बनानैवालाकों भी ख्याल इष्ट लागै है तव बनावै है । अनिष्ट लागै है तव दूर करै है । जो याकों यह लोक इष्ट अनिष्ट लागै है, तौ याकै लोकसों रागद्वेष तौ भया । साक्षीभूत परब्रह्मका स्वरूप काहेकों कहो । साक्षीभूत तौ वाका नाम है जो स्वयमेव जैसे होय तैसे देख्या जान्या करै । जो इष्ट अनिष्टमा उपजावै नष्ट करै ताकों साक्षीभूत कैसे कहिए, जातैं साक्षीभूत रहना अर कर्त्ता हर्त्ता होना ए दोऊ परस्पर विरोधी हैं । एककैं दोऊ संभवै नहीं । बहुरि परमब्रह्मकै पहिलै तौ इच्छा यह भई थी कि 'मैं एक हों सो बहुत होस्यों' तव बहुत भया था । अब ऐसी इच्छा भई होगी जो "मैं बहुत हों सो एक होस्यों" सो जैसे कोऊ

भोलपतैं कारज करि पीछैं तिस कार्यकौं दूरि किया चाहै तैसैं परमब्रह्म भी बहुत होय एक होनेकी इच्छा करी सो जानिये है कि बहुत होनेका कार्य किया सो भोलपहीतैं किया था आगामी ज्ञानकरि किया होता तौ काहेकौं ताके दूरि करनेकी इच्छा होती ।

बहुरि जो परमब्रह्मकी इच्छा विना ही महेश संहार करै है तौ यह परमब्रह्मका वा ब्रह्माका विरोधी भया । बहुरि पूछैं हैं कि-महेश लोककौं कैसें संहार करै है । जो अपने अंगनिकरि संहार करै है तो सर्वका युगपत् संहार कैसें करै है । बहुरि याकी इच्छा होतैं स्वयमेव संहार हो है तौ इच्छा तौ परमब्रह्म कीन्ही थी यानैं संहार कहा किया ।

बहुरि हम पूछै हैं कि संहार भए सर्व लोकविषै जीव अजीव थे ते कहां गए । तब वै कहै है—जीवनिविषै भक्त तौ ब्रह्मविषै मिले अन्य मायाविषै मिले । अब याकूं पूछिए है कि माया ब्रह्मतैं जुदी रहै है कि पीछैं एक होय जाय है । जो जुदी रहै तौ ब्रह्मवत् माया भी नित्य भई । तब अद्वैतब्रह्म न रखा । अर माया ब्रह्ममें एक होय जाय है तौ जे जीव मायामें मिले थे ते भी मायाकी साथि ब्रह्ममें मिलि गए । जब महाप्रलय होतैं सर्वका परमब्रह्ममें मिलना ठहखा ही तौ मोक्षका उपाय काहेकौं करिए । बहुरि जे जीव मायामें मिले ते बहुरि लोकरचना भए वै ही जीव लोकविषै आवेंगे कि वै तौ ब्रह्ममें मिलगए थे नएउपजेंगे । जो वे ही आवेंगे तौ जानिए है जुदे जुदे रहै हैं मिले काहेकौं कहे । अर नएउपजेंगे तौ जीवका अस्तित्व थोरा कालपर्यंत ही रहै है काहेकौं मुक्त होनेका उपाय कीजिए है । बहुरि वै कहै है कि पृथिवी

आदिक हैं ते मायाविषै मिलैं हैं सो माया अमूर्त्तिक सचेतन है कि मूर्त्तिक अचेतन है । जो अमूर्त्तिक सचेतन है तौ यामैं मूर्त्तिक अचेतन कैसें मिलैं । अर मूर्त्तिक अचेतन है तौ यह ब्रह्ममें मिलै है कि नाही । जो मिलै है तौ याके मिलनेतैं ब्रह्म भी मूर्त्तिक अचेतनकरि मिश्रित भया । अर न मिलै है तौ अद्वैतता न रही । अर तू कहैगा ए सर्व अमूर्त्तिक चेतन होइ जाय है तौ आत्मा अर शरीरादिककी एकता भई सो यह संसारी एकता मानै ही है याकों अज्ञानी काहेकों कहिए । बहुरि पूछैं हैं,—लोकका प्रलय होतैं महेशका प्रलय हो है कि नाही । जो हो है तौ युगपत् हो है कि आगैं पीछैं हो है । जो युगपत् हो है तौ आप नष्ट होता लोककों नष्ट कैसें करै । अर आगैं पीछैं हो है तौ महेश लोककों नष्टकरि आप कहां रखा आप भी तो सृष्टिविषै ही था, ऐसें महेशकों सृष्टिका संहारकर्त्ता मानै है सो असंभव है । या प्रकारकरि वा अन्य अनेकप्रकारकरि ब्रह्मा विष्णु महेशकों सृष्टिका उपजावन-हारा, रक्षा करनेवाला, संहार करनेहारा मानना मिथ्या जानि लोककों अनादिनिधन मानना । इस लोकविषै जे जीवादि पदार्थ हैं ते न्यारे न्यारे अनादिनिधन हैं । बहुरि तिनिकी अवस्थाकी पलटनि हूवा करै है तिस अपेक्षा उपजते विनशते कहिए है । बहुरि स्वर्ग नरक द्वीपादिक हैं ते अनादितैं ऐसें ही हैं अर सदा-काल ऐसें ही रहैगे । कदाचित् तू कहैगा बिना बनाए ऐसे आकारादिक कैसें संभवैं होय तौ बनाए ही होय । सो ऐसा नाही है जातैं अनादितैं ही जे पाइए तहां तर्क कहा । जैसें तू परब्रह्मका स्वरूप अनादिनिधन मानै है तैसें ए भी हैं । तू कहैगा जीवादिक

वा स्वर्गादिक कैसें भए । हम कहेंगे परब्रह्म कैसें भया । तू कहैगा इनकी रचना ऐसी कौन करी । हम कहेंगे परब्रह्मकों ऐसा कौन बनाया । तू कहैगा परमब्रह्म स्वयंसिद्ध है । हम कहेंगे जीवादिक वा स्वर्गादिक स्वयंसिद्ध है । तू कहैगा इनकी अर परब्रह्मकी समानता कैसें संभवै । तौ संभवनेविषै दूषण बताय । लोककों नवा उपजावना ताका नाश करना तिसविषै तौ हम अनेक दोष दिखाए । लोककों अनादिनिधन माननेतैं कहा दोष है सो तू बताय । जो तू परमब्रह्म मानै है सो जुदा ही कोई है नाहीं । ए संसारविषै जीव हैं ते ही यथार्थ ज्ञानकरि मोक्षमार्ग साधनेतैं सर्वज्ञ वीतराग हो हैं ।

इहां प्रश्न—जो तुम तौ न्यारे न्यारे जीव अनादिनिधन कहो हौ । मुक्त भए पीछैं तो निराकार हो हैं तहां न्यारे न्यारे कैसें संभवैं । ताका समाधान—जो मुक्त भए पीछैं सर्वज्ञकों दीसै है कि नाहीं दीसै है । जो दीसै है तौ किछू आकार दीसता ही होगा । विना आकार देखैं कहा देख्या । अर न दीसै है तौ कै तौ वस्तु ही नाहीं कै सर्वज्ञ नाहीं । तातैं इंद्रियगम्य आकार नाहीं तिस अपेक्षा निराकार हैं अर सर्वज्ञ ज्ञानगम्य है तातैं आकारवान् हैं । जब आकारवान् ठहस्या तब जुदा जुदा होय तौ कहा दोष लागै । बहुरि जो तू जाति अपेक्षा एक कहै तौ हम भी मानैं हैं । जैसें गेहूं भिन्नभिन्न हैं तिनकी जाति एक है ऐसें एक मानैं तो किछू दोष है नाहीं । या प्रकार यथार्थ श्रद्धानकरि लोकविषै सर्व पदार्थ अकृत्रिम जुदे जुदे अनादिनिधन मानने । बहुरि जो वृथा ही भ्रमकरि सांच झूठका निर्णय न करै तौ तू जानै तेरे श्रद्धानका फल तू पावैगा ।

बहुरि वै ही ब्रह्मातैं पुत्रपौत्रादिकरि कुलप्रवृत्ति कहै हैं । बहुरि कुलनिविषै राक्षस मनुष्य देव तिर्यचनिकै परस्पर प्रसूतिभेद बतावै हैं । तहां देवतैं मनुष्य वा मनुष्यतैं देव वा तिर्यचतैं मनुष्य इत्यादि कोई माता कोई पितातैं पुत्रपुत्रीका उपजना बतावैं सो कैसें संभवै । बहुरि मनहीकरि वा पवनादिकरि वा वीर्य सूंघने आदिकरि प्रसूति होनी बतावै हैं, सो प्रत्यक्षविरुद्ध भासै है । ऐसैं होतैं पुत्रपौत्रादिकका नियम कैसें रखा । बहुरि बड़ेबड़ेनिकों अन्य अन्य मातापितातैं भए कहै हैं । सो महंतपुरुष कुशीली मातापितातैं कैसें उपजैं । यह तौ लोकविषै गालि है । ऐसा कहि उनकी महंतता काहेकौं कहिए है । बहुरि गणेशादिककी मैल आदिकरि उत्पत्ति बतावै हैं । वा काहूका अंग काहूकै जुरै बतावै हैं । इत्यादि अनेक प्रत्यक्ष विरुद्ध कहै हैं । बहुरि चौईस अवतार भए कहै हैं, तहां केई अवतारनिकों पूर्णावतार कहै हैं । केईनिकों अंशावतार कहै हैं । सो पूर्णावतार भए तव ब्रह्म अन्यत्र व्यापि रखा कि न रखा । जो रखा तौ इनि अवतारनिकों पूर्णावतार काहेकौं कहौ । जो व्यापि न रखा तौ एतावन्मात्र ही ब्रह्म रखा । बहुरि अवतार भए तहां ब्रह्मका अंश तौ सर्वत्र कहौ तौ इनविषै कहा अधिकता भई । बहुरि कार्य तौ तुच्छ तिसकै वास्तै आप ब्रह्म अंशावतार धार्या कहै सो जानिये है विना अवतार धारे ब्रह्मकी शक्ति तिस कार्यके करनेकी न थी । जातैं जो कार्य स्तोक उद्यमतैं होइ तहां बहुत उद्यम काहेकौं करिए । बहुरि अवतारनिविषै मच्छ कच्छादि अवतार भए सो किंचित् करनेके अर्थि हीन तिर्यच पर्यायरूप भए सो कैसें संभवै । बहुरि प्रह्लादके अर्थि नरसिंह-



अवतार भए सो हरिणाकुशकों ऐसा काहेकों होने दिया । अर कितनेक काल अपने भक्तकौ काहेकों दुख द्याया । बहुरि विडूरूप खांग काहेकों धर्या । बहुरि नाभिराजाकै वृषभावतार भया बतावै हैं सो नाभिकों पुत्रपनेका सुख उपजावनेकों अवतार धर्या । घोरतपश्चरण किस अर्थि किया । उनकों तौ कुछ साध्य था ही नहीं । अर कहैगा जगतके दिखावनैकों किया तौ कोई अवतार तौ तपश्चरण दिखावै । कोई अवतार भोगादिक दिखावै । जगत किसकों भला जानि लागै । यह तौ बहुरूपियाकासा खांग किया ।

बहुरि वह कहै है—एक अरहंत नामका राजा भया, सो वृषभावतारका मत अंगीकारकरि जैनमत प्रगट किया सो जैनविषै कोई एक अरहंत भया नाही । जो सर्वज्ञपद पाय पूजने योग्य होय ताहीका नाम अर्हत् है । बहुरि राम कृष्ण इनि दोय अवतारनिकों मुख्य कहै हैं सो रामावतार कहा किया । सीताके अर्थि विलापकरि रावणसौं लरि वाकूं मारि राज किया । अर कृष्णावतार पहिले गुवालिया होय परस्त्री गोपिकानिके अर्थि नाना विपरीत चेष्टाकरि पीछें जरासिंधु आदिकों मारि राज किया । सो ऐसे कार्य करनेमें कहा सिद्धि भई । बहुरि रामकृष्णादिकका एक स्वरूप कहै । सो बीचमें इतने काल कहां रहे । जो ब्रह्मविषै रहे तौ जुदे रहे कि एक रहे । जुदे रहे तौ जानिए है ए ब्रह्मतैं जुदे रहे । एक रहे तौ राम ही कृष्ण भया सीता ही रुक्मिणी भई इत्यादि कैसें कहिए है । बहुरि रामावतारविषै तौ सीताकों मुख्य कहै अर कृष्णावतारविषै सीताकों रुक्मिणी भई कहै ताकूं

तौ प्रधान न कहैं राधिका कुमारी ताकूं मुख्य कहैं । बहुरि पूछैं तब कहैं कि राधिका भक्त थी, सो निजस्त्रीकौं छोरि दासीका मुख्य करना कैसें बनै । बहुरि कृष्णकै तौ राधिकासहित परस्त्री सेवनके सर्व विधान भए । सो यह भक्ति कैसें करी । ऐसे कार्य तौ महानिघ हैं । बहुरि रुक्मिणीकूं छोरि राधाकौं मुख्य करी सो परस्त्रीसेवनकौं भला जानि करी होसी । बहुरि एक राधाहीविषै आसक्त न भया अन्य गोपिका कुब्जा आदि अनेक परस्त्रीनिविषै भी आसक्त भया । सो यह अवतार ऐसे ही कार्यका अधिकारी भया । बहुरि कहैं—लक्ष्मी वाकी स्त्री है बहुरि धनादिककौं लक्ष्मी कहैं सो ए तौ पृथ्वी आदिविषै जैसें पाषाण धूलि है तैसें ही रत्न सुवर्णादि देखिए है । जुदी ही लक्ष्मी कौन जाका भर्तार नारायण है । बहुरि सीतादिकौं मायाका स्वरूप कहैं सो इनिविषै आसक्त भए तब मायाविषै आसक्त कैसें न भए । कहां ताई कहिए जो निरूपण करैं सो विरुद्ध करैं । परंतु जीवनिकौं भोगादिककी वार्त्ता सुहावै तातैं तिनिका कहना बल्लभ लागै है । ऐसें अवतार कहे हैं इनिकौं ब्रह्मस्वरूप कहे हैं । बहुरि औरनिसौं भी ब्रह्मस्वरूप कहे हैं । एक तौ महादेवकौं ब्रह्मस्वरूप मानै हैं । ताकूं योगी कहै हैं, सो योग किस अर्थि ब्रह्मा । बहुरि मृगछाला भस्मी धारै है सो किस अर्थि धारी है । बहुरि रुंडमाला पहरै हैं सो हाड़ाका छीवना भी निघ है ताकूं गलेमें किस अर्थि धारै है । सर्पादि सहित है सो यामैं कौन बड़ाई है । आक धतूरा खाय है सो यामैं कौन भलाई है । त्रिशूलादि राखै है सो कौनका भय है । बहुरि पार्वती संग लिए हैं सो योगी होय स्त्री राखै है सो ऐसा विपरीतपना

काहेकौ किया । कामासक्त था तौ घरहीमें रखा होता । बहुरि वानै नानाप्रकार विपरीत चेष्टा कीन्हीं ताका प्रयोजन तौ किछू भासै नाहीं । बाउलेकासा कर्त्तव्य भासै ताकौ ब्रह्मस्वरूप कहैं ।

बहुरि कृष्णकौ याका सेवक कहै हैं कबहू याकौ कृष्णका सेवक कहैं कबहू दोऊनिकौ एक ही कहैं सो किछू ठिकाना नाहीं । बहुरि सूर्यादिककौ ब्रह्मका स्वरूप कहैं । बहुरि ऐसा कहैं जो विष्णु कखा सो धातूनिविषै सुवर्ण, वृक्षनिविषै कल्पवृक्ष, जूवाविषै झूठ इत्यादिमें में ही हौं । सो किछू पूर्वापर विचारै नाहीं । कोई एक अंगकरि संसारी जीवकौ महंत मानै ताहीकौ ब्रह्मका स्वरूप कहैं । सो ब्रह्म सर्वव्यापी है ऐसा विशेषण काहेकौ किया । अर सूर्यादिविषै वा सुवर्णादिविषै ही ब्रह्म है तौ सूर्य उजाला करै है सुवर्ण धन है इत्यादि गुणनिकरि ब्रह्म मान्या सो सूर्यवत् दीपादिक भी उजाला करै हैं सुवर्णवत् रूपा लोहा आदि भी धन हैं इत्यादि गुण अन्य पदार्थनिविषै भी हैं तिनिकौ भी ब्रह्म मानै । बड़ा छोटा मानौ परंतु जाति तौ एक भई । सो झूठी महंतता ठहरावनेके अर्थि अनेकप्रकार युक्ति बनावै हैं ।

बहुरि अनेक ज्वालामालिनी आदि देवीनिकौ मायाका स्वरूप कहि हिंसादिक पाप उपजाय पूजना ठहरावै हैं सो माया तौ निंद्य है ताका पूजना कैसें संभवै । अर हिंसादिक करतां कैसें भला होय । बहुरि गऊ सर्पादि पशु अभक्ष्यभक्षणादिसहित तिनिकौ पूज्य कहैं । अग्नि पवन जलादिककौ देव ठहराय पूज्य कहैं । वृक्षादिककौ युक्ति बनाय पूज्य कहैं । बहुरि कहा कहिए पुरुषलिंगी नाम सहित जे होंय तिनिविषै ब्रह्मकी कल्पना करैं अर स्त्रीलिंगी

नाम सहित होंय तिनिविषै मायाकी कल्पनाकरि अनेक वस्तूनिका पूजन ठहरावै है। इनिके पूजे कहा होयगा सो विचार किछू नाही। झूठे लौकिक प्रयोजनके कारन ठहराय जगतकौं भ्रमावै हैं। बहुरि कहै हैं—विधाता शरीरकौं घड़े है, यम मारै है, मरते समय यमके दूत लेनै आवै हैं, मूए पीछैं मार्गविषै बहुतकाल लागै है, तहां पुण्य पापका लेखा हो है, तहां सिद्धादिक देवै हैं। सो ए कल्पित झूठी युक्ति हैं। जीव तौ समय समय अनंते उपजै मरै हैं तिनिका युगपत् कैसेँ इसप्रकार संभवै अर ऐसेँ माननेका कोई कारण भी भासै नाही। बहुरि मूए पीछैं श्राद्धादिककरि वाका भला होना कहैँ सो जीवतां तौ काहूके पुण्यकरि कोई सुखी दुखी होता दीखै ही नाही मूए पीछैं कैसेँ होय। ए युक्ति मनुष्यनिकौं भ्रमाय अपने लोभ साधनेके अर्थ बनावै हैं। कीड़ी पतंग सिंहादिक जीव भी तौ उपजै मरै हैं सो उनकौं प्रलयके जीव ठहरावै। तहां जैसेँ मनुष्यादिकके जन्म मरण होते देखिण है, तैसेँ ही उनके होते देखिण है। झूठी कल्पना किए कहा सिद्धि है। बहुरि वै शास्त्रनिविषै कथादिक निरूपै हैं तहां विचार किए विरुद्ध भासै है। बहुरि यज्ञादिक करना यम ठहरावै हैं। तहां बड़े जीवनिका होम करै हैं, अन्नादिकका महा आरंभ करै हैं, तहां जीवघात हो है सो उन्हीके शास्त्रविषै वा लोकविषै हिंसाका निषेध है परंतु ऐसेँ निर्दय हैं किछू गिनै नाही। अर कहैँ—“यज्ञार्थं पशवः सृष्टाः” ए यज्ञहीके अर्थि पशु बनाए हैं। तहां घातकरनेका दोष नाही। बहुरि मेघादिकका होना शत्रु आदिका विनशना इत्यादि फल दिखाय अपने लोभके अर्थि राजादिकनिकौं भ्रमावै।

काहेकौ किया । कामासक्त था तौ घरहीमें रखा होता । बहुरि वानै नानाप्रकार विपरीत चेष्टा कीन्हीं ताका प्रयोजन तौ किछू भासै नाहीं । बाउलेकासा कर्त्तव्य भासै ताकौ ब्रह्मस्वरूप कहै ।

बहुरि कृष्णकौ याका सेवक कहै हैं कबहू याकौ कृष्णका सेवक कहै कबहू दोऊनिकौ एक ही कहै सो किछू ठिकाना नाहीं । बहुरि सूर्यादिककौ ब्रह्मका स्वरूप कहै । बहुरि ऐसा कहै जो विष्णु कब्हा सो धातूनिविषै सुवर्ण, वृक्षनिविषै कल्पवृक्ष, जूबाविषै झूठ इत्यादिमें में ही हौं । सो किछू पूर्वापर विचारै नाहीं । कोई एक अंगकरि संसारी जीवकौ महंत मानै ताहीकौ ब्रह्मका स्वरूप कहै । सो ब्रह्म सर्वव्यापी है ऐसा विशेषण काहेकौ किया । अर सूर्यादिविषै वा सुवर्णादिविषै ही ब्रह्म है तौ सूर्य उजाला करै है सुवर्ण धन है इत्यादि गुणनिकरि ब्रह्म मान्या सो सूर्यवत् दीपादिक भी उजाला करै हैं सुवर्णवत् रूपा लोहा आदि भी धन हैं इत्यादि गुण अन्य पदार्थनिविषै भी हैं तिनिकौ भी ब्रह्म मानै । बड़ा छोटा मानौ परंतु जाति तौ एक भई । सो झूठी महंतता ठहरावनेके अर्थि अनेकप्रकार युक्ति बनावै हैं ।

बहुरि अनेक ज्वालामालिनी आदि देवीनिकौ मायाका स्वरूप कहि हिंसादिक पाप उपजाय पूजना ठहरावै हैं सो माया तौ निंद्य है ताका पूजना कैसें संभवै । अर हिंसादिक करतां कैसें भला होय । बहुरि गऊ सर्पादि पशु अभक्ष्यभक्षणादिसहित तिनिकौ पूज्य कहै । अग्नि पवन जलादिककौ देव ठहराय पूज्य कहै । वृक्षादिककौ युक्ति बनाय पूज्य कहै । बहुरि कहा कहिए पुरुषलिंगी नाम सहित जे होंय तिनिविषै ब्रह्मकी कल्पना करै अर स्त्रीलिंगी

नाम सहित होंय तिनिविषै मायाकी कल्पनाकरि अनेक वस्तुनिका पूजन ठहरावै है। इनिके पूजे कहा होयगा सो विचार किछू नाहीं। झूठे लौकिक प्रयोजनके कारन ठहराय जगतकों भ्रमावै हैं। बहुरि कहै हैं—विधाता शरीरकों घड़े है, यम मारै है, मरते समय यमके दूत लेनै आवै हैं, मूए पीछैं मार्गविषै बहुतकाल लागै है, तहां पुण्य पापका लेखा हो है, तहां सिंहादिक देवै हैं। सो ए कल्पित झूठी युक्ति हैं। जीव तौ समय समय अनंते उपजै मरै हैं तिनिका युगपत् कैसै इसप्रकार संभवै अर ऐसै माननेका कोई कारण भी भासै नाहीं। बहुरि मूए पीछैं श्राद्धादिककरि वाका भला होना कहै सो जीवतां तौ काहूके पुण्यकरि कोई सुखी दुखी होता दीखै ही नाहीं मूए पीछैं कैसै होय। ए युक्ति मनुष्यनिकों भ्रमाय अपने लोभ साधनेके अर्थ बनावै हैं। कीड़ी पतंग सिंहादिक जीव भी तौ उपजै मरै हैं सो उनकों प्रलयके जीव ठहरावै। तहां जैसै मनुष्यादिकके जन्म मरण होते देखिण है, तैसै ही उनके होते देखिण है। झूठी कल्पना किए कहा सिद्धि है। बहुरि वै शास्त्रनिविषै कथादिक निरूपै हैं तहां विचार किए विरुद्ध भासै है। बहुरि यज्ञादिक करना धर्म ठहरावै हैं। तहां बड़े जीवनिका होम करै हैं, अन्नादिकका महा आरंभ करै हैं, तहां जीवघात हो है सो उनहीके शास्त्रविषै वा लोकविषै हिंसाका निषेध है परंतु एमे निर्दय हैं किछू गिनै नाहीं। अर कहै—“यज्ञार्थं पशवः सृष्टाः” ए यज्ञहीके अर्थ पशु बनाए हैं। तहां घातकरनेका दोष नाहीं। बहुरि मेघादिकका होना शत्रु आदिका विनशना इत्यादि फल दिखाय अपने लोभके अर्थ राजादिकनिकों भ्रमावै।

जैसे कोई विषतें जीवना कहै सो प्रत्यक्ष विरुद्ध है तैसे हिंसा किए धर्म अरु कार्यसिद्धि कहना प्रत्यक्ष विरुद्ध है। परंतु जिनकी हिंसा करनी कही, तिनकी तौ किञ्चु शक्ति नाही अरु उनकी काहूकौ पीरि नाही। जो किसी शक्तिवानका इष्टका होम करना ठहराया होता, तौ ठीक पड़ता। पापका भय नाही तातैं दुर्बलका घातक होय अपने लोभके अर्थ अपना वा अन्यका बुरा करनेविषै तत्पर भए हैं। बहुरि मोक्षमार्ग भक्तियोग ज्ञानयोगकरि दोय प्रकार प्ररूपै हैं। तहां प्रथम ही भक्तियोगकरि मोक्षमार्ग कहै हैं, ताका स्वरूप कहिए है,—

तहां भक्ति निर्गुण सगुण भेदकरि दोयप्रकार कहै हैं। तहां अद्वैत परब्रह्मकी भक्ति करनी सो निर्गुणभक्ति है। सो ऐसे कहै हैं,— तुम निराकार हो, निरंजन हो, मन वचनके अगोचर हो, अपार हो, सर्वव्यापी हो, एक हो, सर्वके प्रतिपालक हो, अधमउधारक हो, सर्वके कर्ता हर्ता हो, इत्यादि विशेषणनिकरि गुण गावै हैं। सो इनिविषै केई तौ निराकारादि विशेषण हैं सो भावरूप हैं तिनिकौं सर्वथा मानै अभाव ही भासै। जातैं आकारादि वस्तु विना कैसे भासै। बहुरि केई सर्वव्यापी आदि विशेषण असंभव हैं सो तिनिका असंभवपना पूर्वे दिखाया ही है। बहुरि ऐसा कहै—जीवबुद्धिकरि मैं तिहारा दास हौं, शास्त्रदृष्टिकरि तिहारा अंश हौं, तत्त्वबुद्धिकरि 'तू ही मैं हूं' सो ए तीनों ही भ्रम हैं। यह भक्तिकरनहारा चेतन है कि जड़ है। तहां जो चेतन है तौ चेतना ब्रह्मकी है कि इसहीकी है। जो ब्रह्मकी है तौ मैं दास हौं ऐसा मानना चेतनाहीके हो है सो चेतना ब्रह्मका स्वरूप

ठहऱ्या । अर स्वभाव स्वभावीके तादात्म्यसंबंध है । तहां दास अर स्वामीका संबंध कैसे बने । दासस्वामीका संबंध तौ भिन्न-पदार्थ होय तब ही बने । बहुरि जो यह चेतना इसहीकी है तौ यह अपनी चेतनाका धनी जुदा पदार्थ ठहऱ्या तौ मैं अंश हौं वा 'जो तू है सो मैं हूं' ऐसा कहना झूटा भया । बहुरि जो भक्ति करनहारा जड़ है, तौ जड़के बुद्धिका होना असंभव है ऐसी बुद्धि कैसे भई । तातैं 'मैं दास हौं' ऐसा कहना तब ही बने है जब जुदा पदार्थ होय । अर 'तेरा मैं अंश हौं' ऐसा कहना बने ही नाहीं । जातैं 'तू' अर 'मैं' ऐसा तौ भिन्न होय तब ही बने सो अंश अंशी भिन्न कैसे होय । अंशी तौ कोई जुदा वस्तु है नाहीं, अंशनिका समुदाय सो ही अंशी है । अर 'तू है सो मैं हूं' ऐसा वचन ही विरुद्ध है । एक पदार्थविषे आपो भी मानै अर पर भी मानै सो कैसे संभवे । तातैं भ्रम छोड़ि निर्णय करना । बहुरि केई नाम ही जपै हैं । सो जाका नाम जपै ताका स्वरूप पहचानेविना केवल नामहीका जपना कैसे कार्यकारी होय । जो तू कहैगा नामहीका अतिशय है तौ जो नाम ईश्वरका है सो ही नाम किसी पापी-पुरुषका धर्या तहां दोऊनिका नाम उच्चारणविषे फलकी समानता होय सो कैसे बने । तातैं स्वरूपका निर्णयकरि पीछैं भक्तिकरने-योग्य होय ताकी भक्ति करनी । ऐसे निर्गुणभक्तिका स्वरूप दिखाया ।

बहुरि जहां काम क्रोधादिकरि निपजे कार्यनिका वर्णनकरि स्तुत्यादि करिए ताकौं सगुणभक्ति कहै हैं । सो तहां सगुणभक्ति-विषे लौकिकशृंगार वर्णन जैसे नायक नायिकाका करिए तैसें



ठाकुरठकुरानीका वर्णन करै हैं । खकीया परकीया स्त्रीसंबंधी संयोगवियोगरूप सर्वव्यवहार तहां निरूपै हैं । बहुरि खान करती स्त्रीनिका बख चुरावना, दधि लट्टना, स्त्रीनिकै पगां परना, स्त्रीनिकै आगै नाचना इत्यादि जिन कार्यनिकों करते संसारी जीव लज्जित होंय तिनि कार्यनिका करना ठहरावै हैं । सो ऐसा कार्य अतिकामपीडित भए ही बनै । बहुरि युद्धादिक किए कहैं सो ए क्रोधके कार्य हैं । अपनी महिमा दिखावनेके अर्थि उपाय किए कहैं सो मानके कार्य हैं । अनेक छल किए कहैं सो मायाके कार्य हैं । विषयसामग्रीकी प्राप्तिके अर्थि यत्न किए कहैं सो लोभके कार्य हैं । कुतूहलादिक किए कहैं सो हास्यादिकके कार्य हैं । ऐसैं ए सब कार्य क्रोधादिकरि युक्त भए ही बनै । याप्रकार कामक्रोधादिकरि निपजे कार्यनिकों प्रगटकरि कहैं हम स्तुति करै हैं । सो काम क्रोधादिके कार्य ही स्तुतियोग्य भए तौ निंघ कौन ठहरैंगे । जिनकी लोकविषै शास्त्रविषै अत्यंत निंदा पाईए तिनि कार्यनिका वर्णनकरि स्तुति करना तौ हस्तचुगलकासा कार्य है । हम पूछैं हैं-कोऊ किसीका नाम तौ कहै नाहीं अर ऐसे कार्यनिहीका निरूपण करि कहै कि किसीनै ऐसे कार्य किए हैं, तब तुम वाकों भला जानौ कै बुरा जानौ । जो भला जानौ तौ पापी भले भए । बुरा कौन भया । अर बुरे जानौ तौ ऐसे कार्य कोई करौ सो ही बुरा भया । पक्षपातरहित न्याय करौ । जो पक्षपातकरि कहौंगे, ठाकुरका ऐसा वर्णन करना भी स्तुति है तौ ठाकुर ऐसे कार्य किस अर्थ किए । ऐसे निंघकार्य करनेमें कहा सिद्धि भई । कहौंगे, प्रवृत्ति चलावनेके अर्थि किए, तौ परस्त्रीआदिसेवन निंघकार्यनिकी

प्रवृत्ति चलावनेमें आपकै वा अन्यकै कहा नफा भया । तातैं ठाकुरकै ऐसे कार्य करना संभवैं नाहीं । बहुरि जो ठाकुर कार्य नाहीं किए तुम ही कहो हौ तौ जामैं दोष न था ताकौं दोष लगाया तातैं ऐसा वर्णन करना तौ निंदा है स्तुति नाहीं । बहुरि स्तुति करते जिन गुणनिका वर्णन करिए तिस रूप ही परिणाम होय वा तिनिहीविषै अनुराग आवै । सो काम क्रोधादि कार्यनिका वर्णन करतैं आप भी कामक्रोधारूप होय अथवा कामक्रोधादिविषै अनुरागी होय तौ ऐसे भाव तौ भले नाहीं । जो कहोगे, भक्त ऐसा भाव न करै हैं तौ परिणाम भए विना वर्णन कैसें किया । अनुराग भए विना भक्ति कैसें करी । जो ए भाव ही भले होंय तौ ब्रह्मचर्यकौं वा क्षमादिककौं भले काहेकौं कहिए । इनिकै तौ परस्पर प्रतिपक्षीपना है । बहुरि सगुणभक्तिकरनेके अर्थि राम कृष्णादिककी मूर्ति भी शृंगारादि किए वक्रत्वादिसहित स्त्रीआदि संगलिए बनावैं हैं जाकौं देखते ही कामक्रोधादि भाव प्रगट होय आवैं । बहुरि महादेवके लिंगहीका आकार बनावैं हैं । देखो विटंबना, जाका नाम लिए ही लाज आवै जगत् जिसकौं ढक्या राखै ताका आकारका पूजन करावै हैं । अन्य अंग कहा वाकै न थे । परंतु घनी विटंबना ऐसे ही किए प्रगट होय । बहुरि सगुणभक्तिकै अर्थि नानाप्रकार विषयसामग्री भेली करै तहां नाम तौं ठाकुरका करै अर आप भोगवैं भोजनादि बनावैं बहुरि ठाकुरकौं भोग लगाया कहैं पीछैं आपही प्रसादकी कल्पनाकरि ताका भक्षणादि करै । सो यहां पूछिए है, प्रथम तौ ठाकुरकै क्षुधा तृषादिककी पीड़ा होयगी । जो न होय तौ ऐसी कल्पना कैसें संभवै ।

अर क्षुधादिकरि पीड़ित होय सो व्याकुल होय तब ईश्वर दुखी भया औरका दुःख दूर कैसे करै । बहुरि भोजनादि सामग्री आप तौ उनकै अर्थि अर्पण करी सो करी पीछें प्रसाद तौ ठाकुर देवै तब होय आपहीका तौ किया न होय । जैसें कोऊ राजाकी भेट करै पीछें राजा बकसै तौ वाकौं ग्रहण करना योग्य अर राजा तौ किल्लू कहै नाहीं, आप ही 'राजा मोकूं बकसी' ऐसें कहि वाकौं अंगीकार करै तौ यह ख्याल (खेल) भया । तैसें यहां भी ऐसें किए भक्ति तौ भई नाहीं हास्यकरना भया । बहुरि ठाकुर अर तू दोय हो कि एक हो । दोय हो तौ तैनें भेट करी पीछें ठाकुर बकसै सो ग्रहण कीजै । आपही काहेकौं ग्रहण करै है । अर तू कहैगा ठाकुरकी तौ मूर्ति है तातैं में ही कल्पना करूं हूं तौ ठाकुरके करनेका कार्य तैनें ही किया तब तू ही ठाकुर भया । बहुरि जो एक हो, तौ भेट करनी प्रसाद करना झूठा भया । एक भए यह व्यवहार संभवै नाहीं । तातैं भोजनासक्त पुरुषनिकरि ऐसी कल्पना करिए है । बहुरि ठाकुरकै अर्थि नृत्य गीतादि करावना, शीत ग्रीष्म वसंत आदि ऋतुनिविधै संसारीकै संभवती ऐसी विषयसामग्री भेली करनी इत्यादि कार्य करैं । तहां नाम तौ ठाकुरका लेना अर इंद्रियविषय अपने पोषने । सो विषयासक्त जीवनिकरि ऐसा उपाय किया है । बहुरि जन्म विवाहादिककी वा सोवना जागना इत्यादि-ककी कल्पना तहां करै हैं सो जैसें लड़की गुड्डा गुड्डीका ख्याल बनायकरि कुतूहल करै तैसें यह भी कुतूहल करना है । किल्लू परमार्थरूप गुण है नाहीं । बहुरि बालक ठाकुरका खंग बनाय चेष्टा दिखवैं । ताकरि अपने विषय पोषैं अर कहैं यह भी भक्ति

है। इत्यादि कहा कहिए ऐसी ऐसी अनेक विपरीतता सगुण-  
भक्तिविषै पाईए है। ऐसै दोय प्रकार भक्तिकरि मोक्षमार्ग कहै हैं  
सो ताका स्वरूप मिथ्या जानना। अब अन्यमतके ज्ञानयोगकरि  
मोक्षमार्गका स्वरूप दिखाइए है,—

एक अद्वैत सर्वव्यापी परब्रह्मकौ जानना ताकौ ज्ञान कहै हैं सो  
ताका मिथ्यापना तौ पूवै कखा ही है। बहुरि आपकों सर्वथा शुद्ध  
ब्रह्मस्वरूप मानना काम क्रोधादिक वा शरीरादिककौ भ्रम जानना  
ताकौ ज्ञान कहै हैं सो यह भ्रम है। जो आप शुद्ध है तौ मोक्षका  
उपाय काहेकौ करै है। आप शुद्धब्रह्म ठहस्या, तब कर्तव्य कहा  
रखा। बहुरि प्रत्यक्ष आपके काम क्रोधादिक होते देखिए अर  
शरीरादिकका संयोग देखिए है सो इनिका अभाव होगा तब  
होगा वर्तमानविषै इनिका सद्भाव मानना भ्रम कैसै भया। बहुरि  
कहै हैं, मोक्षका उपाय करना भी भ्रम है। जैसे जेवरी तौ जेवरी ही  
है ताकौ सर्प जानै था सो भ्रम था—भ्रम मिटे जेवरी ही है। तैसें  
आप तौ ब्रह्म ही है आपकों अशुद्ध मानै था सो भ्रम था भ्रम मिटे  
आप ब्रह्म ही है। सो ऐसा कहना मिथ्या है। जो आप शुद्ध होय  
अर ताकौ अशुद्ध जानै तौ भ्रम, अर आप कामक्रोधादिसहित  
अशुद्ध होय रखा ताकौ अशुद्ध जानै तौ भ्रम काहेका। झूठा भ्रम-  
करि आपकों शुद्ध माने कहा सिद्धि है। बहुरि तू कहैगा ए  
काम क्रोधादिक तौ मनके धर्म हैं ब्रह्म न्यारा है तौ पूछिए है—मन  
है सो तेरा स्वरूप है कि नाही। जो है तौ काम क्रोधादि भी तेरे  
ही भए। अर नाही है तौ पूछिए है जो तू ज्ञानस्वरूप है कि जड़  
है। जो ज्ञानस्वरूप है तौ तेरै तौ ज्ञान मन वा इंद्रियद्वारा ही

होता दीखै है । इनि विना कोई ज्ञान बतावै तौ ताकों जुदा तेरा स्वरूप मानै सो भासता नाही । बहुरि 'मन ज्ञाने' धातुतैं मन शब्दनिपजै है सो मन तौ ज्ञानस्वरूप है । यह ज्ञान किसका है ताकों बताय । सो जुदा कोऊ भासै नाही । बहुरि जो तू जड़ है तौ ज्ञान विना अपने स्वरूपका विचार कैसें करै है । यह बनै नाही । बहुरि तू कहै है ब्रह्म न्यारा है सो वह न्यारा ब्रह्म तू ही है कि और है । जो तू ही है तौ तेरे 'मैं ब्रह्म हूँ' ऐसा माननेवाला ज्ञान है सो तौ मनस्वरूप ही है मनतैं जुदा नाही । आपा मानना आपहीविषे होय । जाकों न्यारा जानै तिसविषे आपा मान्या जाय नाही । सो मनतैं न्यारा ब्रह्म है तौ मनरूप ज्ञान ब्रह्मविषे आपा काहेकों मानै है । बहुरि जो ब्रह्म और ही है तौ तू ब्रह्मविषे आपा काहेकों मानै । तातैं भ्रम छोड़ि ऐसा मानि कि जैसें स्पर्श-नादि इंद्रिय तौ शरीरका स्वरूप है सो जड़ है याकै द्वारि जो जानपनो हो है सो आत्माका स्वरूप है । ततैं ही मन भी सूक्ष्म परमाणुनिका पुंज है सो शरीरहीका अंग है । ताकै द्वारि जानपना हो है वा कामक्रोधादि भाव हो हैं सो सब आत्माका स्वरूप है । विशेष इतना जो जानपना तौ निज स्वभाव है काम क्रोधादिक उपाधिक भाव हैं तिसकरि आत्मा अशुद्ध है । बहुरि जब कालपाय क्रोधादिक मिटैगे अर जानपनाकै मन इंद्रियका आधीनपना मिटैगा, तब केवल ज्ञानस्वरूप आत्मा शुद्ध होगा । ऐसैं ही बुद्धि अहंकारादिक भी जानि लेने । जातैं मन अर बुद्ध्यादिक एकार्थ हैं । अर अहंकारादिक हैं ते काम क्रोधादिकवत् उपाधिक भाव हैं । इनकों आपतैं भिन्न जानना भ्रम है । इनकों अपने जानि उपाधिक भाव-

निके अभाव करनेका उद्यम करना योग्य है। बहुरि जिनितै  
 इनिका अभाव न होय सकै अर अपनी महंतता चाहैं ते जीव  
 अपने इन भावनिकों न ठहराय स्वच्छंद प्रवर्तै हैं। काम क्रोधा-  
 दिक भावनिकों बधाय विषयसामग्रीविषै वा हिंसादिकार्यनिविषै  
 तत्पर हो हैं। बहुरि अहंकारादिकका त्यागकों भी अन्यथा मानै  
 हैं। सर्वकों परब्रह्म मानना कहीं आपा न मानना ताकों अहंका-  
 रका त्याग बतावै सो मिथ्या है। जातै कोई आप है कि  
 नाही। जो है तौ आपविषै आपा कैसें न मानिए अर न है तौ  
 सर्वकों ब्रह्म कौन मानै है। तातै शरीरादि परविषै अहंबुद्धि न  
करनी। तहां करता न होना सो अहंकारका त्याग है। आपविषै  
अहंबुद्धि करनेका दोष नाही। बहुरि सर्वकों समान जानना कोई-  
 विषै भेद न करना ताकों राग द्वेषका त्याग बतावै हैं सो भी  
 मिथ्या है। जातै सर्व पदार्थ समान नाही हैं। कोई चेतन हैं कोई  
 अचेतन हैं कोई कैसा है कोई कैसा है। तिनिकों समान कैसें  
 मानिए। तातै परद्रव्यनिकों इष्ट अनिष्ट न मानना सो रागद्वेषका  
 त्याग है। पदार्थनिका विशेष जाननेमें तौ किछू दोष है नाही।  
 ऐसें ही अन्य मोक्षमार्गरूप भावनिकी अन्यथा कल्पना करै हैं।  
 बहुरि ऐसी कल्पनाकरि कुशील सेवै हैं अभक्ष्य भस्म हैं वर्णादि  
 भेद नाही करै हैं हीन क्रिया आचरै हैं इत्यादि विपरीतरूप  
 प्रवर्तै हैं। जब कोऊ पूछै तब कहै हैं, यह तौ शरीरका धर्म है  
 अथवा जैसी प्रालब्धि है तैसें होय है अथवा जैसें ईश्वरकी इच्छा  
 हो है तैसें हो है। हमकों तौ विकल्प न करना। सो देखो आप  
 जानि जानि प्रवर्तै ताकों तौ शरीरका धर्म बतावै। आप उद्यमी

होय कार्य करै ताकौं प्रालब्धि कहै । आप इच्छाकरि सेवै ताकौं ईश्वरकी इच्छा बतावै । विकल्प करै अरु कहै हमकौं तौ विकल्प न करना । सो धर्मका आश्रय लेय विषयकषाय सेवने तातैं ऐसी झंठी युक्ति बनावै हैं । जो अपने परिणाम किछू भी न मिलावै तौ हम याका कर्त्तव्य न मानै । जैसे आप ध्यान धरैं तिष्ठै अरु कोऊ अपने ऊपरि बल्ल गेरि आवै तहां आप किछू सुखी न भया तहां तौ ताका कर्त्तव्य नाहीं सो सांच, अरु आप बल्लकौं अंगीकारकरि पहरै अपनी शीतादिक वेदना मिटाय सुखी होय तहां जो अपना कर्त्तव्य न मानै सो कैसें वनै । बहुरि कुशील सेवना अभक्ष्य भक्षणा इत्यादि कार्य तौ परिणाम मिले विना होते ही नाहीं । तहां अपना कर्त्तव्य कैसें न मानिए । तातैं जो काम क्रोधादिका अभाव ही भया होय तौ तहां किसी क्रियानिविधै प्रवृत्ति संभवै ही नाहीं । अरु जो कामक्रोधादि पाईए है तौ जैसे ए भाव थोरे हांय तैसें प्रवृत्ति करनी । स्वच्छंद होय इनिकौं बधावना युक्त नाहीं । बहुरि केई जीव पवनादिकका साधनकरि आपकौं ज्ञानी मानै हैं । तहां इडा पिंगला सुपुष्णारूप नासिकाद्वारकरि पवन निकसै, तहां वर्णादिक भेदानितैं पवनहीकौं पृथ्वी तत्त्वादिकरूप कल्पना करै हैं । ताका विज्ञानकरि किछू साधनतैं निमित्तका ज्ञान होय तातैं जगतकौं इष्ट अनिष्ट बतावै आप महंत कहावै सो यह तौ लौकिक कार्य है किछू मोक्षमार्ग नाहीं । जीवनिकौं इष्ट अनिष्ट बताय उनकै राग द्वेष बधावै अरु अपनै मान लोभादिक निपजावै यामैं कहा सिद्धि है । बहुरि प्राणायामादिका साधनकरि पवनकौं चद्राय समाधि लगाई कहैं, सो यह तौ जैसें नट साधनतैं हस्तादिक क्रिया करै तैसें

यहां भी साधनतैं पवनकरि क्रिया करी । हस्तादिक अर पवन यह तौ शरीरहीके अंग हैं । इनिके साधनतैं आत्महित कैसैं सधै । बहुरि तू कहैगा—तहां मनका विकल्प मिटै है सुख उपजै है यमकै वशीभूतपना न हो है सो यह मिथ्या है । जैसे निद्राविषै चेतनाकी प्रवृत्ति मिटै है तैसें पवन साधनतैं यहां चेतनाकी प्रवृत्ति मिटै है । तहां मनकौं रोकि राख्या है किछू वासना तौ मिटी नाहीं । तातैं मनका विकल्प मिथ्या न कहिए । अर चेतनाविना सुख कौन भोगवै है । तातैं सुख उपज्या न कहिए । अर इस साधनवाले तौ इस क्षेत्रविषै भए हैं तिनिविषै कोई अमर दीखता नाहीं । अभि ल्याए ताका मरण होता दीखै है तातैं यमकै वशीभूत नाहीं यह झूठी कल्पना है । बहुरि जहां साधनविषै किछू चेतना रहै अर तहां साधनतैं शब्द सुनै, ताकौं अनहद शब्द बतावैं । सो जैसे वीणादिकके शब्द सुननेतैं सुख मानना तैसें तिसके सुननेतैं सुख मानना है । यह तौ विषयपोषण भया परमार्थ तौ किछू नाहीं ठहस्या । बहुरि पवनके निकसनै पैठनैविषै 'सोहं' ऐसे शब्दकी कल्पनाकरि ताकौं 'अजपा जाप' कहै हैं । सो जैसे तीतरके शब्दविषै 'तू ही' शब्दकी कल्पना करै हैं किछू तीतर अर्थ अवधारि ऐसा शब्द कहता नाहीं । तैसें यहां 'सोहं' शब्दकी कल्पना है । किछू पवन अर्थ अवधारि ऐसा शब्द कहता नाहीं । बहुरि शब्दके जपने सुननेतैं ही तौ किछू फलप्राप्ति नाहीं । अर्थ अवधारे फल-प्राप्ति हो है । सो 'सोहं' शब्दका तौ यह अर्थ है 'सो हूं छूं' यहां ऐसी अपेक्षा चाहिए है, 'सो' कौन? तब ताका निर्णय क्रिया चाहिए । जातैं तत् शब्दकै अर यत् शब्दकै नित्यसंबंध है । तातैं वस्तुका



निर्णयकरि ताविषै अहंबुद्धि धारने विषै 'सोहं' शब्द बनै। तहां भी आपकौ आप अनुभवै तहां तौ 'सोहं' शब्द संभवै नाहीं। परकौ अपने स्वरूप बतावनेविषै 'सोहं' शब्द संभवै है। जैसे पुरुष आपकौ आप जानै, तहां 'सो हूं हूं' ऐसा काहेकौ विचारै। कोई अन्यजीव आपकौ न पहचानता होय अर कोई अपना लक्षण न पहचानता होय, तब वाकौ कहिए 'जो ऐसा है सो मैं हूं' तैसें ही यहां जानना। बहुरि केई ललाट भंवारा नासिकाके अग्रभाग देखनेका साधनकरि त्रिकुटी आदिका ध्यान भया कहि परमार्थ मानै, सो नेत्रकी पूतरी फिरे मूर्त्तिक वस्तु देखी, यामें कहा सिद्धि है। बहुरि ऐसे साधननिर्तै किंचित् अतीत अनागतादिकका ज्ञान होय वा वचनसिद्धि होय वा पृथ्वी आकाशादिविषै गमनादिककी शक्ति होय वा शरीरविषै आरोग्यादिक होय तौ ए तौ सर्व लौकिक कार्य हैं। देवादिककै स्वयमेव ऐसी ही शक्ति पाइए है। इनिर्तै किछु अपना भला तौ होता नाहीं, भला तौ विषयकषायकी वासना मिटे होय। सो ए तौ विषयकषाय पोषनेके उपाय हैं। तातैं ए सर्व साधन किछु हितकारी है नाहीं। इनिविषै कष्ट बहुत है मरणादि पर्यंत होय अर हित सधै नाहीं। तातैं ज्ञानी ऐसा खेद न करै है। कषायी जीव ही ऐसे साधनविषै लागै हैं। बहुरि काहूकौ बहुत तपश्चरणादिककरि मोक्षका साधन कठिन बतावै हैं काहूकौ सुगम-पनै ही मोक्षभया कहै। उद्धवादिककौ परम भक्त कहै तिनकौ तौ तपका उपदेश दिया कहै अर वेद्यादिककै विना परिणाम केवल नामादिकहीतैं तिरना बतावै किछु थल है नाहीं। ऐसें मोक्षमार्गकौ अन्यथा प्ररूपै हैं।

बहुरि मोक्षस्वरूपकों भी अन्यथा प्ररूपै हैं । तहां मोक्ष अनेक प्रकार बतावै हैं । एक तौ मोक्ष ऐसा कहै हैं—जो वैकुण्ठधामविषै ठाकुर ठकुरानीसहित नानाभोगविलास करै हैं तहां जाय प्राप्त होय अर तिनिकी टहल किया करै सो मोक्ष है । सो यह तौ विरुद्ध है । प्रथम तौ ठाकुर भी संसारीवत् विषयासक्त होय रखा है । तौ जैसा राजादिक हैं तैसा ही ठाकुर भया । बहुरि अन्य पासि टहल करावनी हुई तब ठाकुरकै पराधीनतापना भया । बहुरि यह मोक्षकों पाय तहां टहल किया करै तौ जैसे राजाकी चाकरी करनी तैसें यह भी चाकरी भई । तहां पराधीन भए सुख कैसें होय । यह भी बनै नाहीं ।

बहुरि एक मोक्ष ऐसा कहै हैं—ईश्वरकै समान आप हो है सो भी मिथ्या है । जो उनकै समान और भी जुदा हो है तौ बहुत ईश्वर भए लोकका कर्ता हर्ता कौन ठहरै । भिन्न २ इच्छा भए परस्पर विरोध होय । एक ही है तौ समानना न भई । न्यून है ताकै नीचापनेकरि उच्चता होनेकी आकुलता रही तब सुखी कैसें होय । जैसे छोटा राजा बड़ा राजा संसारविषै हो हैं तैसें छोटा बड़ा ईश्वर भी मुक्तिविषै भया सो बनै नाहीं ।

बहुरि एक मोक्ष ऐसा कहै हैं—जो वैकुण्ठविषै दीपककीसी ज्योति है । तहां ज्योतिविषै ज्योति जाय मिलै है । सो यह भी मिथ्या है । दीपककी ज्योति तौ मूर्त्तिक अचेतन है, ऐसी ज्योति तहां कैसें संभवै । बहुरि ज्योतिमें ज्योति मिले यह ज्योति रहै है कि विनसि जाय है । जो रहै है तौ ज्योति बधती जायगी । तब ज्योतिविषै हीनाधिकपना होगा । अर विनसि जाय है तौ आपकी

सत्ता नाश होय ऐसा कार्य उपादेय कैसें मानिए । ताँतै ऐसें भी बनै नाहीं ।

बहुरि एक मोक्ष ऐसा कहै हैं—जो आत्मा ब्रह्म ही है मायाका आवरण मिटे मुक्ति ही है । सो यह भी मिथ्या है । यह मायाका आवरणसहित था तब ब्रह्मसौं एक था कि जुदा था । जो एक था तौ ब्रह्म ही मायारूप भया अर जुदा था तौ माया दूरि भए ब्रह्मविषै मिलै है तब याका अस्तित्व रहै है कि नाहीं रहै है, जो रहै है तौ सर्वज्ञकों तौ याका अस्तित्व जुदा भासै तब संयोग होनेतैं मिल्या कहो परंतु परमार्थतैं तौ मिल्या नाहीं । बहुरि अस्तित्व नाहीं रहै है तौ आपका अभाव होना कौन चाहै ताँतै यह भी न बनै ।

बहुरि एक प्रकार मोक्षका स्वरूप ऐसा भी केई कहै हैं—जो बुद्ध्यादिकका नाश भए मोक्ष हो है । सो शरीरके अंगभूत मन इंद्रिय तिनिकै आधीन ज्ञान न रखा । ऐसं कहना तौ काम क्रोधादिक दूरि भए बनै है अर तहां चेतनताका भी अभाव भया मानिए तौ पापाणादि समान जड़ अवस्थाकों कैसें भली मानिए । बहुरि भला साधन करतैं तौ जानपना बवै है भला साधन किए जानपनेका अभाव होना कैसें मानिए । बहुरि लोकविषै ज्ञानकी महंततातैं जड़पनाकी महंतता नाहीं ताँतै यह भी बनै नाहीं । ऐसें ही अनेकप्रकार कल्पनाकरि मोक्षकों बतावैं सो किछू यथार्थ तौ जानै नाहीं संसार अवस्थाकी मुक्ति अवस्थाविषै कल्पनाकरि अपनी इच्छा अनुसारि बकै हैं । याप्रकार वेदांतादि मतनिविषै अन्यथा निरूपण करै हैं ।

बहुरि ऐसें ही मुसलमानोंके मतविषै अन्यथा निरूपण करिए

है। जैसे वै ब्रह्मकों सर्वव्यापी निरंजन सर्वका कर्ता हर्ता मानै हैं तैसें ए खुदाकों मानै हैं। बहुरि जैसे वै अवतार भए मानै है तैसें ए पैगंबर भए मानै हैं। जैसे वै पुण्य पापका लेखा लेना यथा-योग्य दंडादिक देना ठहरावै हैं तैसें ए खुदाकै ठहरावै हैं। बहुरि जैसे वै गऊ आदिकौ पूज्य कहै हैं, तैसें ए सूकर आदिकों कहै हैं। ए सब तिर्यचादिक हैं। बहुरि जैसे वै ईश्वरकी भक्तितैं मुक्ति कहै हैं तैसें ए खुदाकी भक्तितैं कहै हैं। बहुरि वै कहीं दया पोषै कहीं हिंसा पोषै, तैसें ए भी कहीं मिह्र करना पोषै रहम कहीं जिबहकरना पोषै हैं। बहुरि जैसे वै कहीं तपश्चरण करना पोषै कहीं विषयसेवना पोषै तैसें ही ए भी पोषै हैं। बहुरि जैसे वै कहीं मांस मदिरा शिकार आदिका निषेध करै कहीं उत्तम पुरुषनिकरि तिनिका अंगीकार करना बतावै तैसें ए भी तिनिका निषेध वा अंगीकार करना बतावै हैं। ऐसैं अनेकप्रकारकरि समानता पाइए है। यद्यपि नामादिक और और हैं तथापि प्रयोजनभूत अर्थकी एकता पाइए है। बहुरि ईश्वर खुदा आदि मूल-श्रद्धानकी तौ एकता है अर उत्तरश्रद्धानविषै घने ही विशेष हैं। तहां उनकें भी विपरीतरूप विषयकपाय हिंसादि पापके पोषक प्रत्यक्षादि प्रमाणतैं विरुद्ध निरूपण करै हैं। तातैं मुसलमानोंका मत महाविपरीतरूप जानना। याप्रकार इस क्षेत्र कालविषै जिनिकी प्रचुर प्रवृत्ति है ताका मिथ्यापना दिखाया। यहां कोऊ कहै जो ए मत मिथ्या हैं तौ बड़े राजादिक वा बड़े विद्यावान् इनि मतनिविषै कैसें प्रवर्तै हैं, ताका समाधान,—

जीवनिकै मिथ्यावासना अनादितैं है सो इनिविषै मिथ्यात्वहीका

पोषण है। बहुरि जीवनिकै विषयकषायरूप कार्यनिकी चाहि वरतै है सो इनिकै विषयकषायरूप कार्यनिहीका पोषण है। बहुरि राजादिकोंका विद्यावानोंका ऐसे धर्मविषै विषयकषायरूप प्रयोजन सिद्ध होय है। बहुरि जीव तौ लोकनिघपनाकौ भी उलंघि वा पाप भी जानि जिन कार्यनिकौ किया चाहै तिनि कार्यनिकौ करतै धर्म बतावै तौ ऐसे धर्मविषै कौन न लागै। तातै इनि धर्मनिकी विशेष प्रवृत्ति है। बहुरि कदाचित् तू कहैगा,—इनि धर्मनिविषै विरागता दया इत्यादि भी तौ कहै हैं, सो जैसे झोल दिए विना खोटा द्रव्य चालै नाही तैसे सांच मिलाए विना झूठ चालै नाही। परंतु सर्वके हित प्रयोजनविषै विषयकषायका ही पोषण किया है। जैसे गीताविषै उपदेश देय गारि (युद्ध) करावनेका ही प्रयोजन प्रगट किया। वेदान्तविषै शुद्ध निरूपणकरि स्वच्छंद होनेका प्रयोजन दिखाया। ऐसे ही जानना। बहुरि यह काल तौ निकृष्ट है सो इसविषै तौ निकृष्ट धर्महीकी प्रवृत्ति विशेष हो है। देखो, इस कालविषै मुसलमान बहुत प्रधान हो गए। हिंदू घटि गए। हिंदूनिविषै और बधि गए जैनी घटि गए। सो यह कालका दोष है। ऐसे यहां अवार मिथ्याधर्मकी प्रवृत्ति बहुत पाईए है। अब पंडितपनाके बलकरि कल्पितयुक्तिकरि नाना मत स्थापित भए हैं तिनिविषै जे तत्त्वादिक मानिए है तिनिका निरूपण कीजिए है। तहां सांख्यमतविषै पच्चीस तत्त्व माने हैं सो कहिए है,—

सत्त्व रजः तमः यह तीन गुण कहै हैं। तहां सत्त्वकरि प्रसाद हो है रजोगुणकरि चित्तकी चंचलता हो है तमोगुणकरि मूढ़ता

हो है इत्यादि लक्षण कहै हैं । इनिरूप अवस्था ताका नाम प्रकृति है । बहुरि तिसतैं बुद्धि उपजै है याहीका नाम महत्तत्त्व है । बहुरि तिसतैं अहंकार निपजै है । बहुरि तिसतैं सोलहमात्रा हो हैं । तहां पांच तौ ज्ञानइंद्रिय हो हैं—स्पर्शन, रसन, घ्राण, चक्षु, श्रोत्र । बहुरि एक मन हो है । बहुरि पांच कर्मेन्द्रिय हो हैं—वचन, चरन, हस्त, गुदा, लिंग । बहुरि पांच तन्मात्रा हो हैं—रूप, रस, गंध, स्पर्श, शब्द । बहुरि रूपतैं अग्नि, रसतैं जल, गंधतैं पृथ्वी, स्पर्शतैं पवन, शब्दतैं आकाश, ऐसैं भया कहै हैं । ऐसैं चौईस तत्त्व तौ प्रकृतिस्वरूप हैं । इनितैं भिन्न निर्गुण कर्ता भोक्ता एक पुरुष है । ऐसैं पचीस तत्त्व कहै हैं । सो ए कल्पित हैं । जातैं राजसादिक गुण आश्रयविना कैसें होंय । इनिका आश्रय तौ चेतनद्रव्य ही संभवै है । बहुरि बुद्धि इनितैं भई कहैं सो बुद्धि नाम तौ ज्ञानका है । कोई ज्ञानगुणका धारी पदार्थविषै ए होते देखिए है । इनितैं ज्ञान भया कैसें मानिए । कोई कहै,—बुद्धि जुदी है ज्ञान जुदा है तौ मन तौ आगैं षोडशमात्राविषै कष्टा अर ज्ञान जुदा कहोगे तौ बुद्धि किसका नाम ठहरैगा । बहुरि तिसतैं अहंकार भया कष्टा, सो परवस्तुविषै 'मैं करूं हूं' ऐसैं माननेका नाम अहंकार है । साक्षीभूत जाननेकरि तौ अहंकार होता नाहीं । ज्ञानकरि उपज्या कैसें कहिए है । बहुरि अहंकारकरि षोडश मात्रा उपजी कहीं । तिनिविषै पांच ज्ञानइंद्रिय कहीं । सो शरीरविषै नेत्रादि आकाररूप द्रव्येन्द्रिय हैं सो तौ पृथ्वी आदिवत् देखिए है । अन्य वर्णादिकके जाननेरूप भावइंद्रिय हैं सो ज्ञानरूप हैं । अहंकारका कहा प्रयोजन है । अहंकार बुद्धिरहित कोऊ काहूकूं दीखै है । तहां

अहंकार निपजना कैसें संभवै । बहुरि मन कखा, सो इंद्रियवत् ही मन है । जातैं द्रव्यमन शरीररूप है, भावमन ज्ञानरूप है । बहुरि पांच कर्मेन्द्रिय कहीं, सो ए तौ शरीरके अंग हैं । मूर्त्तिक हैं । अहंकार अमूर्त्तिकतैं इनिका उपजना कैसें मानिए । बहुरि कर्मइंद्रिय पांच ही तौ नाहीं । शरीरके सर्व अंग कार्यकारी हैं । बहुरि वर्णन तौ सर्व जीवाश्रित है, मनुष्याश्रित ही तौ नाहीं, तातैं सूँड़ि पूँछ इत्यादि अंग भी कर्मइंद्रिय हैं । पांचहीकी संख्या कैसें कहिए है । बहुरि स्पर्शादिक पांच तन्मात्रा कहीं, सो रूपादि किछू जुदे वस्तु नाहीं ए तौ परमाणूनि सौं तन्मय गुण हैं । ए जुदे कैसें निपजैं । बहुरि अहंकार तौ अमूर्त्तिक जीवका परिणाम है । तातैं ए मूर्त्तिकगुण कैसें निपजे मानिए । बहुरि इनि पांचनितैं अभि आदि निपजे कहैं, सो प्रत्यक्ष झूठ है । रूपादिक अग्न्यादिककै तौ सहभूत गुणगुणी संबंध है । कहने मात्र भिन्न हैं वस्तुविषै भेद नाहीं । किसीप्रकार कोऊ भिन्न होता भासै नाहीं, कहने मात्रकरि भेद उपजाईए है । तातैं रूपादिकरि अग्न्यादि कैसें उपजे मानिए । कहनेविषै भी गुणीविषै गुण हैं । गुणतैं गुणी निपज्या कैसें मानिए । बहुरि इनितैं भिन्न एक पुरुष कहै हैं, सो वाका स्वरूप अवक्तव्य कहि प्रच्युत्तर नाहीं करते । जो पूछिए कि कैसा है, कहा है, कैसें कर्त्ता हर्त्ता है, सो बतावते नाहीं । जो बतावैं तौ ताहीमैं विचार किए अन्यथापनौ भासै । ऐसैं सांख्यमतकरि कल्पित तत्त्व मिथ्या जानने । बहुरि पुरुषकों प्रकृतितैं भिन्न जाननेका नाम मोक्षमार्ग कहै हैं । सो प्रथम तौ प्रकृतिपुरुष कोई है ही नाहीं । बहुरि केवल जानेहीतैं तौ सिद्धि होती नाहीं ।

जानिकरि रागादिक मिटाए सिद्धि होय, सो ऐसैं ज्ञाने किछु रागादिक घटै नाहीं । प्रकृतिका कर्त्तव्य माने आप अकर्त्ता रहै, तब काहेकौं आप रागादिक घटावै । तातैं यह मोक्षमार्ग नाहीं है । बहुरि प्रकृति पुरुषका जुदा होना मोक्ष कहै हैं । सो पञ्चीस तत्त्वनिविषै चौईस तत्त्व तौ प्रकृतिसंबंधी कखा, एक पुरुष भिन्न कखा । सो ए तौ जुदे ही हैं अर जीव कोई पदार्थ पञ्चीस तत्त्वनिविषै कखा ही नाहीं । अर पुरुषहीकौं प्रकृतिसंयोग भए जीवसंज्ञा हो है, तौ पुरुष न्यारे न्यारे प्रकृतिसहित हैं पीछैं साधनकरि कोई पुरुष रहित हो हैं, ऐसा सिद्ध भया—पुरुष एक न ठहस्या । बहुरि प्रकृति पुरुषकी भूलि है कि, कोई व्यंतरीवत् जुदी ही है सो जीवकौं आनि लागै है । जो याकी भूलि है, तौ प्रकृतितैं इंद्रियादिक तत्त्व उपजे कैसें मानिए । अर जुदी है तौ वै भी एक वस्तु है सर्व कर्त्तव्य वाका ठहस्या । पुरुषका किछु कर्त्तव्य रखा ही नाहीं काहेकौं उपदेश दीजिए है । ऐसैं यह मोक्षमार्गपना मानना मिथ्या है । बहुरि तहां प्रत्यक्ष अनुमान आगम ए तीन प्रमाण कहै हैं, सो तिनिका सत्य असत्यका निर्णय जैनके न्याय ग्रंथनितैं जानना । बहुरि इस सांख्यमतविषै कोई ईश्वरकौं न मानै हैं । कोई एक पुरुषकौं ईश्वर मानै हैं । कोई शिवकौं देव मानै हैं । कोई नारायणकौं मानै हैं । अपनी इच्छा अनुसार कल्पना करै हैं किछु निश्चय है नाहीं । बहुरि इस मतविषै केई जटा धारै हैं, केई चोटी राखैं हैं, केई मुंडित हो हैं, केई काथे वस्त्र पहरैं हैं, इत्यादि अनेकप्रकार भेष धारि तत्त्वज्ञानका आश्रयकरि महंत कहावैं हैं । ऐसैं सांख्यमतका निरूपण किया ।



बहुरि शिवमतविषै दोय भेद हैं—नैयायिक वैशेषिक । तहां नैयायिकविषै सोलह तत्त्व कहै हैं । प्रमाण, प्रमेय, संशय, प्रयोजन, दृष्टांत, सिद्धांत, अवयव, तर्क, निर्णय, वाद, जल्प, वितंडा, हेत्वाभास, छल, जाति, निग्रहस्थान । तहां प्रमाण च्यार प्रकार कहै हैं । प्रत्यक्ष, अनुमान, शब्द, उपमा । बहुरि आत्मा, देह, अर्थ, बुद्धि इत्यादि प्रमेय कहै हैं । बहुरि 'यह कहा है' ताका नाम संशय है । जाकै अर्थि प्रवृत्ति होय, सो प्रयोजन है । जाकौं वादी प्रतिवादी मानै सो दृष्टांत है । दृष्टांतकरि जाकौं ठहराईए सो सिद्धांत है । बहुरि अनुमानके प्रतिज्ञा आदि पंच-अंग ते अवयव हैं । संशय दूर भए किसी विचारतैं ठीक होय, सो तर्क है । पीछैं प्रतीतिरूप जानना सो निर्णय है । आचार्य शिष्यकै पक्ष प्रतिपक्षकरि अभ्यास सो वाद है । जाननेकी इच्छा-रूप कथाविषै जो छल जाति आदि दूषण सो जल्प है । प्रतिपक्ष-रहित वाद सो वितंडा है । सांचे हेतु नाही, ते असिद्ध आदि भेद लिए हेत्वाभास हैं । छललिए वचन सो छल है । सांचे दूषण नाही ऐसे दूषणाभास सो जाति है । जाकरि परवादीका निग्रह होय सो निग्रहस्थान है । या प्रकार संशयादि तत्त्व कहे, सो ए कोई वस्तुस्वरूप तौ तत्त्व हैं नाही । ज्ञानके निर्णय करनेकौं वा वादकरि पांडित्य प्रगट करनेकौं कारणभूत विचाररूप तत्त्व कहे, सो इनितैं परमार्थ कार्य कैसें होय । काम क्रोधादि भावकौं मेटि निराकुल होना सो कार्य है । सो तौ यहां प्रयोजन किछू दिखाया ही नाही । पंडिताईकी नाना युक्ति बनाई सो यह भी एक चातुर्य्य है, तातैं ये तत्त्वभूत नाही ।

बहुरि कहोगे इनिकौ जाने विना प्रयोजनभूत तत्त्वका निर्णय न करि सकै, तातैं ए तत्त्व कहे हैं। सो ऐसैं परंपरा तौ व्याकरणवाले भी कहै हैं। व्याकरण पढ़ें अर्थ निर्णय होय, वा भोजनादिकके अधिकारी भी कहै हैं कि भोजन किए शरीरकी स्थिरता भए तत्त्वनिर्णय करनेकौं समर्थ होय, सो ऐसी युक्ति कार्यकारी नाही। बहुरि जो कहोगे, व्याकरण भोजनादिक तौ अवश्य तत्त्वज्ञानकौं कारण नाही, लौकिक कार्यसाधनेकौं कारण हैं। सो जैसे ए हैं तैसे ही तुम तत्त्व कहे, सो भी लौकिक कार्य साधनेकौं कारण हैं। जैसे इंद्रियादिकके जाननेकौं प्रत्यक्षादि प्रमाण कहे वा स्थाणु पुरुषादिविषै संशयादिकका निरूपण किया। तातैं जिनिकौं जाने अवश्य काम क्रोधादि दूरि होय निराकुलता उपजै, वै ही तत्त्व कार्यकारी हैं। बहुरि कहोगे, जो प्रमेय तत्त्वविषै आत्मादिकका निर्णय हो है सो कार्यकारी है। सो प्रमेय तौ सर्व ही वस्तु हैं। प्रमितिका विषय नाही ऐसा कोई भी नाही, तातैं प्रमेय तत्त्व काहेकौं कखा। आत्मा आदि तत्त्व कहने थे। बहुरि आत्मादिकका भी स्वरूप अन्यथा प्ररूपण किया, सो पक्षपातरहित विचार किए भासै है। जैसे आत्माके भेद दोय कहै हैं—परमात्मा जीवात्मा। तहां परमात्माकौं सर्वका कर्ता बतावै हैं। तहां ऐसा अनुमान करै हैं जो यह जगत् कर्ताकरि निपज्या है, जातैं यह कार्य है। जो कार्य है सो कर्ताकरि निपज्या है। जैसे घटादिक। सो यह अनुमानाभास है। जातैं यहां अनुमानांतर संभवै है। यह जगत् सर्व कर्ताकरि निपज्या नाही। जातैं याविषै केई अकार्यरूप पदार्थ भी हैं। जो अकार्य है, सो कर्ताकरि निपज्या नाही। जैसे

सूर्यविवादिक् । जातैं अनेक पदार्थनिका समुदायरूप जगत् तिस-  
विषै कोई पदार्थ कृत्रिम हैं सो मनुष्यादिककरि किए होय हैं ।  
कोई अकृत्रिम हैं सो ताका कर्त्ता नाहीं । यह प्रत्यक्षादि प्रमाणके  
अगोचर है । तातैं ईश्वरकौं कर्त्ता मानना मिथ्या है । बहुरि  
जीवात्माकौं प्रतिशरीर भिन्न कहै हैं । सो यह सत्य है । परंतु  
मुक्त भए पीछैं भी भिन्न ही मानना योग्य है । विशेष पूर्व कखा  
ही है । ऐसैं ही अन्य तत्त्वनिकौं मिथ्या प्ररूपे हैं । बहुरि  
प्रमाणादिकका भी स्वरूप अन्यथा कल्पै हैं, सो जैनग्रंथनितैं  
परीक्षा किए भासै है । ऐसैं नैयायिकमतविषै कहे तत्त्व कल्पित  
जानने ।

बहुरि वैशेषिकमतविषै छह तत्त्व कहे हैं । द्रव्य, गुण, कर्म,  
सामान्य, विशेष, समवाय । तहां द्रव्य नवप्रकार पृथ्वी, जल,  
अग्नि, पवन, आकाश, काल, दिशा, आत्मा, मन । तहां पृथ्वी  
जल अग्निके परमाणु भिन्न भिन्न हैं । ते परमाणू नित्य हैं ।  
तिनिकरि कार्यरूप पृथ्वी हो है सो अनित्य है । सो ऐसा कहना  
प्रत्यक्षादितैं विरुद्ध है । ईधनरूप पृथ्वी आदिके परमाणु अग्निरूप  
होते देखिए है । अग्निके परमाणु राखरूप पृथ्वी होती देखिए है ।  
जलके परमाणु मुक्ताफल (मोती) रूप पृथ्वी होते देखिए है । बहुरि  
जो तू कहैगा, वै परमाणु जाते रहै हैं और ही परमाणु तिनिरूप  
हो हैं सो प्रत्यक्षकौं असत्य ठहरावै है । कोई ऐसी प्रबलयुक्ति  
कहै तौ ऐसैं ही मानै, परंतु केवल कहतैं ही तौ ऐसैं ठहरै नाहीं ।  
जातैं सब परमाणूनिकी एक पुद्गलरूप जाति है, सो पृथ्वी आदि  
अनेक अवस्थारूप परिणमै है । बहुरि इन पृथ्वी आदिकका कहीं

जुदा शरीर ठहरावै है, सो मिथ्या ही है। जातैं बाका कोई प्रमाण नहीं। अर पृथ्वी आदि तौ परमाणुपिंड हैं। इनिका शरीर अन्यत्र ए अन्यत्र ऐसा संभवै नहीं। तातैं यह मिथ्या है। बहुरि जहां पदार्थ अटकै नहीं, ऐसी जो पोलि ताकौं आकाश कहै हैं। क्षण पल आदिकौं काल कहै हैं। सो ए दोन्युं ही अवस्तु हैं। सत्तारूप ए पदार्थ नहीं। पदार्थनिका क्षेत्रपरिणमनादिकका पूर्वापरविचार करनेके अर्थि इनिकी कल्पना कीजिए है। बहुरि दिशा किछू हैं नहीं। आकाशविषै खंड कल्पनाकरि दिशा मानिए है। बहुरि आत्मा दोय प्रकार कहै हैं, सो पूवैं निरूपण किया ही हैं। बहुरि मन कोई जुदा पदार्थ नहीं। भावमन तौ ज्ञानरूप है, सो आत्माका स्वरूप है। द्रव्यमन परमाणूनिका पिंड है, सो शरीरका अंग है। ऐसैं ये द्रव्य कल्पित जानने। बहुरि गुण चोईस कहै हैं—स्पर्श, रस, गंध, वर्ण, शब्द, संख्या, विभाग, संयोग, परिमाण, पृथक्त्व, परत्व, अपरत्व, बुद्धि, सुख, दुःख, इच्छा, धर्म, अधर्म, प्रयत्न, संस्कार, द्वेष, स्नेह, गुरुत्व, द्रव्यत्व। सो इनिविषै स्पर्शादिक गुण तौ परमाणूनिविषै पाईए है। परंतु पृथ्वीकौं गंधवती ही कहनी, जलकौं शीतस्पर्शवान् कहना इत्यादि मिथ्या है। जातैं कोई पृथ्वीविषै गंधकी मुग्यता न भासै है। कोई जल उष्ण देखिए है। इत्यादि प्रत्यक्षादितैं विरुद्ध है। बहुरि शब्दकौं आकाशका गुण कहै, सो भी मिथ्या है। शब्द भीति इत्यादितैं रुकै है, तातैं मूर्त्तिक है। आकाश अमूर्त्तिक सर्वव्यापी है। भीतिविषै आकाश रहै शब्दगुण न प्रवेशकरि सकै, यह कैसैं बनै। बहुरि संख्यादिक हैं सो वस्तुविषै तौ किछू हैं नहीं, अन्य

पदार्थ अपेक्षा अन्य पदार्थके हीनाधिक जाननेकों अपने ज्ञानविषै संख्यादिककी कल्पनाकरि विचार कीजिए है । बहुरि बुद्धिआदि हैं, सो आत्माका परिणमन है । तहां बुद्धि नाम ज्ञानका है तौ आत्माका गुण है अर मनका नाम है तौ द्रव्यनिविषै कखा ही था, यहां गुण काहेकों कखा । बहुरि मुखादिक हैं, सो आत्माविषै कदाचित् पाईए है तातैं आत्माके लक्षणभूत तौ ए गुण हैं नाहीं, अव्याप्तनेतैं लक्षणाभास हैं । बहुरि स्नेहादि पुद्गलपरमाणुविषै पाईए है, सो स्निग्धगुरुत्व इत्यादि तौ स्पर्शन इंद्रियकरि जानिए, तातैं स्पर्शगुणविषै गर्भित भए जुदे काहेकों कहे । बहुरि द्रव्यत्वगुण जलविषै कखा, सो ऐसैं तौ अग्निआदिविषै ऊर्ध्वगमनत्व आदि पाईए है । कै तौ सर्व कहने थे, कै सामान्यविषै गर्भित कहने थे । ऐसैं ए गुण कहे ते भी कल्पित हैं । बहुरि कर्म पांचप्रकार कहैं हैं—उत्क्षेपण, अवक्षेपण, आकुंचन, प्रसारण, गमन । सो ए तौ शरीरकी चेष्टा हैं । इनिकों जुदा कहनेका अर्थ कहा । बहुरि ए-ती ही चेष्टा तौ होती नाहीं, चेष्टा तौ घनी ही प्रकारकी हो हैं । बहुरि जुदी ही इनिकों तत्त्वसंज्ञा कही, सो कै तौ जुदा पदार्थ होय तौ ताको जुदा तत्त्व कहना था, कै काम क्रोधादि मेटनेकों विशेष प्रयोजनभूत होय तौ तत्त्व कहना था, सो दोऊ ही नाहीं । अर ऐसैं ही कहि देना तौ पाषाणादिककी अनेक अवस्था हो हैं सो कखा करौ किछू साध्य नाहीं । बहुरि सामान्य दोय प्रकार है—पर अपर । सो पर तौ सत्तारूप है अपर द्रव्यत्वरूप है । बहुरि नित्यद्रव्यविषै प्रवृत्ति जिनिकी होय ते विशेष हैं । बहुरि अयुत-सिद्धसंबंधका नाम समवाय है । सो सामान्यादिक तौ बहुतनिकों

एकप्रकारकरि वा एकवस्तुविषै भेदकल्पनाकरि वा भेदकल्पना अपेक्षा संबंध माननेकरि अपने विचारहीविषै हो है कोई जुदे पदार्थ तौ नहीं । बहुरि इनिके जाने कामक्रोधादि मेटनेरूप विशेष प्रयोजनकी भी सिद्धि नहीं, तातैं इनिकौं तत्त्व काहेकौं कहे । अर ऐसैं ही तत्त्व कहने थे, तौ प्रमेयत्वादि वस्तुके अनंत-धर्म हैं वा संबंध आधारादिक कारकनिके अनेक प्रकार वस्तुविषै संभवै हैं । कै तौ सर्व कहने थे, कै प्रयोजन जानि कहने थे । तातैं ए सामान्यादिक तत्त्व भी वृथा ही कहे । ऐसैं वैशेषिकनि-करि कहे कल्पित तत्त्व जानने । बहुरि वैशेषिक दोय ही प्रमाण मानै है—प्रत्यक्ष, अनुमान । सो इनिका सत्य असत्यका निर्णय जैनन्यायग्रंथनितैं जानना ।

बहुरि नैयायिक तौ कहै हैं—विषय, इंद्रिय, बुद्धि, शरीर, सुख, दुःख, इनिका अभावतैं आत्माकी स्थिति सो मुक्ति है । अर वैशेषिक कहै हैं—चौईस गुणनिविषै बुद्धि आदि नवगुणनिका अभाव सो मुक्ति है । सो यहां बुद्धिका अभाव कह्या सो बुद्धि नाम ज्ञानका है तौ ज्ञानका अधिकरणपना आत्माका लक्षण कह्या था, अब ज्ञानका अभाव भए लक्षणका अभाव होतैं लक्ष्यका भी अभाव होतैं आत्माकी स्थिति कैसैं रही । अर जो बुद्धि नाम मनका है, तौ भावमन तौ ज्ञानरूप है ही अर द्रव्यमन शरीररूप है सो मुक्त भए द्रव्यमनका संबन्ध छूटै ही छूटै । सो द्रव्यमन जड़ ताका नाम बुद्धि कैसैं होय । बहुरि मनवत् ही इंद्रिय जानने । बहुरि विषयका अभाव होय । सो स्पर्शादि विषयनिका जानना मिटै है, तौ ज्ञान काहेका नाम ठहरैगा । अर तिनि विषयनिका ही अभाव

होगा, तौ लोकका अभाव होयगा । बहुरि सुखका अभाव कखा सो सुखहीके अर्थ उपाय कीजिए है ताका जहां अभाव होय सो उपादेय कैसे होय । बहुरि जो आकुलतामय इंद्रियजनित सुखका तहां अभाव भया कहैं, तौ यह सत्य है । निराकुलता लक्षण अतीन्द्रियसुख तौ तहां संपूर्ण संभवै है तातैं सुखका अभाव नाहीं । बहुरि शरीर दुःख द्वेषादिकका तहां अभाव कहैं सो सत्य ही है । बहुरि शिवमतविषै कर्त्ता निर्गुण ईश्वर शिव है ताकाँ देव मानै हैं । सो याके स्वरूपका अन्यथापना पूर्वोक्त प्रकार जानना । बहुरि यहां भस्मी, कोपीन, जटा, जनेऊ इत्यादि चिन्हसहित भेष हो हैं सो आचारादि भेदतैं च्यार प्रकार हैं—शैव, पाशुपत्, महाव्रती, कालमुख । सो ए रागादि सहित हैं तातैं सुलिंग नाहीं । ऐसैं शिव-मतका निरूपण किया । अब मीमांसक मतका स्वरूप कहिए है—

मीमांसक दोय प्रकार हैं—ब्रह्मवादी कर्मवादी । तहां ब्रह्मवादी तौ सर्व यह ब्रह्म है दूसरा कोऊ नाहीं ऐसा वेदान्तविषै अद्वैत ब्रह्मको निरूपै है । बहुरि आत्माविषै लय होना सो मुक्ति कहै हैं । सो इनिका मिथ्यापना पूर्वे दिखाया है, सो विचारना । अर कर्मवादी क्रिया आचार यज्ञादिक कार्यानिका कर्तव्यपना प्ररूपै हैं, सो इन क्रियानिविषै रागादिकका सद्भाव पाईए है, तातैं ए । रर्थ किछू कार्यकारी नाहीं । बहुरि तहां 'भट्ट' अर 'प्रभाकर' करि करी हुई दोय पद्धति हैं । तहां भट्ट तौ छह प्रमाण मानै है—प्रत्यक्ष, अनुमान, वेद, उपमा, अर्थापत्ति, अभाव । बहुरि प्रभाकर अभाव-विना पांच ही प्रमाण मानै है । सो इनिका सत्यासत्यपना जैन-शास्त्रनितैं जानना । बहुरि तहां षट्कर्मसहित ब्रह्मसूत्रके धारक

शूद्रअन्नादिकके त्यागी ते गृहस्थाश्रम है नाम जिनिका ऐसे भट्ट हैं । बहुरि वेदान्तविषै यज्ञोपवीतरहित विप्रअन्नादिकके ग्राही भागवत् है नाम जिनिका ऐसे च्यारि प्रकार हैं—कुटीचर, बहूदक, हंस, परमहंस । सो ए किछू त्यागकरि संतुष्ट भए हैं, परंतु ज्ञान श्रद्धानका मिथ्यापना अर रागादिकका सद्भाव इनिकै पाईए है । ताँतँ ए भेष कार्यकारी नाहीं ।

बहुरि यहां जैमिनीयमत है, सो ऐसैं कहै है,—

सर्वज्ञदेव कोई है नाहीं । वेदवचन नित्य हैं, तिनितैं यथार्थ निर्णय हो है । ताँतँ पहलैं वेदपाठकरि क्रियाप्रति प्रवर्त्तना सो तौ चोदना सोई है लक्षण जाका ऐसा धर्म ताका साधन करना । जैसैं कहै हैं “स्वःकामोऽग्निं यजेत्” स्वर्गाभिलाषी अग्निकौ पूजे, इत्यादि निरूपण करै हैं । यहां पूछिए है,—शैव, सांख्य, नैयायिकादिक सर्व ही वेदकौ मानैं हैं तुम भी मानो हौ । तुम्हारै अर उन सबनिकै तत्त्वादिनिरूपणविषै परस्पर विरुद्धता पाईए है सो कहा है । जो वेदहीविषै कहीं किछू कहीं किछू निरूपण किया है, तौ वाकी प्रमाणता कैसी रही । अर जो मतवाले ही ऐसैं निरूपण करैं हैं तौ तुम परस्पर झगरि निर्णयकरि एककौ वेदका अनुसारि गन्यकौ वेदतैं पराङ्मुख ठहरावो । सो हमकौ तौ यह भासै है वेदहीविषै पूर्वापरविरुद्धतालिए निरूपण है । तिसतैं ताका अपनी अपनी इच्छा अनुसारि अर्थ ग्रहणकरि जुदे जुदे मतके अधिकारी भए हैं । सो ऐसे, वेदकौ प्रमाण कैसैं कीजिए । बहुरि अग्नि पूजे स्वर्ग होय, सो अग्नि गन्प्यतैं उत्तम कैसैं मानिए प्रत्यक्षविरुद्ध है । बहुरि वह स्वर्गदाता कैसैं होय । ऐसैं ही अन्य वेदवचन प्रमाण-



विरुद्ध हैं। बहुरि वेदविषै ब्रह्म कखा है, सर्वज्ञ कैसें न मानै हैं। इत्यादि प्रकारकरि जैमिनीयमत कल्पित जानना।

अब बौद्धमतका स्वरूप कहिए है,—

बौद्धमतविषै च्यारितत्त्व प्ररूपै हैं। दुःख, आयतन, समुदाय, मार्ग। तहां संसारीकै बंधरूप सो दुःख है। सो पांच प्रकार है—विज्ञान, वेदना, संज्ञा, संस्कार, रूप। तहां रूपादिकका जानना सो विज्ञान है, सुख दुःखका अनुभवना सो वेदना है, मनका जानना सो संज्ञा है, पद्व्या था ताका जानना सो संस्कार है, रूपका धारना सो रूप है। सो यहां विज्ञानादिककौं दुःख कखा सो मिथ्या है। दुःख तौ काम क्रोधादिक हैं। ज्ञान दुःख नाहीं। यह तौ प्रत्यक्ष देखिए हैं। काहूकै ज्ञान थोरा है अर क्रोध लोभादिक बहुत हैं सो दुखी है। काहूकै ज्ञान बहुत है काम क्रोधादि स्तोक हैं वा नाहीं हैं सो सुखी है। तातैं विज्ञानादिक दुःख नाहीं हैं। बहुरि आयतन बारह कहे हैं। पांच तौ इंद्रिय अर तिनिके शब्दादिक पांच विषय, एक मन, एक धर्मायतन। सो ये आयतन किस अर्थि कहे। क्षणिक सबकौं कहै, इनिका कहा प्रयोजन है। बहुरि जातैं रागादिकका कारण निपजै ऐसा आत्मा अर आत्मीय यह है नाम जाका सो समुदाय है। तहां अहरूप आत्मा अर ममरूप आत्मीय जानना, सो क्षणिक माने इनिका भी कहनेका किछू प्रयोजन नाहीं। बहुरि सर्व गंस्कार क्षणिक हैं, ऐसी वासना सो मार्ग है। सो प्रत्यक्ष बहुतकाल-स्थायी केई वस्तु अवलोकिए है। तू कहैगा एक अवस्था न रहै है, तौ यह हम भी मानै हैं। सूक्ष्मपर्याय क्षणस्थायी हैं। बहुरि तिस

वस्तुहीका नाश मानै तौ यह होता न दीसै है हम कैसेँ मानै ।  
 बहुरि बाल वृद्धादि अवस्थाविषै एक आत्माका अस्तित्व भासै है ।  
 जो एक नाहीं है तौ पूर्व उत्तर कार्यका एक कर्त्ता कैसेँ मानै हैं ।  
 जो तू कहैगा संस्कारतैं हैं, तौ संस्कार कौनकै है । जाकै है सो  
 नित्य है कि क्षणिक है । नित्य है तौ सर्व क्षणिक कैसेँ कहै है ।  
 क्षणिक है तौ जाका आधार ही क्षणिक तिस संस्कारकी परंपरा  
 कैसेँ कहै है । बहुरि सर्वक्षणिक भया, तव आप भी क्षणिक भया ।  
 तू ऐसी वासनाको मार्ग कहै है सो इस मार्गका फलकौ आप तौ  
 पावै ही नाहीं काहेकौ इस मार्गविषै प्रवर्त्तै । बहुरि तेरे मतविषै  
 निरर्थक शास्त्र काहेकौ किए । उपदेश तौ किछू कर्त्तव्यकरि फल-  
 पावै तिसकै अर्थ दीजिए है । ऐसेँ यह मार्ग मिथ्या है । बहुरि  
 रागादिक ज्ञानसंतानवासनाका उच्छेद जो निरोध, ताकौ मोक्ष  
 कहै है । सो क्षणिक भया तव मोक्ष कौनकै कहै है । अर रागा-  
 दिकका अभाव होना तौ हम भी मानै हैं । अर ज्ञानादिक अपने  
 स्वरूपका अभाव भए तौ आपका अभाव होय ताका उपाय करना  
 कैसेँ हितकारी होय । हिताहितका विचार करनेवाला तौ ज्ञान ही  
 है । सो आपका अभावकौ ज्ञानी हित कैसेँ मानै । बहुरि बौद्ध-  
 मतविषै दोय प्रमाण मानै है—प्रत्यक्ष, अनुमान । सो इनिके सत्या-  
 सत्यका निरूपण जैन शास्त्रनितैं जानना । बहुरि जो यह दोय ही  
 प्रमाण हैं, तौ इनिके शास्त्र अप्रमाण भए तिनिका निरूपण किस  
 अर्थि किया । प्रत्यक्ष अनुमान तौ जीव आप ही करि लेंगे, तुम  
 शास्त्र काहेकौ किए । बहुरि तहां सुगतकौ देव मानै हैं सो ताका  
 स्वरूप नम्र वा विक्रियारूप स्थापै हैं सो विटंबनारूप है । बहुरि

कमंडलु रक्तांबरके धारी पूर्वाह्नविषै भोजन करै इत्यादि लिंगरूप बौद्धमतके भिक्षुक हैं, सो क्षणिककौ भेष धरनैका कहा प्रयोजन । परंतु महंतताकै अर्थ कल्पित निरूपण करना वा भेष धरना हो है । ऐसे बौद्ध हैं, ते च्यारि प्रकार हैं—वैभाषिक, सौत्रांतिक, योगाचार, मध्यम । तहां वैभाषिक तौ ज्ञानसहित पदार्थकौ मानै हैं । सौत्रांतिक प्रत्यक्ष यह देखिए है सो ही है परैं किछू नाहीं ऐसैं मानै है । योगाचारनिकै आचारसहित बुद्धि पाईए है । मध्यम हैं ते पदार्थका आश्रयविना ज्ञानहीकौ मानै हैं । सो अपनी अपनी कल्पना करै हैं । विचार किए किछू ठिकाणाकी बात नाहीं । ऐसैं बौद्धमतका निरूपण किया ।

अब चार्वाक मत कहिए है,---

कोई सर्वज्ञदेव धर्म अधर्म मोक्ष हैं नाहीं । अर परलोक नाहीं वा पुण्यपापका फल नाहीं । यह इंद्रियगोचर जितना है सो ही लोक है । ऐसैं चार्वाक कहै हैं । तहां वाकौ पूछिए है—सर्वज्ञदेव इस काल क्षेत्रविषै नाहीं कि सर्वदा सर्वत्र नाहीं । इस कालक्षेत्र-विषै तौ हम भी नाहीं मानै हैं । अर सर्वकालक्षेत्रविषै नाहीं ऐसा सर्वज्ञविना जानना किसकै भया । जो सर्व कालक्षेत्रकी जानै सो ही सर्वज्ञ अर न जानै है तौ निषेध कैसें करै है । बहुरि धर्म अधर्म लोकविषै प्रसिद्ध हैं । जो ए कल्पित होंय तौ सर्वजन प्रसिद्ध कैसें होय । बहुरि धर्म अधर्मरूप परणति होती देखिए है, ताकरि वर्तमानहीमें सुखी दुखी होते देखिए हैं । इनिकौ कैसें न मानिए । अर मोक्षका होना अनुमानविषै आवै है । क्रोधादिक दोष काहूकै हीन हैं काहूकै अधिक हैं सो जानिए है काहूकै

इनकी नास्ति भी होती होगी । अर ज्ञानादिक गुण काहूकै हीन काहूकै अधिक भासै हैं, सो जानिए है काहूकै संपूर्ण भी होते होंयगे । ऐसै जाकै समस्तदोषनिकी हानि गुणनिकी प्राप्ति होय सो ही मोक्ष अवस्था है । बहुरि पुण्य पापका फल भी देखिए है । कोऊ उद्यम करै तौ भी दरिद्री रहै । कोऊकै स्वयमेव लक्ष्मी होय । कोऊ शरीरका यत्न करै, तौ भी रोगी रहै । काहूके विना ही यत्न नीरोगता रहै । इत्यादि प्रत्यक्ष देखिए है । सो याका कारण कोई तौ होगा । जो याका कारण सो ही पुण्य पाप है । बहुरि परलोक भी प्रत्यक्ष अनुमानतै भासै है । व्यंतरादिक हैं ते अवलो-  
 किए है । मैं अमुक था सो देव भया हूं । बहुरि तू कहैगा यह तौ पवन है तातै हम तौ 'मैं हौं' इत्यादि चेतनाभाव जाकै आश्रय पाईए ताहीकों आत्मा कहै हैं, सो तू वाका नाम पवन कहि परंतु पवन तौ भीति आदिकरि अटकै है आत्मा मूंघा बन्द किया हुवा भी अटकै नाहीं, तातै पवन कैसें मानिए । बहुरि जितना इंद्रियगोचर है तितना ही लोक कहै है । सो तेरी इंद्रियगोचर तौ थोरेसे भी योजनका दूरिवर्ती क्षेत्र अर थोरासा अतीत अनागत काल ऐसा क्षेत्रकालवर्ती भी पदार्थ नाहीं होय सकै । अर दूर देशकी वा बहुतकालकी बातें परंपरातै सुनिए ही है, तातै सबका जानना तेरै नाहीं तू इतना ही लोक कैसें कहै है । बहुरि चार्वाकमतविषै कहै हैं पृथ्वी, अप, तेज, वायु, आकाश-  
 मिले चेतना होय आवै है । सो मरतै पृथ्वी आदि यहां रही चेतनावान् पदार्थ गया सो व्यंतरादि भया प्रत्यक्ष जुदे जुदे देखिए है । बहुरि एक शरीरविषै पृथ्वी आदि तौ भिन्न भिन्न

भासै हैं चेतना एक भासै है । जो पृथ्वी आदिकै आधार चेतना होय तौ लोही उखासादिककै जुदी जुदी ही चेतना होय अर हस्तादिक काटे जैसे वर्णादि रहै है तैसें चेतना भी रहै है । बहुरि अहंकार बुद्धि तौ चेतनाकै है सो पृथिवी आदि रूप शरीर तौ यहां ही रखा व्यंतरादि पर्यायविषै पूर्व<sup>पर्याय</sup>का अहंपना मानना देखिए है सो कैसें हो है । बहुरि पूर्वपर्यायका गुह्य समाचार प्रगट करै सो यह जानना किसकी साथि गया, जाकी साथि जानना गया सो ही आत्मा है । बहुरि चार्वाकमतविषै खान पान भोग विलास इत्यादि स्वच्छंद वृत्तिका उपदेश है सो ऐसें तौ जगत् स्वयमेव ही प्रवर्तै है । तहां शास्त्रादि बनाय कहा भला होनेका उपदेश दिया । बहुरि तू कहैगा तपश्चरण शील संयमादि छुड़ावनेकै अर्थ उपदेश दिया तौ इनि कार्यनिविषै तौ कषाय घटनेतैं आकुलता घटै है तातैं यहां ही सुखी होना हो है यश आदि हो है तू इनिकौ छुड़ाय कहा भला करै है । विषयासक्त जीवनिकौ सुहावती बातैं कहि अपना वा औरनिका बुरा करनेका भय नाहीं । स्वच्छंद होय विषयसेवनके अर्थ ऐसी झूठी युक्ति बतावै है । ऐसें चार्वाकमतका निरूपण किया ।

इस ही प्रकार अन्य अनेक मत हैं ते झूठी युक्ति बनाय विषयकषायासक्त पापी जीवनिकरि प्रगट किए हैं । तिनिका श्रद्धानादिकरि जीवनिका बुरा हो है । बहुरि एक जिनमत है सो ही सत्यार्थका प्ररूपक है । सर्वज्ञ वीतरागदेवकरि भाषित है । तिसका श्रद्धानादिक करि ही जीवनिका भला हो है । सो जिनमताविषै जीवादि तत्त्व निरूपण किए हैं । प्रत्यक्ष परोक्ष दोय

प्रमाण किए हैं । सर्वज्ञ वीतराग अर्हत देव हैं । बाह्य अभ्यन्तर परिग्रहरहित निर्ग्रन्थ गुरु हैं । सो इनिका वर्णन इस ग्रन्थविषे आगे विशेष लिखेंगे सो जानना । यहां कोऊ कहै—तुम्हारे राग-द्वेष है, तातैं तुम अन्य मतका निषेधकरि अपने मतको स्थापो हो, ताको कहिए हैं—

यथार्थ वस्तुके प्ररूपण करनेविषे रागद्वेष नाहीं । किछू अपना प्रयोजन विचारि अन्यथा प्ररूपण करै, तौ रागद्वेष नाम पावै । बहुरि वह कहै है—जो रागद्वेष नाहीं है, तौ अन्यमत बुरे जैनमत भला ऐसा कैसे कहो हो । साम्यभाव होय, तौ सर्वको समान जानौ मतपक्ष काहेको करो हो । ताको कहिए है—बुराको बुरा कहै हैं भलाको भला कहै हैं, यामैं रागद्वेष कहा किया । बहुरि बुरा भलाको समान जानना तौ अज्ञानभाव है, साम्यभाव नाहीं । बहुरि वह कहै है—जो सर्व मतनिका प्रयोजन तौ एक ही है, तातैं सर्वको समान जानना । ताको कहिए है—प्रयोजन एक ही होय तौ नानामत काहेको कहिए । एक मतविषे तौ एक प्रयोजन लिए अनेकप्रकार व्याख्यान हो है, ताको जुदा मत कौन कहै है । परंतु प्रयोजन ही भिन्न भिन्न हो है, सो ही दिखाईए है—जैनमतविषे एक वीतरागभाव पोषनेका प्रयोजन है, सो कथानिविषे वा लोकादिका निरूपणविषे वा आचरणविषे वा तत्त्वनिविषे जहां तहां वीतरागताहीको पुष्टता करी है । बहुरि अन्य मतनिविषे सराग-भाव पोषनेका प्रयोजन है । जातैं कल्पित रचना तौ कषायी जीव करै, सो अनेक युक्ति बनाय कषायभावहीको पोषै । जैसे अद्वैत ब्रह्मवादी सर्वको ब्रह्म माननेकरि, अर सांख्यमती सर्व कार्य प्रकृति-

का मानि आपको शुद्ध अकर्ता माननेकरि, अर शिवमती तत्त्व जाननेहीतैं सिद्धि होना माननेकरि, मीमांसक कषायजनित आचार-पकों धर्म माननेकरि, बौद्ध क्षणिक माननेकरि, चार्वाक परलोकादि न माननेकरि विषयभोगादिरूप कषायकार्यनिविषै स्वच्छन्द होना ही पोषै हैं । यद्यपि कोई ठिकानै कोई कषाय घटावनेका भी निरूपण करै, तौ उस छलकरि अन्य कषायकों पोषण करै हैं । जैसे गृह-कार्य छोरि परमेश्वरका भजन करना ठहराया अर परमेश्वरका स्वरूप सरागी ठहराय उनकै आश्रय अपने विषय कषाय पोषै हैं । बहुरि जैनधर्मविषै देव गुरु धर्मादिकका स्वरूप वीतराग ही निरूपणकरि केवल वीतरागताहीकों पोषै हैं, सो यह प्रगट है । हम कहा कहैं, अन्यमती भर्तृहरि ताहूँनै वैराग्यप्रकरणविषै ऐसा कखा है—

एँको रागिषु राजते प्रियतमादेहार्द्धधारी हरो  
नीरागेषु जिनो विमुक्तललनासङ्गो न यस्मात्परः ।  
दुर्वारस्मरबाणपन्नगविषव्यासक्तमुग्धो जनः  
शेषः कामविडंबितो हि विषयान् भोक्तुं न भोक्तुं क्षमः॥१॥

१ वैराग्यप्रकरणमें नहीं किन्तु शृंगारप्रकरण ( शतक ) में यह ९७ नं० का श्लोक है । न जाने यहां वैराग्यप्रकरण कैसे लिख गया है ।

२ रागी पुरुषोंमें तो एक महादेव शोभित होता है, जिसने अपनी प्रिय-तमा पार्वतीको आधे शरीरमें धारणकर रक्खा है और विरागियोंमें जिनदेव शोभित होते हैं, जिनके समान स्त्रियोंका संग छोड़नेवाला दूसरा कोई नहीं है । शेष लोग तो दुर्निवार कामदेवके बाणरूप सपोंके विषसे मूर्च्छित हुए हैं, जो कामकी विडम्बनासे न तो विषयोंको भलीभांति भोग ही सकते हैं और न छोड़ ही सकते हैं ।

याविषै सरागीनिविषै महादेवकौ प्रधान कखा अर वीतरागीनिविषै जिनदेवकौ प्रधान कखा है । बहुरि सरागभाव वीतरागभावनिविषै परस्पर प्रतिपक्षीपना है, सो यह दोऊ भले नाहीं । इनिविषै एक ही हितकारी है, सो वीतराग ही हितकारी है जाके होते तत्काल आकुलता मिटै, स्तुतियोग्य होय । आगामी भला होना सर्व कहै । अर सरागभाव होते तत्काल आकुलता होय, निंदनीक होय, आगामी बुरा होना भासै, तातैं जामें वीतरागभावका प्रयोजन ऐसा जैनमत सो ही श्रेष्ठ है । जिनमें सरागभावके प्रयोजन प्रगट किए हैं ऐसे अन्यमत अनिष्ट हैं । इनिकौ समान कैसें मानिए । तब वह कहै है—यह तौ सांच, परंतु अन्यमतकी निंदा किए अन्यमती दुःख पावैं, औरनिसौं विरोध उपजै, तातैं काहेकौं निंदा करिए । तहां कहिए है—जो हम कषायकरि निंदा करैं वा औरनिकौं दुःख उपजावैं तौ हम पापी ही हैं । अन्यमतके श्रद्धानादिककरि जीव-निकै अतत्त्वश्रद्धान दृढ़ होय, ताकरि संसारविषै जीव दुखी होय, तातैं करुणाभावकरि यथार्थ निरूपण किया है । कोई विनादोष ही दुःख पावैं, विरोध उपजावैं, तौ हम कहा करैं । जैसे मदिराकी बात किए कलाल दुःख पावैं, कुशीलकी निंदा किए वेश्यादिक दुःख पावैं, खोटा खरा पहिचाननेकी परीक्षा बतावतैं ठिग दुःख पावैं, तौ कहा करिए । ऐसें जो पापीनिके भयकरि धर्मोपदेश न दीजिए, तौ जीवनिका भला कैसें होय । ऐसा तौ कोई उपदेश नाहीं, जा करि सर्व ही चैन पावैं । बहुरि वह विरोध उपजावै, सो विरोध तौ परस्पर हो है । हम लरैं नाहीं, वै आप ही उपशांत हो जायंगे । हमकौं तौ हमारे परिणामौका फल होगा । बहुरि



कोऊ कहै—प्रयोजनभूत जीवादिक तत्त्वनिका अन्यथा श्रद्धान किए मिथ्यादर्शनादिक हो हैं, अन्यमतनिका श्रद्धान किए कैसें मिथ्यादर्शनादिक होय, ताका समाधान—

अन्यमतनिविषै विपरीति युक्ति बताय जीवादिक तत्त्वनिका स्वरूप यथार्थ न भासै यह उपाय किया है, सो किस अर्थ किया है । जीवादि तत्त्वनिका यथार्थ स्वरूप भासै, तौ वीतरागभाव भए ही महंतपनौ भासै । बहुरि जे जीव वीतरागी नाहीं अर अपनी महंतता चाहैं, तिनि सरागभाव होतैं महंतता मनावनेके अर्थि कल्पित युक्तिकरि अन्यथा निरूपण किया है । सो अद्वैतब्रह्मादिकका निरूपणकरि जीव अजीवका अर स्वच्छंदवृत्ति पोषनेकरि आसव संवरादिकका अर सकषायीवत् वा अचेतनवत् मोक्षकहनैकरि मोक्षका अयथार्थ श्रद्धानकोँ पोषै हैं । जातैं अन्यमतनिका अन्यथापना प्रगट किया है । इनिका अन्यथापना भासै, तौ तत्त्वश्रद्धानविषै रुचिवंत होय उनकी युक्तिकरि भ्रम न उपजै । ऐसैं अन्यमतनिका निरूपण किया ।

अब अन्यमतनिके शास्त्रनिहीकी साक्षीकरि जिनमतकी समीचीनता वा प्राचीनता प्रगट कीजिए है,—

बड़ा योगवाशिष्ठ छत्तीस हजार श्लोक प्रमाण, ताका प्रथम वैराग्यप्रकरण तहां अहंकार निषेधाध्यायविषै वशिष्ठ अर रामका संवादविषै ऐसा कथा है,—

रामोवाच—

“नाहं रामो न मे वांछा भावेषु च न मे मनः ।

१ अर्थात्—मैं राम नहीं हूँ, मेरी कुछ इच्छा नहीं है और भावों वा पदार्थों-

शांतिमास्थातुमिच्छामि स्वात्मन्येव जिनो यथा ॥ १॥”

या विषै रामजी जिन समान होनेकी इच्छा करी, ताँतें रामजीतैं जिनदेवका उत्तमपना प्रगट भया अर समीचीनपना प्रगट भया । बहुरि ‘दक्षिणामूर्ति—सहस्रनाम’विषै कखा है,—

शिवोवाच—

“जैनमार्गरतो जैनो जितक्रोधो जितामयः ॥”

यहां भगवतका नाम जैनमार्गविषै रत अर जैन कखा, सो यामैं जैनमार्गकी प्रधानता वा प्राचीनता प्रगट भई । बहुरि ‘वैशंपायन-सहस्रनाम’ विषै कखा है,—

“कालनेमिनिहा वीरः शूरः शौरिर्जिनेश्वरः ।”

यहां भगवानका नाम जिनेश्वर कखा, ताँतैं जिनेश्वर भगवान् हैं । बहुरि दुर्वासाऋषिकृत ‘महिम्नस्तोत्र’विषै ऐसा कखा है,—

“तत्तद्दर्शनमुख्यशक्तिरिति च त्वं ब्रह्मकर्मेंश्वरी ।

कर्त्तार्हन् पुरुषो हरिश्च सविता बुद्धः शिवस्त्वं गुरुः” ॥ १॥

यहां ‘अरहंत तुम हो’ ऐसैं भगवंतकी स्तुति करी, ताँतैं अरहंतकै भगवंतपनौ प्रगट भयो । बहुरि हनुमन्नाटकविषै ऐसैं कखा है,—

“यं शैवाः समुपासते शिव इति ब्रह्मेति वेदान्तिनः

में मेरा मन नहीं है । मैं तो अपनी जिनदेवके समान आत्मामें ही शान्ति स्थापन करना चाहता हूं ।

१ यह हनुमन्नाटकके मंगलाचरणका श्लोक है । इसका अभिप्राय यह है कि, जिसको शैव लोग शिव कहकर, वेदान्ती ब्रह्म कहकर, बौद्ध बुद्धदेव कहकर, नैयायिक कर्ता कहकर, जैनी अर्हन् कहकर और मीमांसक कर्म कहकर उपासना करते हैं, वह त्रैलोक्यनाथ प्रभु तुम्हारे मनोरथोंको सफल करे ।

बौद्धा बुद्ध इति प्रमाणपटवः कर्त्तेति नैयायिकाः ।

अर्हन्नित्यथ जैनशासनरताः कर्मेति मीमांसकाः

सोऽयं वो विदधानु वाञ्छितफलं त्रैलोक्यनाथः प्रभुः॥१॥”

यहां छहों मतविषै ईश्वर एक कखा, तहां अरहंतदेवकै भी ईश्वरपना प्रगट किया । यहां कोऊ कहै, जैसें यहां सर्वमतविषै एक ईश्वर कखा तैसं तुम भी मानौ, ताकौं कहिए है—तुमनै यह कखा है, हम तौ न कखा । तातैं तुम्हारे मतविषै अरहंतकौं ईश्वरपना सिद्ध भया । हमारे मतविषै भी ऐसं ही कहैं, तौ हम भी शिवादिककौं ईश्वर मानैं । जैसें कोई व्यापारी सांचा रत्न दिखावै, कोई झूठा रत्न दिखावै । तहां झूठा रत्नवाला तौ सर्व रत्नांका समान मोल लेनेकै अर्थि समान कहै । सांचा रत्नवाला कैसें समान मानै । तैसें जैनी सांचा देवादिककौं निरूपैं, अन्यमती झूठा निरूपैं, तहां अन्यमती अपनी महिमाकै अर्थि सर्वकौं समान कहैं—जैनी कैसें कहैं । बहुरि ‘रुद्रयामलतंत्र’विषै भवानीससहनामविषै ऐसैं कखा है,—

“कुंडासना जगद्धात्री बुद्धमाता जिनेश्वरी ।

जिनमाता जिनेन्द्रा च शारदा हंसबाहिनी ॥ १ ॥”

यहां भवानीके नाम जिनेश्वरी इत्यादि कहे, तातैं जिनका उत्तमपना प्रगट भया । बहुरि ‘गणेशपुराण’विषै ऐसैं कखा है,—

“जैनं पाशुपतं सांख्यं ।”

बहुरि व्यासकृत सूत्रविषै ऐसा कखा है—

“जैना एकस्मिन्नेव वस्तुनि उभये प्ररूपयन्ति ।”

इत्यादि तिनिके शास्त्रनिविषै जैन निरूपण है, तातैं जैनमतका प्राचीनपना भासै है । बहुरि भागवतका पंचमस्कंधविषै ऋषभावतारका वर्णन है । तहां इनिकौ करुणामय तृष्णादिरहित ध्यानमुद्राधारी सर्वाश्रमकरि पूजित कछा है, ताकै अनुसारि अरहंत राजा प्रवृत्ति करी ऐसा कहै हैं । सो जैसे रामकृष्णादि अवतारनिकै अनुसारि अन्यमत, तैसें ऋषभावतारकै अनुसारि जैनमत, ऐसें तुम्हारे मतहीकरि जैन प्रमाण भया । यहां इतना विचार और किया चाहिए—कृष्णादि अवतारनिकै अनुसारि विषयकषायनिकी प्रवृत्ति हो है । ऋषभावतारकै अनुसारि वीतराग साम्यनावकी प्रवृत्ति हो है । यहां दोऊ प्रवृत्ति समान माने, धर्म अधर्मका विशेष न रहै अर विशेष माने भली होय जो अंगीकार करनी । बहुरि दशावतारचरित्रविषै—“बद्धा पद्मासनं यो नयनयुगमिदं न्यस्य नासाग्रदेशे” इत्यादि बुद्धावतारका स्वरूप अरहंत देव सारिखा लिख्या है, सो ऐसा स्वरूप पूज्य है तौ अरहंतदेव पूज्य सहज ही भया ।

बहुरि काशीखंडविषै दिवोदास राजानैं संबोधि राज्य छुड़ायो । तहां नारायण तौ विनयकीर्त्ति जती भया, लक्ष्मीकौ विनयश्री अर्जिका करी, गरुड़कौ श्रावक किया, ऐसा कथन है । सो जहां संबोधन करना भया, तहां जैनी भेष बनाया । तातैं जैन हितकारी प्राचीन प्रतिभासै है । बहुरि ‘प्रभासपुराण’विषै ऐसा कछा है—

“भवस्य पश्चिमे भागे वामनेन तपः कृतम् ।

तेनैव तपसाकृष्टः शिवः प्रत्यक्षतां गतः ॥ १ ॥”

“पद्मासनसमासीनः श्याममूर्त्तिर्दिगम्बरः ।

नेमिनाथः शिवोथैवं नाम चक्रेऽस्य वामनः ॥ २ ॥”

“कलिकाले महाघोरे सर्वपापप्रणाशकः ।

दर्शनात्स्पर्शनादेव कोटियज्ञफलप्रदः ॥ ३ ॥”

यहां वामनकौं पद्मासन दिगंबर नेमिनाथका दर्शन भया कब्बा । वाहीका नाम शिव कब्बा । बहुरि ताके दर्शनादिकतैं कोटियज्ञका फल कब्बा सो ऐसा नेमिनाथका स्वरूप तौ जैनी प्रत्यक्ष मानै हैं, सो प्रमाण ठहस्या । बहुरि प्रभासपुराणविषै कब्बा है,—

“रैवताद्रौ जिनो नेमिर्युगादिर्विमलाचले ।

ऋषीणामाश्रमादेव मुक्तिमार्गस्य कारणम् ॥ १ ॥”

यहां नेमिनाथकौं जिनसंज्ञा कही, ताके स्थानकौं ऋषिका आश्रम मुक्तिका कारण कब्बा, अर युगादिके स्थानकौं भी ऐसा ही कब्बा, तातैं उत्तम पूज्य ठहरे । बहुरि ‘नगरपुराण’ विषै भवावतार-रहस्यविषै ऐसा कब्बा है,—

“अकारादिहकारन्तं मूर्द्धाधोरेफसंयुतम् ।

नादबिन्दुकलाक्रान्तं चन्द्रमण्डलसन्निभम् ॥ १ ॥

एतद्देवि परं तत्त्वं यो विजानाति तत्त्वतः ।

संसारबन्धनं छित्त्वा स गच्छेत्परमां गतिम् ॥ २ ॥”

यहां ‘अर्ह’ ऐसे पदकौं परमतत्त्व कब्बा । याके जाने परमगतिकी प्राप्ति कही, सो ‘अर्ह’ पद जैनमतउक्त है । बहुरि नगरपुराणविषै कब्बा है,—

“दशभिर्भोजितैर्विप्रैः यत्फलं जायते कृते ।

मुनेरर्हत्सुभक्तस्य तत्फलं जायते कलौ ॥ १ ॥”

यहां कृतयुगविषै दश ब्राह्मणोंकौं भोजन करानेका जेता फल कखा, तेताफल कलियुगविषै अर्हतभक्तमुनिके भोजन कराएका कखा । तातैं जैनी मुनि उत्तम ठहरे । बहुरि 'मनुस्मृति' विषै ऐसा कखा है,—

“कुलादिवीजं सर्वेषां प्रथमो विमलवाहनः ।

चक्षुष्मान् यशस्वी वाभिचंद्रोऽथ प्रसेनजित् ॥ १ ॥

मरुदेवीच नाभिश्च भरते कुलसत्तमाः ।

अष्टमो मरुदेव्यां तु नाभेर्जात उरुक्रमः ॥ २ ॥

दर्शयन् वर्त्म वीराणां सुरासुरनमस्कृतः ।

नीतित्रितयकर्त्ता यो युगादौ प्रथमो जिनः ॥ ३ ॥

यहां विमलवाहनादिक मनु कहे, सो जैनविषै कुलकरनिके ए नाम कहे हैं अर यहां प्रथम जिन युगकी आदिविषै मार्गका दर्शक अर सुरासुरकरि पूजित कखा, सो ऐसैं ही है तौ जैनमत युगकी आदिहीतैं है अर प्रमाणभूत कैसैं न कहिए । बहुरि ऋग्वेदविषै ऐसा कखा है,—

“ॐत्रैलोक्यप्रतिष्ठितान् चतुर्विंशतितीर्थकरान् ऋष-

भाद्यावर्द्धमानान्तान् सिद्धान् शरणं प्रपद्ये । ॐ

पवित्रं नग्नमुपवि प्रसामहे एषां नग्ना (नग्नये)

जातिर्येषां वीरा ।” इत्यादि

बहुरि यजुर्वेदविषै ऐसा कखा है,—

ॐ नमो अर्हतो ऋषभो ॐ ऋषभ पवित्रं पुरुद्वत-

मध्वरं यज्ञेषु नग्नं परमं माहसंस्तुतं वरं शत्रुं जयंतं

पथुरिंद्रमाहुतिरिति स्वाहा । ॐ त्रातारमिंद्रं ऋषभं

वदन्ति अमृतारमिंद्रं हवे सुगतं सुपार्श्वमिंद्रं हवे  
 शक्रमजितं तद्वर्द्धमानपुरुहूतमिंद्रमाहुरिति स्वाहा ।  
 ॐ नम्रं सुधीरं दिग्वाससं ब्रह्मगर्भं सनातनं उपैमि  
 वीरं पुरुषमर्हंतमादित्यवर्णं तमसः परस्तात् स्वाहा ।  
 ॐ स्वस्तिन इंद्रो वृद्धश्रवा स्वस्तिनः पूषा विश्व-  
 वेदाः स्वस्तिनस्ताक्षर्यो अरिष्टनेमिः स्वस्तिनो बृहस्प-  
 तिर्दधानु । दीर्घायुस्त्वायुबलायुर्वा शुभजातायु  
 ॐ रक्ष रक्ष अरिष्टनेमिः स्वाहा । वामदेव शान्त्यर्थ-  
 मनुविधीयते सोऽस्माकं अरिष्टनेमिः स्वाहा ।

यहां जैनतीर्थकरनिके जे नाम हैं तिनिका पूजन कइया ।  
 बहुरि यहां यह भास्या, जो इनिकै पीछें वेदरचना भई है । ऐसैं  
 अन्यमतनिकी साक्षीतैं भी जिनमतकी उत्तमता अर प्राचीनता दृढ  
 भई । अर जिनमतकौं देखैं वै मत कल्पित ही भासैं । तातैं  
 अपना हितका इच्छक होय, सो पक्षपात छोरि सांचा जैनधर्मकौं  
 अंगीकार करो । बहुरि अन्य मतनिविषै पूर्वापरविरोध भासै है ।  
 पहले अवतार वेदका उद्धार किया । तहां यज्ञादिकविषै हिंसादिक  
 पोषे । अर बुद्धावतार यज्ञका निंदक होय, हिंसादिक निषेधे ।  
 वृषभावतार वीतराग संयमका मार्ग दिखाया । कृष्णावतार परस्त्री-  
 रमणादि विषय कषायादिकनिका मार्ग दिखाया । सो अब यह  
 संसारी कौनका कइया करै, कौनकै अनुसारि प्रवर्तै, अर इन सब  
 अवतारनिकौं एक बतावैं सो एक ही कदाचित् कैसें कदाचित् कैसें  
 कहै वा प्रवर्तै तौ याकै उनके कहनेकी वा प्रवर्तनेकी प्रतीति कैसें

आवै । बहुरि कहीं क्रोधादिकषायनिका वा विषयनिका निषेध करै, कहीं लरनेका वा विषयादिसेवनेका उपदेश दें । तहां प्रालम्बि बतावै, सो विना क्रोधादि भए आपहीतैं लरना आदि कार्य होंय, तौ यह भी मानिए सो तौ होंय नाहीं । बहुरि लरना आदि कार्य होतैं क्रोधादि भए मानिए तौ जुदे ही क्रोधादि कौन हैं, तिनका निषेध किया । तातैं बनै नाहीं, पूर्वापरविरोध है । गीताविषै वीतरागता दिखाय लरनेका उपदेश दिया, सो यह प्रत्यक्ष विरोध भासै है । बहुरि ऋषीश्वरादिकनिकरि श्राप दिया बतावै, सो ऐसा क्रोध किए निंघपना कैसें न भया । इत्यादि जानना । बहुरि अपुत्रस्य गतिर्नास्ति ऐसा भी कहैं अर भारतविषै ऐसा भी कखा है,—

अनेकानि सहस्राणि कुमारब्रह्मचारिणाम् ।

दिवं गतानि राजेन्द्र अकृत्वा कुलसन्ततिम् ॥ १ ॥

यहां कुमारब्रह्मचारीनिकौं स्वर्ग गए बताए, सो यह परस्पर विरोध है । बहुरि ऋषीश्वर भारतविषै तौ ऐसा कखा,—

मद्यमांसाशनं रात्रौ भोजनं कन्दभक्षणम् ।

ये कुर्वन्ति वृथास्तेषां तीर्थयात्रा जपस्तपः ॥ १ ॥

वृथा एकादशी प्रोक्ता वृथा जागरणं हरेः ।

वृथा च पौष्करी यात्रा कृत्स्नं चान्द्रायणं वृथा ॥ २ ॥

चातुर्मास्ये तु सम्प्राप्ते रात्रिभोज्यं करोति यः ।

तस्य शुद्धिर्न विद्येत चान्द्रायणशतैरपि ॥ ३ ॥

इनविषै मद्यमांसादिकका वा रात्रिभोजनका वा चौमासैमें विशेषपनै रात्रिभोजनका वा कंदभक्षणका निषेध किया । बहुरि



बड़े पुरुषनिकै मद्यमांसादिकका सेवन करना कहै, व्रतादिविषै रात्रिभोजन थापै वा कंदादिभक्षण थापै, ऐसैं विरुद्ध निरूपै हैं । ऐसैं ही अनेक पूर्वापर विरुद्धवचन अन्यमतके शास्त्रनिविषै है । सो करै कहा, कहीं तौ पूर्वपरंपरा जानि विश्वास अनावनेके अर्थि यथार्थ कह्या अर कहीं विषयकषाय पोषनेके अर्थि अन्यथा कह्या । सो जहां पूर्वापरविरोध होय, तिनका वचन प्रमाण कैसैं करिए । तहां जो अन्यमतनिविषै क्षमा शील संतोषादिककौं पोषते वचन हैं, सो तौ जैनमतविषै पाइए हैं अर विपरीत वचन हैं, सो उनके कल्पित हैं । जिनमत अनुसार वचनका विश्वासतैं उनका विपरीतवचनका श्रद्धानादिक होय जाय, तातैं अन्यमतका कोऊ अंग भला देखिकर भी तहां श्रद्धानादिक न करना । जैसैं विषमिलित भोजन हितकारी नाहीं, तैसै जानना । बहुरि जो कोई उत्तमधर्मका अंग जिनमतविषै न पाइए अर अन्यमतविषै पाइए, अथवा कोई निषिद्ध धर्मका अंग जैनमतविषै पाइए अर अन्यत्र न पाइए, तौ अन्यमतकौं आदरो सो सर्वथा होय नाहीं । जातैं सर्वज्ञका ज्ञानतैं किछू छिपा नाहीं है । तातैं अन्यमतनिका श्रद्धानादिक छोरि जिनमतका दृढ़ श्रद्धानादिक करना । बहुरि कालदोषतैं कषायी जीवनिकरि जिनमतविषै भी कल्पितरचना करी है, सो ही दिखाइए है,—

श्वेतांबरमतवारे काहनै सूत्र बनाए, तिनकौं गणधरके किए कहै हैं । सो उनकौं पूछिए है—गणधरनै आचारांगादिक बनाए हैं सो तुम्हारे अवार पाइए है सो इतने प्रमाण लिए ही किए थे । जो इतने प्रमाण लिए ही किए थे, तौ तुम्हारे शास्त्रनिविषै

आचारांगादिकनिके पदनिका प्रमाण अठारहहजारआदि कखा है, सो तिनकी विधि मिलाय द्यो । पदका प्रमाण कहा । जो विभक्तिका अंतकौ पद कहोगे, तौ कहे प्रमाणतैं बहुत पद होय जांयगे अर जो प्रमाणपद कहोगे, तौ तिस एकपदकै साधिक इक्यावन कोड़ि श्लोक हैं । सो यह तौ बहुत छोटे शास्त्र हैं, सो बनै नाहीं । बहुरि आचारांगादिकतैं दशवैकालिकादिकका प्रमाण घाटि कखा है । तुम्हारै बधता है सो कैसें बनै । बहुरि कहोगे, आचारांगादिक बड़े थे, कालदोष जानि तिनहीमेंसौं केतेक सूत्र काढ़ि यह शास्त्र बनाए हैं । तौ प्रथम तौ टूटकग्रंथ प्रमाण नाहीं । बहुरि यह प्रबंध है, जो बड़ा ग्रंथ बनावै तौ वा विषै सर्ववर्णन विस्तार लिए करै अर छोटा ग्रंथ बनावै तौ तहां संक्षेपवर्णन करै, परंतु संबंध टूटै नाहीं । अर कोई बड़ा ग्रंथमें थोरासा कथन काढ़ि लीजिए, तौ तहां संबंध मिलै नाहीं—कथनका अनुक्रम टूटि जाय । सो तुम्हारे सूत्रनिविषै तौ कथादिकका भी संबंध मिलता भासै है—टूटकपना न भासै है । बहुरि अन्य कवीनितैं गणधरकी तौ बुद्धि अधिक होगी, ताके किए ग्रंथनिमें थोरे शब्दमें बहुत अर्थ चाहिए सो तौ अन्य कवीनिकीसी भी गंभीरता नाहीं । बहुरि जो ग्रंथ बनावै, सो अपना नाम ऐसें धरै नाहीं, 'जो अमुक कहै है' । 'मैं कहाँ हौं' ऐसा कहै । सो तुम्हारे सूत्रनिविषै 'हे गोतम' वा 'गोतम कहै है' ऐसे वचन हैं । सो ऐसे वचन तौ तब ही संभवैं, जब और कोई कर्ता होय । तातैं यह सूत्र गणधरकृत नाहीं, औरके किए हैं । गणधरका नामकरि कल्पितरचनाकौ प्रमाण कराया चाहै हैं । सो विवेकी तौ परीक्षाकरि मानै, कखा ही तौ

न मानें । बहुरि वह ऐसा भी कहै हैं—जो गणधरसूत्रनिकै अनुसार कोई दशपूर्वधारी भया है, तानै ए सूत्र बनाए हैं । तहां पूछिए है—जो नए ग्रंथ बनाए थे, तौ नवा नाम धरना था, अंगादिकके नाम काहेकौं धरे । जैसे कोई बड़ा साहूकारकी कोठीका नामकरि अपना साहूकारा प्रगट करै, तैसं यह कार्य भया । सांचेकौं तौ जैसे दिगंबरविषै ग्रंथनिके नाम धरे अर अनुसारी पूर्वग्रंथनिका कब्जा, तैसैं कहना योग्य था । अंगादिकका नाम धरि गणधरदेवका भ्रम काहेकौं उपजाया । तातैं गणधरके वा पूर्वधारीके वचन नाहीं । बहुरि इन सूत्रनिविषै जो विश्वास अनावनेकै अर्थि जिनमतअनुसार कथन है, सो तौ सांच है ही । दिगंबर भी तैसैं ही कहै हैं । बहुरि जो कल्पितरचना करी है, तामैं पूर्वापरविरुद्धपनौ वा प्रत्यक्षादि प्रमाणमैं विरुद्धपनौ भासै है, सो ही दिखाईए है,—

अन्य लिंगीकै वा गृहस्थकै वा स्त्रीकै वा चांडालादि शूद्रनिकै साक्षात् मुक्तिकी प्राप्ति होनी मानै हैं, सो बनै नाहीं । सम्यग्दर्शन ज्ञान चारित्रकी एकता मोक्षमार्ग है । सो वै सम्यग्दर्शनका स्वरूप तौ ऐसा कहै हैं,—

अरहंतो महादेवो जावज्जीवं सुसाहणो गुरुणो ।

जिणपण्णत्तं तत्तं ए सम्मत्तं मए गहिणं ॥ १ ॥

सो अन्यलिंगीकै अरहंत देव, साधु गुरु, जिनप्रणीत तत्त्वका मानना कैसें संभवै । तब सम्यक्त भी न होय, तौ मोक्ष कैसें होय । जो कहोगे अंतरंगके श्रद्धान होनैतैं सम्यक्त तिनकै हो है, सो विपरीत लिंगधारककी प्रशंसादिक किए भी सम्यक्तकौं अतीचार

कक्षा है तौ सांचा श्रद्धान भए पीछैं आप विपरीतलिंगका धारक कैसें रहै । श्रद्धान भए पीछैं महाव्रतादि अंगीकार किए सम्यक्-चारित्र अन्यलिंगविषै कैसें बनै । जो अन्यलिंगविषै भी सम्यक्-चारित्र हो है, तौ जैनलिंग अन्यलिंग समान भया । तातैं अन्य-लिंगीकौ मोक्ष कहना मिथ्या है । बहुरि गृहस्थकौ मोक्ष कहैं, सो हिंसादिक सर्व सावधका त्याग किए सम्यक्चारित्र होय, सो सर्व सावधयोगका त्याग किए गृहस्थपनौ कैसें संभवै । जो कहोगे—अंतरंगका त्याग भया है, तौ यहां तौ तीनूं योगका त्याग करै है कायकरि त्याग कैसें भया । बहुरि बाह्यपरिग्रहादिक राखे भी महाव्रत हो है, सो महाव्रतनिविषै तौ बाह्यत्यागकरनेकी ही प्रतिज्ञा करिए है, त्याग किए विना महाव्रत न होय । महाव्रत विना छठाआदि गुणस्थान न होय सकै, तौ मोक्ष कैसें होय । तातैं गृहस्थकौ मोक्ष कहना मिथ्या वचन है ।

बहुरि स्त्रीकौ मोक्ष कहैं, सो जातैं सप्तमनरकगमनयोग्य पाप न होय सकै, ताकरि मोक्षका कारण शुद्धभाव कैसें होय सकै । जातैं जाके भाव दृढ़ होंय, सो ही उत्कृष्ट पाप वा धर्म उपजाय सकै है । बहुरि स्त्रीकै निशंक एकांतविषै ध्यान धरना, सर्वपरिग्रहादिकका त्याग करना संभवै नाहीं । जो कहोगे, एकसमयविषै पुरुषवेदी वा स्त्रीवेदी वा नपुंसकवेदीकौ सिद्धि होनी सिद्धांतविषै कही है, तातैं स्त्रीकौ मोक्ष मानिए है । सो यहां भाववेदी है कि द्रव्यवेदी है । जो भाववेदी है तौ हम मानै ही हैं । द्रव्यवेदी है, तौ पुरुषस्त्रीवेदी तौ लोकविषै प्रचुर दीखै हैं, नपुंसक तौ कोई विरला दीखै है । एक समयविषै मोक्ष जानेवाले इतने नपुंसक कैसें

संभवै । ताँतें द्रव्यवेद अपेक्षा कथन बनै नाहीं । बहुरि जो कहोगे, नवमगुणस्थानताँई वेद कहे हैं, सो भी भाववेद अपेक्षा ही कथन है । द्रव्यवेदअपेक्षा होय तौ चौदहवाँ गुणस्थानपर्यंत वेदका सद्भाव संभवै । ताँतें स्त्रीकै मोक्षका कहना मिथ्या है ।

बहुरि शूद्रनिकौ मोक्ष कहै । सो चांडालादिककौ गृहस्थ सन्मानादिककरि दानादिक कैसेँ दे, लोकविरुद्ध होय । बहुरि नीचकुलवालोंके उत्तम परिणाम न होय सकै । बहुरि नीचगोत्रकर्मका उदय तौ पंचम गुणस्थानपर्यंत ही है । ऊपरिके गुणस्थान चढ़े विना मोक्ष कैसेँ होय । जो कहोगे—संयम धारे पीछें वाकै उच्चगोत्रका उदय कहिए, तौ संयम धारनेकी वा न धारनेकी अपेक्षातैं नीच उच्चगोत्रका उदय ठहस्या । ऐसं होतैं असंयमी मनुष्य तीर्थकर क्षत्रियादिककै भी नीचगोत्रका उदय ठहरै । जो उनकै कुल अपेक्षा उच्चगोत्रका उदय कहोगे, तौ चांडालादिककै भी कुल अपेक्षा ही नीचगोत्रका उदय कहो । ताका सद्भाव तुम्हारे सूत्रनिविषै भी पंचम गुणस्थानपर्यंत ही कब्बा है । सो कल्पित कहनेमें पूर्वापरविरुद्ध होय ही होय । ताँतें शूद्रनिकै मोक्षका कहना मिथ्या है ।

ऐसै तिनहनै सर्वकै मोक्षकी प्राप्ति कही, सो ताका प्रयोजन यह है जो सर्वका भला मनावना मोक्षका लालच देना अर अपना कल्पितमतकी प्रवृत्ति करनी । परंतु विचार किए मिथ्या भासै है । बहुरि तिनके शास्त्रनिविषै 'अछेरा' कहै हैं । सो कहै हैं—हुंडावसाँपिणीके निमित्ततैं भए हैं, इनकौ छेड़ने नाहीं । सो कालदोषतैं केई बात होय परंतु प्रमाणविरुद्ध तौ न होय । जो

प्रमाणविरुद्ध भी होय, तौ आकाशके फूल गधेके सींग इत्यादिका होना भी बनै सो संभवै नाहीं । तातैं वै जो अछेरा कहै हैं सो प्रमाणविरुद्ध हैं । काहेतैं, सो कहिए है,—

वर्द्धमानजिन केतेककाल ब्राह्मणीके गर्भविषै रहि पीछैं क्षत्रियाणीके गर्भविषै बधे, ऐसा कहै हैं । सो काहूका गर्भ काहूके धर्या प्रत्यक्ष भासै नाहीं, अनुमानादिकमें आवै नाहीं । बहुरि तीर्थकरके भया कहिए, तौ गर्भकल्याणक काहूके घर भया, जन्मकल्याणक काहूके भया । केतेक दिन रत्नवृश्चादिक काहूके घर भई, केतेक दिन काहूके भई । सोलह स्वप्न किसीकौं आए, पुत्र किसीकै भया, इत्यादि असंभव भासै । बहुरि माता तौ दोय भई अर पिता तौ एक ब्राह्मण ही रह्या । जन्मकल्याणादिविषै वाका सन्मान किया, कै अन्य कल्पित पिताका किया । सो तीर्थकरके दोय पिताका कहना, महाविपरीत भासै है । सर्वोत्कृष्ट-पदके धारकके ऐसे वचन सुनने भी योग्य नाहीं । बहुरि तीर्थ-करके भी ऐसी अवस्था भई, तौ सर्वत्र ही अन्यस्त्रीका गर्भ अन्यस्त्रीके धरि देना ठहरै, तौ वैष्णव जैसें अनेक प्रकार पुत्र पुत्रीका उपजना बतावैं हैं, तैसें यह कार्य भया । सो ऐसे निकृष्ट कालविषै तौ ऐसे होय ही नाहीं, तहां होना कैसें संभवै । तातैं यह मिथ्या है ।

बहुरि मल्लितीर्थकरकौं कन्या कहै हैं । सो मुनि देवादिककी सभाविषै स्त्रीका स्थिति करना उपदेश देना न संभवै, वा स्त्रीपर्याय हीन है सो उत्कृष्ट तीर्थकरपदधारकके न बनै । बहुरि तीर्थकरके नम्रलिंग ही कहै हैं, सो स्त्रीके नम्रपनौ न संभवै । इत्यादि विचार किए असंभव भासै है ।

बहुरि हरिक्षेत्रका भोगभूमियांकौ नरकि गया कहै । सो बंध-  
 वर्णनविषै तौ भोगभूमियांकै देवगति देवायुहीका बंध कहै, नरकि  
 कैसे गया । सिद्धांतविषै तौ अनंतकालविषै जो बात होय, सो भी  
 कहै । जैसे तीसरे नरक<sup>पार्ल</sup> तीर्थकरका<sup>प्रकृति</sup> सत्व कब्जा, भोगभूमियांकै  
 नरक आयु गतिका बंध न कब्जा, सो केवली भूलै तौ नाहीं ।  
 तातैं यह मिथ्या है । ऐसैं सर्व अच्छेरे असंभव जानने । बहुरि वै  
 कहै हैं, इनकौं छोड़ने नाहीं । सो झूठ कहनेवाला ऐसैं ही कहै ।  
 बहुरि जो कहोगे—दिगंबरविषै जैसे तीर्थकरकै पुत्री, चक्रवर्तिका  
 मानभंग इत्यादि कार्य कालदोषतैं भया कहै हैं, तैसैं ए भी  
 भए । सो वै कार्य तौ प्रमाणविरुद्ध नाहीं । अन्यकै होते थे  
 सो महंतनिकै भए, तातैं कालदोष भया कहै हैं । गर्भहरणादि  
 कार्य प्रत्यक्ष अनुमानादितैं विरुद्ध, तिनकै होना कैसे संभवै ।  
 बहुरि अन्य भी घने ही कथन प्रमाणविरुद्ध कहै हैं । जैसे कहै हैं,  
 सर्वार्थसिद्धिके देव मनहीतैं प्रश्न करै हैं, केवली मनहीतैं उत्तर  
 दे हैं । सो सामान्य ही जीवकै मनकी बात मनःपर्ययज्ञानीविना  
 जानि सकै नाहीं । केवलीका मनकी सर्वार्थसिद्धिके देव कैसे  
 जानै । बहुरि केवलीकै भावमनका तौ अभाव है, द्रव्यमन जड़  
 आकारमात्र है, उत्तर कौन दिया । तातैं मिथ्या है । ऐसैं अनेक  
 प्रमाणविरुद्ध कथन किए हैं, तातैं तिनके आगम कल्पित ही  
 जानै ।

बहुरि श्वेतांबरमतवाले देवगुरुधर्मका स्वरूप अन्यथा निरूपै  
 हैं । तहां केवलीकै क्षुधादिक दोष कहै । सो यह देवका स्वरूप  
 अन्यथा है । काहेतैं क्षुधादिक दोष होतैं आकुलता होय, तब

अनंतसुख कैसें बनें । बहुरि जो कहोगे, शरीरकों क्षुधा लगी है आत्मा तद्रूप न हो है, तौ क्षुधादिकका उपाय आहारादिक काहेकों ग्रहण किया कहो हौ । क्षुधादिकरि पीड़ित होय, तब ही आहार ग्रहण करै । बहुरि कहोगे, जैसें कर्मोदयतैं विहार हो है, तैसें ही आहार ग्रहण हो है । सो विहार तौ विहायोगति उदयतैं हो है, अर पीड़ाका उपाय नाहीं, अर विना इच्छा भी किसी जीवकै होता देखिए है । बहुरि आहार है, सो प्रकृतिका उदयतैं नाहीं क्षुधाकरि पीड़ित भए ही ग्रहण करै है । बहुरि आत्मा पवनादिककों प्रैरे तब ही निगलना हो है, तातैं विहारवत् आहार नाहीं । जो कहोगे—सातावेदनीयकै उदयतैं आहार ग्रहण हो है, सो बनें नाहीं । जो जीव क्षुधादिकरि पीड़ित होय, पीछैं आहारादिक ग्रहणतैं सुख मानै, ताकै आहारादिक साताके उदयतैं कहिए । आहारादिक सातावेदनीयके उदयतैं स्वयमेव होय ऐसें तौ है नाहीं । जो ऐसें होय, तौ सातावेदनीयका मुख्यउदय देवनिकै है, ते निरंतर आहार क्यों न करैं । बहुरि महामुनि उपवासादि करैं, तिनकै साताका भी उदय अर निरंतर भोजन करनेवालौकै असाताका भी उदय संभवै । तातैं जैसें विना इच्छा विहायोगतिके उदयतैं विहार संभवै, तैसें विना इच्छा केवल सातावेदनीयहीके उदयतैं आहारका ग्रहण संभवै नाहीं । बहुरि वह कहै हैं, सिद्धांतविषै केवलीकै क्षुधादिक ग्यारह परिषह कहै हैं, तातैं तिनकै क्षुधाका सद्भाव संभवै है । बहुरि आहारादिक-विना तिनकी उपशांतता कैसें होय, तातैं तिनकै आहारादिक मानै हैं । ताका समाधान,—



कर्मप्रकृतीनिका उदय तीव्रमंद भेद लिए हो है। तहां अति-मंद होतैं, तिसका उदयजनित कार्यकी व्यक्तता भासै नाही। तातैं मुख्यपन अभाव कहिए, तारतम्यविषै सद्भाव कहिए। जैसे नवम गुणस्थानविषै, वेदादिकका उदय मंद है, तहां मैथुनादिक्रिया व्यक्त नाही तातैं; तहां ब्रह्मचर्य ही कखा। तारतम्यविषै मैथुनादिकका सद्भाव कहिए है। तैसें केवलीकै असाताका उदय अतिमंद है। जातैं एक-एक कांडकविषै अनंतवें भाग अनुभाग रहै ऐसे बहुत अनुभागकांडकनि करि वा गुणसंक्रमणादिककरि सत्ताविषै असातावेदनीयका अनुभाग अत्यंत मंद भया, ताका उदयविषै क्षुधा ऐसी व्यक्त होती नाही, जो शरीरकौ क्षीण करै। अर मोहके अभावतैं क्षुधाजनित दुःख भी नाही, तातैं क्षुधादिकका अभाव कहिए है। तारतम्यविषै तिनका सद्भाव कहिए है। बहुरि तैं कखा—आहारादिक विना तिनकी उपशांतता कैसें होय, सो आहारादिकरि उपशांतता होने योग्य क्षुधा लागै, तौ मंद उदय काहेका रखा। देव भोगभूमियां आदिककै किंचित् मंद उदय होतैं ही बहुतकाल पीछैं किंचित् आहार ग्रहण हो है तौ इनकै तौ अतिमंद उदय भया है, तातैं इनकै आहारका अभाव संभवै है। बहुरि वै कहै हैं, देव भोगभूमियांका तौ शरीर ही ऐसा है, जाकौं घनेकाल पीछैं थोरी भूख लागै, इनका तौ शरीर कर्मभूमिका औदारिक है। तातैं इनका शरीर आहार विना देशोनकोड़ि पूर्वपर्यंत उत्कृष्टपनै कैसें रहै, ताका समाधान—

देवादिकका भी शरीर वैसा है, सो कर्मकेही निमित्ततैं है। यहां केवलज्ञान भए ऐसा ही कर्म उदय भया जाकरि शरीर

ऐसा भया, जाकौं भूख प्रगट होती ही नहीं । जैसे केवलज्ञान भए पहलै केश नख बधै थे, सो बधैं ( बढैं ) नहीं । छाया होती थी, सो होती नहीं । शरीरविषै निगोद थी, ताका अभाव भया । बहुत प्रकारकरि जैसे शरीरकी अवस्था अन्यथा भई, तैसे आहार-विना भी शरीर जैसाका तैसा रहै ऐसी भी अवस्था भई । प्रत्यक्ष देखौ, औरनिकौं जरा व्यापै तब शरीर शिथिल होय जाय, इनका आयुका अंतपर्यंत शरीर शिथिल न होय । तातैं अन्य मनुष्यनिकर शरीर अर इनका शरीरकी समानता संभवै नहीं । बहुरि जो तू कहैगा—देवादिककै आहार ही ऐसा है, जाकरि बहुतकालकी भूख मिटै; इनकै भूख काहेतैं मिटी अर शरीर पुष्ट कैसें रखा । ताकौं कहिए है—जो असाताका उदय मंद होनेतैं मिटी अर समय समय परम औदारिक शरीर वर्गणाका ग्रहण हो है, सो अब तौ कर्म आहार है सो ऐसी वर्गणाका ग्रहण हो है जाकरि क्षुधादिक व्यापै नहीं वा शरीर शिथिल होय नहीं । सिद्धांतविषै याहीकी अपेक्षा केवलीकौं आहार कखा है । अर अन्नादिकका आहार तौ शरीरकी पुष्टताका मुख्य कारण नहीं । प्रत्यक्ष देखौ, कोऊ थोरा आहार करै शरीर पुष्ट बहुत होय, कोऊ बहुत आहार करै शरीर क्षीण रहै । बहुरि पवनादि साधनेवाले बहुतकालताई आहार न लें शरीर पुष्ट रखा करै, वा ऋद्धिधारी मुनि उपवासादि करै शरीर पुष्ट बन्या रहै सो केवलीकै तौ सर्वोत्कृष्टपना है । उनकै अन्नादिक विना शरीर पुष्ट बन्या रहै, तौ कहा आश्चर्य भया । बहुरि केवली कैसें आहारकौं जाय, कैसें जावैं । बहुरि वै आहारकौं जाय, तब समवसरण खाली कैसें रहै । अथवा अन्यका

ल्याय देना ठहरावोगे, तौ कौन ल्याय दे, उनके मनकी कौन जानै । पूर्व उपवासादिककी प्रतिज्ञा करी थी, ताका कैसें निर्वाह होय । जीवअंतराय सर्व प्रतिभासै, कैसें आहार ग्रहै, इत्यादि विरुद्ध भासै है । बहुरि वह कहै है—आहार ग्रहै हैं, परंतु काहूँ दीसै नही । सो आहार ग्रहणकों निंघ जान्या, तब वाका न देखना अतिशयविषै लिख्या । सो उनके निंघपना रक्षा अर और न देखै हैं, तौ कहा भया । ऐसें अनेक प्रकार विरुद्ध उपजै है ।

बहुरि अन्य अविवेक कहै हैं—केवलीकै नीहार कहै हैं, रोगादिक भया कहै हैं, अर कहै, काहूँ तेजोलेख्या छोरी ताकरि वर्द्धमान स्वामीकै पेटूंगाका (पेचिसका) रोग भया, ताकरि बहुत बर नीहार होने लाग । सो तीर्थकर केवलीकै भी ऐसा कर्मका उदय रखा, अर अतिशय न भया तौ इंद्रादिकरि पूज्यपना कैसें सोभै । बहुरि नीहार कैसें करै, कहा करै, कोऊ संभवती बात नाहीं । बहुरि जैसें रागादिकरि युक्त छद्मस्थकै क्रिया होय, तैसें केवलीकै क्रिया ठहरावै हैं । वर्द्धमानस्वामीका उपदेशविषै 'हे गौतम' ऐसा वारंवार कहना ठहरावै हैं । सो उनके तौ अपना कालविषै सहज दिव्यध्वनि हो है, तहां सर्वकों उपदेश हो है गौतमकों संबोधन कैसें बनै । बहुरि केवलीकै नमस्कारादिक क्रिया ठहरावै हैं, सो अनुरागविना बंदना संभवै नाहीं । बहुरि गुणाधिककों बंदना संभवै, सो उनसौं कोई गुणाधिक रखा नाहीं । सो कैसें बनै । बहुरि हाटिविषै समवसरण उताख्या कहै, सो इंद्रकृत समवसरण हाटिविषै कैसें रहै ? इतनी रचना तहां कैसें समावै । बहुरि हाटिविषै काहेकों रहै, कहा इंद्र हाटि सारिखी

रचना करनेको भी समर्थ नहीं; जाते हाटिका आश्रय लीजिए । बहुरि कहें,—केवली उपदेशदेनेको गए । सो घरि जाय उपदेश देना अतिरागता होय, सो मुनिके भी संभवै नहीं । केवलीके कैसे बनें । ऐसे ही अनेक विपरीतिता तहां प्ररूपै हैं । केवली शुद्धज्ञानदर्शनमय रागादिरहित भए हैं, तिनके अघातिनिके उदयतैं संभवतीक्रिया कोई हो है, अर मोहादिकका अभाव भया है । तातैं उपयोगमिले जो क्रिया होय सकै, सो संभवै नहीं । पापप्रकृतिका अनुभाग अत्यंत मंद भया है । ऐसा मंद अनुभाग अन्य कोईके नहीं । तातैं अन्यजीवनिके पापउदयतैं जो क्रिया होती देखिए है, सो केवलीके न होय । ऐसे केवली भगवानके सामान्य मनुष्यकीसी क्रियाका सद्भाव कहि देवका स्वरूपको अन्यथा प्ररूपै हैं ।

बहुरि गुरूका स्वरूपको अन्यथा प्ररूपै हैं । मुनिके वस्त्रादिक चौदह उपकरण कहै हैं । सो हम पूछै हैं कि, मुनिकों निर्ग्रथ कहै अर मुनिपद लेतैं नवप्रकार सर्वपरिग्रहका त्यागकरि महाव्रत अंगीकार करें, सो ए वस्त्रादिक परिग्रह हैं कि नहीं । जो हैं तौ त्यागकिए पीछें काहेको राखैं, अर नहीं हैं, तौ वस्त्रादिक गृहस्थ राखै ताको भी परिग्रह मति कहौ । सुवर्णादिकको ही परिग्रह कहौ । बहुरि जो कहोगे, जैसें क्षुधाके अर्थि आहार ग्रहण कीजिए हैं, तैसें शीतउष्णादिकके अर्थि वस्त्रादिक ग्रहण कीजिए है । सो मुनिपद अंगीकार करतैं आहारका त्याग किया नहीं, परिग्रहका त्याग किया है । बहुरि अन्नादिकका तौ संग्रह करना परिग्रह है, भोजन करने जाय सो परिग्रह नहीं । अर वस्त्रादिकका

संग्रह करना वा पहरना सर्व ही परिग्रह है, सो लोकविषै प्रसिद्ध है । बहुरि कहौगे, शरीरकी स्थितिकै अर्थि वस्त्रादिक राखिए है—ममत्त्व नाहीं, तातैं इनकों परिग्रह न कहिए । सो श्रद्धानविषै तौ जब सम्यग्दृष्टी भया, तब ही समस्त परद्रव्यविषै ममत्वका अभाव भया । तिस अपेक्षा तौ चौथा गुणस्थान ही परिग्रहरहित कहौ । अर प्रवृत्तिविषै ममत्त्व नाहीं, तौ कैसें ग्रहण करै है । तातैं वस्त्रादिक ग्रहण धारण छूटैगा, तब ही निःपरिग्रह होगा । बहुरि कहौगे—वस्त्रादिककों कोई ले जाय, तौ क्रोध न करै वा क्षुधादिक लागै तौ बेचै नाहीं, वा वस्त्रादिकपहरि प्रसाद करै नाहीं । परिणामनिकी स्थिरताकरि धर्म ही साथै है, तातैं ममत्व नाहीं । सो वास्तु क्रोध मति करौ, परंतु जाका ग्रहणविषै इष्टबुद्धि होय, ताका वियोगविषै अनिष्टबुद्धि होय ही जाय । जो अनिष्टबुद्धि न भई, तौ बहुरि ताके अर्थि याचना काहेकों करिए है । बहुरि बेचते नाहीं, सो धातु राखनेतैं अपनी हीनता जानि नाहीं बेचिए है । जैसे धनादि राखने तैसें ही वस्त्रादि राखने । लोकविषै परिग्रहके चाहक जीवनिकै दोऊनिकी इच्छा है । तातैं चौरादिकके भयादिकके कारन दोऊ समान हैं । बहुरि परिणामनिकी स्थिरताकरि धर्मसाधनेतैं ही परिग्रहपना न होय, तौ काहूकों बहुत शीत लागै सो सोड़ि राखि परिणामनिकी स्थिरता करैगा अर धर्मसाधैगा तौ वाकों भी निःपरिग्रह कहौ । ऐसें गृहस्थधर्म मुनिधर्मविषै विशेष कहा रहैगा । जाकै परीषह सहनेकी शक्ति न होय, सो परिग्रह राखि धर्म साथै । ताका नाम गृहस्थधर्म, अर जाकै परिणाम निर्मल भए परीषहकरि व्याकुल न होय, सो परिग्रह न राखै अर

धर्म साधै, ताका नाम मुनिधर्म, इतना विशेष है। बहुरि कहोगे, शीतादिकी परीषहकरि व्याकुल कैसें न होय। सो व्याकुलता तौ मोहके उदयके निमित्ततैं है। सो मुनिकै षष्ठादि गुणस्थाननिविषै तीन चौकड़ीका उदय नाही। अर संज्वलनकै सर्वघाती स्पर्द्धकनिका उदय नाही। देशघाती स्पर्द्धकनिका उदय है, सो किछू तिनका बल नाही। जैसे वेदक सम्यग्दृष्टीकै सम्यग्बोहनीयका उदय है, सो सम्यक्त्वकाँ घात न करि सकै; तैसें देशघाती संज्वलनका उदय परिणामनिकाँ व्याकुल करि सकै नाही। मुनिकै अर औरनिकै परिणामनिकी समानता है नाही। और सबनिकै सर्वघातीका उदय है, इनकै देशघातीका उदय है। तातैं औरनिकै जैसे परिणाम होय, तैसे उनकै कदाचित् न होय। तातैं जिनकै सर्वघातीकषायनिका उदय होय, ते गृहस्थ ही रहैं अर जिनकै देशघातीका उदय होय ते मुनिधर्म अंगीकार करैं। ताकै शीतादिककरि परिणाम व्याकुल न होय, तातैं बस्त्रादिक राखैं नाही। बहुरि कहौगे—जैन शास्त्रनिविषै चौदह उपकरण मुनि राखैं, ऐसा कब्या है। सो तुम्हारे ही शास्त्रनिविषै कब्या है, दिगंबर जैनशास्त्रनिविषै तौ कब्या नाही। तहां तौ लंगोटमात्र परिग्रह रहे भी ग्यारहीं प्रतिमाका धारक श्रावक ही कब्या। सो अब यहां विचारौ, दोऊनिमें कल्पित वचन कौन है। प्रथम तौ कल्पित रचना, कषायी होय सो करै। बहुरि कषायी होय, सो ही नीचापदविषै उच्चपदों प्रगट करै। सो यहां दिगंबरविषै बस्त्रादि राखे धर्म होय ही नाही, ऐसा तौ न कब्या परंतु तहां श्रावकधर्म कब्या। श्वेतांबरविषै मुनिधर्म कब्या। सो यहां जानै नीची क्रिया होतैं, उच्चत्व पद

प्रगट किया, सो ही कषायी है। इस कल्पित कहनेकरि आपकों वस्त्रादि राखतैं भी लोक मुनि मानने ल्यौ, तातैं मानकषाय पोष्या गया। अर औरनिकौ सुगमक्रियाविषै उच्चपदका होना दिखाया, तातैं घने लोक लगि गए। जे कल्पित मत भए हैं, ते ऐसैं ही भए हैं। तातैं श्रेतांबरमतविषै वस्त्रादि होतै मुनिपना कषा है, सो पूर्वोक्त युक्तिकरि विरुद्ध भासै है। तातैं ए कल्पितवचन हैं, ऐसा जानना। बहुरि कहौगे—दिगंबरविषै भी शास्त्र पीछी आदि मुनिकै उपकरण कहे हैं, तैसैं हमारै चौदह उपकरण कहे हैं। ताका समाधान—

जाकरि उपकार होय, ताका नाम उपकरण है। सो यहां शीतादिककी वेदना दूरि करणेतैं उपकरण ठहराईए, तौ सर्वपरिग्रह सामग्री उपकरण नाम पावै। सो धर्मविषै इनका कहा प्रयोजन ? ए तौ पापका कारण हैं। धर्मविषै तौ धर्मका उपकारी जे होय, तिनिका नाम उपकरण है। सो शास्त्र ज्ञानकौ कारण, पीछी दयाकौ, कमंडलु शौचकौ कारण, सो ए तौ धर्मके उपकारी भए, वस्त्रादिक कैसैं धर्मके उपकारी होय। वै तौ शरीरका सुखहीकै अर्थि धारिए है। बहुरि जो शास्त्र राखि महंतता दिखावैं, पीछीकरि बुहारी दें, कमंडलुकरि जलादिक पीवैं वा मैल उतारैं, तौ शास्त्रादिक भी परिग्रह ही हैं। सो मुनि ऐसे कार्य करै नाहीं। तातैं धर्मके साधनकौ परिग्रह संज्ञा नाहीं। भोगके साधनकौ परिग्रह संज्ञा हो है, ऐसा जानना। बहुरि कहौगे—कमंडलुतैं तौ शरीरहीका मल दूरि करिए है, सो मुनि मल दूरि करनेकी इच्छाकरि कमंडलु नाहीं राखै हैं। शास्त्र बांचना आदि कार्य करैं, अर

मल्लिप्त होंय, तौ तिनिका अविनय होय, लोकनिब होंय, तातैं इस धर्मके अर्थि कमंडलु राखिए है । ऐसैं पीछी आदि उपकरण संभवैं, बस्त्रादिककौं उपकरण संज्ञा संभवै नाहीं । काम अरतिआदि मोहका उदयतैं विकार बाह्य प्रगट होंय, अर शीतादिक सहे न जाय, तातैं विकार ढांकनेकौं, वा शीतादि घटावनेकौं, वा बस्त्रादिक राखि मानके उदयतैं अपनी महंतता भी चाहैं तातैं, कल्पित-युक्तिकरि उपकरण ठहराईए है । बहुरि घरघर याचनाकरि आहार ल्यावना ठहराया है । सो प्रथम तौ यह पूछिए है, जो याचना धर्मका अंग है कि पापका अंग है । जो धर्मका अंग है, तौ मांगनेवाले सब धर्मात्मा भए । अर पापका अंग है, तौ मुनिकै कैसें संभवै । बहुरि जो तू कहैगा, लोभकरि किछु धनादिक याचैं, तौ पाप होय; यह तौ धर्म साधनके अर्थि शरीरकी स्थिरता किया चाहै हैं । ताका समाधान,—

आहारादिककरि धर्म होता नाहीं, शरीरका सुख हो है । शरीरका सुखके अर्थि अतिलोभ भए याचना करिए है । जो अति लोभ न होता, तो आप काहेकौं मांगता । वै ही देते तौ देते, न देते तौ न देते । बहुरि अतिलोभ भए यहां ही पाप भया, सब मुनिधर्म नष्ट भया और धर्म कहा साधैगा । अब वह कहै है—मनविषै तौ आहारकी इच्छा होय अर याचै नाहीं, तौ मायाकषाय भया अर याचनेमें हीनता आवै है, सो गर्वकरि याचै नाहीं, तौ मानकषाय भया । आहार लेना था, सो मांगि लिया । यामैं अतिलोभ कहा भया अर यातैं मुनिधर्म कैसें नष्ट भया, सो कहौ । ताकौं कहिए है—



जैसे काहू व्यापारीके कुमावनेकी इच्छा मंद है, सो हाटि (दूकान) उपरि तौ बैठै अर मनविषै व्यापारकरनेकी इच्छा भी है परंतु काहूकौ वस्तु लेनेदेनेरूप व्यापारके अर्थ प्रार्थना नाही करै है। स्वयमेव कोई आवै अर अपनी विधि मिलै, तौ व्यापार करै है। तौ ताके लोभकी मंदता है, माया वा मान नाही हैं। माया वा मानकषाय तौ तब होय, जब छलकरनेके अर्थ वा अपनी महंतताके अर्थ ऐसा स्वांग करै। सो भले व्यापारीके ऐसा प्रयोजन नाही। तातैं बाके माया मान न कहिए। तैसें मुनिनके आहारादिककी इच्छा मंद है, सो आहार लेनेकौ आवैं अर मनविषै आहारलेनेकी इच्छा भी है, परंतु आहारके अर्थ प्रार्थना नाही करै हैं। स्वयमेव कोई दे, तौ अपनी विधि मिले आहार ले हैं। तौ उनके लोभकी मंदता है, माया वा मान नाही है। माया मान तौ तब होय, जब छल करनेके अर्थ वा महंतताके अर्थ ऐसा स्वांग करै। सो मुनिनके ऐसें प्रयोजन हैं नाही। तातैं इनिके माया मान नाही है। जो ऐसें ही माया मान होय, तौ जे मनहीकरि पाप करैं वचनकायकरि न करैं, तिन सबनिके माया ठहरै। अर जे उच्चपदके धारक नीचवृत्ति नाही अंगीकार करै हैं, तिन सबनिके मान ठहरै। ऐसें अनर्थ होय। बहुरि तैं कब्या—“आहार मागनेमें अतिलोभ कहा भया” सो अतिकषाय होय, तब लोकनिघ कार्य अंगीकारकरिके भी मनोरथ पूर्ण किया चाहै, सो मांगना लोकनिघ है, ताकौ भी अंगीकारकरि आहारकी इच्छा पूर्ण करनेकी चाहि भई। तातैं यहां अतिलोभ भया। बहुरि तैं कब्या—“मुनिधर्म कैसें नष्ट भया,” सो मुनिधर्मविषै ऐसी तीव्रकषाय संभवै नाही। बहुरि

काहूका आहारदेनेका परिणाम न था, यानै वाका घरमें जाय याचना करी । तहां वाकै सकुचना भया वा न दिए लोकनिघ-होनेका भय भया । तातैं वाकौं आहार दिया, सो वाका अंतरंग प्राण पीड़नेतैं हिंसाका सद्भाव आया । जो आप वाका घरमें न जाते, उसहीकै देनेका उपाय होता, तौ देता । वाकै हर्ष होता । यह तौ दवायकरि कार्य करावना भया । बहुरि अपना कार्यकै अर्थि याचनारूप वचन है, सो पापरूप है । सो यहां असत्यवचन भी भया । बहुरि वाकै देनेकी इच्छा न थी, यानै जाच्या, तब वानै अपनी इच्छातैं दिया नाही—सकुचिकरि दिया । तातैं अदत्त-ग्रहण भी भया । बहुरि गृहस्थके घरमें स्त्री जैसें तैसें तिष्ठै थी, यह चल्या गया । तहां ब्रह्मचर्यकी बाड़िका भंग भया । बहुरि आहार ल्याय, केतेक काल राख्या । आहारादिक राखनेकौं पात्रादिक राखे, सो परिग्रह भया । ऐसें पांच महाव्रतनिका भंग होनेतैं मुनिधर्म नष्ट हो है तातैं याचनाकरि आहार लेना मुनिकौं युक्त नाही । बहुरि वै कहै हैं—मुनिकै बाईस परीषहनि-विषै याचनापरीषह कही है, सो मांगेविना तिस परीषहका सहना कैसें होय ? ताका समाधान—

याचना करनेका नाम याचनापरीषह नाही है । याचना न करनी, ताका नाम याचनापरीषह है । जातैं अरति करनेका नाम अरतिपरीषह नाही, अरति न करनेका नाम अरतिपरीषह है तैसें जानना । जो याचना करना, परीषह ठहरै, तौ रंकादि घनी याचना करै हैं, तिनकै घना धर्म होय । अर कहोगे, मान घटा-वनेतैं याकौं परीषह कहै हैं, तौ कोई कषायी कार्यके अर्थि कोई

कषाय छोरे भी पापी ही होय । जैसे कोई लोभके अर्थि अपन्न अपमानकों भी न गिनें, तौ ताके लोभकी तीव्रता है । उस अपमान करावनेतैं भी महापाप हो है । अर आपके इच्छा किछू नाहीं, कोई स्वयमेव अपमान करै है, तौ वाके महाधर्म हो है । सो यहां तौ भोजनका लोभके अर्थि याचनाकरि अपमान कराया, तातैं पाप ही है धर्म नाहीं । बहुरि वस्त्रादिकके भी अर्थि याचना करै हैं, सो वस्त्रादिक कोई धर्मका अंग नाहीं है । शरीरसुखका कारण है । तातैं पूर्वोक्तप्रकार ताका निषेध जानना । अपना धर्मरूप उच्चपदकों याचनाकरि नीचा करै हैं, सो यामैं धर्मकी हीनता हो है । इत्यादि अनेकप्रकारकरि मुनिधर्मविषै याचनाआदि नाहीं संभवै है । सो ऐसी असंभवती क्रियाके धारक साधु गुरु कहै हैं । तातैं गुरुका स्वरूप अन्यथा कहै हैं । बहुरि धर्मका स्वरूप अन्यथा कहै हैं । सम्यग्दर्शन ज्ञान चारित्र इनकी एकता मोक्षमार्ग है, सो ही धर्म है सो इनिका स्वरूप अन्यथा प्ररूपै हैं । सो ही कहिए है—

तत्त्वार्थश्रद्धान सम्यग्दर्शन है, ताकी तौ प्रधानता नाहीं । आप जैसे अरहंत देव साधु गुरु दया धर्मकों निरूपै हैं, तिनका श्रद्धानकों सम्यग्दर्शन कहै हैं । सो प्रथम तौ अरहंतादिकका स्वरूप अन्यथा कहै । बहुरि इतने ही श्रद्धानतैं तत्त्वश्रद्धान भए विना सम्यक्त्व कैसें होय, तातैं मिथ्या कहै हैं । बहुरि तत्त्वनिकाश्रद्धानकों सम्यक्त्व कहै हैं । प्रयोजनलिए तत्त्वनिकाश्रद्धान नाहीं कहै हैं । गुणस्थान मार्गणादिरूप जीवका, अणुस्कंधादिरूप अजीवका, पुण्यपापके स्थाननिका, अविरतिआदि आश्रवनिका,

व्रतादिरूप संवरका, तपश्चरणादिरूप निर्जराका, सिद्ध होनेके लिंगादिके भेदनिकरि मोक्षका स्वरूप जैसे उनके शास्त्रविषै कक्षा है, तैसें सीखि लीजिए । अर केवलीका वचन प्रमाण है, ऐसें तत्त्वार्थश्रद्धानकरि सम्यक्त्व भया मानै हैं । सो हम पूछै हैं, प्रैवेयिक जानेवाला द्रव्यलिंगी मुनिकै ऐसा श्रद्धान हो है कि नाहीं । जो हो है, तौ वाकौ मिथ्यादृष्टी काहेकौ कहौ । अर न हो है, तौ वानै तौ जैनलिंग धर्मबुद्धिकरि धार्या है, ताकै देवादिकी प्रतीति कैसें नाहीं भई । अर वाकै बहुत शास्त्राभ्यास है, सो वानै जीवादिके भेद कैसें न जाने । अर अन्यमतका लवलेश भी अभिप्रायमें नाहीं, ताकै अरहंतवचनकी कैसें प्रतीति नाहीं भई । ताँतै वाकै ऐसा श्रद्धान तौ होय, परंतु सम्यक्त्व न भया । बहुरि नारकी भोगभूमियां तिर्यचआदिकै ऐसा श्रद्धानहोनेका निमित्त नाहीं अर तिनिकै बहुतकालपर्यंत सम्यक्त्व रहै है । ताँतै वाकै ऐसा श्रद्धान नाहीं हो है, तौ भी सम्यक्त्व भया । ताँतै सम्यक्श्रद्धानका यह स्वरूप नाहीं । सांचा स्वरूप है, सो आगै वर्णन करैगे, सो जानना । बहुरि जो उनके शास्त्रनिका अभ्यास करना, ताकौ सम्यग्ज्ञान कहै हैं । सो द्रव्यलिंगी मुनिकै शास्त्राभ्यास होतै भी मिथ्याज्ञान कक्षा । असंयत सम्यग्दृष्टीकै विषयादिरूप जानना ताकौ सम्यग्ज्ञान कक्षा । ताँतै यह स्वरूप नाहीं, सांचा स्वरूप आगै कहैगे सो जानना । बहुरि उनकरि निरूपित अणुव्रत महाव्रतादिरूप श्रावक यतीका धर्म धारनेकरि सम्यक्चारित्र भया मानै । सो प्रथम तौ व्रतादिका स्वरूप अन्यथा कहै, सो किछू पूर्वै गुरुवर्णनविषै कक्षा है । बहुरि द्रव्यलिंगीकै महाव्रत होतै भी

सम्यक्चारित्र न हो है । अर उनका मतके अनुसारि गृहस्थादि-  
 ककै महाव्रतआदि विना अंगीकार किए भी सम्यक्चारित्र हो है,  
 तातैं यह स्वरूप नाहीं । सांचास्वरूप अन्य है, सो आगैं कहेंगे ।  
 यहां वह कहै हैं—द्रव्यलिङ्गीकै अंतरंगविषै पूर्वोक्त श्रद्धानादिक  
 भए, सो बाह्य ही भए, तातैं सम्यक्तवादि न भए । ताका उत्तर—  
 जो अंतरंग नाहीं अर बाह्य धारै, सो तौ कपटकरि धारै । सो  
 वाकै कपट होय, तौ त्रैवेयिक कैसें जाय, नरकादिविषै जाय ।  
 बंध तौ अंतरंग परिणामनितैं हो है । सो अंतरंग जिनधर्मरूप  
 परिणाम भए विना त्रैवेयिक जाना संभवै नाहीं । बहुरि व्रतादिरूप  
 शुभोपयोगहीतैं देवका बंध मानै, अर याहीकों मोक्षमार्ग मानै,  
 सो बंधमार्ग मोक्षमार्गकों एक किया, सो यह मिथ्या है । बहुरि  
 व्यवहारधर्मविषै अनेक विपरीति निरूपै हैं । निंदककों मारनेमें  
 पाप नाहीं, ऐसा कहै हैं । सो अन्यमती निंदक तीर्थकरादिकके  
 होतैं भी भए, तिनकों इंद्रादिक मारे नाहीं । सो पाप न होता,  
 तौ इंद्रादिक क्यों न मारे । बहुरि प्रतिमाकै आभरणादि बनावै हैं,  
 सो प्रतिबिंब तौ वीतरागभाव बधावनेकों कारण स्थापन किया था ।  
 आभरणादि बनाए, अन्यमतकी मूर्तिवत् यह भी भए । इत्यादि  
 कहां ताई कहिए, अनेक अन्यथा निरूपण करै हैं । या प्रकार  
 श्वेतांबरमत कल्पित जानना । यहां सम्यग्दर्शनका अन्यथा निरू-  
 पणतैं मिथ्यादर्शनादिकहीकों पुष्टता हो है । तातैं याका श्रद्धानादि  
 न करना ।

बहुरि इन श्वेतांबरनिविषै ही द्वंद्विया प्रगट भए हैं, ते आपकों  
 सांचे धर्मात्मा मानै हैं, सो भ्रम है । काहेतैं सो कहिए है,—

केई तौ भेष धारि साधु कहावै हैं, सो उनके ग्रंथनिकै अनुसार भी व्रत समिति गुप्तिआदिका साधन नाही भासै है । बहुरि मन वचन काय कृत कारित अनुमोदनाकरि सर्व सावधयोग त्याग करनेकी प्रतिज्ञा करै, पीछें पालै नाही । बालककौ वा भोलाकौ वा शूद्रादिककौ ही दीक्षा दें । सो ऐसैं त्याग करै अर त्याग करतैं ही किछू विचार न करै, जो कहा त्याग करों हौं । पीछें पालै भी नाही अर ताकौं सर्व साधु मानैं । बहुरि यह कहै,—पीछें धर्मबुद्धि होय जाय, तब तौ याका भला हो है । सो पहले ही दीक्षा देनेवालेनैं प्रतिज्ञाभंग होती जाणि प्रतिज्ञाभंग कराई, अर यानैं प्रतिज्ञा अंगीकारकरि भंग करी, सो यह पाप कौनकौं लाग्या । पीछें धर्मात्मा होनैका निश्चय कहा । बहुरि जो साधुका धर्म अंगीकारकरि यथार्थ न पालै, ताकौं साधु मानिए कै न मानिए । जो मानिए, तौ जे साधु मुनि नाम धरावै हैं, अर ऋषि हैं, तिन सबनिकौं साधु मानौं । न मानिए, तौ इनकै साधुपना न रखा । तुम जैसे आचरणतैं साधु मानौ हौ, ताका भी पालना कोऊ बिरलाकै पाईए है । सबनिकौं साधु काहेकौं मानौ हौ । यहां कोऊ कहै—हम तौ जाकै यथार्थ आचरण देखैंगे, ताकौं साधु मानैंगे औरकौं न मानैंगे । ताकौं पूछिए है—एकसंघविषै बहुत भेषी हैं । तहां जाकै यथार्थ आचरण मानौ हौ, सो यह औरनिकौं साधु मानै है कि न मानै है । जो मानै है, तौ तुमतैं भी अश्रद्धानी भया, ताकौं पूज्य कैसैं मानौ हौ । अर न मानै है, तौ उनसेती साधुका व्यवहार काहेकौं वर्तै है । बहुरि आप तौ उनकौं साधु न मानै अर अपने संघविषै राखि औरनि पासि साधु मनाय

औरनिकों अश्रद्धानी करै, ऐसा कपट काहेकों करै । बहुरि तुम जाकों साधु न मानौगे, तब अन्य जीवनिकों भी ऐसा ही उपदेश देवौगे इनकों साधु मति मानौ, ऐसैं धर्मपद्धतिविषै विरुद्ध होय । अर जाकों तुम साधु मानो हौ, तिसतैं भी तुम्हारा विरुद्ध भया । जातैं वह वाकों साधु मानै है । बहुरि तुम जाकै यथार्थ आचरण मानौ हौ, सो विचारकरि देखौ, वह भी यथार्थ मुनिधर्म नहीं पालै है । कोऊ कहै—अन्य भेषधारीनितैं तौ घने आछे हैं—तातैं हम मानै हैं । सो अन्यमतीनिविषै तौ नानाप्रकार भेष संभवैं, जातैं तहां रागभावका निषेध नहीं । इस जैनमतविषै तौ जैसा कह्या, तैसा ही भए साधु संज्ञा होय । यहां कोऊ कहै—शील संयमादि पालै हैं, तपश्चरणादि करै हैं, सो जेता करैं तितना ही भला है । ताका समाधान,—

यह सत्य है, धर्म थोरा भी पाल्याहुवा भला है । परंतु प्रतिज्ञा तौ बड़े धर्मकी करिए अर पालिए थोरा, तौ तहां प्रतिज्ञाभंगतैं महापाप हो है । जैसैं कोऊ उपवासकी प्रतिज्ञाकरि एकवार भोजन करै, तौ बहुतवार भोजनका संयम होतैं भी प्रतिज्ञाभंगतैं पापी कहिए । तैसैं मुनिधर्मकी प्रतिज्ञा करि कोई किंचित् धर्म न पालै, तौ वाकों शीलसंयमादि होतैं भी पापी ही कहिए । अर जैसैं एकंतकी ( एकासनकी ) प्रतिज्ञाकरि एकवार भोजन करै, तौ धर्मात्मा ही है । तैसैं अपना श्रावकपद धारि थोरा भी धर्म साधन करै, तौ धर्मात्मा ही है । यहां तौ ऊंचा नाम धराय नीची क्रिया करनेतैं पापीपना संभवै है । यथायोग्य नाम धराय धर्मक्रिया करतैं, तौ पापीपना होता नहीं । जेता धर्म साधै, तेता ही भला

है। यहां कोऊ कहै—पंचमकालका अंतपर्यंत चतुर्विधि संघका सद्भाव कब्जा है। इनको साधु न मानिए, तौ किसको मानिए। ताका उत्तर—

जैसे इस कालविषै हंसका सद्भाव कब्जा है अर गम्यक्षेत्रविषै हंस नाहीं दीसै हैं, तौ औरनिकों तौ हंस माने जाते नाहीं, हंसकासा लक्षणमिले ही हंस माने जाय। तैसें इस कालविषै साधुका सद्भाव है, अर गम्यक्षेत्रविषै साधु न दीसै हैं, तौ औरनिकों तौ साधु माने जाते नाहीं। साधुके लक्षणमिलै ही साधु माने जाय। बहुरि इनका भी अबार थोरे ही क्षेत्रविषै सद्भाव दीसै है, तहांतै परै क्षेत्रविषै साधुका सद्भाव कैसें मानै। जो लक्षण मिले मानौ, तौ यहां भी ऐसें ही मानौ। अर विनालक्षण मिले ही मानौ, तौ तहां अन्य कुलिंगी हैं तिनहीको साधु मानौ। ऐसें मानैतै विपरीति होय, तातै बनै नाहीं। कोऊ कहै—इस पंचमकालमें ऐसें भी साधुपद हो है, तौ ऐसा सिद्धांतका वचन बतावौ। विना ही सिद्धांत तुम मानो हौ, तौ पापी होवोगे। ऐसें अनेक युक्तिकरि इनके साधुपना बनै नाहीं है। अर साधुपना विना साधु माने गुरु माने मिथ्यादर्शन हो है। जातै भले साधुको ही गुरु माने, सम्यग्दर्शन हो है।

बहुरि श्रावकका धर्मकी अन्यथा प्रवृत्ति करावै हैं। त्रसकी हिंसा स्थूल मृषादि होतै भी जाका किञ्च प्रयोजन नाहीं, ऐसा किंचित् त्याग कराय वाको देशव्रती भया कहै। सो वै त्रसघातादि जाभै होय ऐसा कार्य करै। सो देशव्रत गुणस्थानविषै तौ ग्यारह अविरति कहे हैं, तहां त्रसघात कैसें संभवै। बहुरि ग्यारह



प्रतिमाभेद श्रावकके हैं, तिनविषै दशमी ग्यारमी प्रतिमाधारक श्रावक तौ कोई होता नहीं, अर साधु होंय । पूछै, तब कहै— पडिमाधारी श्रावक अवार होय सकता नहीं । सो देखो, श्रावक-धर्म तौ कठिन अर मुनिधर्म सुगम ऐसा विरुद्ध भाषै हैं । बहुरि ग्यारमी प्रतिमाधारककै थोरा परिग्रह मुनिकै बहुतपरिग्रह बतावै, सो संभवता वचन नहीं । बहुरि कहै, ए प्रतिमा तौ थोरे ही काल पालि छोड़ि दीजिए है । सो कार्य उत्तम है, तौ धर्मबुद्धि ऊंची क्रियाकौ काहेकौ छोरे । अर नीचे कार्य हैं, तौ काहेकौ अंगीकार करै । यह संभवै ही नहीं । बहुरि कुदेव कुगुरुकौ नमस्कारादि करतै भी श्रावकपना बतावै । कहै, धर्मबुद्धिकरि तौ नहीं बंदै हैं, लौकिक व्यवहार है । सो सिद्धांतविषै तौ तिनकी प्रशंसा स्तवनकौ भी सम्यक्त्वका अतिचार कहै अर गृहस्थ-निका भला मनावनैकै अर्थि बंदना करतै भी किछू न कहै । बहुरि कहौगे—भय लज्जा कुतूहलादिकरि बंदै हैं, तौ इन कारणनिकरि कुशीलादि सेवतै भी पाप मति कहौ । अंतरंगविषै पाप जान्या चाहिए । ऐसै सर्व आचरनविषै विरुद्ध होगा । मिथ्यात्वसारिखे महापापकी प्रवृत्ति छुड़ावनैकी तौ मुख्यता नहीं, अर पवनकायकी हिंसा ठहराय उधारे मुख बोलना छुड़ावनेकी मुख्यता पाईए । सो क्रमभंग उपदेश है । बहुरि धर्मके अंग बहुत हैं, तिनविषै एक परजीवकी दया ताकौ मुख्य कहै हैं । ताका भी विवेक नहीं । जलका छानना, अन्नका शोधना, सदोष वस्तुका भक्षण न करना, हिंसादिकरूप व्यापार न करना, इत्यादि याके अंगनिकी तौ मुख्यता नहीं । बहुरि पाटीका बांधना, शौचादिक थोरा करना,

इत्यादि कार्यनिकी मुख्यता करै हैं । सो मैलयुक्त पाटीकै थूकका संबंधतैं जीव उपजैं, तिनका तौ यल नाही अर पवनकी हिंसाका यल बतावैं । सो नासिकाकरि बहुत पवन निकसै, ताका तौ यल करते ही नाही । बहुरि जो उनका शास्त्रकै अनुसारि बोलनेहीका यल किया, तौ सर्वदा काहेकौं राखिए । बोलिए, तत्र यल कर ली-जिए । बहुरि जो कहैं—भूलि जाय । तौ इतनी भी याद न रहै, तौ अन्य धर्मसाधन कैसें होगा । बहुरि शौचादिक थोरे करिए, सो संभवता शौच तौ मुनि भी करै हैं । तातैं गृहस्थकौं अपने योग्य शौच करना । स्त्रीसंगमादिकरि शौच किए विना सामायिकादि क्रियाकरनेतैं अविनय विक्षिप्तताआदिकरि पाप उपजै । ऐसैं जिनकी मुख्यता करैं, तिनका भी ठिकाना नाही । अर केई दयाके अंग योग्य पालै हैं । हरितकायत्याग आदि करैं, जल थोरा नाखैं, इनका हम निषेध करते नाही । बहुरि इस अहिंसाका एकांत पकड़ि प्रतिमा चैत्यालयपूजनादि क्रियाका उत्थापन करै हैं । सो उनहीके शास्त्रनिविधै प्रतिमाआदिका निरूपण है, ताकौं आग्रहकरि लोपै हैं । भगवतीसूत्रविधै ऋद्धिधारी मुनिका निरूपण है । तहां मेरुगिरिआदिविधै जाय “तत्थ चैययाइं वंदई” ऐसा पाठ है । याका अर्थ यह—तहां चैत्यनिकौं वंदै है । सो चैत्य नाम प्रतिमाका प्रसिद्ध है । बहुरि वै हठकरि कहै हैं—चैत्य शब्दके ज्ञानादिक अनेक अर्थ निपजै हैं, सो अन्य अर्थ है प्रतिमाका अर्थ नाही । याकौं पूछिए है—मेरुगिरि नंदीश्वरद्वीपविधै जाय जाय तहां चैत्यवंदना करी, सो तहां ज्ञानादिककी वंदना करनेका अर्थ कैसें संभवै । ज्ञानादिककौं वंदना तौ सर्वत्र

संभवै । जो वंदने योग्य चैत्य तहां ही संभवै अर सर्वत्र न संभवै, ताकाँ तहां वंदनाकरनेका विशेष संभवै, सो ऐसा संभवता अर्थ प्रतिमा ही है । अर चैत्यशब्दका मुख्य अर्थ प्रतिमा ही है, सो प्रसिद्ध है । इस ही अर्थकरि चैत्यालय नाम संभवै है । याकाँ हठकरि काहेकाँ लोपिए । बहुरि नंदीश्वर द्वीपादिकविषै जाय, देवादिक पूजनादि क्रिया करै हैं, ताका व्याख्यान उनकै जहां तहां पाईए है । बहुरि लोकविषै जहां तहां अकृत्रिम प्रतिमाका निरूपण है । सो या रचना अनादि है । यह भोग कुतूहलादिककै अर्थ तौ है नाहीं । अर इंद्रादिकनिके स्थाननिविषै निःप्रयोजन रचना संभवै नाहीं । सो इंद्रादिक तिनकाँ देखि कहा करै हैं । कै तौ अपने मंदरनिविषै निःप्रयोजन रचना देखि, उसतैं उदासीन होते होंगे तहां दुःख होता होगा, सो संभवै नाहीं । कै आछी रचना देखि विषय पोषते होंगे, सो अर्हत मूर्त्तिकरि सम्यग्दृष्टी अपना विषय पोषै, यह भी संभवै नाहीं । तातैं तहां तिनकी भक्त्यादिक ही करै हैं, यह ही संभवै है । सो उनकै सूर्याभदेवका व्याख्यान है । तहां प्रतिमाजीके पूजनेका विशेष वर्णन किया है । याकाँ गोपनेकै अर्थ कहै हैं, देवनिका ऐसा ही कर्त्तव्य है । सो सांच, परंतु कर्त्तव्यका तौ फल होय ही होय । सो तहां धर्म हो है कि पाप हो है । जो धर्म हो है, तौ अन्यत्र पाप होता था यहां धर्म भया । याकाँ औरनिकै सदृश कैसै कहिए । यह तौ योग्य कार्य भया । अर पाप हो है तौ तहां 'णमोत्थुणं' का पाठ पढ़्या, सो पापकै ठिकानै ऐसा पाठ काहेकाँ पढ़्या । बहुरि एक विचार यहां यह आया, जो

‘णमोत्थुणं’के पाठविषै तौ अरहंतकी भक्ति है । सो प्रतिमाजीके आगै जाय यह पाठ पढ़्या, तातैं प्रतिमाजीके आगै जो अरहंत भक्तिकी क्रिया है, सो करनी युक्त भई । बहुरि जो वह ऐसा कहै—देवनिकै ऐसा कार्य है मनुष्यनिकै नाहीं । जातैं मनुष्यनिकै प्रतिमाआदि बनावनेविषै हिंसा हो है । तौ उनहीके शास्त्रविषै ऐसा कथन है, द्रोपदी राणी प्रतिमाजीका पूजनादिक जैसे सूर्याभदेव किया, तैसें करते भई । तातैं मनुष्यनिकै भी ऐसा कार्य कर्त्तव्य है । यहां एक यह विचार आया—चैत्यालय प्रतिमा बनावनेकी प्रवृत्ति न थी, तौ द्रोपदी कैसें प्रतिमाका पूजन किया । बहुरि प्रवृत्ति थी, तौ बनावनेवाले धर्मात्मा थे कि पापी थे । जो धर्मात्मा थे तौ गृहस्थनिकौ ऐसा कार्य करना योग्य भया । अर पापी थे, तौ तहां भोगादिकका प्रयोजन तौ था नाहीं, काहेकौ बनाया । बहुरि द्रोपदी तहां ‘णमोत्थुणं’का पाठ किया वा पूजनादि किया, सो कुतूहल किया कि धर्म किया । जो कुतूहल किया, तौ महापापिनी भई । धर्मविषै कुतूहल कहा । अर धर्म किया, तौ ओरनिकौ भी प्रतिमाजीकी स्तुति पूजा करनी युक्त है । बहुरि वै ऐसी मिथ्यायुक्ति बनावै हैं—जैसें इंद्रकी स्थापनातैं इंद्रकी कार्यसिद्धि नाहीं, तैसें अरहंतप्रतिमाकरि कार्यसिद्धि नाहीं । सो अरहंत काहूकौ भक्त मानि भला करते होंय, तौ ऐसें भी मानै । सो तौ वै भी वीतराग हैं । यह जीव भक्तिरूप अपने भावनितैं शुभफल पावै है । जैसें स्त्रीका आकाररूप काष्ठ पाषाणकी मूर्ति देखि, तहां विकाररूप होय अनुराग करै, तौ ताकै पापबंध होय । तैसें अरहंतका आकाररूप धातु काष्ठ पाषाणकी मूर्ति देखि, धर्म-

बुद्धितैं तहा अनुराग करै, तौ शुभकी प्राप्ति कैसें न होय । तहां वह कहै है, विना प्रतिमा ही हम अरहंतविषै अनुराग उपजावैगै । तौ उनकाँ कहिए है—आकार देखे जैसा भाव होय, तैसा परोक्ष स्मरण किए होय नाहीं । याहीतैं लोकविषै भी स्त्रीका अनुरागी स्त्रीका चित्र बनावै है । तातैं प्रतिमाका अवलंबनकरि विशेष भक्ति होनेतैं विशेष शुभकी प्राप्ति हो है । कोऊ कहै—प्रतिमाकाँ देखो, परंतु पूजनादिक करनेका कहा प्रयोजन है । ताका उत्तर,—

जैसें कोऊ किसी जीवका आकार बनाय, रुद्रभावनितैं घात करै, तौ वाकै उस जीवकी हिंसा किएकासा पाप लगै, वा कोऊ काहूका आकार बनाय द्वेषबुद्धितैं वाकी बुरी अवस्था करै, तौ जाका आकार बनाया, वाकी बुरी अवस्था किएकासा फल निपजै । तैसें अरहंतका आकार बनाय रागबुद्धितैं पूजनादि करै, तौ अरहंतके पूजनादि किएकासा शुभ फल निपजै । अतिअनुराग भए प्रत्यक्ष दर्शन न होतैं आकार बनाय पूजनादि करिए है । इस धर्मानुरागतैं महापुण्य उपजै है । बहुरि ऐसी कुत्तर्क करै हैं,—जो जाकै जिस वस्तुका त्याग होय, ताकै आगै तिस वस्तुका धरना हास्य करना है । तातैं चंदनादिकरि अरहंतका पूजन युक्त नाहीं । ताका समाधान,—

मुनिपद लेतैं ही सर्व परिग्रहका त्याग किया था, पीछैं केवल-ज्ञान भए तीर्थकरदेवकै समवसरणादि बनाए, छत्र चामरादि किए, सो हास्य करी कि भक्ति करी । हास्य करी तौ इंद्र महापापी भया, सो बनै नाहीं । भक्ति करी, तौ पूजनादिकविषै भी भक्ति ही करिए है । छद्मस्थकै आगै त्याग करी वस्तुका धरना हास्य है ।

जातें बाकै विक्षिप्तता होय आवै है । केवलीकै वा प्रतिमाकै आगैं अनुरागकरि उत्तम वस्तु धरनेका दोष नाही । उनकै विक्षिप्तता होती नाही । धर्मानुरागतै जीवका भला होय । बहुरि वह कहै है—प्रतिमा बनावनेविषै, चैत्यालयादि करावनेविषै, पूजनादि करावनेविषै हिंसा होय अर धर्म अहिंसा है । तातैं हिंसाकरि धर्म माननेतैं महापाप हो है, तातैं हम इन कार्यानिको निषेधैं हैं । ताका उत्तर—

उनहीके शास्त्रविषै ऐसा वचन है,—

सुच्चा जाणइ कल्लाणं सुच्चा जाणइ पावगं ।

उभयं पि जाणये सुच्चा जं सेयं तं समायर ॥ १ ॥

यहां कल्याण पाप उभय ए तीन, शास्त्र सुनिकरि जाणै, ऐसा कखा । सो उभय तौ पाप अर कल्याण मिलें होय, ऐसा कार्यका भी होना ठहस्या । तहां पूछिण है—केवल धर्मतैं तौ उभय घाटि है ही, अर केवल पापतैं उभय बुरा है कि भला है । जो बुरा है, तौ यामैं तौ किछु कल्याणका अंश मिल्या, पापतैं बुरा कैसे कहिए । भला है, तौ केवल पाप छोड़ि ऐसा कार्य करना ठहस्या । बहुरि युक्तिकरि भी ऐसैं ही संभवै है । कोऊ त्यागी होय, मंदिरादिक नाही करावै है, वा सामायिकादि निरवद्य कार्यानिविषै प्रवर्तै है । ताकाँ तौ छोरि प्रतिमादि करावना पूजनादि करना उचित नाही । परंतु कोई अपने रहनेकै वास्तै मंदिर आदि बनावै, तिसतैं तौ चैत्यालयादि करावनेवाला हीन नाही । हिंसा तौ भई, परंतु बाकै तौ लोभ पापानुरागकी वृद्धि भई, याकै लोभ हूत्र्या, धर्मानुराग भया । बहुरि कोई व्यापारादि कार्य करै, तिसतैं

पूजनादि कार्य करना हीन नहीं । वहां तौ हिंसादि बहुत हो है, लोभादि बधै है, पापहीकी प्रवृत्ति है । यहां हिंसादिक भी किंचित् हो है, लोभादि घटै है, धर्मानुराग बधै है । ऐसैं जे त्यागी न होय, अपने धनकौ पापविषै खरचते होय, तिनकौ चैत्यालयादि करावना । अर निरवद्य सामायिकादि कार्यनिविषै उपयोगकौ नहीं लगाय सकै, तिनकौ पूजनादि करना निषेध नहीं । बहुरि तुम कहौगे, निरवद्य सामायिक कार्य ही क्यों न करै, धर्मविषे काल गमावना तहां ऐसे कार्य काहेकौ करै । ताका उत्तर,—

जो शरीरकरि पाप छोरें ही निरवद्यपना होय, तौ ऐसैं ही करै । सो तौ है नहीं । परिणामनितैं पाप छूटें निरवद्यपना हो है । सो विना अवलंबन सामायिकादिविषै जाका परिणाम लागै नहीं, सो पूजनादिकरि तहां उपयोग लगावै है । तहां नाना प्रकार आलंबनकरि उपयोग लगि जाय है । जो तहां उपयोगकौ न लगावै, तौ पापकार्यनिविषै उपयोग भटकै तब बुरा होय । तातैं तहां प्रवृत्ति करनी युक्त है । बहुरि तुम कहो हौ—धर्मकै अर्थ हिंसा किए तौ महा पाप हो है, अन्यत्र हिंसा किए थोरा पाप हो है, सो यह प्रथम तौ सिद्धांतका वचन नहीं । अर युक्तितैं भी मिलै नहीं । जातैं ऐसैं मानैं इंद्र जन्मकल्याणविषै बहुत जलकरि अभिषेक करै है । समवसरणविषै देव पुष्पवृष्टि चमरदारना इत्यादि कार्य करै हैं, सो ये महापापी होय । जो तुम कहोगे, उनका ऐसा ही व्यवहार है, तौ क्रियाका फल तौ भए विना रहता नहीं । जो पाप है, तौ इंद्रादिक तौ सम्यग्दृष्टी हैं, ऐसा कार्य काहेकौ करै । अर धर्म है, तौ काहेकौ निषेध करो हौ ।

बहुरि तुमकों ही पूछै हैं—तीर्थकर वंदनाकों राजादिक गए, वा साधुवंदनाकों दूरि जाईए है, सिद्धांत सुनने आदि कार्यनिकों गमनादि करिए है । तहां मार्गविषै हिंसा भई । बहुरि साधुर्मी जिमाईए है, साधुका मरण भए ताका संस्कार करिए है, साधु होतैं उत्सव करिए है, इत्यादि प्रवृत्ति अब भी दीसै है । सो यहां भी हिंसा हो है, सो ये कार्य तौ धर्महीके अर्थ हैं अन्य कोई प्रयोजन नाहीं । जो यहां महापाप उपजै है, तौ पूर्वे ऐसे कार्य किए तिनिका निषेध करौ । अर अब भी गृहस्थ ऐसा कार्य करै हैं, तिनिका त्याग कहौ । बहुरि जो धर्म उपजै है, तौ धर्मके अर्थ हिंसाविषै महापाप बताय, काहेकों भ्रमावो हौ । तातैं ऐसे मानना युक्त है । जैसे थोरा धन ठिगाए, बहुत धनका लाभ होय, तौ वह कार्य करना, तैसें थोरा हिंसादिक पाप भए बहुत धर्म निपजै, तौ वह कार्य करना । जो थोरा धनका लोभकरि कार्य बिगारै, तौ मूर्ख है । तैसें थोरी हिंसाका भयतैं बड़ा धर्म छोरै, तौ पापी ही होय । बहुरि कोऊ बहुत धन ठिगावै, अर स्तोक धन निपजावै वा न उपजावै, तौ वह मूर्ख है । तैसें बहुत हिंसादिककरि बहुत पाप उपजावै अर भक्ति आदि धर्मविषै स्तोक प्रवर्तैं वा न प्रवर्तैं, तौ वह पापी ही होय है । बहुरि जैसे विना ठिगाए ही धनका लाभ होतैं ठिगावै, तो मूर्ख है । तैसें निरवद्य धर्मरूप उपयोग होतैं सावद्य धर्मविषै उपयोग लगावना युक्त नाहीं । ऐसें अनेक परिणामनिकरि अवस्था देखि भला होय, सो करना । एकांतपक्ष कार्यकारी नाहीं । बहुरि अहिंसा ही केवल धर्मका अंग नाहीं है । रागादिकनिका



घटना धर्मका मुख्य अंग है । तातैं जैसें परिणामनिविषै रागादि घटैं, सो कार्य करना ।

बहुरि गृहस्थनिकौं अणुत्रतादिकका साधन भएविना ही सामायिक, पडिकमणो, पोसह आदि क्रियानिका मुख्य आचरन करावै हैं । सो सामायिक तौ रागद्वेषरहित साम्यभाव भए होय, पाठमात्र पढ़ैं वा उठना बैठना किए ही तौ होता नाही । बहुरि कहौगे, अन्य कार्य करता, तातैं तौ भला है । सो सत्य, परंतु सामायिकपाठविषै प्रतिज्ञा तौ ऐसी करै, जो मनवचनकायकरि सावद्यकौं न करुंगा, न कराऊंगा अर मनविषै तौ विकल्प हुवा ही करै । अर वचनकायविषै भी कदाचित् अन्यथा प्रवृत्ति होय, तहां प्रतिज्ञाभंग होय । सो प्रतिज्ञाभंग करनेतैं न करना भला । जातैं प्रतिज्ञाभंगका महापाप है । बहुरि हम पूछैं है—कोऊ प्रतिज्ञा भी न करै है, अर भाषापाठ पढ़ै है । ताका अर्थ जानि तिसविषै उपयोग राखै है । अर कोऊ प्रतिज्ञा करै, ताकौं तौ नीकै पालै नाही, अर प्राकृतादिकका पाठ पढ़ै, ताके अर्थका आपकौं ज्ञान नाही, विना अर्थ जानै तहां उपयोग रहै नाही, तब उपयोग अन्यत्र भटकै । जैसें इन दोऊनिविषै विशेष धर्मात्मा कौन । जो पहलेकौं कहोगे, तौ ऐसा ही उपदेश क्यों न कीजिए । दूसरेकौं कहोगे, तौ प्रतिज्ञाभंगका पाप न भया वा परिणामनिके अनुसार धर्मात्मापना न ठहस्या । पाठादिकरनेके अनुसार ठहस्या । तातैं अपना उपयोग जैसें निर्मल होय, सो कार्य करना । सधै सो प्रतिज्ञा करनी । जाका अर्थ जानिए, सो पाठ पढ़ना । पद्धतिकरि नाम धरावनेमें नफा नाही । बहुरि

पडिकमणो नाम पूर्वदोष निराकरण करनेका है । सो 'मिच्छामि दुक्कडं' इतना कहे ही तौ दुष्कृत मिथ्या न होय, मिथ्या होने योग्य परिणाम भए दुष्कृत मिथ्या होय । तातैं पाठ ही कार्यकारी नाहीं । बहुरि पडिकमणाका पाठविषै ऐसा अर्थ है, जो बारह व्रतादिकविषै जो दुष्कृत लाग्यो होय, सो मिथ्या होय । सो व्रतधारे विना ही तिनका पडिकमणा करना कैसैं संभवै । जाकै उपवास न होय, सो उपवासविषै लाग्या दोषका निराकरणपना करै, तौ असंभवपना होय । तातैं यह पाठ पढ़ना कौनप्रकार बने नाहीं । बहुरि पोसहविषै भी सामायिकवत् प्रतिज्ञाकरि नाहीं पालै हैं । तातैं पूर्वोक्त ही दोष है । बहुरि पोसह नाम तौ पर्वका है । सो पर्वके दिन भी केतायक कालपर्यंत पापक्रिया करै, पीछैं पोसहधारी होय । सो जेतै काल बनें, तेतै काल साधन करनेका तौ दोष नाहीं । परंतु पोसहका नाम करिण, सो युक्त नाहीं । संपूर्ण पर्वविषै निरवध रहें ही पोसह होय । जो थोरा भी कालतैं पोसह नाम होय, तौ सामायिककौ भी पोसह कहौ, नाहीं, शास्त्रविषै प्रमाण बतावौ । जो जघन्य पोसहका इतना काल है, सो बड़ा नाम धराय लोगनिकौं भ्रमावना, यह प्रयोजन भासै है । बहुरि आखड़ी लेनेका पाठ तौ और पढ़ै, अंगीकार और करै । सो पाठविषै तौ "मेरै त्याग है" ऐसा वचन हैं, तातैं जो त्याग करै सो ही पाठ पढ़ै, यह चाहिए । जो पाठ न आवै, तौ भाषाहीतैं कहैं । परंतु पद्धतिकै अर्थ यह रीति है । बहुरि प्रतिज्ञा ग्रहण करने करावनेकी मुख्यता है, अर यथाविधि पालनेकी शिथिलता है, भावनिर्मल होनेका विवेक नाहीं । आर्त्तपरिणाम-

निकरि वा लोभादिककरि भी उपवासादिक करै, तहां धर्म मानै । सो फल तौ परिणामनिहै हो है । इत्यादि अनेक कल्पित बातें कहै हैं, सो जैनधर्मविषै संभवै नाहीं । ऐसैं यह जैनविषै श्वेतांबरमत है, सो भी देवादिकका वा तत्त्वनिका वा मोक्षमार्गादिकका अन्यथा निरूपण करै है । तातैं मिथ्यादर्शनादिकका पोषक है, सो त्याज्य है । सांचा जिनधर्मका स्वरूप आगैं कहैं हैं । ताकरि मोक्षमार्गविषै प्रवर्तना योग्य है । तहां प्रवर्तैं तुम्हारा कल्याण होगा ।

इति श्रीमोक्षमार्गप्रकाशक शास्त्रविषै अन्यमतनिरूपक  
पांचवाँ अधिकार समाप्त भया ॥ ५ ॥

दोहा ।

मिथ्या देवादिक भजे, हो है मिथ्याभाव ।

तज तिनकाँ सांचे भजौ, यह हितहेत उपाव ॥ १ ॥

अथ—अनादितैं जीवनिकै मिथ्यादर्शनादिक भाव पाईए है, तिनकी पुष्टताकाँ कारण कुदेवकुगुरुकुधर्मसेवन है । ताका त्याग भए मोक्षमार्गविषै प्रवृत्ति होय । तातैं इनका निरूपण कीजिए है । तहां जे हितका कर्त्तव्य नाहीं अर तिनकाँ अमतैं हितका कर्त्ता जानि सेवै, सो कुदेव है । तिनका सेवन तीनप्रकार प्रयोजनलिए करिए है । कहीं तौ मोक्षका प्रयोजन है । कहीं परलोकका प्रयोजन है । कहीं इसलोकका प्रयोजन है । सो ये प्रयोजन तौ सिद्ध होंय नाहीं । किछू विशेषहानि होय । तातैं तिनका सेवन मिथ्याभाव है । सो ही दिखाईए है—

अन्यमतविषै जिनके सेवनतैं मुक्ति होनी कही है, तिनकाँ

केई जीव मोक्षके अर्थ सेवन करै हैं, सो मोक्ष होय नाही । तिनका वर्णन पूर्वे अन्यमत अधिकारविषै कखा ही है । बहुरि अन्यमतविषै कहे देव, तिनकौं केई परलोकविषै सुख होय दुःख न होय, ऐसे प्रयोजन लिए सेवै हैं । सो ऐसी सिद्धि तौ पुण्य उपजाए अर पाप न उपजाए हो है । सो आप तौ पाप उपजावै है, अर कहै ईश्वर हमारा भला करैगा । तौ तहां अन्याय ठहखा । काहूकौं पापका फल दे, काहूकौं न दे, ऐसा तौ है नाही । जैसा अपना परिणाम करैगा, तैसा ही फल पावैगा । काहूका बुरा भला करनेवाला ईश्वर है नाही । बहुरि तिन देवनिका सेवन करतैं तिन देवनिका तौ नाम करैं, अर अन्य जीवनिकी हिंसा करैं, वा भोजन नृत्यादिककरि अपनी इंद्रियनिका विषय पोषैं, सो पापपरिणामनिका फल तौ लागे विना रहनेका नाही । हिंसा विषय कषायनिकौं सर्व पाप कहै हैं । अर पापका फल भी खोटा ही सर्व मानै हैं । बहुरि कुदेवनका सेवनविषै हिंसा विषयादिकहीका अधिकार है । तातैं कुदेवनके सेवनतैं परलोकविषै भला न हो है । बहुरि घने जीव इस पर्यायसंबंधी शत्रुनाशादिक वा रोगादि मिटावना धनादिककी प्राप्ति वा पुत्रादिककी प्राप्ति इत्यादि दुःख भेटनेका वा सुख पावनेका अनेकप्रयोजन लिए कुदेवनिका सेवन करै हैं । बहुरि हनुमानादिककौं पूजै हैं । बहुरि देवीनिकौं पूजै हैं । बहुरि गणगौर सांझी आदि बनाय पूजै हैं । चौथि शीतला दिहाड़ी आदिकौं पूजै हैं । बहुरि अऊत पितर व्यंतरादिककौं पूजै हैं । बहुरि सूर्य चंद्रमा शनैश्वरादि ज्योतिषीनिकौं पूजै हैं । बहुरि पीर पैगंबरादिकनिकौं पूजै हैं । बहुरि गऊ घोटकादि तिर्यचनिकौं पूजै

हैं। अग्नि जलादिककौं पूजै हैं। शस्त्रादिककौं पूजै हैं। बहुत कहा कहिए, रोड़ी इत्यादिककौं भी पूजै हैं। सो ऐसे कुदेवनिका सेवन मिथ्यादृष्टितै हो है। काहेतै, प्रथम तो जाका सेवन करै, सो केई तौ कल्पनामात्र ही देव हैं। सो तिनिका सेवन कार्यकारी कैसै होय। बहुरि केई व्यंतरादिक हैं, सो ए काहूका भला बुरा करनेकौं समर्थ नाही। जो वै ही समर्थ होय, तौ वै ही कर्ता ठहरै। सो तौ उनका किया किछू होता दीसता नाही। प्रसन्न होय, धनादिक देय सकै नाही। द्वेषी होय बुरा कर सकते नाही। इहां कोऊ कहै—दुःख तौ देते देखिए है, मानेतै दुःख देते रहि जाय हैं। ताका उत्तर,—

याकै पापका उदय होय, तब ऐसी ही उनके कुतूहल बुद्धि होय ताकरि चेष्टा करै। चेष्टा करतै यह दुःखी होय। बहुरि कुतूहलतै वै किछू कहै अर यह उनका कछा न करै, तब वह चेष्टा करनेतै रहि जाय। बहुरि याकौं शिथिल जानि कुतूहल किया करै। बहुरि जो याकै पुण्यका उदय होय, तौ किछू कर सकते नाही। सो दिखाइए है—कोऊ जीव उनकौं पूजै नाही वा उनकी निंदा करै, तौ वै भी उसतै द्वेष करै। परंतु ताकौं दुख देइ सकै नाही। वा ऐसे भी कहते देखिए है, जो हमकौं फलाना मानै नाही, सो उसतै हमारा वश नाही। तातै व्यंतरादिक किछू करणेकौं समर्थ नाही। याका पुण्यपापहीतै दुख हो है। उनके माने पूजे उलटा रोग लागै है। किछू कार्यसिद्धि नाही। बहुरि ऐसा जानना—जे कल्पित देव हैं, तिनका भी कहीं अतिशय चमत्कार होता देखिए है, सो व्यंतरादिककरि किया हो है। कोई पूर्व पर्यायविषै इनका

सेवक था, पीछें मरि व्यंतरादि भया, तहां ही कोई निमित्ततैं ऐसी बुद्धि भई, तब वह लोकविषै तिनिके सेवनेकी प्रवृत्ति करावनेके अर्थि कोई चमत्कार देखि तिस कार्यविषै लग जाय है । जैसे जिन प्रतिमादिकका भी अतिशय होता मुनिए वा देखिए है । सो जिनकृत नाहीं जैनी व्यंतरादिकृत हो है । तैसें कुदेवनिका कोई चमत्कार होय, सो उनके अनुचरि व्यंतरादिकनिकरि किया हो है । बहुरि अन्यमतविषै भक्तनिकी सहाय परमेश्वर करी वा प्रत्यक्ष दर्शन दिए इत्यादि कहै हैं । तहां कोई तौ कल्पित बातें कहै हैं । कोई उनके अनुचर व्यंतरादिककरि किए कार्यनिकों परमेश्वरके किए कहै हैं । जो परमेश्वरके किए होय, तो परमेश्वर तौ त्रिकालज्ञ है । सर्वप्रकार समर्थ है । भक्तकों दुःख काहेकों होने दे । बहुरि अब हू भी देखिए है । म्लेच्छ आय भक्तनकों उपद्रव करै हैं, धर्मविध्वंस करै हैं, मूर्तिको विघ्न करै हैं, सो परमेश्वरकों ऐसे कार्यका ज्ञान न होय, तौ सर्वज्ञपनों रहै नाहीं । जाने पीछें सहाय न करै, तौ भक्तवत्सलता गई वा सामर्थ्यहीन भया । बहुरि साक्षीभूत रहै है, तौ आगैं भक्तनकी सहाय करी कहिए है सो झूठ है । उनकी तौ एकसी वृत्ति है । बहुरि जो कहौंगे—वैसी भक्ति नाहीं है । तौ म्लेच्छनितैं तौ भले हैं, वा मूर्तिआदि तौ उनहीकी स्थापन थी, तिनका विघ्न तौ न होने देना था । बहुरि म्लेच्छपार्पानिका उदय हो है, सो परमेश्वरका किया है कि नाहीं । जो परमेश्वरका किया है, तौ निंदकनिकों मुसी करै, भक्तनकों दुःखी करै, तहां भक्तवत्सलपना कैसें रह्या । अर परमेश्वरका किया न हो है, तौ परमेश्वर सामर्थ्यहीन

मया । तातैं परमेश्वरकृत कार्य नाहीं । कोई अनुचर व्यंतरादिक ही चमत्कार दिखावै है । ऐसा ही निश्चय करना । बहुरि कोऊ पूछै कि, कोई व्यंतर अपना प्रभुत्व कहै, वा अप्रत्यक्षकों बताय दे, कोऊ कुस्थानवासादिक बताय अपनी हीनता कहै, पूछिए सो न बतावै, भ्रमरूपवचन कहै वा औरनिकों अन्यथा परिणमावै, औरनिकों दुख दे, इत्यादि विचित्रता कैसें है, ताका उत्तर—

व्यंतरनिविषै प्रभुत्वकी अधिकता हीनता तौ है, परंतु जो कुस्थानविषै वासादिक बताय हीनता दिखावै है सो तौ कुतूहलतैं वचन कहै है । व्यंतर बालकवत् कुतूहल किया करै । सो जैसें बालक कुतूहलकरि आपकों हीन दिखावै, चिड़ावै, गाली मुनै, बार पाड़ै, पीछै हंसने लगि जाय, तैसें ही व्यंतर चेष्टा करै हैं । जो कुस्थानहीके वासी होंय, तौ उत्तमस्थानविषै आवै हैं तहां कौनके ल्याए आवै हैं । आपहीतैं आवै हैं, तौ अपनी शक्ति होतैं कुस्थानविषै काहेकों रहैं । तातैं इनका ठिकाना तौ जहां उपजै हैं, तहां इस पृथ्वीके नीचै वा ऊपरि है सो मनोज्ञ है । कुतूहलके लिए चाहै सो कहै हैं । बहुरि जो उनकों पीड़ा होती होय, तौ रोवते रोवते हंसने कैसें लगि जाय । इतना है, मंत्रादिककी अचिंत्यशक्ति है, सो कोई सांचा मंत्रके निमित्त नैमित्तिक संबंध होय, तौ वाके किंचित् गमनादि न होय सकै वा किंचित् दुःख उपजै वा केई प्रबल वाकों मनै करै, तब रहि जाय । वा आप ही रहि जाय । इत्यादि मंत्रकी शक्ति है । परंतु जलावना आदि न हो है । मंत्रवाला जलाया कहै । सो विक्रियक शरीरका जलावना

आदि संभवै नहीं। अप्रगट हो जाय सकै है। बहुरि व्यंतर-  
निकै अवधिज्ञान काहूकै स्तोकक्षेत्रकाल जाननेका है, काहूकै  
बहुत है। तहां वाकै इच्छा होय अर आपकै बहुत ज्ञान होय तौ  
अप्रत्यक्षकों पूछै ताका उत्तर दे, वा आपकै स्तोकज्ञान होय तौ  
अन्य महत्ज्ञानीकों पूछि आयकरि जुबाव दे। बहुरि आपकै स्तोक  
ज्ञान होय वा इच्छा न होय, तौ पूछै ताका उत्तर न दे, ऐसा  
जानना। बहुरि स्तोकज्ञानवाला व्यंतरादिककै उपजता केतेक काल  
ही पूर्व जन्मका ज्ञान होय सकै, पीछै स्मरण मात्र रहै है। तातैं  
तहां कोई इच्छाकरि आप किछू चेष्टा करै तौ करै। बहुरि पूर्व-  
जन्मकी बातें कहै। कोऊ अन्य वार्ता पूछै, तौ अवधि तौ थोरा,  
विनाजाने कैसे कहै। बहुरि ताका उत्तर आप न देय सकै, वा  
इच्छा न होय, तहां मान कुतूहलादिकतैं उत्तर न दे, वा झूठ  
बोलै। ऐसा जानना। बहुरि देवनिमै ऐसी शक्ति है, जो अपने  
वा अन्यके शरीरकों वा पुद्गलस्कंधकों इच्छा होय तैसें परिणमावै।  
तातैं नाना आकारादिरूप आप होय, वा अन्य नानाचरित्र दिखावै।  
बहुरि अन्य जीवके शरीरकों रोगादियुक्त करै। यहां इतना है—  
अपनै शरीरकों वा अन्य पुद्गलस्कंधनिकों तौ जेती शक्ति होय तितनै  
ही परिणमाय सकै। जातैं सर्व कार्य करनेकी शक्ति नहीं। बहुरि  
अन्य जीवनिके शरीरादिककों वाका पुण्य पापकै अनुसार परिणमाय  
सकै। वाकै पुण्यउदय होय, तौ आप रोगादिरूप न परिणमाय  
सकै। अर पापउदय होय, तौ वाका इष्टकार्य न करिसकै। ऐसें  
व्यंतरादिकनिकी शक्ति जाननी। यहां कोऊ कहै—इतनी जिनकी  
शक्ति पाईए, तिनके मानने पूजनेमैं दोष कहा, ताका उत्तर,—



आपके पापउदय होतें सुख न देय सकै, पुण्यउदय होतें दुख न देय सकै, वा तिनके पूजनेतें कोई पुण्यबंध होय नाही, रागादिककी वृद्धि होतें पाप ही होय है । तातें तिनिका मानना पूजना कार्यकारी नाही—बुरा करनेवाला है । वहुरि व्यंतरादिक मनावै हैं, पुजावै हैं, सो कुतूहलादिक करै हैं, किञ्च विशेष प्रयोजन नाही राखै हैं । जो उनकाँ मानै पूजै, तिससेती कुतूहल किया करै । जो न मानै पूजै तासुं किञ्च न कहै । जो उनके प्रयोजन ही होय, तौ न मानने पूजनेवालेकाँ घना दुखी करै । सो तौ जिनकै न मानने पूजनेका अवगाह है, तिनिकाँ किञ्च भी कहते दीसते नाही । वहुरि प्रयोजन तौ क्षुधादिककी पीड़ा होय तौ होय, सो उनकै व्यक्त होय नाही । जो होय, तौ उनकै अर्थि नैवेद्यादिक दीजिए है ताकाँ ग्रहण क्यों न करै, वा औरनिकै जिमावने आदि करनेहीकाँ काहेकाँ कहै । तातें उनके कुतूहलमात्र किया है । सो आपकाँ उनके कुतूहलका ठिकाना भए दुःख होय, हीनता होय तातें उनकाँ मानना पूजना योग्य नाही । वहुरि कोऊ पूछै कि व्यंतर ऐसै कहै हैं—गया आदि पिंडप्रदान करो, तौ हमारी गति होय, हम वहुरि न आवैं, सो कहा है । ताका उत्तर,—

जीवनिकै पूर्वभवका संस्कार तौ रहै ही है । व्यंतरनिकें पूर्व-भवका स्मरणादिकतें विशेष संस्कार है । तातें पूर्वभवविषै ऐसी ही वासना थी, जो गयादिकविषै पिंडप्रदानादि किए गति हो है । तातें ऐसै कार्य करनेकाँ कहै हैं । मुसलमानआदि मरि व्यंतर हो हैं, ते ऐसै कहै नाही । वै अपने संस्काररूप ही वचन कहै । तातें सर्व व्यंतरनिकी गति तैसै ही होती होय, तौ सब ही समान

प्रार्थना करें। सो है नाहीं, ऐसा जानना। ऐसैं व्यंतरादिकनिका-  
स्वरूप जानना।

बहुरि सूर्य चंद्रमा ग्रहादिक ज्योतिषी हैं, तिनकौं पूजै हैं सो भी भ्रम है। सूर्यादिककौं भी परमेश्वरका अंश मानि पूजै हैं। सो वाकै तौ एक प्रकाशका ही अधिक्य भासै है। सो प्रकाशमान् अन्य रत्नादिक भी हो हैं। अन्य कोई ऐसा लक्षण नाहीं, जातैं वाकौं परमेश्वरका अंश मानिए। बहुरि चंद्रमादिककौं धनादिककी प्राप्तिके अर्थ पूजै हैं। सो उसके पूजनेतैं ही धन होता होय, तौ सर्वदरिद्री इस कार्यकौं करें। तातैं ए मिथ्याभाव है। बहुरि ज्योतिषके विचारतैं खोटे ग्रहादिक आए, तिनिका पूजनादि करै हैं, ताकै अर्थ दानादिक दे हैं। सो जैसे हिरणादिक स्वयमेव गमनादि करै हैं, पुरुषकै दाहिणें वावैं आए सुख दुख होनेका आगामी ज्ञानको कारण हो हैं, किछू सुख दुख देनेकौं समर्थ नाहीं। तैसें ग्रहादिक स्वयमेव गमनादि करै हैं। प्राणीकै यथा-संभव योगकौं प्राप्त होतैं सुख दुख होनेका आगामी ज्ञानकौं कारण हो हैं। किछू सुख दुख देनेकौं समर्थ नाहीं। कोऊ तौ उनका पूजनादि करै, ताकै भी इष्ट न होय, कोऊ न करै, ताकै भी इष्ट होय। तातैं तिनिका पूजनादि करना मिथ्याभाव है। यहां कोऊ कहै—देना तौ पुण्य है, सो भला ही है। ताका उत्तर,—

धर्मकै अर्थि देना पुण्य है। यह तौ दुःखका भयकरि वा सुखका लोभकरि दे है, सो पाप ही है। इत्यादि अनेकप्रकारकरि ज्योतिषी देवनिकौं पूजै हैं, सो मिथ्या है।

बहुरि देवी दिहाड़ी आदि हैं, ते कई तौ व्यंतरी वा ज्योति-

षिणी हैं, तिनका अन्यथा स्वरूप मानि पूजनादि करै हैं। केई कल्पित हैं, सो तिनकी कल्पनाकरि पूजनादि करै हैं। ऐसैं व्यं-  
रादिकके पूजनेका निषेध किया। यहां कोऊ कहै—क्षेत्रपाल  
दिहाड़ी पद्मावती आदि देवी यक्ष यक्षिणी आदि जे जिनमतकों  
अनुसरै हैं, तिनके पूजनादि करनेमें तौ दोष नाही। ताका  
उत्तर,—

जिनमतविषै संयम धारें पूज्यपनौ हो है। सो देवनिकै संयम  
होता ही नाही। बहुरि इनकों सम्यक्त्वी मानि पूजिए है, तौ  
भवनत्रिकमें सम्यक्त्वकी भी मुख्यता नाही। जो सम्यक्त्वकरि ही  
पूजिए, तौ सर्वार्थसिद्धिके देव लौकांतिकदेव तिनकों ही क्यों न  
पूजिए। बहुरि कहौगे—इनकै जिनभक्ति विशेष है। सो  
भक्तिकी विशेषता भी सौधर्म इंद्रकै है, वा सम्यग्दृष्टी भी है।  
वाकों छोरि इनकों काहेकों पूजिए। बहुरि जो कहौगे, जैसें  
राजाकै प्रतीहारादिक हैं, तैसें तीर्थकरकै क्षेत्रपालादिक हैं। सो  
समवसरणादिविषै इनका अधिकार नाही। यह झूठी मानि है।  
बहुरि जैसें प्रतीहारादिकका मिलाया राजासों मिलिए, तैसें ये  
तीर्थकरकों मिलावते नाही। वहां तौ जाकै भक्ति होय, सो ही  
तीर्थकरका दर्शनादिक करो। किछू किसीकै आधीन नाही। बहुरि  
देखो अज्ञानता, आयुधादिक लिए रौद्रस्वरूप जिनका तिनकी  
गाय गाय भक्ति करै। सो जिनमतविषै भी रौद्ररूप पूज्य भया,  
तौ यह भी अन्यमतकै ही समान भया। तीव्र मिथ्यात्वभावकरि  
जिनमतविषै ऐसी विपरीत प्रवृत्तिका मानना हो है। ऐसैं क्षेत्र-  
पालादिककों भी पूजना योग्य नाही।

बहुरि गऊ सर्पादि तिर्यच हैं, ते प्रत्यक्ष ही आपतैं हीन भासै हैं । इनका तिरस्कारादिक करि सकिए है । इनकी निंघदशा प्रत्यक्ष देखिए है । बहुरि वृक्ष अग्नि जलादिक स्थावर हैं, ते तिर्यचनिहूतैं अत्यंत हीनअवस्थाकौ प्राप्त देखिए है । बहुरि शस्त्र दवात आदि अचेतन हैं, सो सर्वशक्तिकरि हीन प्रत्यक्ष देखिए है । पूज्यपनेका उपचार भी संभवै नाहीं । तातैं इनका पूजना महा मिथ्याभाव है । इनकौ पूजे प्रत्यक्ष वा अनुमानकरि भी किछु फलप्राप्ति नाहीं भासै है । तातैं इनकौ पूजना योग्य नाहीं । या प्रकार सर्व ही कुदेवनिका पूजना मानना मिथ्या है । देखो मिथ्यात्वकी महिमा, लोकविपै आपतैं नीचेकौ नमतैं आपकौ निंघ मानैं, अर मोहित होय रोड़ीपर्यंतकौ पूजना भी निंघ न मानैं । बहुरि लोकविपै तौ जातैं प्रयोजन सिद्ध होता जानैं, ताहीकी सेवा करैं । अर मोहित होय कुदेवनितैं मेरा प्रयोजन कैसें सिद्ध होगा, ऐसा विना विचार ही कुदेवनिका सेवन करैं । बहुरि कुदेवनिका सेवन करते हजारों विघ्न होय, ताकौ तौ गिनै नाहीं । कोई पुण्यके उदयतैं इष्टकार्य होय जाय, ताकौ कहैं, इसके सेवनतैं यह कार्य भया । बहुरि कुदेवादिकका सेवन किए विना जे इष्ट कार्य होय, तिनकौ तौ गिनै नाहीं, अर कोई अनिष्ट होय, ताकौ कहैं, याका सेवन न किया, तातैं अनिष्ट भया । इतना नाहीं विचारै हैं, जो इनहीकैं आधीन इष्ट अनिष्ट करना होय, तौ जे पूजैं तिनकैं इष्ट होय, न पूजैं तिनकैं अनिष्ट होय । सो तौ दीसता नाहीं । जैसें काहूकैं शीतलाकौ बहुत माने भी पुत्रादि मरते देखिए है । काहूकैं विना माने भी जीवते देखिए है । तातैं

शीतलाका मानना किछू कार्यकारी नहीं। ऐसं ही सर्व कुदेव-  
निका मानना किछू कार्यकारी नहीं। इहां कोऊ कहै—कार्यकारी  
नाहीं, तौ मति होहु, तिनके माननेतैं किछू बिगार भी होता नाही।  
ताका उत्तर,—

जो बिगार न होय, तौ हम काहेकौं निषेध करैं। परंतु एक  
तौ मिथ्यात्वादि दृढ होनेतैं मोक्षका मार्ग दुर्लभ होय जाय है।  
सो यह बड़ा बिगार है। बहुरि इनतैं पापबंध हो है, अर पापबंध  
होनेतैं आगामी दुःख पाईए है, यह बिगार है। यहां पूछै—  
मिथ्यात्वादिभाव तौ अतत्त्वश्रद्धानादि भण होय हैं। अर पापबंध  
खोटे कार्य किए होय है, सो तिनके माननेतैं मिथ्यात्वादि कैसें  
होय। ताका उत्तर,

प्रथम तौ परद्रव्यनिकौं इष्ट अनिष्ट मानना ही मिथ्या है।  
जातैं कोऊ द्रव्य काहूका मित्र शत्रु है नाहीं। बहुरि जो इष्ट  
अनिष्ट बुद्धि पाईए है, तौ ताका कारण पुण्य पाप है। तातैं जैसें  
पुण्यबंदे होय, पापबंध न होय, सो करै। बहुरि जो पुण्यउदयका भी  
निश्चय न होय, केवल इष्ट अनिष्टके बाह्य कारण तिनके संयोग वा  
वियोगका उपाय करै। सो तौ कुदेवके माननेतैं इष्ट अनिष्टबुद्धि  
दूर होती नाहीं। केवल वृद्धिकौं प्राप्त हो है। बहुरि पुण्यबंध भी  
नाहीं होता, पापबंध हो है। बहुरि कुदेव काहूकौं धनादिक देते  
खोसते देखे नाहीं। तातैं ए बाह्य कारण भी नाहीं। इनका  
मानना किस अर्थ कीजिए है। जब अत्यंत भ्रमबुद्धि होय, जीवा-  
दिक तत्त्वनिका श्रद्धान ज्ञानका अंश भी न होय, अर रागद्वेषकी  
अति तीव्रता होय, तब जे कारण नाहीं तिनकौं भी इष्ट अनि-

ष्टका कारण मानै । तब कुदेवनिका मानना हो है । ऐसैं तीव्र मिथ्यात्वादि भए मोक्षमार्ग अति दुर्लभ हो है । आगैं कुगुरुके श्रद्धानादिककौं निषेधिए है,—

जे जीव विषयकषायादि अधर्मरूप तौ परिणमैं अर माना-दिकतैं आपकौं धर्मात्मा मनावैं, धर्मात्मा योग्य नमस्कारादि क्रिया करावैं, अथवा किंचित् धर्मका कोई अंग धारि बड़े धर्मात्मा कुहावैं, बड़े धर्मात्मा योग्य क्रिया करावैं, ऐसैं धर्मका आश्रयकरि आपकौं बड़ा मनावैं, ते सर्व कुगुरु जानने । जातैं धर्मपद्धतिविषै तौ विषयकषायादि हूटैं जैसा धर्मकौं धारै तैसा ही अपना पद मानना योग्य है । तहां कोई तौ कुलकरि आपकौं गुरु मानै है । तिनविषै केई ब्राह्मणादिक तौ कहै हैं, हमारा कुल ही ऊंचा है, तातैं हम सर्व कुलके गुरु हें । सो उस कुलकी उच्चता तौ धर्मसाधनतैं है । जो उच्चकुलविषै उपजि हीन आचरण करै, तौ वाकौं उच्च कैसें मानिए । जो कुलविषै उपजनेहीतैं उच्चपना रहै, तौ मांसभक्षणादि किए भी वाकौं उच्च ही मानौ । सो बनै न्हीं । भारतविषै भी अनेक प्रकार ब्राह्मण कहे हें । तहां “जो ब्राह्मण होय चांडालकार्य करै, ताकौं चांडालब्राह्मण कहिए” ऐसा कह्या है । सो कुलहीतैं उच्चपना होय, तौ ऐसी हीनसंज्ञा काहेकौं दई है । बहुरि वैष्णवशास्त्रनिविषै ऐसा भी कहे हें—वेदव्यासादिक मछली आदिकतैं उपजे । तहां कुलका अनुक्रम कैसें रह्या । बहुरि मूलउत्पत्ति तौ ब्रह्मतैं कहे हें । तातैं सर्वका एक कुल है, भिन्न-कुल कैसें रह्या । बहुरि उच्चकुलकी स्त्रीकैं नीचकुलके पुरुपतैं अर नीचकुलकी स्त्रीकैं उच्चकुलके पुरुपतैं संगम होतैं संतति होती

देखिए हैं। तहां कुलका प्रमाण कैसे रखा। जो कदाचित् कहौगे, ऐसे है, तौ उच्च नीचकुलका विभाग काहेकौ मानौ हौ। सो लौकिक कार्यविषै तौ असत्य भी प्रवर्त्ति संभवै, धर्मकार्यविषै तौ असत्यता संभवै नाहीं। ताँतें धर्मपद्धतिविषै कुलअपेक्षा महंतपना नाहीं संभवै है। धर्मसाधनहीतें महंतपना होय। ब्राह्मणादि कुलनिविषै महंतता है, सो धर्म प्रवृत्तितें है। सो धर्मकी प्रवृत्तिकौ छोरि हिंसादिक पापप्रवृत्तिविषै प्रवर्त्तें महंतपना कैसे रहै। बहुरि केई कहै हैं—जो हमारे बड़े भक्त भए हैं, वा सिद्ध भए हैं, वा धर्मात्मा भए हैं। हम उनकी संततिविषै हैं, ताँतें हम गुरु हैं। सो उन बड़ेनिके बड़े तौ ऐसे थे नाहीं। तिनकी संततिविषै उत्तमकार्य किए उत्तम मानौ हौ, तौ उत्तमपुरुषकी संततिविषै जो उत्तमकार्य न करै, ताकौ उत्तम काहेकौ मानौ हौ। बहुरि शास्त्रनिविषै वा लोकविषै यह प्रसिद्ध है। पिता शुभकार्यकरि उच्चपदकौ पावै, पुत्र अशुभकार्यकरि नीचपदकौ पावै। वा पिता अशुभकार्यकरि नीचपदकौ पावै, पुत्र शुभकार्यकरि उच्चपदकौ पावै। ताँतें बड़ेनिकी अपेक्षा महंत मानना योग्य नाहीं। ऐसे कुलकरि गुरुपना मानना मिथ्याभाव जानना। बहुरि केई पट्टकरि गुरुपनौ मानै हैं। सो कोई पूर्वे महंतपुरुष भया होय, ताँकै पाटि जे शिष्य प्रतिशिष्य होते आए, तहां तिनविषै तिस महंतपुरुषकैसे गुण न होय, तौ भी गुरुपनौ मानिए, सो ऐसे ही होय तौ उस पाटविषै कोई परस्त्रीगमनादि महापापकार्य करैगा, सो भी धर्मात्मा होगा, सुगतिकौ प्राप्त होगा, सो संभवै नाहीं। अर वह महापापी है, तौ पाटका अधिकार कहां रखा। जो गुरुपदयोग्य कार्य करै, सो ही

गुरु है । बहुरि केई पहलैं तौ स्त्री आदिके त्यागी थे, पीछैं अष्ट होय विवाहादि कार्यकरि गृहस्थ भए, तिनकी संतति आपकौ गुरु मानै है । सो अष्ट भए पीछै गुरुपना कैसेँ रखा । अर गृहस्थवत् ए भी भए । इतना विशेष भया, जो ए अष्ट होय गृहस्थ भए । इनिकौ मूल गृहस्थधर्मी गुरु कैसेँ मानै । बहुरि केई अन्य तौ सर्व पापकार्य करै, एक स्त्री परणै नाहीं, इस ही अंगकरि गुरुपनो मानै है । सो एक अब्रह्म ही तौ पाप नाहीं, हिंसा परिग्रहादिक भी पाप हैं, तिनकौ करते धर्मात्मा गुरु कैसेँ मानिए । बहुरि वह धर्मबुद्धितै विवाहादिकका त्यागी नाहीं भया है । कोई आजीविका वा लज्जाआदि प्रयोजनकौ लिए विवाह न करै है । जो धर्मबुद्धि-होती, तौ हिंसादिककौ काहेकौ बधावता । बहुरि जाकेँ धर्मबुद्धि नाहीं, ताकेँ शीलकी भी दृढता रहै नाहीं । अर विवाह करै नाहीं, तब परस्त्रीगमनादि महापापकौ उपजावै । ऐसी क्रिया होतै गुरुपना मानना महाभ्रमबुद्धि है । बहुरि केई काहूप्रकारका भेषधारनेतै गुरुपनौ मानै है । सो भेष धारे कौन धर्म भया, जातै धर्मात्मा गुरु मानै । तहां केई टोपी देहैं, केई गूदरी राखै हैं, केई चोला पहारै हैं, केई चादरि ओढ़ै हैं, केई लालवस्त्र राखै हैं, केई खेतवस्त्र राखै हैं, केई भगवां राखै हैं, केई टाट पहारै हैं, केई मृगछाला पहारै हैं, केई राख लगावै हैं, इत्यादि केई स्वांग बनावै हैं । सो जो शीत उष्णादिक सहे न जाते थे, लज्जा न छुटै थी, तौ पाग, जामा इत्यादि प्रवृत्तिरूप वस्त्रादिकका त्याग काहेकौ किया । उनकौ छोरि ऐसे स्वांग बनावनेमै कौन धर्मका अंग भया । गृहस्थनिकौ ठिगनेके अर्थ ऐसे भेष जानने । जो गृहस्थसारिसा



अपने स्वांग राखै, तौ गृहस्थ कैसैं ठिगावै । अर इनकों उनकरि आजीविका वा धनादिकका वा मानादिकका प्रयोजन साधना, तातैं तैसा स्वांग बनावै हैं । जगत भोला तिस स्वांगकों देखि ठिगावै, अर धर्म भया मानै, सो यह भ्रम है । सोई कह्य है—

जह कुवि वेस्सारत्तो मुसिज्जमाणो विमण्णए हरिसं ।

तह मिच्छवेसमुहिया गयं पि ण मुणंति धम्मणिहिं॥१॥

याका अर्थ—जैसैं कोई वेश्यासक्त पुरुष धनादिककों मुसावता हुवा भी हर्ष मानै है, तैसैं मिथ्याभेषकरि ठिगे गए जीव ते नष्ट होता धर्म धनकों नाहीं जानै हैं । भावार्थ, यह मिथ्याभेष वाले जीवनिकी शुश्रूषा आदितैं अपना धर्म धन नष्ट होय, ताका विषाद नाहीं, मिथ्याबुद्धितैं हर्ष करै हैं । तहां केई तौ मिथ्या शास्त्रनिविषै भेष निरूपण किए हैं, तिनकों धारै हैं । सो उन शास्त्रनिका करणहारा पापी सुगमक्रियातैं उच्चपद प्ररूपणतैं मेरी मानि हो है, वा अन्य जीव इस मार्गविषै बहुत लागें, इस अभिप्रायतैं मिथ्याउपदेश दिया । ताकी परंपराकरि विचाररहित जे जीव ते इतना तौ विचारै नाहीं, जो सुगमक्रियातैं उच्चपद होना बतावै हैं, सो यहां किछू दगा है । अर भ्रमकरि तिनका कह्य मार्गविषै प्रवर्तै हैं । बहुरि केई शास्त्रनिविषै तौ मार्ग कठिन निरूपण किया, सो तौ सधै नाहीं, अर अपना ऊंचा नाम धराए विना लोक मानै नाहीं, इस अभिप्रायतैं यति मुनि आचार्य उपाध्याय साधु भट्टारक सन्यासी योगी तपस्वी नग्न इत्यादि नाम तौ ऊंचा धरावै हैं, अर इनिका आचरनिकों नाहीं साधि सकैं हैं, तातैं इच्छाअनुसार नानाभेष बनावै हैं । बहुरि केई अपनी इच्छा

अनुसार ही तौ नवीन नाम धरावै हैं, अर इच्छाअनुसार ही भेष बनावै हैं । ऐसैं अनेक भेष धारनेतैं गुरुपनो मानै हैं, सो यह मिथ्या है । इहां कोऊ पूछै—भेष तौ बहुत प्रकारके दीसैं, तिन-विषै सांचे झूठे भेषकी कैसैं पहचान होय । ताका समाधान,—

जिन भेषनिविषै विषयकषायका किञ्छू लगाव नाहीं, ते भेष सांचे हैं । सो सांचे भेष तीन प्रकार हैं, अन्य सर्व भेष मिथ्या हैं । सो ही पद्पाहुड़विषै कुंदकुंदाचार्यकरि कह्या है—

एगं जिणस्स रूवं विदियं उक्किट्ठ सावयाणं तु ।

अवरट्ठियाण तिदयं चउच्छं पुण लिंगं दंसणे णत्थि ॥ १॥

याका अर्थ—एक तौ जिनका स्वरूप निर्ग्रथ दिगंबर मुनिलिंग, अर दूसरा उत्कृष्ट श्रावकनिका रूप दसई ग्यारई प्रतिमाका धारक श्रावकका लिंग, अर तीसरा आर्यिकानिका रूप यह स्त्रीनिका लिंग, ऐसैं ए तीन लिंग तौ श्रद्धानपूर्वक हैं । बहुरि चौथा लिंग सम्यग्दर्शनस्वरूप नाहीं है । भावार्थ, यह इन तीनलिंग विना अन्य-लिंगकौ मानै, सो श्रद्धानी नाहीं, मिथ्यादृष्टी है । बहुरि इन भेष-निविषै केई भेषी अपने भेषकी प्रतीति करावनेके अर्थ किंचित् धर्मका अंगकौ भी पाळै हैं । जैसे खोटा रुपैया चलावनेवाला तिसविषै किञ्छू रूपाका भी अंश राखै है, तैसें धर्मका कोऊ अंग दिखाय अपना उच्चपद मनावै हैं । इहां कोऊ कहै— धर्म साधन क्रिया, ताका तौ फल होगा । ताका उत्तर—

जैसे उपवासका नाम धराय कणमात्रका भी भक्षण करै, तौ पापी है । अर एकंतका (एकासनका) नाम धराय किंचित् ऊन भोजन करै, तौ भी धर्मात्मा है । तैसें उच्चपदवीका नाम धराय

तामैं किंचित् भी अन्यथा प्रवर्तै, तौ महापापी है । अर नीची-पदवीका नाम धराय, किछू भी धर्म साधन करै, तौ धर्मात्मा है । तातैं धर्मसाधन तौ जेता बनै, तेता कीजिए । यामैं किछू दोष नाही । परंतु उंचा धर्मात्मा नाम धराय नीची क्रिया किए महापापी ही हो है । सोई षट्पाहुड़विषै कुंदकुंदाचार्यकरि कखा है—

जह जायरूबसरिसो तिलतुसमित्तं ण गहदि अत्थेसु ।

जइ लेइ अप्प बहुलय तत्तो पुण जाइ णंगोयं ॥ १ ॥

याका अर्थ—मुनिपद है, सो यथाजातरूप सदृश है । जैसा जन्म होतैं था, तैसा नम्र है । सो वह मुनि अर्थ जे धन वस्त्रादिक वस्तु तिनविषै तिलतुषमात्र भी ग्रहण न करै । बहुरि कदाचित् अल्प वा बहुत्व ग्रहै, तौ तिसतैं निगोद जाय । सो देखो, गृहस्थपनेमें बहुत परिग्रह राखि किछू प्रमाण करै, तौ भी स्वर्गमोक्षका अधिकारी हो है अर मुनिपनेमें किंचित् परिग्रह अंगीकार किए भी निगोद जानेवाला हो है । तातैं उंचा नाम धराय नीची प्रवृत्ति युक्त नाही । देखो, हुंडावसर्पिणी कालविषै यह कलिकाल प्रवर्तै है । ताका दोषकरि जिनमतविषै भी मुनिका स्वरूप तौ ऐसा जैसा बाह्य अभ्यंतर परिग्रहका लगाव नाही, केवल अपने आत्माकौ आपो अनुभवते शुभाशुभभावनितैं उदासीन हो है । अर अब विषय कषायासक्त जीव मुनिपद धारैं, तहां सर्वसावधका त्यागी होय पंच महाव्रतादि अंगीकार करैं । बहुरि स्वेत रक्तादि वस्त्रनिकौ ग्रहैं, वा भोजनादिविषै लोलुपी होय, वा अपनी अपनी पद्धति बधावनेकौ उद्यमी होय,

वा केई घनादिक भी राखैं, वा हिंसादिक करैं, नाना आरंभ करैं । सो स्तोकपरिग्रह ग्रहणेका फल निगोद कब्हा है, तौ ऐसे पापनिका फल तौ अनंतसंसार होय ही होय । बहुरि लोकनिकी अज्ञानता देखो, कोई एक छोटी प्रतिज्ञा भंग करै, ताकौं तौ पापी कहैं, अरु ऐसी बड़ी प्रतिज्ञा भंग करते देखैं, तिनकौं गुरु मानैं, मुनिवत् तिनका सन्मानादि करैं । सो शास्त्रविषै कृतकारित अनुमोदनाका फल कब्हा है । तातैं वैसा ही फल इनकौं भी लगै है । मुनिपद लेनेका तौ क्रम यह है—पहलें तत्त्वज्ञान होय, पीछैं उदासीन परिणाम होय, परिषहादि सहनेकी शक्ति होय, तब वह स्वयमेव मुनि भया चाहै । तब श्रीगुरु मुनिधर्म अंगीकार करावैं । यह कौन विपरीत जे तत्त्वज्ञानरहित विषय-कषायासक्त जीव तिनकौं मायाकरि वा लोभ दिखाय मुनिपद देना, पीछैं अन्यथा प्रवृत्ति करावनी, सो यह बड़ा अन्याय है । ऐसैं कुगुरुका वा तिनके सेवनका निषेध किया । अब इस कथनके दृढकरनेकौं शास्त्रनिकी साक्षी दीजिए हैं । तहां उपदेश-सिद्धांतरत्नमालाविषै ऐसा कब्हा है,—

गुरुणो भट्टा जाया सद्दे थुणिऊणालिंति दाणाइं ।

दोण्णवि अमुणिअसारा दूसमिसमयम्मि बुद्धंति ॥ १ ॥

कालदोषतैं गुरु जे हैं, ते भाट भए । भाटवत् शब्दकरि दातारकी स्तुतिकरि कैं दानादि ग्रहैं हैं । सो इस दुखमा कालविषै दातार वा पात्र दोऊ ही संसारविषै डूबैं हैं । बहुरि तहां कब्हा है,—

सप्पे दिट्ठे णासइ लोओ णहि कोवि किंपि अक्खेई ।

जो चयइ कुगुरु सप्पं हा मूढा भणइ तं दुट्ठं ॥ २ ॥

सर्पकों देखि कोई भागै, ताकों तौ लोक किछु भी कहै  
नाहीं । हाय हाय देखो; जो कुगुरुसर्पकों छोरे, ताहि मूढ दुष्ट  
कहैं, बुरा बोलैं ।

सप्पो इक्कं मरणं कुगुरु अणंताइ देइ मरणाइं ।  
तो वर सप्यं गहियं मा कुगुरुसेवणं भद् ॥ १ ॥

अहो सर्पकरि तौ एक ही वार मरण होय अर कुगुरु अनंत-  
मरण दे है, अनंतवार जन्म मरण करावै है । तातैं हे भद्र,  
सांपका ग्रहण तो भला अर कुगुरुका ग्रहण भला नाहीं ।  
बहुरि संघपट्टविपै ऐसा कखा है—

ध्रुक्षामः किल कोपि रंकशिशुकः प्रवृज्य चैत्ये क्वचित्  
कृत्वा किंच न पक्षमक्षतकलिः प्राप्तस्तदाचार्यकम् ।  
चित्रं चैत्यगृहे गृहीयति निजे गच्छे कुटुम्बीयति  
स्वं शक्रीयति बालिशीयति बुधान् विश्वं वराकीयति ॥

याका अर्थ—देखो क्षुधाकरि कृश कोई रंकका बालक सो  
कहीं चैत्यालयादिविषै दीक्षा धारि कोई पक्षकरि पापरहित न  
होतासंता आचार्यपदकों प्राप्त भया । बहुरि वह चैत्यालयविषै  
अपने गृहवत् प्रवर्त्तै है, निजगच्छविषै कुटुंबवत् प्रवर्त्तै है, आपकों  
इंद्रवत् महान् मानै है, ज्ञानीनिकों बालकवत् अज्ञानी मानै है,  
सर्वगृहस्थनिकों रंकवत् मानै है । सो यह बड़ा आश्चर्य भया है ।  
बहुरि 'यैर्जातो न च वर्द्धितो न च न च क्रीतो' इत्यादि  
काव्य है । जिनकरि जन्म भया नाहीं, बध्या नाहीं, मोल लिया  
नाहीं, देणदार भया नाहीं, इत्यादि कोई प्रकार संबंध नाहीं, अर  
गृहस्थनिकों वृषभवत् बहावै, जोरावरी दानादिक ले, सो हाय

हाय यह जगत् राजाकरि रहित है । कोई न्याय पूछनेवाला नहीं । यहां कोऊ कहै, ए तौ श्वेतांबरविरचित उपदेश है तिनकी साक्षी काहेकौं दई । ताका उत्तर—

जैसे नीचापुरुष जाका निषेध करै, ताका उत्तमपुरुषकै तौ सहज ही निषेध किया । तैसें जिनकै ब्रह्मादि उपकरण कहे, वे हू जाकरि निषेध करै, तौ दिगंबरधर्मविषै तौ ऐसी विपरीतिका सहज ही निषेध भया । बहुरि दिगंबरग्रंथनिविषै भी इस श्रद्धानके पोषक वचन हैं । तहां श्रीकुंदकुंदाचार्यकृत षट्पाहुड़विषै ( दर्शन-पाहुडमें ) ऐसा कखा है:

दंसणमूलो धम्मो उवड्डं जिणवरेहिं सिस्साणं ।

तं सोऊण सकण्णे दंसणहीणो ण वंदिव्वो ॥ २ ॥

जिनवरकरि सम्यग्दर्शन है मूल जाका ऐसा धर्म उपदेश्या है । ताकौं सुनकरि हे कर्णसहित हो, यह मानौ—सम्यक्त्वरहित जीव बंदनेयोग्य नहीं । जे आप कुगुरु ते कुगुरुका श्रद्धानसहित सम्यक्ता कैसै होय । विना सम्यक्त अन्य धर्म भी न होय । धर्म विना बंदनेयोग्य कैसै होय । बहुरि कहै हैं,—

जे दंसणेसु भट्टा पाणे भट्टा चरित्तभट्टाय ।

एदे भट्टविभट्टा सेसंपि जणं विणासंति ॥ ८ ॥

जे दर्शनविषै अष्ट हैं, ज्ञानविषै अष्ट हैं, चारित्रअष्ट हैं, ते जीव अष्टतैं अष्ट हैं । और भी जीव जो उनका उपदेश मानैं हैं, तिन जीवनिका नाश करै हैं—बुरा करै हैं । बहुरि कहै हैं,—

जे दंसणेसु भट्टा पाए पाडंति दंसणधराणं ।

ते हुंति लुल्लमूया वोही पुण दुल्लहा तेसिं ॥ १२ ॥

जे आप तौ सम्यक्तै अष्ट हैं, अर सम्यक्तधारकनिकौ अपने पगां पड़ाया चाहै हैं, ते लूले गूंगे हो हैं वा स्थावर हो हैं । बहुरि तिनकै बोधकी प्राप्ति महादुर्लभ हो है ।

जेवि पडंति च तेसिं जाणंता लज्जगारवभएण ।

तेसिंपि णत्थि वोही पावं अणुमोयमाणाणं ॥ १३ ॥

जो जाणता हुवा भी लज्जागारव भयकरि तिनकै पगां पड़े हैं, तिनकै भी बोधी जो सम्यक्त सो नाही है । कैसे हैं ए जीव, पापकी अनुमोदना करते हैं । पापीनिका सन्मानादि किए तिस पापकी अनुमोदनाका फल लागै है । बहुरि ( सूत्रपाहुड़में ) कहै हैं—

जस्स परिग्गहगहणं अप्पं बहुयं च हवइ लिंगस्स ।

सो गरहिउ जिणवयणे परिग्गहरहिओ णिरायारो ॥१९॥

जिस लिंगकै थोरा वा बहुत परिग्रहका अंगीकार होय, सो जिनवचनविषै निदायोग्य है । परिग्रहरहित ही अनगार हो है । बहुरि ( भावपाहुड़में ) कहै हैं—

धम्मम्मि णिप्पिवासो दोसावासो य इक्खुफुल्लसमो ।

णिप्फलणिग्गुणयारो णडसवणो णग्गरूवेण ॥ ७१ ॥

जो धर्मविषै निरुद्यमी है, दोषनिका घर है, इक्षुफूल समान निप्फल है, गुणका आचरणकरि रहित है, सो नमरूपकरि नट श्रमण है । भांडवत् भेषधारी है । सो नम्र भए भांडका दृष्टांत संभवै है । परिग्रह राखै, तौ यह भी दृष्टांत बनै नाही ।

बहुरिमोक्षपाहुड़में कहा है—

जे पावमोहियमई लिंगं धत्तूण जिणवरिंदाणं ।

पावं कुणंति पावा ते चत्ता मोक्खमग्गम्मि ॥ ७८ ॥

पापकरि मोहित भई है बुद्धि जिनकी ऐसे जे जीव जिनवरि-  
निका लिंग धारि पाप करै हैं, ते पापमूर्ति मोक्षमार्गविषै भ्रष्ट  
जानने । बहुरि ऐसा कखा है—

जे पंचचेलसत्ता गंधग्गाहीय जायणासीला ।

आधाकम्मम्मिरया ते चत्ता मोक्खमग्गम्मि ॥ ७८ ॥

जे पंचप्रकार वस्त्रविषै आसक्त हैं, परिग्रहके ग्रहणहारे हैं,  
याचनासहित हैं, अधःकर्म आदि दोषनिविषै रत हैं, ते  
मोक्षमार्गविषै भ्रष्ट जानने । बहुरि कुंदकुंदाचार्यकृत लिंगपाहुड़  
है, ताविषै मुनिलिंगधारि जो हिंसा आरंभ यंत्रमंत्रादि करै हैं,  
ताका निषेध बहुत किया है । बहुरि गुणभद्राचार्यकृत आत्मानु-  
शासनविषै ऐसा कखा है,—

इतस्ततश्च त्रस्यन्तो विभावय्या यथा मृगाः ।

वनाद्दसन्त्युपग्रामं कलौ कष्टं तपस्विनः ॥ १९७ ॥

कलिकालविषै तपस्वी मृगवत् इधर उधरतैं भयवान् होय वनतैं  
नगरकै समीप वसै हैं, यह महाखेदकारी कार्य भया है । यहां  
नगरसमीप ही रहना निषेध्या, तौ नगरविषै रहना तौ निषिद्ध  
भया ही ।

वरं गार्हस्थ्यमेवाद्य तपसो भाविजन्मनः ।

सुस्त्रीकटाक्षलुण्टाकलुप्तवैराग्यसम्पदः ॥ २०० ॥

अवार होनहार है अनंतसंसार जातैं ऐसे तपतैं गृहस्थपना ही



भला है। कैसा है वह तप प्रभात ही स्त्रीनिके कटाक्षरूपी  
 लुटेरेनिकरि लट्टी है वैराग्य संपदा जाकी ऐसा है। बहुरि योगी-  
 न्द्रदेवकृत परमात्माप्रकाशविषै ऐसा कह्या है—

दोहा ।

चिल्ला चिल्ली पुत्थयहिं, तूसइ मूढ णिभंतु ।

एयहिं लज्जइ णाणियउ, बंधहहेउ मुणंतु ॥ २१४ ॥

चेला चेली पुस्तकनिकरि मूढ संतुष्ट हो है। आंतरिहित ऐसैं  
 ही है। बहुरि ज्ञानी इनकौ बंधका कारण जानता संता इनकरि  
 लज्जायमान हो है।

केणवि अप्पा वंचियउ, सिर लुंचिवि छारेण ।

सयलवि संग ण परिहरिय, जिणवरलिंगधरेण ॥२१६॥

किसी जीवकरि अपना आत्मा ठिग्या। सो कौन, जिह जीव  
 जिनवरका लिंग धार्या अर राखकरि माथाका लोंचकरि समस्त-  
 परिग्रह छांड़्या नाहीं।

जे जिणलिंग धरेवि मुणि इट्ठपरिग्गह लिति ।

छद्दिकरेवि णु तेवि जिय, सो पुण छद्दि गिलंति ॥२१७

हे जीव ! जे मुनि लिंगधारि इष्टपरिग्रहकौ ग्रहैं हैं, ते छद्दि करि  
 तिस ही छद्दिकूं बहुरि भयै हैं। भावार्थ—यह निंदनीय है।  
 इत्यादि तहां कहै हैं। ऐसैं शास्त्रनिविषै कुगुरुका वा तिनके  
 आचरनका वा तिनकी सुश्रूपाका निषेध किया है, सो जानना।  
 बहुरि जहां मुनिकै धात्रीदूतआदि छीयालीस दोष आहागदिविषै  
 कहे हैं, तहां गृहस्थनिके बालकनिकौ प्रसन्न करना, समाचार  
 कहना, मंत्र औपधि ज्योतिपादि कार्य बतावना इत्यादि, बहुरि

किया कराया अनुमोद्या भोजन लेना इत्यादि क्रियाका निषेध किया है। सो अब कालदोषतैं इनही दोषनिकों लगाय आहारादि ग्रहै हैं। बहुरि पार्श्वस्थ कुशीलादि भ्रष्टाचारी मुनिनिका निषेध किया है, तिनहीका लक्षणनिकों धरै हैं। इतना विशेष—वै द्रव्यां तौ नम्र रहै हैं, ए नानापरिग्रह राखै हैं। बहुरि तहां मुनिनिकै भ्रमरी आदि आहार लेनेकी विधि कही है। ए आसक्त होय दातारके प्राण पीड़ि आहारादि ग्रहै हैं। बहुरि गृहस्थधर्मविषै भी उचित नाहीं वा अन्याय लोकनिघ्न पापरूप कार्य तिनकूं करते देखिए है। बहुरि जिनबिम्ब शास्त्रादिक सर्वोत्कृष्ट पूज्य तिनका तौ अविनय करै हैं। बहुरि आप तिनतैं भी महंतता राखि ऊंचा बैठना आदि प्रवृत्तिकों धरै हैं। इत्यादि अनेक विपरीतिता प्रत्यक्ष भासै अर आपकों मुनि मानैं, मूलगुणादिकके धारक कहावैं। ऐसैं ही अपनी महिमा करावैं। बहुरि गृहस्थ भोले उनकरि प्रशंसा-दिककरि टिगे हुए धर्मका विचार करैं नाहीं। उनकी भक्तिविषै तत्पर हो हैं। सो बड़े पापकों बड़ा धर्म मानना, इस मिथ्यात्वका फल कैसें अनंतसंसार न होय। एक जिनवचनकों अन्यथा माने महापापी होना, शास्त्रविषै कखा है। यहां तौ जिनवचनकी किञ्च बात राखी ही नाहीं। इस समान और पाप कौन है। अब यहां कुयुक्तिकरि जे तिन कुगुरुनिका स्थापन करै हैं, तिनका निरा-करण कीजिए है। तहां वह कहै हैं,—गुरूविना तौ निगुरा होय, अर वैसे गुरु अवार दीसै नाहीं। तातैं इनहीकों गुरु मानना। ताका उत्तर—

निगुरा तौ वाका नाम है, जो गुरु मानै ही नाहीं। बहुरि जो

गुरुकों तौ मानै अर इस क्षेत्रविषै गुरुका लक्षण न देखि काहूकों गुरु न मानै, तौ इस श्रद्धानतैं तौ निगुरा होता नाहीं। जैसे नास्तिक्य तौ वाका नाम है, जो परमेश्वरकों मानै ही नाहीं। बहुरि जो परमेश्वरकों तौ मानै अर इस क्षेत्रविषै परमेश्वरका लक्षण न देखि काहूकों परमेश्वर न मानै, तौ नास्तिक्य होता नाहीं। तैसें ही यह जानना। बहुरि वह कहै है, जैनशास्त्रनिविषै अबार केवलीका तौ अभाव कखा है, मुनिका तौ अभाव कखा नाहीं। ताका उत्तर,—

ऐसा तौ कखा नाहीं, इन देशनिविषै सद्भाव रहैगा। भरत क्षेत्रविषै कहै हैं, सो भरतक्षेत्र तौ बहुत बड़ा है। कहीं सद्भाव होगा, तातैं अभाव न कखा है। जो तुम रहो हो, जिसही क्षेत्रविषै सद्भाव मानौगे, तौ जहां ऐसे भी मुनि न पावौगे, तहां जावौगे तब किसकों गुरु मानौगे। जैसे हंसनिका सद्भाव अबार कखा है अर हंस दीसते नाहीं, तौ और पक्षीनिकों तौ हंसपना मान्या जाता नाहीं। तैसें मुनिनिका सद्भाव अबार कखा है। अर मुनि दीसते नाहीं, तौ औरनिकों तौ मुनि मान्या जाय नाहीं। बहुरि वह कहै है, एक अक्षरका दाताकों गुरु मानै हैं। जे शास्त्र सिखावैं वा सुनावैं, तिनकों गुरु कैसें न मानिए, ताका उत्तर—

गुरु नाम बड़ेका है। सो जिस प्रकारकी महंतता जाकै संभवै, तिस प्रकार ताकों गुरुसंज्ञा संभवै। जैसे कुलअपेक्षा मातापिताकों गुरुसंज्ञा है, तैसें ही विद्या पढ़ावनेवालेकों विद्याअपेक्षा गुरुसंज्ञा है। यहां तौ धर्मका अधिकार है। तातैं जाकै धर्मअपेक्षा महंतता संभवै, सो ही गुरु जानना। सो धर्म नाम चारित्रका

है। चारिचं खलु धम्मो, ऐसा शास्त्रविषै कखा है। तातैं चारि-  
त्रका धारकहीकौं गुरुसंज्ञा है। बहुरि जैसें भूतादिकका नाम भी  
देव है, तथापि यहां देवका श्रद्धानविषै अरहंतदेवहीका ग्रहण  
है। तैसें औरनिका भी नाम गुरु है, तथापि श्रद्धानविषै निर्ग्रथ-  
हीका ग्रहण है। सो जिनधर्मविषै अरहंत देव निरग्रंथ गुरु  
ऐसा प्रसिद्धवचन है। यहां प्रश्न—जो निर्ग्रथविना और गुरु न  
मानिए, सो कारण कहा। ताका उत्तर—

निर्ग्रथविना अन्य जीव सर्वप्रकारकरि महंतता नाहीं धरै हैं।  
जैसें लोभी शास्त्रव्याख्यान करै, तहां वह वाकौं शास्त्र सुनावनेतैं  
महंत भया। वह वाकौं धनवस्त्रादि देनेतैं महंत भया। यद्यपि  
बाह्य शास्त्र सुनावनेवाला महंत रहै, तथापि अंतरंग लोभी होय,  
सो दाताकौं उच्च मानै। अर दातार लोभीकौं नीचा मानै, तातैं  
वाकैं सर्वथा महंतता न भई। यहां कोऊ कहै, निर्ग्रथ भी तौ  
आहार ले हैं। ताका उत्तर—

लोभी होय दातारकी सुश्रूपाकरि दीनतातैं आहार न ले है।  
तातैं महंतता घटै नाहीं। जो लोभी होय, सो ही हीनता पावै है।  
ऐसें ही अन्य जीव जानने। तातैं निर्ग्रथ ही सर्वप्रकार महंतता-  
युक्त है। बहुरि निर्ग्रथविना अन्य जीव सर्वप्रकार गुणवान्  
नाहीं। तातैं गुणनिकी अपेक्षा महंतता अर दोषनिकी अपेक्षा  
हीनता भासै, तब निःशंक स्तुति करी जाय नाहीं। बहुरि निर्ग्र-  
थविना अन्य जीव जैसा धर्म साधन करै, तैसा वा तिसतैं अधिका  
गृहस्थ भी धर्मसाधन करि सकै। तहां गुरुसंज्ञा किसकौं होय।  
तातैं बाह्यअभ्यंतरपरिग्रहरहित निर्ग्रथमुनि हैं, सो ही गुरु हैं।

यहां कोऊ कहै, ऐसे गुरु तौ अवार यहां नाहीं, तातैं जैसे अर-  
हंतकी स्थापना प्रतिमा है, तैसें गुरुनिकी स्थापना ए भेषधारी हैं—  
ताका उत्तर—

जैसें राजाकी स्थापना चित्रामादिककरि किए तौ प्रतिपक्षी  
नाहीं । अर कोई सामान्य मनुष्य आपको राजा मनावै, तौ  
तिसका प्रतिपक्षी हो है । तैसें अरहंतादिककी पाषाणादिविषै  
स्थापना बनावै, तौ तिनका प्रतिपक्षी नाहीं अर कोई सामान्य  
मनुष्य आपको मुनि मनावै, तौ वह मुनिनिका प्रतिपक्षी भया ।  
ऐसें ही स्थापना होती होय, तौ अरहंत भी आपको मनावो ।  
बहुरि उनकी स्थापना होय, तौ बाह्य तौ ऐसें ही भए चाहिए ।  
वै निर्ग्रथ ए बहुतपरिग्रहके धारी, यह कैसें बनें । बहुरि कोई  
कहै—अब श्रावक भी तौ जैसें संभवैं, तैसें नाहीं । तातैं जैसें  
श्रावक तैसें मुनि । ताका उत्तर—

✓ श्रावकसंज्ञा तौ शास्त्रविषै सर्वगृहस्थ जैनीकों है । श्रेणिक भी  
असंयमी था, ताकों उत्तरपुराणविषै श्रावकोत्तम कखा । वारह-  
सभाविषै श्रावक कहे, तहां सर्व व्रतधारी न थे । जो सर्वव्रतधारी  
होते, तौ असंयत मनुष्यनिकी जुड़ी संख्या कहते, सो कही नाहीं ।  
तातैं गृहस्थ जैनी श्रावक नाम पावै हैं । अर मुनिसंज्ञा तौ निर्ग्रथ  
विना कहीं कही नाहीं । बहुरि श्रावककै तौ आठ मूलगुण कहे  
हैं । सो मद्य मांस मधु पंचउद्वरादि फलनिका भक्षण श्रावकनिकै  
है नाहीं, तातैं काहू प्रकारकरि श्रावकपना तौ संभवै भी है । अर  
मुनिकै अट्टाईस मूलगुण हैं, सो भेषीनिकै दीसते ही नाहीं । तातैं  
मुनिपनौ काहूप्रकारकरि संभवै नाहीं । बहुरि गृहस्थअवस्थाविषै

तौ पूर्वे जंबूकुमारादिक बहुत हिंसादिककार्य किए सुनिए है । मुनि होयकरि तौ काहने हिंसादिक कार्य किए नाहीं, परिग्रह राखे नाहीं, तातैं ऐसी युक्ति कारिजकारी नाहीं । बहुरि देखो, आदिनाथजीकी साथ च्यारि हजार राजा दीक्षा लेय बहुरि अष्ट भए, तब देव उनकौ कहते भए, जिनलिंगी होय अन्यथा प्रवर्त्तौंगे तौ हम दंड देंगे । जिनलिंग छोरि तुम्हारी इच्छा होय, सो ही करो । तातैं जिनालिंगी कहाय अन्यथा प्रवर्त्तैं, तौ दंड योग्य है । बंदनादियोग्य कैसें होय । अब बहुत कहा कहिए, जे जिनमतविषै कुभेष धारैं हैं, ते महापाप उपजावैं हैं । अन्य जीव उनकी सुश्रूपा आदि करैं हैं, ते भी पापी हो हैं । पद्मपुराणविषै यह कथा है— जो श्रेष्ठी धर्मात्मा चारण मुनिनिकौं भ्रमतैं अष्ट जानि आहार न दिया, तौ प्रत्यक्ष अष्ट तिनकौं दानादिक देना कैसें संभवै । यहां कोऊ कहै, हमारै अंतरंगविषै श्रद्धान तौ सत्य है, परंतु बाह्य लज्जादिकरि शिष्टाचार करैं हैं, सो फल तौ अंतरंगका होगा ? ताका उत्तर—

षट्पाहुडविषै लज्जादिकरि बंदनादिकका निषेध दिखाया था, सो पूर्वे ही कहा था । बहुरि कोऊ जोरावरी मस्तक नमाय हाथ जुड़ावै, तब तौ यह संभवै, जो हमारा अंतरंग न था । अर आपही मानादिकतैं नमस्कारादि करै, तहां अंतरंग कैसें न कहिए । जैसे कोई अंतरंगविषै तौ मांसकौं बुरा जानै अर राजादिकका भला मनावनेकौं मांस भक्षण करै, तौ वाकौं ब्रती कैसें मानिए । तैसें अंतरंगविषै तौ कुगुरुसेवनकौं बुरा जानै अर तिनका वा लोकनिका भला मनावनेकौं सेवन करै, ते श्रद्धानी कैसें कहिए ।

तातैं बाह्यत्याग किए ही अंतरंग त्याग संभवै है । तातैं जे श्रद्धानी जीव हैं, तिनकों काहू प्रकारकरि भी कुगुरुनिकी सुश्रूषाआदि करनी योग्य नाहीं । याप्रकार कुगुरुसेवनका निषेध किया । यहां कोऊ कहै—काहू तत्त्वश्रद्धानीकों कुगुरुसेवनतैं मिथ्यात्त्व कैसें भया । ताका उत्तर—

जैसें शीलवती स्त्री परपुरुषसहित भर्तारवत् रमणक्रिया सर्वथा करै नाहीं, तैसें तत्त्वश्रद्धानी पुरुष कुगुरुसहित सुगुरुवत् नमस्कारादिक्रिया सर्वथा करै नाहीं । काहेतैं, यह तौ जीवादितत्त्व-निका श्रद्धानी भया है । तहां रागादिककों निषिद्ध श्रद्धहै है, वीतरागभाव श्रेष्ठ मानै है, तातैं तिनकैं वीतरागता पाईए । जैसे ही गुरुकों उत्तम जानि नमस्कारादि करै हैं । जिनकैं रागादिक पाइए, तिनकों निषिद्ध जानि नमस्कारादि कदाचित् करै नाहीं । कोऊ कहै, जैसें राजादिककों करै, तैसें इनकों भी करै है । ताका उत्तर—

राजादिक धर्मपद्धतिविषै नाहीं । गुरूका सेवन धर्मपद्धतिविषै है । सो राजादिकका सेवन तौ लोभादिकतैं हो है । तहां चारित्र-मोहहीका उदय संभवै है । अर गुरुनिकी जायगा कुगुरुनिकों सेए । तत्त्वश्रद्धानके कारण गुरू थै, तिनतैं प्रतिकूली भया । सो लज्जादिकतैं जानै कारणविषै विपरीतिता उपजाई, ताकै कार्यभूत तत्त्वश्रद्धानविषै दृढता कैसें संभवै । तातैं तहां दर्शनमोहका उदय संभवै है । ऐसें कुगुरुनिका निरूपण किया । अब कुधर्मका निरूपण कीजिए है—

जहां हिंसादिकषाय उपजैं वा विषयकषायनिकी वृद्धि होय,

तहां धर्म मानिए, सो कुधर्म जानना । तहां यज्ञादिकक्रिया-  
निविषै महा हिंसादिक उपजावै, बड़े जीवनिका घात करै, अर तहां  
इंद्रियनिके विषय पोषै । तिन जीवनिविषै दुष्टबुद्धिकरि रौद्रध्यानी  
होय तीव्रलोभतैं औरनिका बुराकरि अपना कोई प्रयोजन साध्या  
चाहै, ऐसा कार्यकरि तहां धर्ममानै, सो कुधर्म है । बहुरि  
तीर्थनिविषै वा अन्यत्र स्नानादिकार्य करै, तहां बड़े छोटे घने  
जीवनिकी हिंसा होय, शरीरकौ चैन उपजै, तातैं विषयपोषण  
होय, तातैं कामादिक बधै, कुतूहलादिककरि तहां कषायभाव बधावै,  
बहुरि तहां धर्म मानै सो कुधर्म है । बहुरि संक्रांति, ग्रहण,  
व्यतीपातादिकविषै दान दे, वा खोटा ग्रहादिककै अर्थ दान दे,  
बहुरि पात्र जानि लोभीपुरुषनिकौ दान दे, बहुरि दानविषै सुवर्ण  
हस्ती घोड़ा तिलआदि वस्तुनिकौ दे, सो संक्रांतिआदि पर्व  
धर्मरूप नाही । ज्योतिषी संचारादिककरि संक्रांतिआदि हो है ।  
बहुरि दुष्टग्रहादिककै अर्थ दिया, तहां भय लोभादिकका आधिक्य  
भया । तातै तहां दान देनैमैं धर्म नाही । बहुरि लोभीपुरुष  
देनेयोग्य पात्र नाही । जातैं लोभी नाना असत्ययुक्ति करि ठिगै  
हैं । किल्लू भला करते नाही । भला तौ तब होय, जब याका  
दानका सहायकरि वह धर्म साथै । सो वह तौ उलटा पापरूप  
प्रवर्त्तै । पापका सहाईका भला कैसैं होय । सो ही रयणसार  
शास्त्रविषै कखा है—

सत्पुरिसाणं दाणं कल्पतरूणां फलाण सोहं वा ॥

लोहीणं दाणं जइ विमाणसोहा सवस्स जाणेह ॥ १ ॥

सत्पुरुषनिकौ दान देना, कल्पवृक्षनिके फलनिकी शोभा



समान है अर सुखदायक है । बहुरि लोभीपुरुषनिकों दान देना जो होय, सो शव जो मर्या ताका विमाण जो चक्रडोल ताकी शोभासमान जानहु । शोभा तौ होय, परंतु धनीकौ परमदुखदायक हो है । तातैं लोभीपुरुषनिकों दान देनेमें धर्म नाहीं । बहुरि द्रव्य तौ ऐसा दीजिए, जाकरि वाकै धर्म वधै । सुवर्ण हस्तीआदि दीजिए, तिनकरि हिंसादिक उपजै वा मान लोभादिक वधै । ताकरि महापाप होय । ऐसी वस्तुनिका देनेवालाकौ पुण्य कैसैं होय । बहुरि विषयासक्त जीव रतिदानादिकविषै पुण्य टहरावै हैं । सो प्रत्यक्ष कुशीलादि पाप जहां होय, तहां पुण्य कैसैं होय । अर युक्ति मिलावनेकौ कहैं, जो वह स्त्री सुख पावै है । तौ स्त्री तौ विषयसेवन किए सुख पावै ही पावै, शीलका उपदेश काहेकौ दिया । रतिसमयविना भी वाका मनोरथ अनुसार न प्रवर्तै दुख पावै । सो ऐसी असत् युक्ति वनाय विषयपोषनेका उपदेश देहैं । ऐसैं ही दयादान वा पात्रदानविना अन्य दान देय धर्म मानना सर्वे कुधर्म है ।

बहुरि व्रतादिककरिकैं तहां हिंसादिक वा विषयादिक वधावै है । सो व्रतादिक तौ तिनका घटावनेकै अर्थि कीजिए है । बहुरि जहां अन्नका तौ त्याग करै अर कंदमूलादिकनिका भक्षण करै, तहां हिंसा विशेष भई—स्वादादिकविषय विशेष भए । बहुरि दिवसविषै तौ भोजन करै नाहीं, अर रात्रिविषै करै । सो प्रत्यक्ष दिवसभोजनतैं रात्रिभोजनविषै हिंसा विशेष भासै, प्रमाद विशेष होय । बहुरि व्रतादिकरि नाना शृंगार बनावैं, कुतूहल करैं, जुवाआदिरूप प्रवर्तैं, इत्यादि पापक्रिया करैं, बहुरि व्रतादिकका

फल लौकिक इष्टकी प्राप्ति अनिष्टका नाशकों चाहैं, तहां कषाय-  
निकी तीव्रता विशेष भई । ऐसैं ब्रतादिकरि धर्म मानै हैं, सो  
कुधर्म है ।

बहुरि भक्त्यादिकार्यनिविषै हिंसादिक पाप बधावैं, वा गीत  
नृत्यादिक वा इष्ट भोजनादिक वा अन्य सामग्रीनिकरि विषयनिकौं  
पोषैं, कुतूहल प्रमादादिरूप प्रवत्तैं । तहां पाप तौ बहुत उपजावैं,  
अर धर्मका किछू साधन नाही । तहां धर्म मानैं, सो सर्व कुधर्म  
है । बहुरि केई शरीरकों तौ क्लेश उपजावैं अर तहां हिंसादिक  
निपजावैं, कषायादिरूप प्रवत्तैं । जैसैं पंचाम्रि तापैं, सो अग्निकरि  
बड़े छोटे जीव जलैं, हिंसादिक बधैं, यामैं धर्म कहा भया ।  
बहुरि अधोमुख झूलैं, ऊर्ध्वबाहु राखैं, इत्यादि साधनकरि तहां  
क्लेश ही होय । किछू ए धर्मके अंग नाही । बहुरि पवनसाधन करैं,  
तहां नेती धोती आदि कार्यनिविषै जलादिककरि हिंसादिक  
उपजै, चमत्कार कोई उपजै तातैं मानादिक बधैं, किछू  
तहां धर्मसाधन नाही । इत्यादि क्लेश करैं, विषयकषाय  
घटावनेका कोई साधन करैं नाही । अंतरंगविषै क्रोध  
मान माया लोभका अभिप्राय है, वृथा क्लेशकरि धर्म मानै हैं,  
सो कुधर्म है । बहुरि केई इस लोकविषै दुख सखा न जाय, वा  
परलोकविषै इष्टकी इच्छा वा अपनी पूजा बढ़ावनेके अर्थ वा  
कोई क्रोधादिककरि अपघात करैं । जैसैं पतिवियोगतैं अग्निविषै  
जलकरि सती कहावैं है, वा हिमालय गलै है, काशीकरोत ले है,  
जीवित मारी ले है, इत्यादि कार्यकरि धर्म मानै हैं । सो अपघातका  
तौ बड़ा पाप है । शरीरादिकतैं अनुराग घट्या था, तौ तपश्चर-

णादि किया होता । मरि जाणेमें कौन धर्मका अंग भया । जातैं अपघात करना कुधर्म है । ऐसैं ही अन्य भी घने कुधर्मके अंग हैं । कहां ताई कहिए जहां विषय कषाय वधै, अर धर्म मानिए, सो सर्व कुधर्म जानने । देखो कालका दोष, जैनधर्मविषै भी कुधर्मकी प्रवृत्ति भई । जैनमतविषै जे धर्मपर्व कहे हैं, तहां तौ विषयकषाय छोरि संयमरूप प्रवर्तना योग्य है । ताकौं तौ आदरै नाहीं । अर व्रतादिकका नाम धराय तहां नाना शृंगार बनावैं, वा गरिष्ठभोजनादि करैं, वा कुतूहलादि करैं, वा कषाय-वधावनेके कार्य करैं, जूवा इत्यादि महा पापरूप प्रवर्तैं ।

बहुरि पूजनादि कार्यविषै उपदेश तौ यह था,—सावद्य-  
लेशो बहुपुण्यराशौ दोषाय नालं । पापका अंश बहुत पुण्यस-  
मूहविषै दोषके अर्थ नाहीं । इस छलकरि पूजाप्रभावनादि कार्य-  
निविषै रात्रिविषै दीपकादिकरि वा अनंतकायादिकका संग्रह करि  
वा अयत्नाचार प्रवृत्तिकरि हिंसादिकरूप पाप तौ बहुत उपजावैं,  
अर स्तुति भक्तिआदि शुभपरिणामनिविषै प्रवर्तैं नाहीं, वा थोरे  
प्रवर्तैं, सो टोटा घना नफा थोरा, वा नफा किछू नाहीं । ऐसा  
कार्यकरनेमें तौ बुरा ही दीखना होय । बहुरि जिनमंदिर तौ  
धर्मका ठिकाना है । तहां नाना कुकथा करनी, सोवना इत्यादिक  
प्रमादरूप प्रवर्तैं, वा तहां बाग वाड़ी इत्यादि बनाय विषयकषाय  
पोषैं, बहुरि लोभी पुरुषनिकौं दानादिक दें, वा तिनकी असत्य-  
स्तुतिकरि महंतपनो मानैं, इत्यादि प्रकारकरि विषयकषायनिकौं  
तौ वधावैं, अर धर्म मानैं, सो जिनधर्म तौ वीतराग-  
भावरूप है । तिसविषै ऐसी प्रवृत्ति कालदोषतैं ही देखिए है ।

याप्रकार कुधर्मसेवनका निषेध किया । अब इसविषै मिथ्यात्व-  
भाव कैसे भया, सो कहिए है—

तत्त्वश्रद्धानविषै प्रयोजनभूत एक यह है रागादिक छोड़ना ।  
इस ही भावका नाम धर्म है । जो रागादिक भावनिकों वधाय  
धर्म मानै, तहां तत्त्वश्रद्धान कैसे रखा । बहुरि जिनआज्ञातै  
प्रतिकूली भया । बहुरि रागादिभाव तौ पाप हैं । तिनकौ धर्म  
मान्या, सो यह झूठश्रद्धान भया । तातै कुधर्म सेवनविषै  
मिथ्यात्वभाव है । ऐसै कुदेव कुगुरु कुशास्त्रसेवनविषै मिथ्यात्व-  
भावकी पुष्टता होती जानि, याका निरूपण किया । सो ही  
षट्पाहुडविषै कखा है—

कुच्छियदेवं धम्मं कुच्छियलिंगं च वंदए जोइ ।

लज्जाभयगारवदो मिच्छादिट्ठी हवे सो दु ॥ १ ॥

जो लज्जातै भयतै बड़ाईतै भी कुत्सित् देवकौ वा कुत्सित्  
धर्मकौ वा कुत्सित् लिंगकौ वंदै हैं, सो मिथ्यादृष्टी हो हैं । तातै  
जो मिथ्यात्वका त्याग किया चाहै, सो पहलै कुदेव कुगुरु  
कुधर्मका त्यागी होय । सम्यक्त्वके पचीस मलनिके त्यागविषै भी  
अमूढदृष्टि वा षडायतनविषै भी इनहीका त्याग कराया है ।  
तातै इनका अवश्य त्याग करना । बहुरि कुदेवादिकके सेवनतै जो  
मिथ्यात्वभाव हो है, सो यह हिंसादिकपापनितै महापाप है । याके  
फलतै निगोद नरकादिपर्याय पाईए है । तहां अनंतकालपर्यंत  
महासंकट पाईए है । सम्यग्ज्ञानकी प्राप्ति महादुर्लभ होय जाय  
है । सो ही षट्पाहुडविषै ( भाव पाहुडमें ) कखा है—

कुच्छियधम्मम्मि-रओ, कुच्छियपासंडिभत्तिसंजुत्तो ।  
कुच्छियतवं कुणंतो कुच्छिय गइभायणो होई ॥ १४० ॥

जो कुत्सितधर्मविषै रत है, कुत्सित पाखंडीनिकी भक्तिकरि संयुक्त है, कुत्सित तपकौ करता है, सो जीव कुत्सित जो खोटी-गति ताकौ भोगनहारा हो है । सो हे भव्य हो, किंचिन्मात्रलोभतै वा भयतै कुदेवादिकका सेवनकरि जातै अनंतकालपर्यंत महा-दुःख सहना होय ऐसा मिथ्यात्वभाव करना योग्य नाही । जिन-धर्मविषै यह तौ आम्नाय है । पहलै बड़ा पाप छुड़ाय पीछै छोटा-पाप छुड़ाया । सो इस मिथ्यात्वकौ सप्तव्यसनादिकतै भी बड़ापाप-जानि पहलै छुड़ाया है । तातै जे पापके फलतै डरै हैं, अपने आत्माकौ दुखसमुद्रमें न डुवाया चाहै हैं, ते जीव इस मिथ्यात्वकौ अवश्य छोड़ो । निंदा प्रशंसादिकके विचारतै शिथिल होना योग्य नाही । जातै नीतिविषै भी ऐसा कब्या है—

निन्दन्तु नीतिनिपुणा यदि वा स्तुवन्तु

लक्ष्मीः समाविशतु गच्छतु वा यथेष्टम् ।

अद्यैव वास्तु मरणं तु युगान्तरे वा

न्यायात्पथः प्रविचलन्ति पदं न धीराः ॥ १ ॥

जे निंदै हैं तौ निंदौ, अर स्तवै हैं तौ स्तवो, बहुरि लक्ष्मी आवो वा जावो, बहुरि अब ही मरण होहु वा युगांतरविषै होहु, परंतु नीतिविषै निपुणपुरुष न्यायमार्गतै पैड़हू चलै नाही । ऐसा न्याय विचारि निंदाप्रशंसादिकका भयतै लोभादिकतै अन्यायरूप मिथ्यात्वप्रवृत्ति करनी युक्त नाही । अहो, देव गुरु धर्म तौ सर्वोत्कृष्ट पदार्थ हैं । इनकै आधार धर्म है । इनविषै शिथिलता

राखें अन्यधर्म कैसें होय तातैं बहुत कहनेकरि कहा, सर्वथाप्रकार कुदेव कुगुरु कुधर्मका त्यागी होना योग्य है । कुदेवादिकका त्याग न किए मिथ्यात्वभाव बहुत पुष्ट हो है । अर अवार यहां इनकी प्रवृत्ति विशेष पाईए है । तातैं इनका निषेधरूप निरूपण किया है । ताकौं जानि मिथ्यात्वभाव छोड़ि अपना कल्याण करो ।

इति मोक्षमार्गप्रकाशकनाम शास्त्रविषै कुदेवकुगुरुकुधर्म-  
निषेधवर्णनरूप छटा अधिकार समाप्त भया ॥ ६ ॥

दोहा ।

इस भवतरुको मूल इक, जानहु मिथ्याभाव ।

ताकौं करि निर्मूल अव, करिए मोक्ष उपाव ॥ १ ॥

अथ,—जे जीव जैनी हैं, जिन आज्ञाकौं मानैं हैं, अर तिनकै भी मिथ्यात्व रहै है ताका वर्णन कीजिए है—जातैं इस मिथ्या-  
त्ववैरीका अंश भी बुरा है, तातैं सूक्ष्ममिथ्यात्व भी त्यागने योग्य है । तहां जिन आगमविषै निश्चय व्यवहाररूप वर्णन है । तिन-  
विषै यथार्थका नाम निश्चय है । उपचारका नाम व्यवहार है । सो इनके स्वरूपकौं न जानते अन्यथा प्रवर्तैं हैं, सोई कहिए है—  
केई जीव निश्चयकौं न जानते निश्चयाभासके श्रद्धानी होय आपकौं मोक्षमार्गी मानैं हैं । अपने आत्माकौं सिद्धसमान अनुभवै हैं । सो आप प्रत्यक्षसंसारी हैं । भ्रमकरि आपकौं सिद्ध मानैं सोई मिथ्यादृष्टी है । शास्त्रनिविषै जो सिद्धसमान आत्माकौं कह्या है, सो द्रव्यदृष्टिकरि कह्या है, पर्याय अपेक्षा समान नाहीं हैं । जैसे राजा अर रंक मनुष्यपनेकी अपेक्षा समान हैं, राजापना रंकपनाकी अपेक्षा तौ समान नाहीं । तैसें सिद्ध अर संसारी जीवत्वपनेकी

अपेक्षा समान हैं, सिद्धपना संसारीपनाकी अपेक्षा तौ समान नहीं। यह जैसे सिद्ध शुद्ध हैं, तैसे ही आपकों शुद्ध मानै। सो शुद्ध अशुद्ध अवस्था पर्याय है। इस पर्यायअपेक्षा समानता मानिए, सो यह मिथ्यादृष्टि है। बहुरि आपकै केवलज्ञानादिकका सद्भाव मानै, सो आपकै तौ क्षयोपशमरूप मतिश्रुतादि ज्ञानका सद्भाव है। क्षायिकभाव तौ कर्मका क्षय भए हो है। यह भ्रमतैं कर्मका क्षय भए विना ही क्षायिकभाव मानै। सो यह मिथ्या-दृष्टी है। शास्त्रनिविषै सर्वजीवनिका केवलज्ञानस्वभाव कह्या है, सो शक्तिअपेक्षा कह्या है। सर्वजीवनिविषै केवलज्ञानादिरूप होनेकी शक्ति है। वर्तमान व्यक्तता तौ व्यक्त भए ही कही। कोऊ ऐसा मानै है, आत्माके प्रदेशनिविषै तौ केवलज्ञान ही है, ऊपरि आवरणतैं प्रगट न हो है। सो यह भ्रम है। जो केवलज्ञान होय, तौ वज्रपटलादि आड़े होतैं भी वस्तुकों जानै। कर्मको आड़े आए कैसे अटकै। तातैं कर्मके निमित्ततैं केवलज्ञानका अभाव ही है। जो याका सर्वदा सद्भाव रहै है, तौ याकों पारिणामिक भाव कहते, सो यह तौ क्षायिकभाव है। सर्वभेद जाँमै गर्भित ऐसा चैतन्यभाव सो पारिणामिक भाव है। याकी अनेक अवस्था मतिज्ञानादिरूप वा केवलज्ञानादिरूप हैं, सो ए पारिणामिकभाव नहीं। तातैं केवलज्ञानका सर्वदा सद्भाव न मानना। बहुरि जो शास्त्रनिविषै सूर्यका दृष्टान्त दिया है, ताका इतना ही भाव लेना, जैसे मेघपटल होतैं सूर्यप्रकाश प्रगट न हो है, तैसे कर्मउदय होतैं केवलज्ञान न हो है। बहुरि ऐसा भाव न लेना, जैसे सूर्यविषै प्रकाश रहै है, तैसे आत्माविषै केवलज्ञान

रहै है। जातें दृष्टांत सर्वप्रकार मिलै नाहीं। जैसें पुद्गलविषै बर्ण-  
गुण है, ताकी हरित पीतादि अवस्था हैं। सो वर्तमानविषै कोई  
अवस्था होतैं अन्य अवस्थाका अभाव ही है। तैसें आत्माविषै  
चैतन्य गुण है, ताकी मतिज्ञानादिरूप अवस्था हैं। सो वर्तमान  
कोई अवस्था होतैं अन्य अवस्थाका अभाव ही है। बहुरि कोऊ  
कहै कि, आवरण नाम तौ वस्तुकों आच्छादनेका है, केवलज्ञानका  
सद्भाव नाहीं है, तौ केवलज्ञानावरण काहेकों कहो हौ। ताका  
उत्तर—

यहां शक्ति है ताकों व्यक्त न होने दे, ताकी अपेक्षा आवरण  
कह्या है। जैसें देशचारित्रका अभाव होतैं शक्ति घातनेकी अपेक्षा  
अप्रत्याख्यानावरण कह्या, तैसें जानना। बहुरि ऐसें जानौ,—  
वस्तुविषै जो परनिमित्ततैं भाव होय, ताका नाम औपाधिकभाव  
है। अर परनिमित्तविना जो भाव होय, सो ताका नाम स्वभाव-  
भाव है। सो जैसें जलकै अग्निका निमित्त होतैं, उष्णपनो भयो,  
तहां शीतलपनाका अभाव ही है। परंतु अग्निका निमित्त मिटे  
शीतलता ही होय जाय। तातैं सदाकाल जलका स्वभाव शीतल  
कहिए। जातैं ऐसी शक्ति सदा पाइए है। बहुरि व्यक्त भए  
स्वभाव व्यक्त भया कहिए। कदाचित् व्यक्तरूप हो है। तैसें  
आत्मकै कर्मका निमित्त होतैं अन्यरूप भया, तहां केवलज्ञानका  
अभाव ही है। परंतु कर्मका निमित्त मिटे सर्वदा केवलज्ञान  
होय जाय। तातैं सदाकाल आत्माका स्वभाव केवलज्ञान कहिए है।  
जातैं ऐसी शक्ति सदा पाइए है। व्यक्त भए स्वभाव व्यक्त भया  
कहिए। बहुरि जैसें शीतलस्वभावकरि उष्ण जलकों शीतल मानि



पानादि करै, तौ दाज्ञना ही होय । तैसेँ केवलज्ञानस्वभावकरि अशुद्ध आत्माकौं केवलज्ञानी मानि अनुभवै, तौ दुखी ही होय । ऐसेँ जे केवलज्ञानादिकरूप आत्माकौं अनुभवै हैं, ते मिथ्यादृष्टी हैं । बहुरि रागादिक भाव आपकै प्रत्यक्ष होतैं भ्रमकरि आत्माकौं रागादिरहित मानै, सो पूछिए है—ए रागादिक तौ होते देखिए है, ए किसद्रव्यके अस्तित्वविषै है । जो शरीर वा कर्मपुद्गलके अस्तित्वविषै होंय, तौ ए भाव अचेतन वा मूर्त्तिक होंय । सो तो ए रागादिक प्रत्यक्ष चेतनता लिए अमूर्त्तिकभाव भासै हैं । तातैं ए भाव आत्माहीके हैं । सो ही समयसारके कलशविषै कखा है—

कार्यत्वादकृतं न कर्म न च तज्जीवप्रकृत्योर्द्वयो-  
रज्ञायाः प्रकृतेः स्वकार्यनुभवाभावान्न चेयं कृतिः ।

नैकस्याः प्रकृतेरचित्वलसनाज्जीवस्य कर्त्ता ततो

जीवस्यैव च कर्म तच्चिदानुगं ज्ञाता न वै पुद्गलः ॥ १॥

यह रागादिरूप भावकर्म है, सो काहकरि किया नाही है । तातैं यह कार्यभूत है । बहुरि जीव अर कर्मप्रकृति इन दोऊनिका भी कर्त्तव्य नाही । जातैं ऐसेँ होय, तौ अचेतनकर्मप्रकृतिकै भी तिस भावकर्मका फल सुख दुख ताकौं भोगना होय, सो असंभव है । बहुरि एकली कर्मप्रकृतिका भी यह कर्त्तव्य नाही । जातैं बाकै अचेतनपनो प्रगट है । तातैं इस रागादिकका जीव ही कर्त्ता है । अर सो रागादिक जीवहीका कर्म है । जातैं भावकर्म तौ चेतनका अनुसारी है, चेतना विना न होय । अर पुद्गल ज्ञाता है नाही । ऐसेँ रागादिकभाव जीवके अस्तित्वविषै हैं । जो रागादिक भावनिका निमित्त कर्महीकौं मानि आपकौं रागादिकका अकर्त्ता

मानै हैं, सो कर्त्ता तौ आप अर आपकौं निरुद्यमी होय प्रमादी रहना, तातैं कर्महीका दोष ठहरावै हैं। सो यह दुखदायक भ्रम है। सोई समयसारका कलशाविषै कखा है—

रागजन्मनि निमित्ततां परद्रव्यमेव कलयन्ति ये तु ते ।  
उत्तरन्ति न हि मोहवाहिनीं शुद्धबोधविधुरान्धबुद्धयः ॥

जे जीव रागादिककी उत्पत्तिविषै परद्रव्यहीकौं निमित्तपनो मानै हैं, ते जीव भी शुद्धज्ञानकरि रहित है अंधबुद्धि जिनकी ऐसे होतसतैं मोहनदीकौं नाहीं उत्तरैं हैं। बहुरि समयसारका 'सर्व-विशुद्धि अधिकार' विषै जो, आत्माकौं अकर्त्ता मानै है, अर यह कहै है—कर्म ही जगावै सुवावै है, परघात कर्मतैं हिंसा है, वेदकर्मतैं ब्रह्म है, तातैं कर्म ही कर्त्ता है, तिस जैनीकौ सांख्यमती कखा है। जैसे सांख्यमती आत्माकौं शुद्ध मानि स्वच्छन्द हो है, तैसे ही यह भया। बहुरि इस श्रद्धानतैं यह दोष भया, जो रागादिक अपने न जानै, आपकौ अकर्त्ता मान्या, तव रागादिक होनेका भय रखा नाहीं, वा रागादिक मेटनेका उपाय रखा नाहीं, तव स्वच्छन्द होय खोटे कर्म बांधि अनंतसंसार-विषै रूलै है। यहां प्रश्न—जो समयसारविषै ही ऐसा कखा है—

वर्णाद्या वा रागमोहादयो वा  
भिन्ना भावाः सर्व एवास्य पुंसः ।

अर्थ—वर्णादिक वा रागादिकभाव हैं, ते सर्व ही इस आत्मातैं भिन्न हैं। बहुरि तहां ही रागादिककौं पुद्गलमय कहे हैं। बहुरि अन्य शास्त्रनिविषै भी रागादिकतैं भिन्न आत्माकौं कखा है, सो कैसे हैं। ताका उत्तर—

रागादिकभाव परद्रव्यके निमित्ततैं उपाधिकभाव हो हैं । अर यह जीव तिनिकौं स्वभाव जानै है । जाकौं स्वभाव जानै, ताकौं बुरा कैसेँ मानै, वा ताके नाशका उद्यम काहेकौं करै । सो यह श्रद्धान भी विपरीत है । ताके छुड़ावनेकौं स्वभावकी अपेक्षा रागादिककौं भिन्न कहे हैं । अर निमित्तकी मुख्यताकरि पुद्गलमय कहे हैं । जैसेँ वैद्य रोग मेथ्या चाहै है । जो शीतका अधिकार देखै, तौ उष्ण औषधि बतवै अर आतापका आधिक्य देखै, तौ शीतल औषधि बतवै । तैसेँ श्रीगुरु रागादिक छुड़ाया चाहै हैं । जो रागादिक परका मानि स्वच्छन्द होय, निरुद्यमी होय, ताकौं उपादानकारणकी मुख्यताकरि रागादिक आत्माका है ऐसा श्रद्धान कराया । बहुरि जो रागादिक आपका स्वभाव मानि तिनिका नाशका उद्यम नाही करै है, ताकौं निमित्तकारणकी मुख्यताकरि रागादिक परभाव हैं, ऐसा श्रद्धान कराया है । दोऊ विपरीत श्रद्धानतैं रहित भए सत्यश्रद्धान होय, तब ऐसा मानै—ए रागादिक भाव आत्माका स्वभाव तौ नाही, कर्मके निमित्ततैं आत्माके अस्तित्वविषै विभावपर्याय निपजै हैं । निमित्त मिटे इनका नाश होतैं स्वभाव भाव रहि जाय है । तातैं इनके नाशका उद्यम करना । यहां प्रश्न—जो कर्मका निमित्ततैं ए हो हैं, तौ कर्मका उदय रहै तावत् विभाव दूर कैसेँ होय । तातैं याका उद्यम करना तौ निरर्थक है । ताका उत्तर—

एक कार्य होनेविषै अनेक कारण चाहिए है । तिनविषै जे कारण बुद्धिपूर्वक होय, तिनकौं तौ उद्यम करि मिलावै अर अबुद्धिपूर्वक कारण स्वयमेव मिलैं—तब कार्यसिद्धि होय । जैसेँ पुत्र-

होनेका कारण बुद्धिपूर्वक तौ विवाहादिक करना है, अर अबुद्धि-पूर्वक भवितव्य है। तहां पुत्रका अर्थी विवाहादिकका तौ उद्यम करै, अर भवितव्य स्वयमेव होय, तब पुत्र होय। तैसें विभाव दूर करनेके कारण बुद्धिपूर्वक तौ तत्त्वविचारादिक हैं अर अबुद्धि-पूर्वक मोहकर्मका उपशमादिक हैं। सो ताका अर्थी तत्त्वविचारादिकका तौ उद्यम करै, अर मोहकर्मका उपशमादिक स्वयमेव होय, तब रागादिक दूर होंय। यहां ऐसा कहै कि—जैसें विवाहादिक भी भवितव्य आधीन हैं, तैसें तत्त्वविचारादिक भी कर्मका क्षयोपशमादिककै आधीन हैं, तातैं उद्यम करना निरर्थक है। ताका उत्तर—

ज्ञानावरणका तौ क्षयोपशम तत्त्वविचारादि करनेयोग्य तेरै भया है। याहीतैं उपयोगकौ यहां लगावनेका उद्यम कराइए है। असंज्ञी जीवनिकै क्षयोपशम नाहीं है, तौ उनकौ काहेकौ उपदेश दीजिए है। बहुरि वह कहै है—होनहार होय, तौ तहां उपयोग लागे, विना होनहार कैसें लागे। ताका उत्तर—

जो ऐसा श्रद्धान है, तौ सर्वत्र कोई ही कार्यका उद्यम मति करै। तू खान पान व्यापारादिकका तौ उद्यम करै, अर यहां होनहार बतावै। सो जानिए है, तेरा अनुराग यहां नाहीं। मानादिककरि ऐसी झूठी बातें बनावै है। याप्रकार जे रागादिक होतैं तिनकरि रहित आत्माकौ मानैं हैं, ते मिथ्यादृष्टी जानने।

बहुरि कर्म नोकर्मका संबंध होतैं आत्माकौ निर्वंध मानैं, सो प्रत्यक्ष इनका बंधन देखिए है। ज्ञानावरणादिकतैं ज्ञानादिकका घात देखिए है। शरीरकरि ताकै अनुसार अवस्था होती देखिए

है । बंधन कैसें नहीं । जो बंधन न होय, तौ मोक्षमार्गी इनके नाशका उद्यम काहेकौं करै । यहां कोऊ कहै—शास्त्रनिविधै आत्माकौं कर्म नोकर्मतैं भिन्न अवद्धस्पृष्ट कैसें कखा है । ताका उत्तर—

संबंध अनेक प्रकार हैं । तहां तादात्म्यसंबंधअपेक्षा आत्माकौं कर्म नोकर्मतैं भिन्न कखा है । तहां द्रव्य पलटकरि एक नाही होय जाय हैं अर इस ही अपेक्षा अवद्धस्पृष्ट कखा है । बहुरि निमित्तनैमित्तिकसंबंध अपेक्षा बंधन है ही । उनके निमित्ततैं आत्मा अनेक अवस्था धरै ही है । तातैं सर्वथा निर्बंध आपकौं मानना मिथ्यादृष्टि है । यहां कोऊ कहै—हमकौं तौ बंध मुक्तिका विकल्प करना नाही, जातै शास्त्रविधै ऐसा कखा है—

“जो बंधउ मुक्कउ मुणइ, सो बंधई ण भंति ।”

याका अर्थ—जो जीव बंध्या अर मुक्त भया मानै है, सो निःसंदेह बंधै है । ताकौं कहिए है—

जे जीव केवल पर्यायदृष्टि होय, बंधमुक्त अवस्थाहीकौं मानै हैं, द्रव्य स्वभावका ग्रहण नाही करै हैं, तिनकौं ऐसैं उपदेश दिया है, जो द्रव्यस्वभावकौं न जानता जीव बंध्या मुक्त मानै, सो बंध है । बहुरि जो सर्वथा ही बंधमुक्ति न होय, तौ सो जीव बंध है, ऐसा काहेकौं कहै । अर बंधके नाशका मुक्त होनेका उद्यम काहेकौं करिए है । तातैं द्रव्यदृष्टिकरि एकदशा है । पर्यायदृष्टिकरि अनेक अवस्था हो हैं, ऐसा मानना योग्य है । ऐसैं ही अनेक प्रकारकरि केवल निश्चयनयका अभिप्रायतैं विरुद्ध

श्रद्धानादिक करै है । जिनवानीविषै तौ नाना नयअपेक्षा कहीं ।  
 कैसा कहि कैसा निरूपण किया है । यह अपने अभिप्रायतैं  
 निश्चयनयकी मुख्यताकरि जो कथन किया होय, ताहीकौं ग्रहिकरि  
 मिथ्यादृष्टिकौं धारै है । बहुरि जिनवानीविषै तौ सम्यग्दर्शन ज्ञान  
 चारित्रकी एकता भए मोक्षमार्ग कह्या है । सो याकै सम्यग्दर्शन  
 ज्ञानविषै सप्ततत्त्वनिका श्रद्धान वा जानना भया चाहिए । सो  
 तिनका विचार नाहीं । अर चारित्रविषै रागादिक दूर किया  
 चाहिए, ताका उद्यम नाहीं । एक अपने आत्माकौं शुद्ध  
 अनुभवना इसहीको मोक्षमार्ग मानि संतुष्ट भया है । ताका  
 अभ्यास करनेकौं अंतरंगविषै ऐसा चितवन किया चाहै है—मैं  
 सिद्धसमान शुद्ध हों, केवलज्ञानादि सहित हों, द्रव्यकर्म नोकर्म  
 रहित हों, परमानंदमय हों, जन्ममरणादि दुःख भेरै नाहीं,  
 इत्यादि चितवन करै है । सो यहां पूछिए है—यह चितवन जो  
 द्रव्यदृष्टिकरि करो हो, तौ द्रव्य तौ शुद्ध अशुद्ध सर्वपर्यायनिका  
 समुदाय है । तुम शुद्ध ही अनुभव काहेकौं करौ हो । अर  
 पर्यायदृष्टिकरि करो हो, तौ तुम्हारै तौ वर्तमान अशुद्धपर्याय है ।  
 तुम आपाकौं शुद्ध कैसें मानौ हो । बहुरि जो शक्तिअपेक्षा शुद्ध  
 मानो हो, तौ मैं ऐसा होनेयोग्य हों, ऐसा मानौ । ऐसें काहेकौं  
 मानौ हो । तातैं आपकौं शुद्धरूप चितवन करना भ्रम है । काहेतैं—  
 तुम आपकौं सिद्धसमान मान्या, तौ यह संसार अवस्था कौनकी  
 है । अर तुम्हारै केवल ज्ञानादिक हैं, तौ ये मतिज्ञानादिक कौनके  
 हैं । अर द्रव्यकर्म नोकर्मरहित हो, तौ ज्ञानादिककी व्यक्तता  
 क्यों नहीं । परमानंदमय हो, तौ अब कर्तव्य कहा रखा । जन्म-

मरणादि दुःख ही नहीं, तौ दुखी कैसें होत हौ । तातैं अन्य अवस्थाविषै अन्यअवस्था मानना भ्रम है । यहां कोऊ कहै— शास्त्रविषै शुद्धचितवन करनेका उपदेश काहेकौ दिया है । ताका उत्तर—

एक तौ द्रव्यअपेक्षा शुद्धपना है, एक पर्यायअपेक्षा शुद्धपना है । तहां द्रव्यअपेक्षा तौ परद्रव्यतैं भिन्नपनौ वा अपने भावनितैं अभिन्नपनौ ताका नाम शुद्धपना है । अर पर्याय अपेक्षा उपाधिकभावनिका अभाव होना, ताका नाम शुद्धपना है । सो शुद्धचितवनविषै द्रव्य अपेक्षा शुद्धपना ग्रहण किया है । सोई समयसारव्याख्याविषै कहा है—

**एष एवाशेषद्रव्यान्तरभावेभ्यो भिन्नत्वेनोपास्यमानः शुद्ध इत्यभिधीयते ।**

याका अर्थ—जो आत्मा प्रमत्त अप्रमत्त नहीं है । सो यह ही समस्त परद्रव्यनिके भावनितैं भिन्नपनेकरि सेया हुवा शुद्ध ऐसा कहिए है । बहुरि तहां ही ऐसा कहा—

**समस्तकारकचक्रप्रक्रियोत्तीर्णनिर्मलानुभूतिमात्रत्वाच्छुद्धः ।**

याका अर्थ—समस्त ही कर्ता कर्म आदि कारकनिका समूहकी प्रक्रियातैं पारंगत ऐसी जो निर्मल अनुभूति जो अभेदज्ञान तन्मात्र है, तातैं शुद्ध है । तातैं ऐसं शुद्ध शब्दका अर्थ जानना । बहुरि ऐसैं ही केवलशब्दका अर्थ जानना । जो परभावतैं भिन्न निःकेवल आप ही ताका नाम केवल है । ऐसैं ही अन्य यथार्थ अर्थ अवधारना । पर्यायअपेक्षा शुद्धपनो मानैं, वा

केवली आप मानें महाविपरीति होय । तातैं आपकों द्रव्यपर्यायरूप अवलोकना । द्रव्यकरि सामान्यस्वरूप अवलोकना, पर्यायकरि अवस्थाविशेष अवधारना । ऐसैं ही चिंतवन किए सम्यग्दृष्टी हो है । जातैं सांचा अवलोके विना सम्यग्दृष्टी कैसें नाम पावै । बहुरि मोक्षमार्गविषै तौ रागादिक भेटनेका श्रद्धान ज्ञान आचरण करना है । सो तौ विचार ही नाहीं । आपका शुद्ध अनुभवनतैं ही आपकों सम्यग्दृष्टी मानि अन्य सर्व साधनिका निषेध करै है, शास्त्राभ्यासकरना निरर्थक बतावै है, द्रव्यादिकका गुणस्थान मार्गणा त्रिलोकादिका विचारकों विकल्प ठहरावै है, तपश्चरण करना वृथा क्लेश करना मानै है, व्रतादिकका करना बंधनमें परना ठहरावै है, पूजना इत्यादि सर्वकार्यनिकों शुभास्रव जानि हेय प्ररूपै है, इत्यादि सर्व साधनिकों उठाय प्रमादी होय परिणमै है । सो शास्त्राभ्यास निरर्थक होय, तौ मुनिनकै भी तौ ध्यान अध्ययन दोय ही कार्य मुख्य हैं । ध्यानविषै उपयोग न लागै, तब अध्ययनहीविषै उपयोगकूं लगावै है, अन्य ठिकाना बीचमें उपयोग लगावने योग्य है नाहीं । बहुरि शास्त्रकरि तत्त्वनिका विशेष जाननेतैं सम्यग्दर्शन ज्ञान निर्मल होय है । बहुरि तहां यावत् उपयोग रहै, तावत् कषाय मंद रहै । बहुरि आगामी वीतरागभावनिकी वृद्धि होय । ऐसे कार्यकों निरर्थक कैसें मानिए । बहुरि वह कहै—जो जिनशास्त्रनिविषै अध्यात्मउपदेश है, तिनिका अभ्यास करना, अन्य शास्त्रनिका अभ्यासकरि किन्नू सिद्धि नाहीं । ताकां कहिए है—

जो तैरै सांची दृष्टि भई है, तौ सर्व ही जैनशास्त्र कार्यकारी



हैं। तहां भी मुख्यपनै अध्यात्मशास्त्रनिविषै तौ आत्मस्वरूपका मुख्य कथन है। सो सम्यग्दृष्टी भए आत्मस्वरूपका तौ निर्णय होय चुकै, तत्र तौ ज्ञानकी निर्मलताकै अर्थि वा उपयोगकौ मंद-कषायरूप राखनेकै अर्थि अन्य शास्त्रनिका अभ्यास मुख्य चाहिए। अर आत्मस्वरूपका निर्णय भया है, ताका स्पष्ट राखनेकै अर्थि अध्यात्मशास्त्रनिका भी अभ्यास चाहिए। परंतु अन्य शास्त्रनिविषै अरुचि न चाहिए। जाकै अन्यशास्त्रनिकी अरुचि है, ताकै अध्यात्मकी रुचि सांची नाही। जैसे जाकै विषयासक्तपना होय, सो विषयासक्त पुरुषनिकी कथा भी रुचितें मुनै, वा विषयके विशेषकौ भी जानै, वा विषयके आचरननिविषै जो साधन होय, ताकौ भी हितरूप जानै, वा विषयका स्वरूपकौ भी पहिचानै। तैसें जाकै आत्मरुचि भई होय, सो आत्मरुचिके धारक तीर्थकरा-दिक तिनका पुराण भी जानै, बहुरि आत्माके विशेष जाननेकौ गुणस्थानादिककौ भी जानै, बहुरि आत्मआचरणविषै जे व्रता-दिक साधन हैं, तिनकौ भी हितरूप मानै, बहुरि आत्माके-स्वरूपकौ भी पहिचानै। तातैं च्याख्यौं ही अनुयोग कार्यकारी हैं। बहुरि तिनका नीका ज्ञान होनेकै अर्थि शब्दन्यायशास्त्रादिका भी जानना चाहिए। सो अपनी शक्तिके अनुसार थोरा वा बहुत अभ्यासकरना योग्य है। बहुरि वह कहै है, 'पद्मनंदिपच्चीसी' विषै ऐसा कहा है—जो आत्मस्वरूपतैं निकसि बाह्य शास्त्रनिविषै बुद्धि विचरै है, सो वह बुद्धि व्यभिचारिणी है। ताका उत्तर—

यह सत्य कहा है। बुद्धि तौ आत्माकी है, ताकौ छोरि पर-द्रव्य शास्त्रनिविषै अनुरागिणी भई, ताकौ व्यभिचारिणी ही

कहिए । परंतु जैसे स्त्री शीलवती है, तौ योग्य ही है । अर न रखा जाय, तौ उत्तमपुरुषकों छोड़ि चांडालादिकका सेवन किए तौ अत्यंत निंदनीक होय । तैसें बुद्धि आत्मस्वरूपविषै प्रवर्तै, तौ योग्य ही है । अर न रखा जाय, तौ प्रशस्त शास्त्रादि परद्रव्यकों छोरि अप्रशस्त विषयादिविषै लगै तौ महानिंदनीक ही होय । सो मुनिनिकै भी बहुत काल स्वरूपविषै बुद्धि रहै नाहीं, तौ तेरी कैसें रखा करै । तातैं शास्त्राभ्यासविषै बुद्धि लगावना युक्त है । बहुरि जो द्रव्यादिकका वा गुणस्थानादिकका विचारकों विकल्प ठहरावै है, सो विकल्प तो है, परंतु निर्विकल्प उपयोग न रहै, तब इन विकल्पनिकों न करै तौ अन्य विकल्प होय, ते बहुत रागादिगर्भित होय हैं । बहुरि निर्विकल्पदशा सदा रहै नाहीं । जातैं छद्मस्थका उपयोग एकरूप उत्कृष्ट रहै, तौ अंतर्मुहूर्त्त रहै । बहुरि तू कहैगा—मैं आत्मस्वरूपहीका चिंतवन अनेक प्रकार किया करुंगा, सो सामान्य चिंतवनविषै तौ अनेकप्रकार बनै नाहीं । अर विशेष करैगा, तब द्रव्य गुण पर्याय गुणस्थान मार्गणा शुद्ध अशुद्ध अवस्था इत्यादि विचार होयगा । बहुरि केवल आत्मज्ञान-हीतैं तौ मोक्षमार्ग होय नाहीं । सप्ततत्त्वनिका श्रद्धान ज्ञान भए, वा रागादिक दूरि किए मोक्षमार्ग होगा । सो सप्ततत्त्वनिका विशेष जाननेकों जीव अजीवके विशेष वा कर्मके आस्रव बंधादिकका विशेष अवश्य जानना योग्य है, जातैं सम्यग्दर्शन ज्ञानकी प्राप्ति होय । बहुरि तहां पीछैं रागादिक दूरि करनेसौं जे रागादिक बधावनेके कारण तिनकों छोड़ि जे रागादिक घटावनेके कारण होय, तहां उपयोगकों लगावना सो द्रव्यादिकका वा

गुणस्थानादिकका विचार रागादिक घटावनेकों कारण है । इनविषे कोई रागादिकका निमित्त नहीं, ताँतें सम्यग्दृष्टी भए पीछें भी यहां ही उपयोग लगावना । बहुरि वह कहै है—रागादि मिटावनेकों कारण होंय तिनविषैं तौ उपयोग लगावना, परंतु त्रिलोकवर्ती जीवनिकी गति आदि विचार करना, वा कर्मका बंध उदयसत्तादिकका घणा विशेष जानना, वा त्रिलोकका आकार प्रमाणादिक जानना इत्यादि विचार कौन कार्यकारी है । ताका उत्तर—

इनकों भी विचारतैं रागादिक बधते नहीं । जातैं ए ज्ञेय याकै इष्ट अनिष्टरूप हें नहीं । ताँतें वर्तमान रागादिककों कारण नहीं । बहुरि इनकों विशेष जानै तत्त्वज्ञान निर्मल होय, ताँतें आगामी रागादिक घटावनेकों ही कारण हें । ताँतें कार्यकारी हें । बहुरि वह कहै है—स्वर्ग नरकादिककों जानै तहां राग द्वेष हो है । ताका समाधान—

ज्ञानीकै तौ ऐसी बुद्धि होय नहीं, अज्ञानीकै होय । जहां पाप छोड़ि पुण्यकार्यविषे लागै, तहां किञ्च रागादि घटै ही है । बहुरि वह कहै है—शास्त्रविषे ऐसा उपदेश है, प्रयोजनभूत थोरा ही जानना कार्यकारी है । ताँतें विकल्प काहेकों कीजिए । ताका उत्तर—

जे जीव अन्य बहुत जानैं, अर प्रयोजनभूतकों न जानैं, अथवा जिनकी बहुत जाननेकी शक्ति नहीं, तिनकों यह उपदेश दिया है । बहुरि जाकों बहुत जाननेकी शक्ति होय, ताकों तौ यह कष्टा नहीं जो बहुत जाने बुरा होगा । जेता बहुत जानैगा,

तेता ही प्रयोजनभूत जानना निर्मल होगा। जातें शास्त्रविषै  
ऐसा कहा है—

**सामान्यशास्त्रतो नूनं विशेषो बलवान् भवेत् ।**

याका अर्थ—यह सामान्य शास्त्रतैं विशेष बलवान् है। विशेष-  
षहीतैं नीकै निर्णय हो है। तातैं विशेष जानना योग्य है। बहुरि  
वह तपश्चरणकौं वृथाक्लेश ठहरावै है। सो मोक्षमार्ग भए तौ  
संसारी जीवनितैं उलटी परणति चाहिए। संसारी जीवनिकै इष्ट  
अनिष्ट सामग्रीतैं रागद्वेष हो है, याकै रागद्वेष न चाहिए। तहां  
राग छोड़नेकै अर्थि इष्ट सामग्री भोजनादिकका त्यागी हो है।  
अर द्वेष छोड़नेकै अर्थि अनिष्टसामग्री अनशनादिककौं अंगीकार  
करै है। स्वाधीनपनैं ऐसा साधन होय, तौ पराधीन इष्ट अनिष्ट  
सामग्री मिले भी राग द्वेष न होय। सो चाहिए तौ ऐसैं, तेरै  
अनशनादिकतैं द्वेष भया। तातैं ताकौं क्लेश ठहरावै है। जब यह  
क्लेश भया, तब भोजन करना स्वयमेव ही सुख ठहखा। तहां  
राग आया, सो ऐसी परिणति तौ संसारीनिकै पाईए ही है। तैं  
मोक्षमार्गी होय, कहा किया। बहुरि जो तू कहैगा, केई सम्य-  
गृष्टी भी तपश्चरण नाहीं करै हैं। ताका उत्तर—

यह कारणविशेषतैं तप न होय सकै है। परन्तु श्रद्धान  
विषै तौ तपकौं भला जानै है। ताके साधनका उद्यम राखै है।  
तेरै तौ श्रद्धान यह तप करना क्लेश है। बहुरि तपका तेरै उद्यम  
नाहीं। तातैं तेरै सम्यगृष्टि कैसैं होय। बहुरि वह कहै है—  
शास्त्रविषै ऐसा कहा है, तप आदिक क्लेश करै है, तौ करो  
ज्ञानविना सिद्धि नाहीं। ताका उत्तर—

जे जीव तत्त्वज्ञानतैं तौ पराङ्मुख हैं अर तपहीतैं मोक्ष मानै हैं, तिनकौं ऐसा उपदेश दिया है । तत्त्वज्ञानविना केवल तपहीतैं मोक्ष न होय । बहुरि तत्त्वज्ञान भए रागादिक मेटनेकै अर्थि तपकरनेका तौ निषेध है नाहीं । जो निषेध होय, तौ गणधरादिक तप फाहेकौं करै । तातैं अपनी शक्तिअनुसार तप करना योग्य है । बहुरि वह तपादिककौं बंधन मानै है । सो स्वच्छन्दवृत्ति तौ अज्ञानअवस्थाहीविषै थी । ज्ञान पाएं तौ परिणतिकौं रोकै ही है । बहुरि तिस परिणति रोकनेकै अर्थि बाह्य हिंसादिक कारणनिका त्यागी अवश्य भया चाहिए । बहुरि वह कहै है—हमारै परिणाम तौ शुद्ध हैं बाह्य त्याग न किया, तौ न किया । ताका उत्तर—

जे ए हिंसादिकार्य तेरे परिणामविना स्वयमेव होते होंय, तौ हम ऐसैं मानै । अर तू अपना परिणामकरि कार्य करै, तहां तेरे परिणाम शुद्ध कैसें कहिए । विषयसेवनादि क्रिया वा प्रमादगमनादि क्रिया परिणामविना कैसें होय । सो क्रिया तौ आप उद्यमी होय तू करै, अर तहां हिंसादिक होय ताकौं तू गिनै नाहीं, परिणाम शुद्ध मानै । सो ऐसैं मानै तौ तेरे परिणाम अशुद्ध ही रहेंगे । बहुरि वह कहै है—परिणामनिकौं रोके हू ए बाह्य हिंसादिक घटाईए । परंतु प्रतिज्ञाकरनेमें बंध हो है, तातैं प्रतिज्ञारूप व्रत नाहीं अंगीकार करना । ताका समाधान—

जिस कार्यके करनेकी आशा रहै, ताकी प्रतिज्ञा न लीजिए है । अर आशा रहे तिसतैं राग रहै है । तिस रागभावतैं विना कार्य किए भी अविरतिका बंध हुवा करै । तातैं प्रतिज्ञा अवश्य करनी

युक्त है। बहुरि कार्यकरनेकों बंधन भए विना परिणाम कैसें रुकेंगे। प्रयोजन पड़े तद्रूपपरिणाम होंय ही होंय। वा विना प्रयोजन पड़ें भी ताकी आशा रहै। तातैं प्रतिज्ञा करनी ही युक्त है। बहुरि वह कहै है—न जानिए कैसा उदय आवै, पीछें प्रतिज्ञाभंग होय, तौ महापाप लागै। तातैं प्रारब्ध अनुसार कार्य बनै, सो बनौ, प्रतिज्ञाका विकल्प न करना। ताका समाधान—

प्रतिज्ञा ग्रहण करतैं जाका निर्वाह होता न जानै, तिस प्रतिज्ञाकों तौ करै नाहीं। प्रतिज्ञा लेतैं ही यह अभिप्राय रहै, प्रयोजन पड़े छोड़ि घोंगा, वह प्रतिज्ञा कौन कार्यकारी भई। अर प्रतिज्ञा ग्रहण करतैं तौ यह परिणाम है, मरणांत भए भी न छोड़ोंगा ऐसी प्रतिज्ञाकरनी युक्त ही है। विना प्रतिज्ञा किए अविरत संबंधी बंध मिटै नाहीं। बहुरि आगामी उदयकरि प्रतिज्ञा न लीजिए सो उदयकों विचारें सर्व ही कर्तव्यका नाश होय। जैसें आपकों पचता जानै, तितना भोजन करै। कदाचित् काहूकै भोजनतैं अजीर्ण भया होय, तिस भयतैं भोजन छांडै तौ मरण ही होय। तैसें आपकै निर्वाह होता जानै, तितनी प्रतिज्ञा करै। कदाचित् काहूकै प्रतिज्ञातैं भ्रष्टपना भया होय, तौ तिस भयतैं प्रतिज्ञा करनी छांडै तौ असंयम ही होय। तातैं बनै सो प्रतिज्ञा लेनी युक्त है। बहुरि प्रारब्ध अनुसार तौ कार्य बनै ही है, तू उद्यमी होय भोजनादि काहेकों करै है। जो तहां उद्यम करै है, तौ त्याग करनेका भी उद्यम करना युक्त ही है। जब प्रतिभावत् तेरी दशा होय जायगी, तब हम प्रारब्ध ही मानेंगे—तेरा कर्तव्य न मानेंगे। तातै काहेकों स्वच्छंद होनेकी युक्ति बनावै है। बनै सो प्रतिज्ञा-

करि व्रत धारना योग्य है । बहुरि वह पूजनादि कार्यानिर्कौं शुभास्रव जानि हेय मानै है । सो यह सत्य है । परंतु जो इन कार्यानिर्कौं छोड़िं शुद्धोपयोगरूप होय तौ भलै ही है । अर विषय कषायरूप अशुभरूप प्रवर्त्तै, तौ अपना बुरा ही किया । शुभोपयोगतैं स्वर्गादि होय वा भली वासनातैं वा भला निमित्ततैं कर्मका स्थिति अनुभाग घटि जाय, तौ सम्यक्तादिककी भी प्राप्ति होय जाय । बहुरि अशुभोपयोगतैं नरक निगोदादि होय, वा बुरी वासनातैं वा बुरा निमित्ततैं कर्मका स्थिति अनुभाग बधि जाय, तौ सम्यक्तादिक महा दुर्लभ होय जाय । बहुरि शुभोपयोगहीतैं कषाय मंद हो है । अशुभोपयोगतैं तीव्र हो है । सो मंदकषायका कारण छोरि तीव्रकषायका कारण तौ ऐसा है, जैसे कड़वी वस्तु न खानी अर विष खाना । सो यह अज्ञानता है । बहुरि वह कहै है—शास्त्रविषै शुभ अशुभकौं समान कब्बा है, तातैं हमकौं तौ विशेष जानना युक्त नाहीं । ताका समाधान—

जे जीव शुभोपयोगकौं मोक्षका कारण मानि उपादेय मानै हैं, शुद्धोपयोगकौं नाहीं पहिचानै हैं, तिनकौं शुभ अशुभ दोऊनिकौं अशुद्धताकी अपेक्षा वा बंधकारणकी अपेक्षा समान दिखाईए है । बहुरि शुभ अशुभनिका परस्पर विचार कीजिए, तौ शुभभावनिकै विषै कषायमंद हो है, तातैं बंध हीन हो है । अशुभभावनिविषै कषायतीव्र हो है, तातैं बंध बहुत हो है । ऐसे विचार किए अशुभकी अपेक्षा सिद्धांतविषै शुभकौं भला भी कहिए । जैसे रोग तौ थोरा वा बहुत बुरा ही है । परंतु बहुत रोगकी अपेक्षा थोरा रोगकूं भला भी कहिए । तातैं शुभोपयोग नाहीं होय, तब अशुभतैं

कृति शुभविषै प्रवर्तना युक्त है । शुभकों छोरि अशुभविषै प्रवर्तना युक्त नाही । बहुरि वह कहै है—जो कामादिक वा क्षुधादिक मिटाबनेकों अशुभरूप प्रवृत्ति तौ भए विना रहती नाही, अर शुभप्रवृत्ति चाहिकरि करनी परै है । ज्ञानीकै चाहि चाहिए नाही । तातैं शुभका उद्यम नाही करना । ताका समाधान—

शुभप्रवृत्तिविषै उपयोग लगनेकरि वा ताके निमित्ततैं विरागता बधनेकरि कामादिक हीन हो हैं । अर क्षुधादिकविषै भी संकलेश थोरा हो है । तातैं शुभोपयोगका अभ्यास करना । उद्यम किए भी जो कामादिक वा क्षुधादिक रहै, तौ ताकै अर्थि जैसे थोरा पाप लागै, सो करना । बहुरि शुभोपयोगकों छोड़ि निःशंक पापरूप प्रवर्तना तौ युक्त नाही । बहुरि तू कहै है—ज्ञानीकै चाहि नाही अर शुभोपयोग चाहि किए होय, सो जैसे पुरुष किंचिन्मात्र भी अपना धन दिया चाहै नाही, परंतु जहां बहुत द्रव्य जाता जानै, तहां चाहिकरि स्तोक द्रव्य देनेका उपाय करै है । तैसें ज्ञानी किंचिन्मात्र भी कषायरूप कार्य किया चाहै नाही । परंतु जहां बहुत कषायरूप अशुभकार्य होता जानै, तहां चाहिकरि स्तोक कषायरूप शुभकार्य करनेका उद्यम करै । ऐसें यह बात सिद्ध भई—जहां शुद्धोपयोग होता जानै, तहां तौ शुभकार्यका निषेध ही है अर जहां अशुभोपयोग होता जानै, तहां शुभकों उपायकरि अंगीकार करना युक्त है । या प्रकार अनेक व्यवहारकार्यकों उथापि स्वच्छंदपनाकों स्थापै है, ताका निषेध किया । अब तिस ही केवल निश्चयावलंबी जीवकी प्रकृति दिखाइए है—



एक शुद्धात्माकौ जाने ज्ञानी होय है—अन्य किछू चाहिए नहीं, ऐसा जानि कबहू एकांत तिष्ठकरि ध्यानमुद्रा धारि में सर्वकर्मउपाधिरहित सिद्धसमान आत्मा हों, इत्यादि विचारकरि संतुष्ट हो है। सो ए विशेषण कैसैं संभवैं। असंभव हैं, ऐसा विचार नहीं। अथवा अचल अखंडित अनुपम आदि विशेषण-निकरि आत्माकौ ध्यावै हैं, सो ए विशेषण अन्य द्रव्यनिविषै भी संभवै हैं। बहुरि ए विशेषण किस अपेक्षा हैं, सो विचार नहीं। बहुरि कदाचित् सूता बैठ्या जिस तिस अवस्थाविषै ऐसा विचार राखि आपकौ ज्ञानी मानै है। बहुरि ज्ञानीकै आश्रव बंध नहीं, ऐसा आगमविषै कछा है। ताँत कदाचित् विषयकषायरूप हो है। तहां बंध होनेका भय नहीं है। स्वच्छंद भया रागादिकरूप प्रवर्तै है। सो आपा परकौ जाननेका तौ चिह्न वैराग्यभाव है, सो समयसारविषै कछा है—

**सम्यग्दृष्टेर्भवति नियतं ज्ञानवैराग्यशक्तिः ।**

याका अर्थ—यह सम्यग्दृष्टीकै निश्चयसौं ज्ञानवैराग्यशक्ति होय। बहुरि कछा है—

**सम्यग्दृष्टिः स्वयमयमहं जातु बन्धो न मे स्या—**

**दित्युत्तानोत्पुलकवदना रागिणोप्याचरन्तु ।**

**आलम्ब्यन्तां समितिपरतां ते यतोद्यापि पापाः**

**आत्मानात्मावगमविरहात्सन्ति सम्यक्त्वशून्याः ॥ १ ॥**

याका अर्थ—स्वयमेव यह मैं सम्यग्दृष्टी हों, मेरै कदाचित् बंध नहीं, ऐसैं ऊंचा फुलाया है मुख जिननै ऐसे रागी वैराग्य-शक्तिरहित भी आचरण करै हैं, तौ करौ, बहुरि पंचसमितिकी

सावधानीकों अवलंबे हैं, तौ अवलंबौ, ज्ञानशक्ति विना अजहू पापी ही हैं । ए दोऊ आत्मा अनात्माका ज्ञानरहितपनातैं सम्यक्त्व-रहित ही हैं ।

बहुरि पूछिए है—परकों पर जान्या, तौ परद्रव्यविषै रागादि करनेका कहा प्रयोजन रखा । तहां वह कहै है—मोहके उदयतैं रागादि हो हैं । पूर्वे भरतादि ज्ञानी भए, तिनकै भी विषय कषायरूप कार्य भया सुनिए है । ताका उत्तर—

ज्ञानीकै भी मोहके उदयतैं रागादिक हो हैं यह सत्य, परंतु बुद्धिपूर्वक रागादिक होते नाहीं । सो विशेष वर्णन आगैं करैगे । बहुरि जाकै रागादि होनेका किछू विषाद नाहीं, तिनके नाशका उपाय नाहीं, ताकै रागादिक बुरे हैं ऐसा श्रद्धान भी नाहीं संभवै है । ऐसे श्रद्धानविना सम्यग्दृष्टी कैसें होय । जीवाजीवादि तत्त्वनिके श्रद्धान करनेका प्रयोजन तौ इतना ही श्रद्धान है । बहुरि भरतादि सम्यग्दृष्टीनिकै विषय कषायनिकी प्रवृत्ति जैसें हो है, सो भी विशेष आगैं कहैगे । तू उनका उदाहरणकरि स्वच्छंद होगा, तौ तेरै तीव्र आस्रव बंध होगा । सो ही कथा है—

**मग्नाः ज्ञाननयैषिणोपि यदि ते स्वच्छन्दमन्दोद्यमाः ।**

याका अर्थ—यह ज्ञाननयके अवलोकनहारे भी जे स्वच्छंद मंदोद्यमी हो हैं, ते संसारविषै बूड़े । और भी तहां “ज्ञानिनः कर्म न जातु कर्तुमुचितं”—इत्यादि कलशाविषै वा “तथापि न निरर्गलं चरितुमिष्यते ज्ञानिनः”—इत्यादि कलशाविषै स्वच्छंद होना निषेध्या है । विना चाहि जो कार्य होय, सो कर्मबंधका कारण नाहीं । अभिप्रायतैं कर्ता होय करै अर ज्ञाता

रहै, यह तौ बनै नाहीं, इत्यादि निरूपण किया है । ताँतै रागादिक बुरे अहितकारी जानि तिनका नाशके अर्थ उद्यम राखना । तहां अनुक्रमविषै पहलें तीव्ररागादि छोड़नेके अनेक अशुभ कार्य छोड़ि शुभकार्यविषै लगना, पीछैं मंदरागादि भी छोड़नेके अर्थ शुभकों छोड़ि शुद्धोपयोगरूप होना । बहुरि केई जीव व्यापारादि कार्य वा स्त्रीसेवनादि कार्यनिकों भी घटावै हैं । बहुरि शुभकों हेय जानि शास्त्राभ्यासादि कार्यनिविषै नाहीं प्रवर्तै हैं । वीतरागभावरूप शुद्धोपयोगकों प्राप्त भए नाहीं, ते जीव अर्थ काम धर्म मोक्षरूप पुरुषार्थतै रहित होतसतै आलसी निरुद्यमी हो हैं । तिनकी निंदा पंचास्तिकायकी व्याख्याविषै कीनी है । तिनकों दृष्टान्त दिया है—जैसे बहुत खीर खांड खाय पुरुष आलसी हो है, वा जैसे वृक्ष निरुद्यमी हैं, तैसे ते जीव आलसी निरुद्यमी भए हैं । अब इनकों पूछिए है—तुम बाह्य तौ शुभ अशुभ कार्यनिकों घटाया, परंतु उपयोग तौ आलंबनविना रहता नाहीं, सो तुम्हारा उपयोग कहां रहै है, सो कहो । जो वह कहै—आत्माका चिंतवन करै हैं, तौ शास्त्रादिकरि अनेक प्रकारका आत्माका विचारकों तौ तुम विकल्प ठहराया अर कोई विशेषण आत्माके जाननेमें बहुत काल लागै नाहीं, वारंवार एकरूप चिंतवनविषै छद्मस्थका उपयोग लागता नाहीं । गणधरादिकका भी उपयोग ऐसे न रहिसकै, ताँतै तेहू शास्त्रादि कार्यनिविषै प्रवर्तै हैं । तेरा उपयोग गणधरादिकतै भी शुद्ध भया कैसेँ मानिए । ताँतै तेरा कहना प्रमाण नाहीं । जैसे कोऊ व्यापारादिविषै निरुद्यमी होय ठाला जैसे तैसेँ काल गमावै, तैसेँ तू धर्मविषै निरुद्यमी होय प्रमादी

यों ही काल गमावै है । कबहू किछू चिंतवनसा करै, कबहू बातें बनावै, कबहू भोजनादि करै, अपना उपयोग निर्मल करनेकों शास्त्राभ्यास तपश्चरण भक्तिआदि कार्यनिविषै प्रवर्तता नाहीं । सूनासा होय प्रमादी होनेका नाम शुद्धोपयोग ठहराय, तहां क्लेश थोरा होनेतैं जैसे कोई आलसी होय पखा रहनैमें सुख मानै, तैसें आनंद मानै है । अथवा जैसें सुपनेविषै आपको राजा मानि सुखी होय, तैसें आपको भ्रमतैं सिद्ध समान शुद्ध मानि आप ही आनंदित हो है । अथवा जैसें कहीं रति मानि सुखी हो है, तैसें किछू विचार करनेविषै रति मानि सुखी होय, ताकों अनुभवजनित आनंद कहै है । बहुरि जैसें कहीं अरति मानि उदास होय, तैसें व्यापारादिक पुत्रादिककों खेदका कारण जानि तिनतैं उदास रहै है, ताकों वैराग्य मानै है । सो ऐसा ज्ञान वैराग्य तौ कषायगर्भित है । जो वीतरागरूप उदासीन दशाविषै निराकुलता होय, सो सांचा आनंद ज्ञान वैराग्य ज्ञानी जीवनिक्कै चारित्रमोहकी हीनता भए प्रगट हो है । बहुरि वह व्यापारादि क्लेश छोड़ि यथेष्ट भोजनादिकरि सुखी हुवा प्रवर्तै है । आपको तहां कषायरहित मानै है, सो ऐसें आनंदरूप भए तौ रौद्रध्यान हो है । जहां सुखसामग्री छोड़ि दुखसामग्रीका संयोग भए संक्लेश न होय, रागद्वेष न उपजै, तहां निःकषायभाव हो है । ऐसें भ्रमरूप तिनकी प्रवृत्ति पाईए है । या प्रकार जे जीव केवल निश्चयाभासके अवलंबी हैं, ते मिय्यादृष्टी जानने । जैसें वेदांती वा सांख्यमतवाले जीव केवल शुद्धात्माके श्रद्धानी हैं, तैसें ए भी जानने । जातैं श्रद्धानकी समानताकरि उनका उपदेश इनकों इष्ट लागै है, इनका

उपदेश उनको इष्ट लागै है । बहुरि तिन जीवनिके ऐसा श्रद्धान है—जो केवल शुद्धात्माका चितवनतैं तौ संवर निर्जरा हो है, वा मुक्तात्माका सुखका अंश तहां प्रगट हो है । बहुरि जीवके गुण-स्थानादि अशुद्ध भावनिका वा आप विना अन्य जीव पुद्गलादिकका चितवन किए आसव बंध हो है । तातैं अन्य विचारतैं पराङ्मुख रहै हैं । सो यह भी सत्य श्रद्धान नाही । जातैं शुद्ध स्वद्रव्यका चितवन करौ, वा अन्य चितवन करौ । जो वीतरागता लिए भाव होय, तौ तहां संवर निर्जरा ही है । अर जहां रागादिरूप भाव, होय, तहां आसव बंध है । जो परद्रव्यके जाननेहीतैं आसव बंध होय तौ केवली तौ समस्त परद्रव्यको जानै हैं, तिनके भी आसव बंध होय । बहुरि वह कहै है—जो छद्मस्थके परद्रव्य चितवन होतैं आसव बंध हो है । सो भी नाही, जातैं शुक्लध्यानविषै भी मुनि-निके छहों द्रव्यनिका द्रव्यगुणपर्यायनिका चितवन होना निरूपण किया है वा अवधिमनःपर्यायादिविषै परद्रव्यके जाननेकी विशेषता हो है । बहुरि चौथा गुणस्थानविषै कोई अपने स्वरूपका चितवन करै है, ताके भी आसव बंध अधिक है, वा गुणश्रेणी निर्जरा नाही है । पंचम षष्ठम गुणस्थानविषै आहार विहारादि क्रिया होतैं परद्रव्य चितवनतैं भी आसव बंध थोरा हो है वा गुण-श्रेणी निर्जरा हुवा करै है । तातैं स्वद्रव्य परद्रव्यका चितवनतैं निर्जरा बंध नाही । रागादिक घटे निर्जरा है, रागादिक भए बंध है । ताको रागादिकके स्वरूपका यथार्थ ज्ञान नाही, तातैं अन्यथा मानै है । तहां वह पूछै है कि, ऐसै है तौ निर्विकल्पदशाविषै नयप्रमाण निक्षेपादिकका वा दर्शन ज्ञानादिकका भी विकल्प-करनेका निषेध किया है, सो कैसे है । ताका उत्तर—

जे जीव इनही विकल्पनिविधै लगी रहे है, अभेदरूप एक आपाकौं नाहीं अनुभवै हैं, तिनकौं ऐसा उपदेश दिया है, जो ए सर्व विकल्प वस्तुका निश्चयकरनेकौं कारन हैं । वस्तुका निश्चय भए इनका प्रयोजन किछू रहता नाहीं । तातैं इन विकल्पनिकौं भी छोड़ि अभेदरूप एक आत्माका अनुभव करना । इनके विचाररूप विकल्पनिहीविधै फँसि रहना योग्य नाहीं । बहुरि वस्तुका निश्चय भए पीछैं ऐसा नाहीं, जो सामान्यरूप स्वद्रव्यहीका चिंतवन रखा करै । स्वद्रव्यका वा परद्रव्यका सामान्यरूप वा विशेषरूप जानना होय, परंतु वीतरागता लिए होय, तिसहीका नाम निर्विकल्पदशा है । तहां वह पूछै है—यहां तौ बहुत विकल्प भए, निर्विकल्पदशा कैसें संभवै । ताका उत्तर—

निर्विचार होनेका नाम निर्विकल्प नाहीं है । तातैं छद्मस्यकै जानना विचार लिए है । ताका अभाव माने ज्ञानका अभाव होय, तब जड़पना भया । सो आत्माकै होता नाहीं । तातैं विचार तौ रहै । बहुरि जो कहिए, एक सामान्यका ही विचार रहता है, विशेषका नाहीं । तौ सामान्यका विचार तौ बहुतकाल रहता नाहीं वा विशेषकी अपेक्षाविना सामान्यका स्वरूप भासता नाहीं । बहुरि कहिए—आपहीका विचार रहता है, परका नाहीं, तौ परविधै परबुद्धि भए विना आपविधै निजबुद्धि कैसें आवै । तहां वह कहै है, समयसारविधै ऐसा कखा है—

भावयेद्भेदविज्ञानमिदमच्छिन्नधारया ।

तावद्भ्यायनपरं धुत्वा ज्ञानं ज्ञाने प्रतिष्ठिते ॥ १ ॥

याका अर्थ—यह भेदविज्ञान तावत् निरंतर भावना, यावत्

परतैं छूटे ज्ञान है सो ज्ञानविषै स्थिति होय । तातैं भेदविज्ञान छूटें परका ज्ञानना मिटि जाय है । केवल आपहीकों आप जान्या करै है ।

सो यहां तौ यह कह्या है—पूर्वें आपा परकों एक जानै था, पीछैं जुदा जाननेकों—भेदविज्ञानकों तावत् भावना ही योग्य है, यावत् ज्ञान पररूपकों भिन्न जानि अपने ज्ञानस्वरूपहीविषै निश्चित होय । पीछैं भेदविज्ञान करनेका प्रयोजन रह्या नाहीं । स्वयमेव परकों पररूप आपकों आपरूप जान्या करै है । ऐसा नाहीं, जो परद्रव्यका जानना ही मिटि जाय है । जातैं परद्रव्यका जानना वा स्वद्रव्यका विशेष जाननेका नाम विकल्प नाहीं है । तौ कैसे है, सो कहिए है—राग द्वेषके वशतैं किसी ज्ञेयके जाननेविषै उपयोग लगावना । ऐसैं वारंवार उपयोगकों भ्रमावना, ताका नाम विकल्प है । बहुरि जहां वीतराग होय जाकों जानै है, ताकों यथार्थ जानै है । अन्य अन्य ज्ञेयके जाननेके अर्थ उपयोगकों नाहीं भ्रमावै है । तहां निर्विकल्पदशा जाननी । यहां कोऊ कहै—छद्मस्थका उपयोग तौ नाना ज्ञेयविषै भ्रमै ही भ्रमै । तहां निर्विकल्पता कैसें संभवै है । ताका उत्तर—

जेतै काल एक जाननेरूप रहै, तेतै निर्विकल्प नाम पावै । सिद्धांतविषै ध्यानका लक्षण ऐसा ही किया है “एकाग्रचिन्ता-निरोधो ध्यानम् ।” एकका मुख्य चिंतवन होय अर अन्य चिन्ता रुकै, ताका नाम ध्यान है । सर्वार्थसिद्धि सूत्रांकी टीकाविषै यह विशेष कह्या है—जो सर्व चिन्ता रुकनेका नाम ध्यान होय, तौ अचेतनपनो होय जाय । बहुरि ऐसी भी विविक्षा

है—जो संतानअपेक्षा नाना ज्ञेयका भी जानना होय । परंतु यावत् वीतरागता रहै, रागादिककरि आप उपयोगकों अभावै नाहीं, तावत् निर्विकल्पदशा कहिए है । बहुरि वह कहै—ऐसैं है, तौ परद्रव्यतैं छुड़ाय स्वरूपविषै उपयोग लगावनेका उपदेश काहेकों दिया है । ताका समाधान—

जो शुभ अशुभ भावनिकों कारण परद्रव्य हैं, तिनविषै उपयोग लगे जिनके राग द्वेष होय आवै है, अर स्वरूपचितवन करै तौ राग द्वेष घटै है, ऐसे नीचली अवस्थावारे जीवनिकों पूर्वोक्त उपदेश है । जैसे कोऊ स्त्री विकारभावकरि काहूके घर जाय थी, ताकों मनै करी—परघर मति जाय, घरमें बैठि रहौ । बहुरि जो स्त्री निर्विकार भावकरि काहूके घर जाय, यथायोग्य प्रवर्तै, तौ किछू दोष है नाहीं । तैसें उपयोगरूप परणति राग-द्वेषभावकरि परद्रव्यनिविषै प्रवर्तै थी, ताकों मनै करी—परद्रव्य-निविषै मति प्रवर्तै, स्वरूपविषै मग्न रहौ । बहुरि जो उपयोगरूप परणति वीतरागभावकरि परद्रव्यकों जानि यथायोग्य प्रवर्तै, तौ किछू दोष है नाहीं । बहुरि वह कहै है—ऐसैं है, तौ महा-मुनि परिग्रहादिक चितवनका त्याग काहेकों करै हैं । ताका समाधान—

जैसें विकाररहित स्त्री कुशीलके कारण परघरनिका त्याग करै, तैसें वीतरागपरणति राग द्वेषके कारण परद्रव्यनिका त्याग करै है । बहुरि जे व्यभिचारके कारण नाहीं, ऐसे परघर जानेका त्याग है नाहीं । तैसें जे राग द्वेषके कारण नाहीं, ऐसे परद्रव्य जाननेका त्याग है नाहीं । बहुरि वह कहै है—जो जैसें



स्त्री प्रयोजन जानि पितादिककै घर जाय तौ जावो, विना प्रयोजन जिस तिसकै घर जाना तौ योग्य नाही । तैसें परणतिकौ प्रयोजन जानि सप्ततत्त्वनिका विचार करना । विना प्रयोजन गुणस्थानादिकका विचार करना योग्य नाही । ताका समाधान—

जैसें स्त्री प्रयोजन जानि पितादिक वा मित्रादिककै भी घर जाय, तैसें परणति तत्त्वनिका विशेष जाननेकौ कारण गुणस्थानादिक कर्मादिककौ भी जानै । बहुरि यहां ऐसा जानना—जैसें शीलवती स्त्री उद्यमकरि तौ विटपुरुषनिकै स्थान न जाय, अर परवश जाना बनि जाय, तौ तहां कुशील न सेवै, तौ स्त्री शीलवती ही है । तैसें वीतरागपरणति उपायकरि तौ रागादिकके कारण परद्रव्यनिविषै न लागै । जो स्वयमेव तिनका जानना होय जाय, अर तहां रागदि न करै तौ परणति शुद्ध ही है । तैसें स्त्री आदिकी परीषह मुनिनकै होय, तिनकौ जानै ही नाही, अपने स्वरूपहीका जानना रहै है, ऐसा मानना मिथ्या है । उनकौ जानै तौ है, परंतु रागादिक नाही करै है । या प्रकार परद्रव्यनिकौ जानतैं भी वीतरागभाव हो है, ऐसा श्रद्धान करना । बहुरि वह कहै है—ऐसें है तौ शास्त्रविषै ऐसें कैसें कब्या है, जो आत्माका श्रद्धान ज्ञान आचरण सम्यग्दर्शन ज्ञान चारित्र है । ताका समाधान—

अनादितैं परद्रव्यविषै आपका श्रद्धान ज्ञान आचरण था, ताकौ छुड़ावनेकौ यह उपदेश है । आपहीविषै आपका श्रद्धान ज्ञान आचरण भए परद्रव्यविषै रागद्वेषादिपरणतिका श्रद्धान वा ज्ञान वा आचरण मिटि जाय, तब सम्यग्दर्शनादि हो है । जो

परद्रव्यका परद्रव्यरूप श्रद्धानादि करनेतैं सम्यग्दर्शनादि न होते होय, तौ केवलीकै भी तिनका अभाव होय । जहां परद्रव्यकौ बुरा जानना, निजद्रव्यकौ भला जानना, तहां तौ राग द्वेष सहज ही भया । तहां आपकौ आपरूप परकौ पररूप यथार्थ जान्या करै, तैसैं ही श्रद्धानादिरूप प्रवर्तै, तब ही सम्यग्दर्शनादि हो है । ऐसैं जानना । तातैं बहुत कहा कहिए, जैसैं रागादि मिटावनेका श्रद्धान होय, सो ही श्रद्धान सम्यग्दर्शन है । बहुरि जैसैं रागादि मिटावनेका जानना होय, सो ही जानना सम्यग्ज्ञान है । बहुरि जैसैं रागादि मिटै, सो ही आचरण सम्यक्चारित्र है । ऐसा ही मोक्षमार्ग मानना योग्य है । या प्रकार निश्चयनयका आभास लिए एकांतपक्षके धारी जैनाभास तिनकै मिथ्यात्वका निरूपण किया ।

अब व्यवहाराभास पक्षके जैनाभासनिकै मिथ्यात्वका निरूपण कीजिए है—जिनआगमविषै जहां व्यवहारकी मुख्यताकरि उपदेश है, ताकौ मानि बाह्यसाधनादिकहीका श्रद्धानादिक करै है, तिनके सर्व धर्मके अंग अन्यथारूप होय मिथ्याभावकौ प्राप्त होय हैं । यहां ऐसा जानि लेना—व्यवहारधर्मकी प्रवृत्तितैं पुण्यबंध होय है, तातैं पापप्रवृत्ति अपेक्षा तौ याका निषेध है नाहीं । परंतु इहां जो जीव व्यवहार प्रवृत्तिहीकरि सन्तुष्ट होइ, सांचा मोक्षमार्गविषै उद्यमी न होय है, ताकौ मोक्षमार्गविषै सन्मुख करनेकौ तिस शुभरूप मिथ्याप्रवृत्तिका भी निषेधरूप निरूपण कीजिए है । जो यहु कथन कीजिए है, ताकौ सुनि जो शुभप्रवृत्ति छोड़ि अशुभविषै प्रवृत्ति करौगे, तौ तुम्हारा बुरा होगा, और जो यथार्थ

श्रद्धानकरि मोक्षमार्गविषै प्रवृत्त होवौगे, तौ तुम्हारा भला होगा। जैसें कोऊ रोगी निर्गुण औषधिका निषेध सुनि औषधि साधन छोड़ि कुपथ्य करैगा, तौ मरैगा, वैद्यका कछू दोष है नाहीं। तैसें ही कोउ संसारी पुण्यरूप धर्मका निषेध सुनि धर्मसाधन छोड़ि विषय कषायरूप प्रवर्तैगा, तौ वह ही नरकादिविषै दुख पावैगा। उपदेश दाताका तौ दोष नाहीं। उपदेश देनेवालेका अभिप्राय असत्य श्रद्धानादि छुड़ाय मोक्षमार्गविषै लगावनेका जानना। सो ऐसा अभिप्रायतै इहां निरूपण कीजिए है। इहां कोई जीव तौ कुलक्रमकरि ही जैनी हैं, जैनधर्मका स्वरूप जानते नाहीं। परन्तु कुलविषै जैसी प्रवृत्ति चली आई, तैसें प्रवर्तै हैं। सो जैसें अन्यमती अपने कुलधर्मविषै प्रवृत्तै हैं, तैसें ही यहु प्रवृत्तै हैं। जो कुलक्रमहीतै धर्म होय, तौ मुसलमान आदि सर्व ही धर्मात्मा होइ। जैनधर्मका विशेष कहा रखा। सोई कथा है—

लोक्यम्मि रायणीई णायं ण कुलकम्म कइयावि ।

किं पुण तिलोयपट्टणो जिणंदधम्मादिगारम्मि ॥ १ ॥

लोकविषै यहु राजनीति है—कदाचित् कुलक्रमकरि न्याय नाहीं होय है। जाका कुल चोर होय, ताका चोरकरि पकरै, तौ वाका कुलक्रम जानि छोड़ै नाहीं, दंड ही दे। तौ त्रिलोक-प्रभु जिनेन्द्रदेवके धर्मका अधिकारविषै कहा कुलक्रम अनुसारि न्याय संभवै। बहुरि जो पिता दरिद्री होय आप धनवान् होय, तहां तौ कुलक्रम विचारि आप दरिद्री रहता ही नाहीं। धर्मविषै कुलका कहा प्रयोजन है। बहुरि पिता नरकि जाय, पुत्र मोक्ष जाय। तहां कुलक्रम कैसें रखा। जो कुल ऊपरि

दृष्टि होय, तौ पुत्र भी नरकगामी होय । तातैं धर्मविषै किछु कुलक्रमका प्रयोजन नाहीं । शास्त्रनिका अर्थ विचारि जो काल-दोष तैं जिनधर्मविषै भी पापी पुरुषनिकरि कुदेव कुगुरु कुधर्म सेवनादिरूप वा विषयकषायपोषणादिरूप विपरीति प्रवृत्ति चलाई होइ, ताका त्याग करि जिनआज्ञा अनुसारि प्रवर्तना योग्य है । इहां कोऊ कहै-परंपरा छोड़ि नवीन मार्गविषै प्रवर्तना योग्य नाहीं । ताकौं कहिए है—

जो अपनी बुद्धिकरि नवीन मार्ग प्रवर्तै, तो युक्त नाहीं । जो परंपरा अनादिनिधन जैनधर्मका स्वरूप शास्त्रनिविषै लिख्या है, ताकी प्रवृत्ति मेटि पापीपुरुषां अन्यथा प्रवृत्ति चलाई, तौ ताकौं परंपरायमार्ग कैसें कहिए । बहुरि ताकौं छोड़ि पुरातन जैनशास्त्रनिविषै जैसा धर्म लिख्या था, तैसे प्रवर्तै, तौ ताकौं नवीन मार्ग कैसें कहिए । बहुरि जो कुलविषै जैसे जिन-देवकी आज्ञा है, तैसे ही धर्मकी प्रवृत्ति है, तौ आपको भी तैसे ही प्रवर्तना योग्य है । परन्तु ताका कुलचरण जानना, धर्म जानि ताके स्वरूप फलादिकका निश्चय करि अंगीकार करना । जो सांचा भी धर्मको कुलचार जानि प्रवर्तै है, तौ ताकौं धर्मात्मा न कहिए । जातैं सर्व कुलके उस आचरणको छोड़ैं, तौ आप भी छोड़ि दे । बहुरि जो वह आचरण करै है, सो कुलका भयकरि करै है । किछु धर्मबुद्धितैं नाहीं करै है । तातैं वह धर्मात्मा नाहीं । ऐसे विवाहादि कुलसंबंधी कार्यनिविषै तौ कुलक्रमका विचार करना और धर्मसंबंधी कार्यविषै कुलका विचार न करना । जैसे धर्ममार्ग सांचा है, तैसे प्रवर्तना योग्य

है। बहुरि कोई आज्ञा अनुसारि जैनी हैं। जैसे शास्त्रविषै आज्ञा है, तैसें मानै हैं। परन्तु आज्ञाकी परीक्षा करै नाहीं। सो आज्ञा ही मानना धर्म होय, तौ सर्व मतवारे अपने २ शास्त्रकी आज्ञा मानि धर्मात्मा होइ। तातैं परीक्षाकरि जिनवचनकौ सत्यपनो पहिचानि जिनआज्ञा माननी योग्य है। विना परीक्षा किए सत्य असत्यका निर्णय कैसें होय। और विना निर्णय किए जैसें अन्यमती अपने २ शास्त्रनिकी आज्ञा मानै हैं, तैसें याने जैनशास्त्रकी आज्ञा मानी। यहु तो पक्षकरि आज्ञा मानना है। कोउ कहै—शास्त्रविषै दश प्रकार सम्यक्त्वविषै आज्ञासम्यक्त्व कछा है, वा आज्ञाविचयधर्मध्यानका भेद कछा है, वा निःशंकित-अंगविषै जिनवचनविषै संशय करना निषेध्या है, सो कैसे है। ताका समाधान—

शास्त्रविषै केई कथन तौ ऐसे हैं, जिनका प्रत्यक्ष अनुमान करि सकिए है। बहुरि केई कथन ऐसे हैं, जो प्रत्यक्ष अनुमानादिगोचर नाहीं। तातैं आज्ञाहीकरि प्रमाण होय है। तहां नाना शास्त्रनिविषै जो कथन समान होय, तिनकी तौ परीक्षा करनेका प्रयोजन ही नाहीं। बहुरि जो कथन परस्परविरुद्ध होइ, तिनिविषै जो कथन प्रत्यक्ष अनुमानादिगोचर होय, तिनकी तौ परीक्षा करनी। तहां जिन शास्त्रके कथनकी प्रमाणता ठहरे, तिनि शास्त्रविषै जो प्रत्यक्ष अनुमानगोचर नाहीं, ऐसे कथन किए होंय, तिनकी भी प्रमाणता करनी। बहुरि जिन शास्त्रनिके कथनकी प्रमाणता न ठहरै, तिनके सर्व हू कथनकी अप्रमाणता माननी। इहां कोऊ कहै—परीक्षा किए कोई कथन कोई शास्त्रविषै प्रमाण

भासै, कोई कथन कोई शास्त्रविषै अप्रमाण भासै तौ कहा करिए ।  
ताका समाधान—

जो आप्तके भासे शास्त्र हैं, तिनिविषै कोई ही कथन प्रमाण-  
विरुद्ध न होइ । जातैं कै तौ जानपना ही न होइ, कै राग द्वेष  
होय, ते असत्य कहैं । सो आप्त ऐसा होय नाहीं, तातैं परीक्षा  
नीकी नाहीं कीनी है, तातैं भ्रम है । बहुरि वह कहै है—छद्मस्थके  
अन्यथा परीक्षा होय जाय, तौ कहा करै । ताका समाधान—

सांची झूठी दोऊ वस्तुनिकौं मीड़े अर प्रमाद छोड़ि परीक्षा  
किए तौ सांची ही परीक्षा होइ । जहां पक्षपातकरि नीके  
परीक्षा न करै, तहां ही अन्यथा परीक्षा होय है । बहुरि वह  
कहै है, जो शास्त्रनिविषै परस्पर विरुद्ध कथन तो घनो,—  
कौन २ की परीक्षा करिए । ताका समाधान—

मोक्षमार्गविषै देव गुरू धर्म वा जीवादि तत्त्व वा बंधमोक्षमार्ग  
प्रयोजनभूत हैं, सो इनकी परीक्षा करि लैनी । जिन शास्त्रनिविषै ए  
सांचे कहे, तिनकी सर्व आज्ञा माननी । जिनविषै ए अन्यथा  
प्ररूपे, तिनकी आज्ञा न माननी । जैसे लोकविषै जो पुरुष प्रयो-  
जनभूत कार्यनिविषै झूठ न बोलै, सो प्रयोजनरहितविषै कैसें झूठ  
बोलैगा । तैसें जिन शास्त्रनिविषै प्रयोजनभूत देवादिका स्वरूप  
अन्यथा न कह्या, तिनिविषै प्रयोजनरहित द्वीप समुद्रादिकका  
कथन अन्यथा कैसें होगा । जातैं देवादिकका कथन अन्यथा किए  
वक्ताके विषय कषाय पोखे जांय हैं । इहां प्रश्न—जो देवादि-  
कका कथन तो अन्यथा विषयकषायतैं किया, तिन ही शास्त्रनि-  
विषै अन्य कथन अन्यथा काहेकौं किया । ताका समाधान—

जो एक ही कथन अन्यथा कहै, वाका अन्यथापना शीघ्र ही प्रगट होय जाइ । जुदी पद्धती ठहरै नाहीं । तातैं धनै कथन अन्यथा करनेतैं जुदी पद्धति ठहरै । तहां तुच्छबुद्धी भ्रममें पड़ि-जाय—यह भी मत है । तातैं प्रयोजनभूतका अन्यथापनाका भेलनेके अर्थि अप्रयोजनभूत भी अन्यथा कथन घने किए । बहुरि प्रतीति अनावनेके अर्थि कोई २ सांचा भी कथन किया । परंतु स्याना होय, सो भ्रममें परै नाहीं । प्रयोजनभूत कथनकी परीक्षाकरि जहां सांच भासै, तिस मतकी सर्व आज्ञा मानै, सो परीक्षा किए जैनमत ही सांचा भासै है । जातैं याका वक्ता सर्वज्ञ वीतराग है, सो झूठा काहेकौं कहै । ऐसैं जिन आज्ञा मानै, सो सांचा श्रद्धान होइ, ताका नाम आज्ञासम्यक्त्व है । बहुरि जहां एकाग्र चिन्तवन होय, ताका नाम आज्ञाविचय धर्मध्यान है । जो ऐसैं न मानिए अर विना परीक्षा किए आज्ञा माने सम्यक्त्व वा धर्मध्यान होय जाय, तौ द्रव्यलिंगी आज्ञा मानि मुनि भया, आज्ञाअनुसारि साधनकरि प्रैवेयिक पर्यंत प्राप्त होय, ताकै मिथ्यादृष्टिपना कैसैं रखा । तातैं किळू परीक्षाकरि आज्ञा माने ही सम्यक्त्व वा धर्मध्यान होय है । लोकविषै भी कोई प्रकार परीक्षा किए ही पुरुषकी प्रतीति कीजिए है । बहुरि तैं कखा—जिन-वचनविषै संशय करनेतैं सम्यक्त्वको शंका नाम दोष होय, सो 'न जानिए यह कैसैं है,' ऐसा मानि निर्णय न कीजिए तो तहां शंका नाम दोष होय । बहुरि जहां निर्णय करनेको विचार करते ही सम्यक्त्वको दोष लागै, तौ अष्टसहस्रीविषै आज्ञाप्रधानतैं परीक्षाप्रधानको उत्तम काहेकौं कखा । पृच्छना आदि स्वाध्यायके अंग कैसैं कहै ।

प्रमाण नयतैँ पदार्थनिका निर्णय करनेका उपदेश काहेकौँ दिया । तातैँ परीक्षाकरि आज्ञा माननी योग्य है । बहुरि केई पापी पुरुषाँ अपना कल्पित कथन किया है अर तिनकौँ जिनवचन ठहरावै हैं, तिनकौँ जैनमतका शास्त्र जानि प्रमाण न करना । तहां भी प्रमाणादिकतैँ परीक्षाकरि वा परस्पर शास्त्रनतैँ विधि मिलाय वा ऐसैँ संभव है कि नाहीं, ऐसा विचारकरि विरुद्ध अर्थको मिथ्या ही जानना । जैसे टिग आप पत्र लिखि तामैँ लिखनवारेका नाम किसी साहूकारका धर्या, नामके भ्रमतैँ धनको ठिगावै, तौ दरिद्री ही होय । तैसैँ पापी आप ग्रंथादि बनाय, तहां कर्ताका नाम जिन गणधर आचायनिका धर्या, तिस नामके भ्रमतैँ झूठा श्रद्धान करै, तौ मिथ्यादृष्टी ही होय । बहुरि वह कहै है—गोम्मटसारविषै ऐसा कथा है—सम्यग्दृष्टी जीव अज्ञानगुरुकै निमित्ततैँ झूठा भी श्रद्धान करै, तौ आज्ञा माननेतैँ सम्यग्दृष्टी होय है । सो यह कथन कैसैँ किया है । ताका उत्तर—जो प्रत्यक्ष अनुमानादि-गोचर नाहीं, सूक्ष्मपनैँतैँ जिनका निर्णय न होइ सकै, तिनकी अपेक्षा यह कथन है । मूलभूत देव गुरु धर्मादि वा तत्त्वादिकका अन्यथा श्रद्धान भए, तौ सर्वथा सम्यक्त्व रहै नाहीं, यहु निश्चय करना । तातैँ विना परीक्षा किए केवल आज्ञाहीकरि जैनी हैं, ते भी मिथ्यादृष्टी जानने । बहुरि केई परीक्षा भी करि जैनी होय हैं, परंतु मूल परीक्षा नाहीं करै हैं । दया शील तप संयमादि क्रियानिकरि वा पूजा प्रभावनादि कार्यानिकरि वा अतिशय चमत्कारादिकरि वा जिनधर्मतैँ इष्ट प्राप्ति होनेकरि जिनमतकौँ उत्तम जानि प्रीतवंत होय जैनी होय हैं । अन्यमतविषै हू ए कार्य



तौ होय हैं, तातैं इन लक्षणनिविषै अतिव्याप्ति पाइए है । कोऊ कहै—जैसें जिनधर्मविषै ए कार्य हैं, तैसें अन्यमतविषै न पाइए है । तातैं अतिव्याप्ति नाही । ताका समाधान—

यह तौ सत्य है, ऐसें ही है । परंतु जैसें तू दयादिक मानै है, तैसें तौ वै भी निरूपै हैं । परजीवनिकी रक्षाकौ दया तू कहै, सो ही वे कहै हैं । ऐसें ही अन्य जानने ।

बहुरि वह कहै है—उनकै ठीक नाही । कबहू दया प्ररूपै, कबहू हिंसा प्ररूपै । ताका उत्तर—तहां दयादिकका अंशमात्र तौ आया । तातैं अतिव्याप्तिपना इनि लक्षणनिकरि पाइए है । इनिकरि सांची परीक्षा होय नाही । तौ कैसें होय । जिनधर्मविषै सम्यग्दर्शनज्ञानचारित्र मोक्षमार्ग कखा है । तहां सांचे देवादिकका वा जीवादिकका श्रद्धान किए सम्यक्त्व होय, वा तिनिकौ जाने सम्यग्ज्ञान होइ, वा सांचा रागादिक मिटें सम्यक्चारित्र होइ, सो इनिका स्वरूप जैसें जिनमतविषै निरूपण किया है, तैसें कहीं निरूपण किया नाही । वा जैनीविना अन्यमती ऐसा कार्य करि सकते नाही । तातैं यहु जिनमतका सांचा लक्षण है । इस लक्षणकौ पहचानि जे परीक्षा करै, तेई श्रद्धानी हैं । इस विना अन्य प्रकारकरि परीक्षा करै हैं, ते मिथ्यादृष्टी ही रहै हैं ।

बहुरि केई संगतिकरि जैनधर्म धारै हैं । कोई महान्पुरुषको जिनधर्मविषै प्रवर्त्तता देखि आप भी प्रवर्त्तै हैं । केई देखा देखी जिनधर्मकी शुद्ध वा अशुद्ध क्रियानिविषै प्रवर्त्तै हैं । इत्यादि अनेकप्रकारके जीव आप विचारकरि जिनधर्मका रहस्य नाही पहिचानै हैं अर जैनी नाम धरावै हैं, ते सर्व मिथ्यादृष्टी ही

जानने । इतना तौ है, जिनमतविषै पापकी प्रवृत्ति विशेष नाहीं होय सकै है अर पुण्यके निमित्त घने हैं । अर सांचा मोक्षमार्गके भी कारण तहां बनि रहे हैं । तातैं जे कुलादिकरि भी जैनी हैं, ते भी औरनितैं तौ भले ही हैं । बहुरि जे जीव कपटकरि आजीवकाके अर्थि वा बड़ाईके अर्थि वा किछू विषकषायसंबंधी प्रयोजनविचारि जैनी हो हैं, ते पापी ही हैं । अति तीव्रकषाय भए ऐसी बुद्धि आवै है । उनका मुलझना भी कठिन है । जैन-धर्म तौ संसारका नाशिके अर्थि सेवै है । ताकरि जो संसारके प्रयोजन साध्या चाहै, सो बड़ा अन्याय करै है । तातैं ते तौ मिथ्यादृष्टि हैं ही ।

इहां कोऊ कहै—हिंसादिककरि जिन कार्यनिकौं करिए, ते कार्य धर्मसाधनकरि सिद्ध कीजिए, तौ बुरा कहा भया । दोऊ प्रयोजन सधे । ताकौं कहिए है—पापकार्य अर धर्मकार्यका एक साधन किए पाप ही होय । जैसे कोऊ धर्मका साधन चैत्यालय बनाय, तिसहीकौं स्त्रीसेवनादि पापनिका भी साधन करै, तौ पाप ही होइ । हिंसादिककरि भोगादिकके अर्थि जुदा मंदिर बनावै, तौ बनावौ । परंतु चैत्यालयविषै भोगादि करना युक्त नाहीं । तैसें धर्मका साधन पूजा शास्त्रादि कार्य हैं, तिनिहीकौं आजीविका आदि पापका भी साधन करै, तौ पापी ही होय । हिंसादिकरि आजीविकादिकके अर्थि व्यापारादि करै, तौ करौ । परंतु पूजादि कार्यनिविषै तौ आजीविका आदिका प्रयोजन विचारना युक्त नाहीं । इहां प्रश्न—जो ऐसें है तौ मुनि भी धर्मसाधि परघर भोजन करैं हैं वा साधर्मा साधर्मीका उपकार करैं करावैं है, सो कैसें बने । ताका उत्तर—

जो आप किछू आजीविका आदिका प्रयोजन विचारि धर्म नहीं साथै है, आपकौं धर्मात्मा जानि केई स्वयमेव भोजन उपकारादि करै है, तौ किछू दोष है नहीं। बहुरि जो आप ही भोजनादिकका प्रयोजन विचारि धर्म साथै है, तो पापी है ही। जे विरागी होय मुनिपनो अंगीकार करै हैं, तिनिकै भोजनादिकका प्रयोजन नहीं। शरीरकी स्थितिके अर्थि स्वयमेव भोजनादिक कोई दे तौ लें, नहीं तौ समता राखें। संकलेशरूप होय नहीं। बहुरि आप हितकै अर्थि धर्म साथै हैं। उपकार करावनेका अभिप्राय नहीं है। आपके जाका त्याग नहीं, ऐसा उपकार करावें। कोई साधर्मि स्वयमेव उपकार करै, तौ करौ अर न करै तौ आपके किछू संकलेश होता नहीं। सो ऐसैं तौ योग्य है। अर आप ही आजीविका आदिका प्रयोजन विचारि बाह्य धर्मका साधन करै, तहां भोजनादिक उपकार कोई न करै, तहां संकलेश करै, याचना करै, उपाय करै, वा धर्मसाधनविषै शिथिल होय जाय, सो पापी ही जानना। ऐसैं संसारीक प्रयोजन लिए धर्म साथै हैं, ते पापी भी हैं अर मिथ्यादृष्टी हैं ही। याप्रकार जिनमतवाले भी मिथ्यादृष्टि जानने। अब इनकै धर्मका साधन कैसैं पाइए है, सो विशेष दिखाइए है—

तहां जीव कुलप्रवृत्तिकरि वा देख्यां देखी लोभादिकका अभिप्रायकरि धर्म साथै हैं, तिनिकै तौ धर्मदृष्टि नहीं। जो भक्ति करै है तौ चित्त तौ कहीं है, दृष्टि फिस्था करै है। अर मुखतैं पाठादि करै है वा नमस्कारादि करै है। परंतु यह ठीक नहीं—मैं कौन हौं, किसकी स्तुति करूं हूं, किस प्रयोजनके अर्थि स्तुति

करौं हौं, पाठविषै कहा अर्थ है, सो किछू ठीक नहीं। बहुरि कदाचित् कुदेवादिककी भी सेवा करने लगि जाय। तहां सुदेव गुरुशास्त्रादिविषै विशेष पहिचानै नहीं। बहुरि जो दान दे है, तौ पात्र अपात्रका विचाररहित जैसे अपनी प्रशंसा होय, तैसे दान दे है। बहुरि तप करै है, तौ भूखा रहनेकरि महंतपनौ होय सो कार्य करै है। परिणामिनकी पहिचान नहीं। बहुरि व्रतादिक धारै है, तहां बाह्यक्रिया ऊपरि दृष्टि है, सो भी कोई सांची क्रिया करै है, कोई झूठी करै है। अर अंतरंग रागादिक भाव पाइए है, तिनिका विचार ही नहीं। वा बाह्य भी रागादि पोषनेका साधन करै है। बहुरि पूजा प्रभावना आदि कार्य करै है। तहां जैसे लोकविषै बढ़ाई होय वा विषय कषाय पोषे जाय, तैसे कार्य करै है। बहुरि बहुत हिंसादिक निपजावै है। सो ए कार्य तौ अपना वा अन्य जीवनिका परिणाम सुधारनेके अर्थि कहे हैं। बहुरि तहां किंचित् हिंसादिक भी निपजै है, तौ थोरा अपराध होय गुण बहुत होय, सो कार्य करना कह्या है। सो परिणामिनकी पहिचानि नहीं। अर यहां अपराध केता लगै है, गुण केता हो है, सो नफा टोटाका ज्ञान नहीं, वा विधि अविधिका ज्ञान नहीं। बहुरि शास्त्राभ्यास करै है। तहां पद्धतिरूप प्रवर्तै है। जो वांचै है, तौ औरनिकौं सुनाय दे है। जो पढ़ै है, तौ आप पढ़ि जाय है। सुनै है, तौ कहै है सो सुनि ले है। जो शास्त्राभ्यासका प्रयोजन है, ताकौं आप नहीं अवधारै है। इत्यादि धर्मकार्यनिका धर्मकौं नहीं पहिचानै। केई तौ कुलविषै जैसे बड़े प्रवर्तै, तैसे हमकौं भी करना, अथवा और

करै हैं, तैसें हमकों भी करना, वा ऐसें किए हमारा लोभादिककी सिद्धि होगी, इत्यादि विचार लिए अभूतार्थ धर्मकों साथै हैं । बहुरि केई जीव ऐसे हैं, जिनके किछू तौ कुलादिरूप बुद्धि है, किछू धर्मबुद्धि भी है, तातैं पूर्वोक्तप्रकार भी धर्मका साधन करै हैं अर किछू आगैं कहिए है, तिस प्रकार अपने परिणामनिकों भी सुधारै हैं । मिश्रपनो पाईए है । बहुरि केई धर्मबुद्धिकरि धर्म साथै हैं, परंतु निश्चयधर्मकों न जानै हैं । तातैं अभूतार्थ धर्मकों साथै हैं । तहां व्यवहार सम्यग्दर्शन ज्ञान चारित्रिकों मोक्षमार्ग जानि तिनिका साधन करै हैं । तहां शास्त्रविषै देव गुरु धर्मकी प्रतीति लिए सम्यक्त्व होना कब्या है । ऐसी आज्ञा मानि अरहंत देव निर्ग्रंथ गुरु जैनशास्त्र विना औरनिकों नमस्कारादि करनेका त्याग किया है । परंतु तिनका गुण अवगुणकी परीक्षा नाहीं करै हैं । अथवा परीक्षा भी करै, तौ तत्त्वज्ञानपूर्वक सांची परीक्षा नाहीं करै हैं । बाह्यलक्षणनिकरि परीक्षा करै हैं । ऐसें प्रतीतिकरि सुदेव गुरु शास्त्रनिकी भक्तिविषै प्रवर्त्तै हैं । तहां अरहंत देव है, सो इंद्रादिकरि पूज्य है, अनेक अतिशयसहित है, क्षुधादिदोषरहित है, शरीरकी सुंदरताकों धरै है, स्त्रीसंगमादि रहित है, दिव्यध्वनिकरि उपदेश दे है, केवलज्ञानकरि लोकालोक जानै है, काम क्रोधादिक नष्ट किए हैं, इत्यादि विशेषण कहै है । तहां इनविषै केई विशेषण पुद्गलके आश्रय हैं, केई जीवके आश्रय हैं । तिनकों भिन्न भिन्न नाहीं पहिचानै है । जैसें असमानजातीय मनुष्यादि पर्यायनिविषै भिन्न न जानि मिथ्यादृष्टि धरै है, तैसें यह असमान जातीय अरहंतपर्यायविषै जीव पुद्गलके

विशेषणनिकों भिन्न न जानि मिथ्यादृष्टिता धरै है । बहुरि जो बाह्य विशेषण हैं, तिनकों तौ जानि तिनकरि अरहंतदेवको महंतपनो विशेष मानै है । अर जे जीवके विशेषण हैं, तिनकों यथावत् न जानि तिनकरि अरहंतदेवको महंतपनो आज्ञा अनुसार मानै है । अथवा अन्यथा मानै है । जातैं यथावत् जीवका विशेषण जाने मिथ्यादृष्टी रहै नाहीं । बहुरि तिन अरहंतनिकों स्वर्गभोक्षका दाता दीनदयाल अधमउधारक पतितपावन मानै है । सो अन्यमती कर्तृत्वबुद्धितैं ईश्वरकों जैसे मानै है, तैसें यह अरहंतकों मानै है । ऐसा नाहीं जानै है—फल तौ अपने परिणामनिका लागै है, अरहंतनिकों निमित्त मानै हैं, तातैं उपचारकरि वै विशेषण संभवै हैं । अपने परिणाम शुद्ध भए विना अरहंत हू स्वर्गभोक्षादिका दाता नाहीं । बहुरि अरहंतादिकके नामादिकतैं श्वानादिक स्वर्ग पाया । तहां नामादिकका ही अतिशय मानै हैं । विना परिणाम नाम लेनेवालोंकै भी स्वर्गकी प्राप्ति न होय, तौ सुननेवालेकै कैसें होय । श्वानादिककै नाम सुननेके निमित्ततैं मंदकषायरूप भाव भए हैं । तिनका फल स्वर्ग भया है । उपचारकरि नामहीकी मुख्यता करी है । बहुरि अरहंतादिकके नाम पूजनादिकतैं अनिष्ट सामग्रीका नाश इष्ट सामग्रीकी प्राप्ति मानि रोगादि भेटनेके अर्थि वा धनादिकी प्राप्तिके अर्थि नाम ले है वा पूजनादि करै है । सो इष्ट अनिष्टके तौ कारण पूर्वकर्मका उदय है । अरहंत तौ कर्त्ता है नाहीं । अरहंतादिककी भक्तिरूप शुभोपयोग परिणामनितैं पूर्व पापका संक्रमणादिक होय जाय है । तातैं उपचारकरि अनिष्टका नाशकों इष्टकी प्राप्तिकों कारण अर-

हंतादिककी भक्ति कहिए है । अर जो जीव पहलैं ही संसारी प्रयोजन लिए भक्ति करै, ताकै तौ पापहीका अभिप्राय रखा । कांक्षारूप भाव भए तिनकरि पूर्वपापका संक्रमणादि कैसें होय । बहुरि तिनका कार्यसिद्ध न भया । बहुरि केई जीव भक्तिकौ मुक्तिका कारण जानि तहां अति अनुरागी होय प्रवर्तै हैं । सो अन्यमती जैसें भक्तितैं मुक्ति मानै हैं, तैसें याकै भी श्रद्धान भया । सो भक्ति तौ रागरूप है । रागतैं बंध है । तातैं मोक्षका कारण नाहीं । जब रागका उदय आवै, तब भक्ति न करै, तौ पापानुराग होय । तातैं अशुभ राग छोड़नेकौं ज्ञानी भक्तिविषै प्रवर्तै हैं । वा मोक्षमार्गकौं बाह्य निमित्तमात्र भी जानै हैं । परंतु यहां ही उपादेयपना मानि संतुष्ट न हो हैं । शुद्धोपयोगका उद्यमी रहै हैं । सो ही पंचास्तिकायव्याख्याविषै कखा है—

**इयं भक्तिः केवलभक्तिप्रधानस्याज्ञानिनो भवति ।  
तीव्ररागद्वेषविनोदार्थमस्थानरागनिषेधार्थं क्वचित्  
ज्ञानिनोपि भवति ॥**

याका अर्थ—यह भक्ति केवलभक्ति ही है प्रधान जाकै ऐसा अज्ञानीजीवकै हो है । बहुरि तीव्र रागज्वर मेटनेके अर्थ वा कुठिकानैं रागनिषेधनेके अर्थ कदाचित् ज्ञानीकै भी हो है । तहां वह पूछै है—ऐसें है, तौ ज्ञानीतैं अज्ञानीकै भक्तिकी विशेषता होती होगी । ताका उत्तर—

यथार्थपनेकी अपेक्षा तौ ज्ञानीकै सांची भक्ति है—अज्ञानीकै नाहीं है । अर रागभावकी अपेक्षा अज्ञानीकै श्रद्धानविषै भी मुक्तिकारण जाननेतैं अति अनुराग है । ज्ञानीकै श्रद्धानविषै

शुभबंधकारण जाननेतैं तैसा अनुराग नाही है । बाह्य कदाचित् ज्ञानीकै अनुराग घना हो है, कदाचित् अज्ञानीकै हो है ऐसा जानना । ऐसैं देवभक्तिका स्वरूप दिखाया । अब गुरुभक्ति वाकै कैसैं हो है, सो कहिए है—

केई जीव आज्ञानुसारी हैं । ते तौ ए जैनके साधु हैं, हमारे गुरु हैं, तातैं इनकी भक्ति करनी, ऐसैं विचारि तिनकी भक्ति करै हैं । बहुरि केई जीव परीक्षा भी करै हैं । तहां ए मुनि दया पाळै है, शील पाळै है, धनादि नाही राखै हैं, उपवासादि तप करै हैं, क्षुधादि परीपह सहै हैं, किसीसौं क्रोधादि नाही करै हैं, उपदेश देय औरनिकौं धर्मविषै लगावै हैं, इत्यादि गुण विचारि तिनविषै भक्तिभाव करै हैं । सो ऐसे गुण तौ परमहंसादिक परमती हैं, तिनविषै वा जैनी मिथ्यादृष्टीनिविषै भी पाईए । तातैं इनविषै अतिव्यासपनो है । इनकरि सांची परीक्षा होय नाही । बहुरि जिन गुणनिकौं विचारै है, तिनविषै केई जीवाश्रित हैं, केई पुद्गलाश्रित हैं, तिनका विशेष न जानना, असमानजातीय मुनिपर्यायविषै एकत्व बुद्धितैं मिथ्यादृष्टि ही रहै है । बहुरि सम्यग्दर्शनज्ञानचारित्रकी एकतारूप मोक्षमार्ग सोई मुनिनका सांचा लक्षण है । ताकौं पहिचानै नाही । जातैं यह पहिचानि भए मिथ्यादृष्टी रहता नाही । ऐसैं मुनिनका सांचा स्वरूप ही न जानै, तौ सांची भक्ति कैसैं होय । पुण्यबंधकौं कारणभूत शुभक्रियारूप गुणनिकौं पहिचानि तिनकी सेवातैं अपना भला होना जानि तिनविषै अनुरागी होय भक्ति करै है । ऐसा गुरुभक्तिका स्वरूप कहा । अब शास्त्रभक्तिका स्वरूप कहिए है—



केई जीव तौ यह केवली भगवानकी वानी है, तातैं केवलीके पूज्यपनातैं यह भी पूज्य है, ऐसा जानि भक्ति करै हैं । बहुरि केई ऐसैं परीक्षा करै हैं—इन शास्त्रनिविषै विरागता दया क्षमा शील संतोषादिकका निरूपण है, तातैं उत्कृष्ट हैं, ऐसा जानि भक्ति करै हैं । सो ऐसा कथन तौ अन्य शास्त्र वेदान्तादिक तिनविषै भी पाईए है । बहुरि इन शास्त्रनिविषै त्रिलोकादिकका गंभीर निरूपण है । तातैं उत्कृष्टता जानि भक्ति करै हैं । सो यहां अनुमानादिकका तौ प्रवेश नाही । यहां अनेकांतरूप सांचा जीवादितत्त्वनिका निरूपण है । अर सांचा रत्नत्रयरूप मोक्षमार्ग दिखाया है । ताकरि जैनशास्त्रनिकी उत्कृष्टता है । ताकाँ नाही पहिचानै है । जातैं यह पहचानि भए मिथ्यादृष्टि रहै नाही । ऐसैं शास्त्रभक्तिका स्वरूप कह्या ।

या प्रकार याकै देव गुरु शास्त्रकी प्रतीति भई, तातैं व्यवहार-सम्यक्त्व भया मानै है । परंतु उनका सांचास्वरूप भास्या नाही । तातैं प्रतीति भी सांची भई नाही । सांची प्रतीतिविना सम्यक्त्वकी प्राप्ति नाही । तातैं मिथ्यादृष्टी रहै है । बहुरि शास्त्रनिषै “तत्त्वार्थश्रद्धानं सम्यग्दर्शनम्” ऐसा वचन कह्या है । तातैं जैसे शास्त्रनिविषै जीवादि तत्त्व लिखे हैं, तैसे आप सीखि ले है । तहां ही उपयोग लगावै है । औरनिकाँ उपदेश दे है, परन्तु तिनका भाव भासता नाही । अर यहां तिस वस्तुका भावहीका नाम तत्त्व कह्या । सो भाव भासे विना तत्त्वार्थश्रद्धान कैसे होय । भावभासना कहा, सो कहिए है—

जैसें कोऊ पुरुष चतुर होनेकै अर्थि शास्त्रकरि स्वर ग्राम मूर्छना

रागनिका स्वरूप ताल तानके भेद तिनकों सीखै है। परंतु खरादिकका स्वरूप नहीं पहिचानै है। स्वरूपपहिचानि भए विना अन्य खरादिककों अन्य खरादिकरूप मानै है। वा सत्य भी मानै है, तौ निर्णयकरि नहीं मानै है। तातैं वाकै चतुरपनो होय नहीं। तैसें कोऊ जीव सम्यक्ती होनेकै आर्थे शास्त्रकरि जीवादि तत्त्वनिका स्वरूपकों सीखै है। परंतु तिनका स्वरूपकौ नहीं पहिचानै है। स्वरूप पहिचाने विना अन्य तत्त्वनिकों अन्य तत्त्वरूप मानि ले है। वा सत्य भी मानै है, तौ निर्णयकरि नहीं मानै है। तातैं वाकै सम्यक्त्व होय नहीं। बहुरि जैसें कोई शास्त्रादि पढ़्या है, वा न पढ़्या है, जो खरादिकका स्वरूपकों पहिचानै है, तौ वह चतुर ही है। तैसें शास्त्र पढ़्या है वा न पढ़्या है, जो जीवादिकका स्वरूप पहिचानै है, तौ वह सम्यग्दृष्टी ही है। जैसें हिरण रागादिकका नाम न जानै है, अर ताका स्वरूपकों पहिचानै है। तैसें तुच्छबुद्धि जीवादिकका नाम न जानै है, अर तिनका स्वरूपकों पहिचानै है। यह मैं हूं, यह पर है, ए भाव बुरे हैं, ए भले हैं, ऐसें स्वरूप पहिचानै ताका नाम भावभासना है। शिवभूति मुनि जीवादिकका नाम न जानै था, अर “तुषमाषभिन्न” ऐसा घोषने लगा, सो यह सिद्धान्तका शब्द था नहीं। परंतु आपा परका भावरूप ध्यान किया, तातैं केवली भया। अर ग्यारह अंगका पाठी जीवादितत्त्वनिका विशेषभेद जानै, परंतु भासै नहीं, तातैं मिथ्यादृष्टी ही रहै है। अब याकै तत्त्वश्रद्धान किसप्रकार हो है, सो कहिए है—

जिनशास्त्रनिविषै कहे जीवके त्रस स्थावरादिरूप वा गुणस्थान-

मार्गणादिरूप भेदनिकौ जानै है अर जीवके पुद्गलादि भेदनिकौ वा तिनके वर्णादि विशेष तिनकौ जानै है । परंतु अध्यात्मशास्त्र-निविषै भेदविज्ञानकौ कारणभूत वा वीतरागदशा होनेकौ कारण-भूत जैसें निरूपण किया है, तैसें न जानै है । बहुरि किसी प्रसंगतैं तैसें भी जानना होय, तौ शास्त्र अनुसार जानि ले है । परंतु आपका आप जानि परका अंश भी न मिलावना अर आपका अंश भी परविषै न मिलावना, ऐसा सांचा श्रद्धान नाहीं करै है । जैसें अन्य मिथ्यादृष्टी निर्धारविना पर्यायबुद्धिकरि जानपनाविषै वा वर्णादिविषै अहंबुद्धि धारै हैं, तैसें यह भी आत्माश्रित ज्ञानादिविषै वा शरीराश्रित उपदेश उपवासादि क्रियानिविषै आपो मानै है । बहुरि शास्त्रकै अनुसार कबहू सांची बात भी बनावै, परंतु अंतरंग निर्द्धाररूप श्रद्धान नाहीं । तातैं जैसें मतवाला माताकौ माता भी कहै, तौ स्याना नाहीं । तैसें याकौ सम्यक्ती न कहिए । बहुरि जैसें कोई औरहीकी बातें करता होय, तैसें आत्माका कथन करै । परंतु यह आत्मा में हूं, ऐसा भाव नाहीं भासै । बहुरि जैसें कोई औरकूं औरतैं भिन्न बतावता होय, तैसें आत्मा शरीरकी भिन्नता प्ररूपै । परंतु मैं इस शरीरादिकतैं भिन्न हूं, ऐसा भाव भासै नाहीं । बहुरि पर्यायविषै जीव पुद्गलकै परस्पर निमित्ततैं अनेक क्रिया हो हैं, तिनकौ दोय द्रव्यका मिलापकरि निपजी जानै । यह जीवकी क्रिया है, ताका पुद्गल निमित्त है, यह पुद्गलकी क्रिया है, ताका जीव निमित्त है, ऐसा भिन्न भिन्न भाव भासै नाहीं । इत्यादि भाव भासे विना जीव अजीवका सांचा श्रद्धानी न कहिए । तातैं जीव अजीव जाननेका तौ यह ही

प्रयोजन था, सो भया नहीं। बहुरि आश्रवतत्त्वविषै जे हिंसादिरूप पापासव हैं, तिनकौं हेय जानै है। अहिंसादिरूप पुण्यासव है, तिनकौं उपादेय मानै है। सो ए तौ दोऊ ही कर्मबंधके कारण इनविषै उपादेयपना मानना सोई मिथ्यादृष्टि है। सोई समय-सारका बंधाधिकारविषै कब्जा है—

सर्व जीवनिक्कै जीवन मरण सुख दुःख अपने कर्मके निमित्त तैं हो है। जहां अन्य जीव अन्य जीवकै इन कार्यानिका कर्ता होय, सोई मिथ्याध्यवसाय बंधका कारण है। तहां अन्य जीवकौ जिवावनेका वा सुखी करनेका अध्यवसाय होय, सो तौ पुण्यबंधका कारण है, अर मारनेका वा दुखी करनेका अध्यवसाय होय, सो पापबंधका कारण है। ऐसैं अहिंसावत् सत्यादिक तौ पुण्यबंधकौ कारण हैं, अर हिंसावत् असत्यादिक पापबंधकौ कारण हैं। ए सर्व मिथ्याध्यवसाय हैं, ते त्याज्य हैं। तातैं हिंसादिवत् अहिंसादिककौ भी बंधका कारण जानि हेय ही मानना। हिंसाविषै मारनेकी बुद्धि होय, सो वाका आयु पूरा हुवा विना मरै नहीं। अपनी द्वेषपरणतिकरि आप ही पाप बांधै है। अहिंसाविषै रक्षा-करनेकी बुद्धि होय, सो वाका आयु अवशेषविना जीवै नहीं, अपनी प्रशस्त रागपरणतिकरि आप ही पुण्य बांधै है। ऐसैं ए दोऊ होय हैं। जहा वीतराग होय दृष्टा ज्ञाता प्रवर्त्तै, तहां निर्बंध है। सो उपादेय है। सो ऐसी दशा न होय, तावत् प्रशस्त रागरूप प्रवर्त्तै। परंतु श्रद्धान तौ ऐसा राखौ—यह भी बंधका कारण है—हेय है। श्रद्धानविषै याकौं मोक्षमार्ग जाने मिथ्या-दृष्टी ही है।

बहुरि मिथ्यात्व अविरत कषाय योग ए आस्रवके भेद हैं, तिनकों बाह्यरूप तौ मानै, अंतरंग इन भावनिकी जातिकों पहिचानै नाहीं। तहां अन्य देवादिकसेवनेरूप गृहीतमिथ्यात्वकों मिथ्यात्व जानै, अर अनादि अगृहीतमिथ्यात्व है, ताकों न पहिचानै। बहुरि बाह्य त्रस स्थावरकी हिंसा वा इंद्रिय मनके विषयनिविषै प्रवृत्ति ताकों अविरत जानै। हिंसाविषै प्रमादपरणति मूल है, अर विषयसेवनविषै अभिलाष मूल है, ताकों न अवलोकै। बहुरि बाह्य क्रोधादि करना, ताकों कषाय जानै, अभिप्रायविषै रागद्वेष रहै, ताकों न पहिचानै। बहुरि बाह्य चेष्टा होय, ताकों योग जानै, शक्तिभूत योगनिकों न जानै। ऐसैं आस्रवनिका स्वरूप अन्यथा जानै। बहुरि राग द्वेष मोहरूप जे आस्रवभाव हैं, तिनका तौ नाश करनेकी चिंता नाहीं। अर बाह्यक्रिया वा बाह्य निमित्त भेटनेका उपाय राखै, सो तिनके भैटे आश्रव मिटता नाहीं। द्रव्यलिंगीमुनि अन्य देवादिककी सेवा न करै हैं, हिंसा वा विषयनिविषै न प्रवर्तै हैं, क्रोधादि न करै हैं, मन वचन कायकों रोकै हैं, तौ भी वाकै मिथ्यात्वादि च्यारों आस्रव पाईए है। बहुरि कपटकरि भी ए कार्य न करै हैं। कपटकरि करै, तौ प्रैवेयकपर्यंत कैसें पहुंचै। तातैं जो अंतरंग अभिप्रायविषै मिथ्यात्वादिरूप रागादिभाव हैं, सोई आस्रव हैं। ताकों न पहिचानै, तातैं याकै आस्रवतत्त्वका भी सत्य श्रद्धान नाहीं। बहुरि बंधतत्त्वविषै जे अशुभभावनिकरि नरकादिरूप पापका बंध होय, ताकों तौ बुरा जानै अर शुभभावनिरूप पुण्यका बंध होय, ताकों भला जानै। सो सर्व ही जीवनिकै दुखसामग्रीविषै द्वेष सुखसामग्री-

विषै राग पाईए, सो ही याकै राग द्वेष करनेका श्रद्धान भया ।  
 जैसा इस पर्यायसंबंधी सुखदुखसामग्रीविषै राग द्वेष करना, तैसा  
 ही आगामी पर्यायसंबंधी सुखदुखसामग्रीविषै राग द्वेष करना ।  
 बहुरि शुभअशुभभावनिकरि पुण्यपापका विशेष तौ अघाति  
 कर्मनिविषै हो है । सो अघातिकर्म आत्माके गुणके घातक नाहीं ।  
 बहुरि शुभ अशुभ भावनिविषै घातिकर्मनिका तौ निरंतरबंध  
 होय । ते सर्व पापरूप ही हैं । अर तेई आत्मगुणके घातक हैं ।  
 तातैं अशुद्ध भावनिकरि कर्मबंध होय, तिसविषै भला बुरा  
 जानना सोई मिथ्याश्रद्धान है । सो ऐसे श्रद्धानतैं बंधका भी  
 याकै सत्यश्रद्धान नाहीं । बहुरि संवरतत्त्वविषै अहिंसादिरूप  
 शुभास्रव भाव तिनकौ संवर जानै है । सो एक कारणतैं पुण्यबंध  
 भी मानै अर संवर भी मानै, सो बनै नाहीं । यहां प्रश्न—जो  
 मुनिनिकै एकै काल ए भाव हो हैं । तहां उनकै बंध भी हो है अर  
 संवर निर्जरा भी हो है, सो कैसें है । ताका समाधान—

वह भाव मिश्ररूप है । किछू वीतराग भया है, किछू सराग  
 भया है । जे अंश वीतराग भए तिनकरि संवर है ही अर जे  
 अंश सराग रहे, तिनकरि बंध है । सो एकभावतैं तौ दो कार्य बनै  
 परंतु एक प्रशस्तरागहीतैं पुण्यास्रव भी मानना अर संवरनिर्जरा  
 भी मानना सो भ्रम है । मिश्रभावविषै भी यह सरागता है, यह  
 विरागता है, ऐसी पहचानि सम्यग्दृष्टीहीकै होय । तातैं  
 अवशेष सराग ताकौ हेय श्रद्दहै है । मिथ्यादृष्टीकै ऐसी पहचानि  
 नाहीं । तातैं सराग भावविषै संवरका भ्रमकरि प्रशस्त रागरूप  
 कार्यनिकौ उपादेय श्रद्दहै । बहुरि सिद्धांतविषै गुप्ति समिति

धर्म अनुप्रेक्षा परीषह—जय चारित्र इनकरि संवर हो है, ऐसा कक्षा है । सो इनकौ भी यथार्थ न श्रद्धहै है । कैसें, सो कहिए है—

बाह्य मन वचन कायकी चेष्टा मेटै, पापचिंतवन न करै, मौन धरै, गमनादि न करै, सो गुप्ति मानै है । सो यहां तौ मनविषै भक्तिआदिरूप प्रशस्तरागादि नानाविकल्प हो हैं, वचन कायकी चेष्टा आप रोकि राखै है, तहां शुभप्रवृत्ति है, अर प्रवृत्तिविषै गुप्तिपनो बनै नाहीं । तातैं वीतरागभाव भए जहां मन वचन कायकी चेष्टा न होय, सो ही सांची गुप्ति है । बहुरि परजीवनिकी रक्षाकै अर्थ यत्नाचारप्रवृत्ति ताकौं समिति मानै है । सो हिंसाके परिणामनिर्ते तौ पाप हो है, अर रक्षाके परिणामनिर्ते संवर कहौगे, तौ पुण्यबंधका कारण कौन ठहरैगा । बहुरि एषणासमिति-विषै दोष टालै है । तहां रक्षाका प्रयोजन है नाहीं । तातैं रक्षाहीकै अर्थ समिति नाहीं है । तौ समिति कैसें हो है— मुनिनकै किंचित् राग भए गमनादि क्रिया हो है । तहां तिन क्रियानिविषै अति आसक्तताके अभावतैं प्रमादरूप प्रवृत्ति न हो है । बहुरि और जीवनिकौं दुखी करि अपना गमनादि प्रयोजन न साधै हैं । तातैं स्वयमेव ही दया पलै है । ऐसें सांची समिति है । बहुरि बंधादिकके भयतैं वा स्वर्गमोक्षकी चाहितैं क्रोधादि न करै है, सो यहां क्रोधादिकरनेका अभिप्राय तौ गया नाहीं । जैसें कोई राजादिकका भयतैं वा महंतपनाका लोभतैं परस्त्री न सेवै है, तौ वाकौं त्यागी न कहिए । तैसें ही यह क्रोधादिका त्यागी नाहीं । तौ कैसें त्यागी होय । पदार्थ अनिष्ट इष्ट भासैं क्रोधादि

हो हैं । जब तत्त्वज्ञानके अभ्यासतैं कोई इष्ट अनिष्ट न भासै, तब स्वयमेव ही क्रोधादिक न उपजै, तब सांचा धर्म हो है । बहुरि अनित्यादि चिंतवनतैं शरीरादिककौ बुरा जानि हितकारी न जानि तिनतैं उदास होना ताका नाम अनुपेक्षा कहै हैं । सो यह तौ जैसें कोऊ मित्र था, तब उसतैं राग था, पीछैं वाका अवगुण देखि उदासीन भया, तैसें शरीरादिकतैं राग था पीछैं अनित्यत्वादि अवगुण अवलोकि उदासीन भया । सो ऐसी उदासीनता तौ द्वेषरूप है । जहां जैसा अपना वा शरीरादिकका स्वभाव है, तैसा पहचानि भ्रमकौं मेटि भला जानि राग न करना, बुरा जानि द्वेष न करना, ऐसी सांची उदासीनताकै अर्थि यथार्थ अनित्यत्वादि-कका चिंतवन सो ही सांची अनुपेक्षा है । बहुरि क्षुधादिक भए तिनके नाशका उपाय न करना, वाकौं परीषह सहना कहै हैं । सो उपाय तौ न किया, अर अंतरंग क्षुधादि अनिष्ट सामग्री मिले दुखी भया, रति आदिका कारण मिले सुखी भया, तौ सो दुख-सुखरूप परिणाम है, सोई आर्त्तध्यान रौद्रध्यान है । ऐसे भावनितैं संवर कैसें होय । तातैं दुखका कारण मिले दुखी न होय, सुखका कारण मिले सुखी न होय, ज्ञेयरूपकरि तिनका जाननहारा ही रहै, सोई सांची परीषहका सहना है । बहुरि हिंसादि सावध योगका त्यागकौं चारित्र मानै हैं । तहां महाव्रतादिरूप शुभयोगकौं उपादेयपनैकरि ग्रहण मानै है । सो तत्त्वार्थसूत्रविषै आस्रव-पदार्थका निरूपण करते महाव्रत अणुव्रत भी आस्रवरूप कहे हैं । ए उपादेय कैसें होय । अर आस्रव तौ बंधका साधक है, चारित्र मोक्षका साधक है । तातैं महाव्रतादिरूप आस्रवभावनिकैं चारित्र-



पनो संभवै नाहीं । सकल कषायरहित जो उदासीनभाव ताहीका नाम चारित्र है । जो चारित्रमोहके देशघाती स्पर्द्धकनिके उदयतैं महामंद प्रशस्त राग हो है, सो चारित्रका मल है । याकौं छूटता न जानि याका त्याग न करै है । सावद्ययोग ही त्याग करै है । परंतु जैसें कोई पुरुष कंदमूलादि बहुत दोषीक हरितकायका त्याग करै है, अर कैसें हरितकायनिकौं भखै है । परंतु ताकौं धर्म न मानै है । तैसें मुनि हिंसादि तीव्रकषायरूप भावनिका त्याग करै है, अर कैसें मंदकषायरूप महाव्रतादिकौं पालै है । परंतु ताकौं मोक्षमार्ग न मानै है । यहां प्रश्न—जो ऐसें है, तौ चारित्रके तेरह भेदनिविषै महाव्रतादि कैसें कहे हैं । ताका समाधान,—

यह व्यवहारचारित्र कछा है । व्यवहार नाम उपचारका है । सो महाव्रतादिक भए ही वीतरागचारित्र हो है । ऐसा संबंध जानि महाव्रतादिविषै चारित्रका उपचार किया है । निश्चयकरि निःकषाय भाव है, सो ही सांचा चारित्र है । या प्रकार संवरका कारणनिकौं अन्यथा जानता संता सांचा श्रद्धानी न हो है । बहुरि यह अनशनादि तपतैं निर्जरा मानै है । सो केवल बाह्यतप ही तौ किए निर्जरा होय नाहीं । बाह्यतप तौ शुद्धोपयोग वधावनेके अर्थि कीजिए है । शुद्धोपयोग निर्जराका कारण है । तातैं उपचारकरि तपकौं भी निर्जराका कारण कछा है । जो बाह्य दुख सहना ही निर्जराका कारण होय, तौ तिर्यचादि भी भूख तृषादि सहै हैं । तब वह कहै है—स्वाधीनपनै धर्मबुद्धितैं उपवासादिरूप तप करै, ताकै निर्जरा हो है । ताका समाधान—

धर्मबुद्धितैं बाह्य उपवासादिक तो किए, बहुरि तहां उपयोग

अशुभ शुभ शुद्धरूप जैसें परिणमै तैसें परिणमो । घने उपवासादि किए घनी निर्जरा होय, थोरे किए थोरी निर्जरा होय । जो ऐसें नियम ठहरै, तौ उपवासादिक ही मुख्य निर्जराका कारण ठहरै । सो तौ बनै नाही । परिणाम दुष्ट भए उपवासादिकतैं निर्जरा होनी कैसें संभवै । बहुरि जो कहिए—जैसा अशुभ शुभ शुद्धरूप उपयोग परिणमै, ताकै अनुसार बंधनिर्जरा है । तौ उपवासादि तप मुख्य निर्जराका कारण कैसें रखा । अशुभ शुभ परिणाम बंधके कारण ठहरै, शुद्ध परिणाम निर्जराके कारण ठहरै । यहां प्रश्न— जो तत्त्वार्थसूत्रविषै “तपसा निर्जरा च” ऐसा कैसें कबा है । ताका समाधान—

शास्त्रविषै “इच्छानिरोधस्तपः” ऐसा कबा है । इच्छाका रोकना ताका नाम तप है । सो शुभ अशुभ इच्छा मिटे उपयोग शुद्ध होय, तहां निर्जरा हो है । तातैं तपकरि निर्जरा कही है । यहां कोऊ कहै, आहारादिरूप अशुभको तौ इच्छा दूर भए ही तप होय । परंतु उपवासादिक वा प्रायश्चित्तादि शुभकार्य हैं, तिनकी इच्छा तौ रहै । ताका समाधान—

ज्ञानी जननिकै उपवासादिककी इच्छा नाही है । एक शुद्धोपयोगकी इच्छा है । उपवासादि किए शुद्धोपयोग बधै है, तातैं उपवासादि करै हैं । बहुरि जो उपवासादिकतैं शरीरकी वा परिणामनिकी शिथिलताकरि शुद्धोपयोग शिथिल होता जानै, तहां आहारादिक ग्रहै हैं । जो उपवासादिकहीतैं सिद्धि होय, तौ अजितनाथादिक तेईस तीर्थकर दीक्षा लेय दोय उपवास ही कैसें धरते । उनकी तौ शक्ति भी बहुत थी । परंतु जैसें परिणाम भए

तैसें बाह्यसाधनकरि एक वीतराग शुद्धोपयोगका अभ्यास किया ।  
यहां प्रश्न—जो ऐसैं है, तौ अनशनादिककौ तपसंज्ञा कैसें भई ।  
ताका समाधान—

इनकौ बाह्यतप कहै हैं । सो बाह्यका अर्थ यह है, जो बाह्य और-  
निकौ दीखै, यह तापसी है । बहुरि आप तौ फल जैसा अंतरंग  
परिणाम होगा, तैसा ही पावैगा । जातैं परिणामशून्य शरीरकी  
क्रिया फलदाता नाही । बहुरि यहां प्रश्न—जो शास्त्रविषै तौ  
अकामनिर्जरा कही है । तहां विना चाहि भूख तृषादि सहे  
निर्जरा हो है । तौ उपवासादिकरि कष्ट सहे कैसें निर्जरा न  
होय । ताका समाधान—

अकामनिर्जराविषै भी बाह्य निमित्त तौ विना चाहि भूख  
तृषाका सहना भया है । अर तहां मंदकषायरूप भाव होय, तौ  
पापकी निर्जरा होय, देवादि पुण्यका बंध होय । अर जो तीव्रक-  
षाय भए भी कष्ट सहे पुण्यबंध होय, तौ सर्व तिर्यचादिक देव ही  
होंय । सो बनै नाही । तैसें ही चाहिकरि उपवासादि किए तहां  
भूख तृषादि कष्ट सहिए है । सो यह बाह्यनिमित्त है । यहां जैसा  
परिणाम होय, तैसा फल पावै है । जैसें अन्नकौ प्राण कब्बा । ऐसैं  
बाह्यसाधन भए अंतरंगतपकी वृद्धि हो है । तातैं उपचारकरि  
इनकौ तप कहे हैं । जो बाह्यतप तौ करै अर अंतरंगतप न होय,  
तौ उपचारतैं भी वाकौ तपसंज्ञा नहीं । सोई कब्बा है—

कषायविषयाहारो त्यागो यत्र विधीयते ।

उपवासः स विज्ञेयः शेषं लङ्घनकं विदुः ॥

जहां कषाय विषय आहारका त्याग कीजिए, सो उपवास

जानना । शेषकों लंघन श्रीगुरु कहै हैं । यहां कहैगा, जो ऐसैं है, तौ हम उपवासादि न करैगे । ताकों कहिए है—

उपदेश तौ ऊंचा चढ़नेकों दीजिए है । तू उलटा नीचा पड़ैगा, तौ हम कहा करैगे । जो तू मानादिकतैं उपवासादि करै है, तौ करि वा मति करै, किछू सिद्धि नाहीं । अर जो धर्म-बुद्धितैं आहारादिकका अनुराग छोड़ै है, तौ जेता रग छूट्या तेता ही छूट्या । परंतु इसहीकों तप जानि इसतैं निर्जरा मानि संतुष्ट मति होहु । बहुरि अंतरंग तपनिविषै प्रायश्चित्त, विनय, वैयावृत्य, स्वाध्याय, त्याग, ध्यानरूप जो क्रिया ताविषै बाह्यप्रवर्तन सो तौ बाह्य तपवत् ही जानना । जैसे अनशनादि बाह्यक्रिया हैं, तैसें ए भी बाह्यक्रिया हैं । तातैं प्रायश्चित्तादि बाह्यसाधन अंतरंग-तप नाहीं हैं । ऐसा बाह्य प्रवर्तन होतैं, जो अंतरंग परिणामनिकी शुद्धता होय, तहां तौ निर्जरा ही है, बंध नाहीं हो है । अर स्तोक शुद्धताका भी अंश रहै, तौ जेती शुद्धता भई ताकरि तौ निर्जरा है । अर जेता शुभभाव है ताकरि बंध है । ऐसा मिश्रभाव युगपत् हो है, तहां बंध वा निर्जरा दोऊ हो हैं । यहां कोऊ कहै, शुभभावनितैं पापकी निर्जरा हो है, पुण्यका बंध हो है, शुद्धभावनितैं दोऊनिकी निर्जरा हो है, ऐसा क्यों न कहौ । ताका उत्तर—

मोक्षमार्गविषै स्थितिका तौ घटना सर्व ही प्रकृतीनिका होय । तहां पुण्यपापका विशेष है ही नाहीं । अर अनुभागका घटना पुण्यप्रकृतीनिका शुद्धोपयोगतैं भी होता नाहीं । ऊपरि ऊपरि पुण्यप्रकृतीनिकै अनुभागका तीव्रउदय हो है, अर पापप्रकृतिके परमाणु पलटि शुभप्रकृतिरूप होय ऐसा संक्रमण शुभ शुद्ध दोऊ

भाव होते हैं होय । तातैं पूर्वोक्त नियम संभवैं नाहीं । विशुद्धताहीकै अनुसार नियम संभवै है । देखो, चतुर्थगुणस्थानवाला शास्त्राभ्यास आत्मचितवनादि कार्य करै, तहां भी निर्जरा नाहीं, बंध भी घना होय । बहुरि पंचमगुणस्थानवाला उपवासादि वा प्रायश्चितादि तप करै, तिस कालविषै भी वाकै निर्जरा थोरी, अर छठागुणस्थानवाला आहार विहारादि क्रिया करै, तिस कालविषै भी वाकै निर्जरा घनी । उसतैं भी बंध थोरा होय । तातैं बाह्य प्रवृत्तिकै अनुसार निर्जरा नाहीं है । अंतरंग कषायशक्ति घटें विशुद्धता भए निर्जरा हो है । सो इसका प्रकटस्वरूप आगैं निरूपण करैंगे, तहां जानना । ऐसैं अनशनादि क्रियाकौं तपसंज्ञा उपचारतैं जाननी । याहीतैं इनकौं व्यवहार तप कह्या है । व्यवहार उपचारका एक अर्थ है । बहुरि ऐसा साधनतैं जो वीतराग-भावरूप विशुद्धता होय, सो सांचा तप निर्जराका कारण जानना । यहां दृष्टांत—जैसैं धनकौं वा अन्नकौं प्राण कह्या । सो धनतैं अन्न ल्याय भक्षण किए प्राण पोषे जांय, तातैं धन अन्नकौं प्राण कह्या । कोई इंद्रियादिक प्राणनिकौं न जानै, अर इनहीकौं प्राण जानि संग्रह करै, तौ मरण ही पावै । तैसैं अनशनादिकौं वा प्रायश्चित्तादिकौं तप कह्या, सो अनशनादि साधनतैं प्रायश्चित्तादिरूप प्रवर्त्तै वीतरागभावरूप सत्य तप पोख्या जाय । तातैं उपचारकरि अनशनादिकौं वा प्रायश्चित्तादिकौं तप कह्या । कोई वीतराग-भावरूप तपकौं न जानै अर इनहीकौं तप जानि संग्रह करै, तौ संसारहीमैं भ्रमै । बहुत कहा, इतना समझि लेना—निश्चय धर्म तौ वीतरागभाव है । अन्य नाना विशेष बाह्यसाधन अपेक्षा

उपचारतैं किए हैं, तिनकौं व्यवहारमात्र धर्म संज्ञा जाननी ।  
इस रहस्यकौं न जानै, तातैं वाकै निर्जराका भी सांचा श्रद्धान  
नाहीं है ।

बहुरि सिद्ध होना ताकौं मोक्ष मानै है । बहुरि जन्म जरा  
मरण रोग क्लेशादि दुख दूरि भए अनंतज्ञानकरि लोकालोकका  
जानना भया, त्रिलोकपूज्यपना भया, इत्यादि रूपकरि ताकी  
महिमा जानै है । सो सर्व जीवनिकै दुख दूर करनेकी वा ज्ञेय  
जाननेकी वा पूज्य होनेकी चाहि है । इनहीकै अर्थ मोक्षकी  
चाहि कीनी, तौ याकै और जीवनिका श्रद्धानतैं कहा विशेषता  
भई । बहुरि याकै ऐसा भी अभिप्राय है—स्वर्गविषै सुख है,  
तातैं अनंतगुणा मोक्षविषै सुख है । सो इस गुणकारविषै स्वर्ग  
मोक्ष सुखकी एक जाति जानै है । तहां स्वर्गविषै तौ विषयादि  
सामग्रीजनित सुख हो है, ताकी जाति याकौं भासै है अर  
मोक्षविषै विषयादि सामग्री है नाहीं, सो वहांका सुखकी जाति  
याकौं भासै तौ नाहीं, परंतु स्वर्गतैं भी उत्तम मोक्षकौं महापुरुष  
कहै हैं, तातैं यह भी उत्तम ही मानै है । जैसें कोऊ गानका स्वरूप  
न पहिचानै, परंतु सर्व सभाके सराहैं, तातैं आप भी सराहै  
है । तैसें यह मोक्षकौं उत्तम मानै है । यहां वह कहै है—  
शास्त्रविषै भी तौ इंद्रादिकतैं अनंतगुणा सुख सिद्धनिकै प्ररूपै हैं ।  
ताका उत्तर—

जैसें तीर्थकरके शरीरकी प्रभाकौं सूर्यप्रभातैं कोट्यां गुणी कही ।  
तहां तिनकी एक जाति नाहीं । परंतु लोकविषै सूर्यप्रभाकी  
महिमा है, तातैं भी बहुत महिमा जनावनेकौं उपमालंकार

कीजिए है। तैसैं सिद्धसुखकौं इंद्रादिसुखतैं अनंतगुणा कखा। तहां तिनकी एकजाति नाही। परंतु लोकविषै इंद्रादिसुखकी महिमा है, तातैं भी बहुत महिमा जनावनेकौं उपमालंकार कीजिए है। बहुरि प्रश्न—जो सिद्धसुख अर इंद्रादिसुखकी एकजाति वह जानै है, ऐसा निश्चय तुम कैसें किया। ताका समाधान—

जिस धर्मसाधनका फल स्वर्ग मानै है, तिस धर्मसाधनहीका फल मोक्ष मानै है। कोई जीव इंद्रादिपद पावै, कोई मोक्ष पावै, तहां तिन दोऊनिकै एकजाति धर्मका फल भया मानै। ऐसा तौ मानै, जो जाकै साधन थोरा हो है, सो इंद्रादिपद पावै है, जाकै संपूर्ण साधन होय, सो मोक्ष पावै है। परंतु तहां धर्मकी जाति एक जानै है। सो जो कारणकी एक जाति जानै, ताकौं कार्यकी भी एक जातिका श्रद्धान अवश्य होय। जातैं कारण विशेष भए ही कार्य विशेष हो है। तातैं हम यह निश्चय किया, वाकै अभिप्रायविषै इंद्रादिसुख अर सिद्धसुखकी जातिका एक जातिका श्रद्धान है। बहुरि कर्मनिमित्ततैं आत्माकै औपाधिक भाव थे, तिनका अभाव होतैं शुद्धस्वभावरूप केवल आत्मा आप भया। जैसें परमाणु स्कंधतैं बिछुरें शुद्ध हो हैं, तैसें यह कर्मादिकतैं भिन्न भए शुद्ध हो है। विशेष इतना—वह दोऊ अवस्थाविषै दुखी सुखी नाही, आत्मा अशुद्ध अवस्थाविषै दुखी था, अब ताके अभाव होनेतैं निराकुलक्षण अनंतसुखकी प्राप्ति भई। बहुरि इंद्रादिकनिकै जो सुख है, सो कषाय भावनिकरि आकुलतारूप है। सो वह परमार्थतैं दुखी ही है। तातैं वाकी याकी एकजाति

नाहीं । बहुरि स्वर्गसुखका कारण प्रशस्तराग है, मोक्षसुखका कारण वीतरागभाव है, तातैं कारणविषै भी विशेष है । सो ऐसा भाव याकौं भासै नाहीं । तातैं मोक्षका भी याकै सांचा श्रद्धान नाहीं है । या प्रकार याकै सांचा तत्त्वश्रद्धान नाहीं है । याहीतैं समयसारविषै कह्या है—“अभव्यकै तत्त्वश्रद्धान भए भी मिथ्या-दर्शन ही रहै है ।” वा प्रवचनसारविषै कह्या है—“आत्मज्ञान-शून्य तत्त्वार्थश्रद्धान कार्यकारी नाहीं ।” बहुरि यह व्यवहारदृष्टिकरि सम्यग्दर्शनके आठ अंग कहे हैं, तिनकौं पालै है । पचीस दोष कहे हैं, तिनकौं टालै है । संवेगादिक गुण कहे हैं, तिनकौं धारै है । परंतु जैसे बीज बोए विना खेतकी सावधानी किए भी अन्न होता नाहीं, तैसें सांचा तत्त्वश्रद्धान भए विना सम्यक्त होता नाहीं । सो पंचास्तिकायव्याख्याविषै जहां अंतविषै व्यवहारा-भासवालेका वर्णन किया, तहां ऐसा ही कथन किया है । या प्रकार याकै सम्यग्दर्शनके अर्थ साधन करतैं भी सम्यग्दर्शन न हो है ।

अब यह सम्यग्ज्ञानकै अर्थ शास्त्रविषै शास्त्रभ्यास किए सम्यग्ज्ञान होना कह्या है, तातैं जे शास्त्राभ्यासविषै तत्पर रहै हैं, तहां सीखना सिखावना यादि करना वांचना पढ़ना आदि क्रियाविषै तौ उपयोगकौं रमावै है । परंतु वाकै प्रयोजन ऊपरि दृष्टि नाहीं है । इस उपदेशविषै मुझकौं कारिजकारी कह्या, सो अभिप्राय नाहीं । आप शास्त्राभ्यासकरि औरनिकौं उपदेश देनेका अभिप्राय राखै है । घने जीव उपदेश मानैं तहां संतुष्ट हो है । सो ज्ञानाभ्यास तौ आपकै अर्थ कीजिए है और प्रसंग पाय परका भी



मला करै । बहुरि कोई उपदेश न सुनै, तौ मति सुनौ, आप काहेकौं विषाद कीजिए । शास्त्रार्थका भाव जानि आपका मला करना । बहुरि शास्त्राभ्यासविषै भी केई तौ व्याकरण न्याय काव्य आदि शास्त्रनिकौं बहुत अभ्यासैं हैं । सो ए तौ लोकविषै पंडितता प्रगट करनेके कारण हैं । इनविषै आत्महितनिरूपण तौ है नाहीं । इनका तौ प्रयोजन इतना ही है । अपनी बुद्धि बहुत होय, तौ थोरा बहुत इनका अभ्यासकरि पीछें आत्महितके साधक शास्त्र तिनका अभ्यास करना । जो बुद्धि थोरी होय, तौ आत्महितके साधक सुगम शास्त्र तिनहीका अभ्यास करै । ऐसा न करना, जो व्याकरणादिकका ही अभ्यास करतैं करतैं आयु पूरा होय जाय, अर तत्त्वज्ञानकी प्राप्ति न बनै । यहां कोऊ कहै— ऐसैं है, तौ व्याकरणादिकका अभ्यास न करना । ताकौं कहिए है—तिनका अभ्यासविना महान् ग्रंथनिका अर्थ खुलै नाहीं । तातैं तिनका भी अभ्यास करना योग्य है । बहुरि यहां प्रश्न— महान् ग्रंथ ऐसे क्यौं किए, जिनका अर्थ व्याकरणादि विना न खुलै । भाषाकरि सुगमरूप हितोपदेश क्यौं न लिख्या । उनकै किञ्च प्रयोजन तौ था नाहीं । ताका समाधान—

भाषाविषै भी प्राकृत संस्कृतादिकके ही शब्द हैं । परंतु अपभ्रंश लिए हैं । बहुरि देशनिविषै भाषा अन्य अन्य प्रकार है । सो महंत पुरुष शास्त्रनिविषै अपभ्रंश शब्द कैसें लिखैं । बालक तोतला बोलै, तौ बड़े तौ न बोलैं । बहुरि एकदेशकी भाषारूप शास्त्र दूसरे देशविषै जाय, तौ तहां ताका अर्थ कैसें भासै । न्यायविना लक्षण परीक्षा आदि यथावत् न होय सकै । इत्यादि

वचनद्वारि वस्तुका स्वरूपनिर्णय व्याकरणादि विना नीकै न होता जानि तिनकी आम्नाय अनुसार कथन किया । भाषाविषै भी तिनकी थोरी बहुत आम्नाय आप ही उपदेश होय सकै है । तिनकी बहुत आम्नायतै नीकै निर्णय होय सकै है । बहुरि जो कहौगे—ऐसै है, तौ अब भाषारूप ग्रंथ काहेकौ बनाईए है । ताका समाधान—

कालदोषतै जीवनिकी मंदबुद्धि जानि केई जीवनिके जेता ज्ञान होगा, तेता ही होगा, ऐसा अभिप्राय विचारि भाषाग्रंथ कीजिए है । सो जे जीव व्याकरणादिकका अभ्यास न करि सकै, तिनकौ ऐसे ग्रंथनिकरि ही अभ्यास करना । बहुरि जे जीव शब्दनिकी नाना युक्ति लिए अर्थ करनेकौ ही व्याकरण अवगाहै हैं, वादादिकरि महंत होनेकौ न्याय अवगाहै हैं, चतुरपना प्रगट करनेके अर्थ काव्य अवगाहै हैं, इत्यादि लौकिक प्रयोजन लिए इनका अभ्यास करै हैं, ते धर्मात्मा नाहीं । बनै जेता थोरा बहुत अभ्यास इनका करि आत्महितके अर्थ तत्त्वादिकका निर्णय करै हैं, सोई धर्मात्मा पंडित जानना । बहुरि कोई जीव पुण्य पापादिक फलके निरूपक पुराणादि शास्त्र वा पुण्य पापक्रियाके निरूपक आचारादि शास्त्र वा गुणस्थान मार्गणा कर्मप्रकृति त्रिलोकादिकके निरूपक करणानुयोगके शास्त्र तिनका अभ्यास करै हैं । सो जो इनका प्रयोजन आप न विचारै, तब तौ सूवाकासा ही पढ़ना भया । बहुरि जो इनका प्रयोजन विचारै है, तहां पापकौ बुरा जानना, पुण्यकौ भला जानना, गुणस्थानादिकका स्वरूप जानि लेना, इनका अभ्यास करैगे तितना हमारा भला है इत्यादि

प्रयोजन विचाखा, सो इसतै इतना तौ होगा—नरकादिका छेद स्वर्गादिकी प्राप्ति, परंतु मोक्षमार्गकी तौ प्राप्ति होय नाहीं। पहलैं सांचा तत्त्वज्ञान होय, तहां पीछैं पुण्यपापका फलकों संसार जानै, शुद्धोपयोगतै मोक्ष मानै, गुणस्थानादिरूप जीवका व्यवहार निरूपण जानै, इत्यादि जैसाका तैसा श्रद्धान करता संता इनका अभ्यास करै, तौ सम्यग्ज्ञान होय। सो तत्त्वज्ञानकों कारण अध्यात्मरूप द्रव्यानुयोगके शास्त्र हैं। बहुरि केई जीव तिन शास्त्रनिका भी अभ्यास करै है। परंतु जहां जैसैं लिख्या है, तैसैं आप निर्णय-करि आपकों आपरूप, परकों पररूप, आस्रवादिककों आस्रवादिरूप न श्रद्धान करै हैं। मुखतै तौ यथावत् निरूपण ऐसा भी करै, जाके उपदेशतै और जीव सम्यग्दृष्टी होय जांय। परंतु जैसं लड़का स्त्रीका स्वांगकरि ऐसा गान करै, जाकों सुनतै अन्य पुरुष स्त्री कामरूप होय जांय। परंतु वह जैसैं सीख्या तैसैं कहै है, वाकों किल्लू भाव भासै नाहीं, तातैं आप कामासक्त न हो है। तैसैं यह जैसैं लिख्या, तैसैं उपदेश दे, परंतु आप अनुभव नाहीं करै है। जो आपकै श्रद्धान भया होता, तौ और तत्त्वका अंश और तत्त्वविषै न मिलावता, सो याकै थल नाहीं, तातैं सम्यग्ज्ञान होता नाहीं। ऐसैं यह ग्यारह अंगपर्यंत पढ़ै, तौ भी सिद्धि होती नाहीं। सो समयसारादिविषै मिथ्यादृष्टीकै ग्यारह अंगका ज्ञान होना लिख्या है। यहां कोऊ कहै—ज्ञान तौ इतना हो है, परंतु जैसैं अभव्यसेनके श्रद्धानरहित ज्ञान भया, तैसैं हो है। ताका समाधान—

वह तौ पापी था, जाकै हिंसादिकी प्रवृत्तिका भय नाहीं।

परंतु जो जीव भ्रैवेयिकआदिविषै जाय है, ताकै ऐसा ज्ञान हो है, सो तौ श्रद्धानरहित नाहीं । वाकै तौ ऐसा ही श्रद्धान है, ए ग्रंथ सांचे हैं परंतु तत्त्वश्रद्धान सांचा न भया । समयसारविषै एक ही जीवकै धर्मका श्रद्धान एकादशांगका ज्ञान महान्नतादिकका पालना लिख्या है । प्रवचनसारविषै ऐसा लिख्या है— आगमज्ञान ऐसा भया जाकरि सर्वपदार्थनिकौ हस्तामलकवत् जानै है । यह भी जानै है इनका जाननहारा मैं हूं । परंतु मैं ज्ञानस्वरूप हौं ऐसा आपकौं परद्रव्यतैं भिन्न केवल चैतन्यद्रव्य नाहीं अनुभवै है । तातैं आत्मज्ञानशून्य आगमज्ञान भी कार्यकारी नाहीं । या प्रकार सम्यग्ज्ञानके अर्थ जैनशास्त्रनिका अभ्यास करै है, तौ भी याकैं सम्यग्ज्ञान नाहीं ।

बहुरि इनिकै सम्यक्चारित्रकै अर्थ कैसैं प्रवृत्ति है, सो कहिए है—बाह्यक्रियाऊपरि तौ इनकै दृष्टि है, अर परिणाम सुधरने बिगारनेका विचार नाहीं । जो परिणामनिका भी विचार होय, तौ जैसा अपना परिणाम होता दीसै, तिनहीकै ऊपरि दृष्टि रहै है । परंतु उन परिणामनिकी परंपरा विचारें अभिप्रायविषै जो वासना है, ताकौं न विचारै है । अर फल लागै है, सो अभिप्रायविषै वासना है, ताका फल लागै है । सो इसका विशेष व्याख्यान आगैं करैंगे । तहां स्वरूप नीकै भासैगा । ऐसी पहिचानि विना बाह्य आचरणका ही उद्यम है । तहां केई जीव तौ कुलकमकरि वा देखादेखी वा क्रोध मान माया लोभादिकतैं आचरण आचरै हैं । सो इनकै तौ धर्मबुद्धि ही नाहीं । सम्यक्चारित्र काहेतैं होय । ए जीव कोई तौ भोले हैं वा कषायी हैं, सो अज्ञानभाव

कषाय होतैं सम्यक्चारित्र होता नाहीं । बहुरि केई जीव ऐसा मानै हैं, जो जाननेमें कहा है, अर माननेमें कहा है, किछू करैगा तौ फल लागैगा । ऐसैं विचारि व्रत तप आदि क्रियाहीका उद्यमी रहै हैं अर तत्त्वज्ञानका उपाय न करै हैं । सो तत्त्वज्ञान विना महाव्रतादिका आचरण भी मिथ्याचारित्र ही नाम पावै है । अर तत्त्वज्ञान भए किछू भी व्रतादिक नाहीं है, तौ भी असंयत सम्यग्दृष्टी नाम पावै है । तातैं पहलैं तत्त्वज्ञानका उपाय करना, पीछैं कषाय घटावनेकौ बाह्य साधन करना । सो ही योगीन्द्रदेव-कृत श्रावकाचारविषै कह्या है—

“दंसणभूमिह बाहिरा, जिय वयरुक्ख ण होंति ।”

याका अर्थ—यह सम्यग्दर्शनभूमिका विना हे जीव व्रतरूपी वृक्ष न होय । भावार्थ—जिन जीवनिकै तत्त्वज्ञान नाहीं, ते यथार्थ आचरण न आंचरै हैं । सोई विशेष दिखाईए है—

केई जीव पहलैं तौ बड़ी प्रतिज्ञा धरि बैठै अर अंतरंगविषै कषायवासना मिटी नाहीं । तब जैसे तैसे प्रतिज्ञा पूरी किया चाहैं, तहां तिस प्रतिज्ञाकरि परिणाम दुखी होय हैं । जैसे बहुत उपवासकरि बैठै, पीछैं पीड़ातैं दुखी हुवा रोगीवत् काल गमावै, धर्मसाधन न करै । सो पहलैं ही सधती जानिए तितनी ही प्रतिज्ञा क्यों न लीजिए । दुखी होनेमें आर्त्तध्यान होय, ताका फल भला कैसे लागैगा । अथवा उस प्रतिज्ञाका दुख सखा न जाय, तब ताकी एवज विषयपोषनेकौ अन्य उपाय करै । जैसे तृषा लागै, तब पानी तौ न पीवै अर अन्य शीतल उपचार अनेक प्रकार करै । वा घृत तौ छोड़ै, अर अन्य स्निग्धवस्तुकौ

उपायकरि भखै । ऐसैं ही अन्य जानना । सो परीषह न सखा जाय  
 था, विषयवासना न छूटै थी, तौ ऐसी प्रतिज्ञा काहेकौं करी ।  
 सुगमविषय छोड़ि विषमविषयनिका उपाय करना पड़ै, ऐसा कार्य  
 काहेकौं कीजिए । यहां तौ उलटा रागभाव तीव्र हो है । अथवा  
 प्रतिज्ञाविषै दुख होय, तब परिणाम लगावनेकौं कोई आलंबन  
 विचारै । जैसे उपवासकरि पीछें क्रीड़ा करै । केई पापी जूवा  
 आदि कुविसनविषै लगै हैं । अथवा सोय रखा चाहैं । यह जानै,  
 किसी प्रकारकरि काल पूरा करना । ऐसैं ही अन्य प्रतिज्ञाविषै  
 जानना । अथवा केई पापी ऐसे भी हैं, पहलैं प्रतिज्ञा करै पीछें  
 तिसतैं दुखी होंय, तब प्रतिज्ञा छोड़ दें । प्रतिज्ञा लेना छोड़ना  
 तिनकै ख्यालमात्र है । सो प्रतिज्ञा भंग करनेका महापाप है ।  
 इसतैं तौ प्रतिज्ञा न लेनी ही भली है । या प्रकार पहलैं तौ  
 निर्धिचार होय, प्रतिज्ञा करै, पीछें ऐसी इच्छा होय । सो जैन-  
 धर्मविषै प्रतिज्ञा न लेनेका दंड तौ है नाहीं । जैनधर्मविषै तौ यह  
 उपदेश है, पहलैं तौ तत्त्वजानी होय । पीछें जाका त्याग करै,  
 ताका दोष पहिचानै । त्याग किए गुण होय, ताकौं जानै । बहुरि  
 अपने परिणामनिका ठीक करै । वर्त्तमान परिणामनिहीकै भरोसै  
 प्रतिज्ञा न करि बैठै । आगामी निर्वाह होता जानै, तौ प्रतिज्ञा  
 करै । बहुरि शरीरकी शक्ति वा द्रव्य क्षेत्र काल भावादिकका  
 विचार करै । ऐसैं विचारें पीछें प्रतिज्ञा करनी, सो भी ऐसी  
 करनी जिस प्रतिज्ञातैं निरादरपना न होय, परिणाम चढ़ते रहैं ।  
 ऐसी जैनधर्मकी आज्ञाय है । यहां कोऊ कहै, चांडालादिकौं नै  
 प्रतिज्ञा करीं, तिनकै इतना विचार कहां हो है । ताका समाधान—

मरणपर्यंत कष्ट होय, तौ होहु परंतु प्रतिज्ञा न छोड़नी, ऐसा विचारकरि प्रतिज्ञा करै हैं । प्रतिज्ञाविषै निरादपरना नाहीं । अर सम्यग्दृष्टी प्रतिज्ञा करै है, सो तत्त्वज्ञानादिपूर्वक ही करै है । बहुरि जिनकै अंतरंग विरक्तता न भई अर बाह्य प्रतिज्ञा धरै हैं, ते प्रतिज्ञाके पहलैं वा पीछैं जाकी प्रतिज्ञा करै, ताविषै अति आसक्त होय लागै हैं । जैसे उपवासके धारनैं पारनैं भोजनविषै अतिलोभी होय गरिष्ठादि भोजन करै, शीघ्रता घनी करै । सो जैसे जलकौ मूदि राख्या था, झूथ्या तब ही बहुत प्रवाह चलने लागा । तैसें प्रतिज्ञाकरि विषयप्रवृत्ति मूदि, अंतरंग आसक्तता बधती गई । प्रतिज्ञा पूरी होतैं ही अत्यंत विषयप्रवृत्ति होनै लागी । सो प्रतिज्ञाका कालविषै विषयवासना मिटी नाहीं । आगैं पीछैं तिसकी एवज अधिका राग क्रिया, तौ फल तौ रागभाव मिटे होगा । तातैं जेती विरक्तता भई होय, तितनी ही प्रतिज्ञा करनी । महामुनि भी थोरी प्रतिज्ञा करै, पीछैं आहारादिविषै उछटि करै । अर बड़ी प्रतिज्ञा करै हैं, सो अपनी शक्ति देखि करै हैं । जैसे परिणाम चढ़ते रहैं, सो करै हैं । प्रमाद भी न होय अर आकुलता भी न उपजै । ऐसी प्रवृत्ति कारिजकारी जाननी । बहुरि जिनकै धर्मऊपरि दृष्टि नाहीं, ते कबहू तौ बड़ा धर्म आचरै, कबहू अधिक स्वच्छन्द होय प्रवर्तै । जैसे कोई धर्मपर्वविषै तौ बहुत उपवासादि करै, कोई धर्मपर्वविषै वारंवार भोजनादि करै । सो धर्मबुद्धि होय, तौ सर्व धर्मपर्वनिविषै यथायोग्य संयमादि धरै । बहुरि कबहू तौ कोई धर्मकार्यनिविषै बहुत धन खरचै, कबहू कोई धर्मकार्य आनि प्राप्त भया होय, तौ भी तहां थोरा भी धन

न खरचै । सो धर्मबुद्धि होय, तौ यथाशक्ति यथायोग्य सर्व ही धर्मकार्यनिविषै धन खरच्या करै । ऐसैं ही अन्य जानना । बहुरि जिनकै सांचा धर्मसाधन नाही, ते कोई क्रिया तौ बहुत बड़ी अंगीकार करै अर कोई हीनक्रिया किया करै । जैसे धनादिकका तौ त्याग किया, अर चोखा भोजन चोखा वस्त्र इत्यादि विषयनिविषै विशेष प्रवर्तै । बहुरि कोई जामा पहरना, स्त्रीसेवन करना, इत्यादि कार्यनिका तौ त्यागकरि धर्मात्मापना प्रकट करै, अर पीछैं खोटे व्यापारादि कार्य करै । तहां लोकनिन्द्य पापक्रियाविषै प्रवर्तै । ऐसैं ही कोई क्रिया अति ऊंची, कोई क्रिया अति नीची करै । तहां लोकनिन्द्य होय, धर्मकी हास्य करावै । देखो अमुक धर्मात्मा ऐसे कार्य करै हैं । जैसे कोई पुरुष एक वस्त्र तौ अति उत्तम पहरै, एक वस्त्र अति हीन पहरै, तौ हास्य ही होय । तैसें यह हास्य पावै हैं । सांचा धर्मकी तौ यह आम्नाय है, जेता अपना रागादि दूरि भया होय, ताकै अनुसार जिस पदविषै जो धर्मक्रिया संभवै, सो सर्व अंगीकार करै । जो थोरा रागादि मिट्या होय, तौ नीचा ही पदविषै प्रवर्तै । परंतु ऊंचा पद धराय, नीची क्रिया न करै । यहां प्रश्न—जो स्त्रीसेवनादिकका त्याग ऊपरिकी प्रतिमाविषै कह्या है, सो नीचली अवस्थावाला तिनका त्याग करै कि न करै । ताका समाधान—

सर्वथा तिनका त्याग नीचली अवस्थावाला कर सकता नाही । कोई दोष लागै है, तातैं ऊपरिकी प्रतिमाविषै त्याग कह्या है । नीचली अवस्थाविषै जिसप्रकार त्याग संभवै, तैसा नीचली अवस्थावाला भी करै । परंतु जिस नीचली अवस्थाविषै जो कार्य



संभवै नाहीं, ताका करना तौ कषायभावनिहीतै हो है । जैसे कोऊ सप्तव्यसन सेवै, खस्त्रीका त्याग करै, तौ कैसें बनै । यद्यपि खस्त्रीका त्याग करना धर्म है, तथापि पहले सप्तव्यसनका त्याग होय, तब ही खस्त्रीका त्याग करना योग्य है । ऐसे ही अन्य जानने । बहुरि सर्व प्रकार धर्मकौ न जानै, ऐसा जीव कोई धर्मका अंगकौ मुख्यकरि अन्य धर्मनिकौ गौण करै है । जैसे केई जीव दयाधर्मकौ मुख्यकरि पूजा प्रभावनादि कार्यकौ उथापै हैं, केई पूजा प्रभावनादि धर्मकौ मुख्यकरि हिंसादिकका भय न राखै हैं, केई तपकी मुख्यताकरि आर्तध्यानादिकरि कैं भी उपवासादि करे वा आपकौ तपस्वी मानि निःशंक क्रोधादि करै, केई दानकी मुख्यताकरि बहुत पाप करै भी धन उपजाय दान दे हैं, केई आरंभत्यागकी मुख्यताकरि याचना करने लागि जाय हैं, केई जीव हिंसा मुख्यकरि स्नानशौचादि नाहीं करै हैं वा लौकिक कार्य आएं धर्म छोड़ि तहां लागि जाना इत्यादि करै हैं । इत्यादि प्रकारकरि कोई धर्मकौ मुख्यकरि अन्य धर्मकौ न गिनै हैं, वा वाकै आसरै पाप आचरै हैं । सो जैसे अविवेकी व्यापारीकौ काहू व्यापारके नफेके अर्थे अन्य प्रकारकरि घना टोटा होय है, तैसें यह कार्य भया । सो जैसे विवेकी व्यापारीका प्रयोजन नफा है, सर्व विचारकरि जैसे नफा घना होय तैसें करै । तैसें ज्ञानीका प्रयोजन वीतरागभाव है । सर्व विचारकरि जैसे वीतरागभाव घना होय, तैसें करै । जातैं मूलधर्म वीतरागभाव है । याही प्रकार अविवेकी जीव अन्यथा धर्म अंगीकार करै हैं, तिनकै तौ सम्यक्चारित्रका आभास भी न होय । बहुरि केई जीव

अणुव्रत महाव्रतादिरूप यथार्थ आचरण करे हैं । बहुरि आचरणकै अनुसार ही परिणाम हैं । कोई माया लोभादिकका अभिप्राय नाहीं है । इनकों धर्म जानि मोक्षकै अर्थि इनका साधन करै हैं । कोई स्वर्गादिक भोगनिकी इच्छा न राखैं, परंतु तत्त्वज्ञान पहलैं न भया तातैं आप तौ जानै मोक्षका साधन करौं हौं, अर मोक्षका साधन जो है, ताकों जानै भी नाहीं । केवल स्वर्गादिक-हीका साधन करै । सो मिश्रीकों अमृत जानि भखै हैं, अमृतका गुण तौ न होय । आपकी प्रतीतिकै अनुसार नफा फल होता नाहीं । फल जैसा साधन करै, तैसा ही लागै है । शास्त्रविषै ऐसा कबा है—चारित्रविषै 'सम्यक्' पद है, सो ज्ञानपूर्वक आचरणकी निवृत्तिकै अर्थि है । तातैं पहलैं तत्त्वज्ञान होय, तहां पीछैं चारित्र होय, सो सम्यक्चारित्र नाम पावै है । जैसैं कोई खेतीवाला बीज तौ बोवै नाहीं अर अन्य साधन करै, तौ अन्नप्राप्ति कैसैं होय । घास फूस ही होय । तैसैं अज्ञानी तत्त्वज्ञानका तौ अभ्यास करै नाहीं, अर अन्य साधन करै, तौ मोक्षप्राप्ति कैसैं होय देवपदादिक ही होंय । तहां केई जीव तौ ऐसे हैं, तत्त्वादिकका नीकै नाम भी न जानै, केवल व्रतादिकविषै ही प्रवर्तै हैं । केई जीव ऐसे हैं, पूर्वोक्तप्रकार सम्यग्दर्शन ज्ञानका अयथार्थ साधनकरि व्रतादिविषै प्रवर्तै हैं । सो यद्यपि व्रतादिक यथार्थ आचरै, तथापि यथार्थ श्रद्धान ज्ञानविना सर्व आचरण मिथ्याचारित्र ही है । सो ही समयसारका कलशाविषै कबा है—

क्लिश्यन्तां स्वयमेव दुर्धरतरैर्मोक्षोन्मुखैः कर्मभिः  
क्लिश्यन्तां च परे महाव्रततपो भारेण भग्नाश्चिरम् ।

साक्षान्मोक्षइदं निरामयपदं संवेद्यमानं स्वयं  
ज्ञानं ज्ञानगुणं विना कथमपि प्राप्तं क्षमन्ते न हि ॥१॥

याका अर्थ—मोक्षतै पराङ्मुख ऐसे अतिदुस्तर पंचाग्नि तपनादि कार्य तिनकरि आप ही क्लेश करै है, तौ करौ । बहुरि अन्य केई जीव महाव्रत अर तपका भारकरि चिरकालपर्यंत क्षीण होते क्लेश करै हैं, तौ करौ । परंतु यह साक्षात् मोक्षस्वरूप सर्वरोगरहित जो पद आपै आप अनुभवमैं आवै, ऐसा ज्ञान स्वभाव सो तौ ज्ञान-गुणविना अन्य कोई भी प्रकारकरि पावनेकौं समर्थ नहीं है । बहुरि पंचास्तिकायविषै जहां अंतविषै व्यवहाराभासवालोंका कथन किया है, तहां तेरहप्रकार चारित्र होतैं भी ताका मोक्षमार्गविषै निषेध किया है । बहुरि प्रवचनसारविषै आत्मज्ञानशून्य संयम-भाव अकार्यकारी कछा है । बहुरि इनही ग्रंथनिविषै वा अन्य परमात्माप्रकाशादि शास्त्रनिविषै इस प्रयोजन लिए जहां तहां निरूपण है । तातैं पहलैं तत्त्वज्ञान भए ही आचरण कार्यकारी है । यहां कोऊ जानैगा, बाह्य तौ अणुव्रत महाव्रतादि साधै है, अंतरंग परिणाम नाही, वा स्वर्गादिककी वांछाकरि साधै है, सो ऐसै साधैं तौ पापबंध होय । द्रव्यलिंगी मुनि ऊपरिम त्रैवेयकपर्यंत जाय है । परावर्तनिविषैं इकतीससागर पर्यंत देवायुकी प्राप्ति अनंत वार होनी लिखी है । सो ऐसे ऊंचेपद तौ तब ही पावै, जब अंतरंग परिणामपूर्वक महाव्रत पालै, महामंदकषायी होय, इस लोक परलोकका भोगादिककी चाहि न होय, केवल धर्मबुद्धितैं मोक्षाभिलाषी हुवा साधन साधै । तातैं द्रव्यलिंगीकै स्थूल तौ अन्यथापनो है नाही, सूक्ष्म अन्यथापनो है, सो सम्यग्दृष्टीकौं भासै

है । अब इनके धर्मसाधन कैसे हैं, अर तामें अन्यथापनो कैसे हैं, सो कहिए है—

प्रथम तौ संसारविषै नरकादिकका दुख जानि स्वर्गादिविषै भी जन्म मरणादिका दुख जानि संसारतैं उदास होय, मोक्षकौं चाहै है । सो इन दुखनिकौं तौ दुख सब ही जानै हैं । इंद्र अहमिन्द्रादिक विषयानुरागतैं इंद्रियजनित सुख भोगवै हैं, ताकौं भी दुख जानि निराकुल सुखअवस्थाकौं पहचानि मोक्ष जानै हैं, सोई सम्यग्दृष्टि जानना । बहुरि विषयसुखादिकका फल नरकादिक है, शरीर अशुचि विनाशीक है, पोषनेयोग्य नाहीं, कुटुंबादिक स्वार्थके सगे हैं, इत्यादि परद्रव्यनिका दोष विचारि तिनका तौ त्याग करै है । व्रतादिकका फल स्वर्गमोक्ष है, तपश्चरणादि पवित्रफलके दाता हैं, तिनकरि शरीर सोखने योग्य है, देव गुरु शास्त्रादि हितकारी हैं, इत्यादि परद्रव्यनिका गुण विचारि तिनहीका अंगीकार करै है । इत्यादि प्रकारकरि कोई परद्रव्यकौं बुरा जानि अनिष्ट श्रद्धहै है । कोई परद्रव्यकौं भला जानि इष्ट श्रद्धहै है । सो परद्रव्यविषै इष्ट अनिष्टरूप श्रद्धान सो मिथ्या है । बहुरि इसही श्रद्धानतैं याकै उदासीनता भी द्वेषबुद्धिरूप हो है । जातैं काहूकौं बुरा जानना, ताहीका नाम द्वेष है । कोऊ कहैगा, सम्यग्दृष्टी भी तौ बुरा जानि परद्रव्यकौं त्यागै है । ताका समाधान—

सम्यग्दृष्टी परद्रव्यनिकौं बुरा न जानै है । अपना रागभावकौं बुरा जानै है । आप सरागभावकौं छोड़ै, तातैं ताका कारणका भी त्याग हो है । वस्तु विचारें कोई परद्रव्य तौ भला बुरा है नाहीं । कोऊ कहैगा, निमित्तमात्र तौ है । ताका उत्तर—

परद्रव्य जोरावरी तौ क्यौई बिगारता नाहीं । अपने भाव बिगरै तब वह भी बाह्यनिमित्त है । बहुरि वाका निमित्तविना भी भाव बिगरै हैं । तातैं नियमरूप निमित्त भी नाहीं । ऐसैं परद्रव्यका तौ दोष देखना मिथ्याभाव है । रागादिभाव ही बुरे हैं । सो याकै ऐसी समझि नाहीं । यह परद्रव्यनिका दोष देखि तिन-विषै द्वेषरूप उदासीनता करै है । सांची उदासीनता तौ वाका नाम है, जो कोई ही परद्रव्यका गुण वा दोष न भासै, तातैं काहूकौ बुरा भला न जानै । आपको आप जानै, परकौ पर जानै, परतैं किछू भी प्रयोजन मेरा नाहीं, ऐसा मानि साक्षीभूत रहै । सो ऐसी उदासीनता ज्ञानीहीकै होय । बहुरि यह उदासीन होय शास्त्रविषै व्यवहारचारित्र अणुव्रत महाव्रतरूप कखा है, ताकौ अंगीकार करै है, एकदेश वा सर्वदेश हिंसादिपापकौ छांडै है, तिनकी जायगा अहिंसादि पुण्यरूप कार्यनिविषै प्रवर्तै है । बहुरि जैसैं पर्यायाश्रित पापकार्यनिविषै कर्त्तापना मानै था तैसैं ही अब पर्यायाश्रित पुण्यकार्यनिविषै कर्त्तापना अपना मानने लगी, ऐसैं पर्यायाश्रित कार्यनिविषै अहंबुद्धि माननेकी समानता भई । जैसैं मैं जीव मारों हौं, मैं परिग्रहधारी हौं, इत्यादिरूप मानि थी, तैसैंही मैं जीवनिकी रक्षा करों हौं, मैं नम्र परिग्रहरहित हौं, ऐसी मानि भई । सो पर्यायाश्रित कार्यविषै अहंबुद्धि है, सो ही मिथ्यादृष्टि है । सोई समयसारविषै कखा है—

ये तु कर्त्तारमात्मानं पश्यन्ति तमसावृताः ॥

सामान्यजनवत्तेषां न मोक्षोपि मुमुक्षुतां ॥ १ ॥

याका अर्थ—जे जीव मिथ्याअंधकारव्याप्त होत संतैं आपको

पर्यायाश्रित क्रियाका कर्ता माने हैं, ते जीव मोक्षाभिलाषी हैं, तौऊ तिनकै जैसेँ अन्यमती सामान्य मनुष्यनिकै मोक्ष न होय, तैसेँ मोक्ष न हो है। जातैं कर्त्तापनाका श्रद्धानकी समानता है। बहुरि ऐसेँ आप कर्त्ता होय श्रावकधर्म वा मुनिधर्मकी क्रियाविषै मन वचन कायकी प्रवृत्ति निरंतर राखै है। जैसेँ उन क्रियानिविषै भंग न होय, तैसेँ प्रवर्त्तै है। सो ऐसे भाव तौ सराग हैं। चारित्र है, सो वीतरागभावरूप है। तातैं ऐसे साधनकौं मोक्षमार्ग मानना मिथ्याबुद्धि है। यहां प्रश्न—जो सराग वीतराग भेदकरि दोयप्रकार चारित्र कब्हा है, सो कैसेँ है। ताका उत्तर—

जैसेँ तंदुल दोय प्रकार हैं—एक तुषरहित हैं, एक तुषसहित हैं। तहां ऐसा जानना—तुष है सो तंदुलका स्वरूप नाही। तंदुलविषै दोष है। अर कोई स्याना तुषसहित तंदुलका संग्रह करै था, ताकौं देखि कोई भोला तुषनिहीकौं तंदुल मानि संग्रह करै, तौ वृथा खेदखिन्न ही होय। तैसेँ चारित्र दोय प्रकार है—एक सराग है एक वीतराग है। तहां ऐसा जानना—राग है, सो चारित्रका स्वरूप नाही। चारित्रविषै दोष है। अर केई ज्ञानी प्रशस्तरागसहित चारित्र धारै हैं। तिनकौं देखि कोई अज्ञानी प्रशस्तरागहीकौं चारित्र मानि संग्रह करै, तौ वृथा खेदखिन्न ही होय। यहां कोऊ कहैगा—पापक्रिया करतैं तीव्ररागादिक होते थे, अब इन क्रियानिकौं करतैं मंदराग भया। तातैं जेताअंश रागभाव घट्या, तितना अंशांतौ चारित्र कहौ। जेता अंश राग रब्हा, तेता अंश राग कहौ। ऐसेँ याकै सरागचारित्र संभवै है। ताका समाधान—

जो तत्त्वज्ञानपूर्वक ऐसेँ होय, तौ कहो हौ जैसेँ ही है।

तत्त्वज्ञानविना उत्कृष्ट आचरण होतें भी असंयम ही नाम पावै है । जातें रागभाव करनेका अभिप्राय नाहीं मिटै है । सोई दिखाईए है—

द्रव्यलिङ्गी मुनि राज्यादिककौं छोड़ि निर्ग्रन्थ हो है, अठाईस मूलगुणनिकौं पालै है, उग्रोग्र अनशनादि घना तप करै है, शुधादिक बाईस परीषह सहै है, शरीरका खंड खंड भए भी व्यग्र न हो है, व्रतभंगके कारण अनेक मिलैं, तौ भी दृढ़ रहै है, कोईसेती क्रोध न करै है, ऐसा साधनका मान न करै है, ऐसे साधनविषै कोई कपटाई नाहीं है, इस साधनकरि इस लोक परलोकके विषयसुखकौं न चाहै है । ऐसी याकी दशा भई है । जो ऐसी दशा न होय, तौ भ्रैवेयकपर्यंत कैसें पहुंचै । परंतु याकौं मिथ्यादृष्टी असंयमी ही शास्त्रविषै कह्या । सो ताका कारण यह है—याकै तत्त्वनिका श्रद्धान ज्ञान सांचा भया नाहीं । पूर्वे वर्णन किया, तैसें तत्त्वनिका श्रद्धान ज्ञान भया है । तिस ही अभिप्रायतैं सर्व साधन करै है । सो इन साधनिका अभिप्रायकी परंपराकौं विचारें कषायनिका अभिप्राय आवै है । सो कैसें, सो सुनहु—

यह पापके कारण रागादिककौं तौ हेय जानि छोरे है, परंतु पुण्यका कारण प्रशस्तरागकौं उपादेय मानै है । ताके बधनेका उपाय करै है । सो प्रशस्तराग भी तौ कषाय है । कषायकौं उपादेय मान्या, तब कषाय करनेका ही श्रद्धान रह्या । अप्रशस्त परद्रव्यनिसौं द्वेषकरि प्रशस्त परद्रव्यनिविषै राग करनेका अभिप्राय भया । किछू परद्रव्यनिविषै साम्यभावरूप अभिप्राय न भया । यहां प्रश्न—जो सम्यग्दृष्टी भी तौ प्रशस्तरागका उपाय राखै है । ताका उत्तर—

जैसें काहूँके बहुत दंड होता था, सो वह थोरा दंड देनेका उपाय राखै है । अर थोरा दंड दिए हर्ष भी मानै है । परंतु श्रद्धानविषै दंड देना, अनिष्ट ही मानै है । तैसें सम्यग्दृष्टीके पापरूप बहुत कषाय होता था, सो यह पुण्यरूप थोरा कषाय-करनेका उपाय राखै है । अर थोरा कषाय भए हर्ष भी मानै है । परंतु श्रद्धानविषै कषायकौं हेय ही मानै है । बहुरि जैसें कोऊ कुमाईका कारण जानि व्यापारादिकका उपाय राखै है । उपाय बनि आए हर्ष मानै है । तैसें द्रव्यलिंगी मोक्षका कारण जानि प्रशस्तरागका उपाय राखै है ! उपाय बनि आए हर्ष मानै है । ऐसें प्रशस्तरागका उपायविषै वा हर्षविषै समानता होतैं भी सम्यग्दृष्टीके तौ दंडसमान मिथ्यादृष्टीके व्यापारसमान श्रद्धान पाईए है । तातैं अभिप्रायविषै विशेष भया । बहुरि याकै परीषह तपश्चरणादिकके निमित्ततैं दुख होय, ताका इलाज तौ न करै है, परंतु दुख वैदै है । सो दुखका वेदना कषाय ही है । जहां वीतरागता हो है, तहां तौ जैसें अन्य ज्ञेयकौं जानै है, तैसें ही दुखका कारण ज्ञेयकौं जानै है । सो ऐसी दशा याकी न हो है । बहुरि उनकौं सहै है, सो भी कषायका अभिप्रायरूप विचारतैं सहै है । सो विचार ऐसा हो है—जो परवशपनैं नरकादिगतिविषै बहुत दुख सहे, ये परीषहादिकका दुख तौ थोरा है । याकौं स्वश सहैं स्वर्ग मोक्षसुखकी प्राप्ति हो है । जो इनकौं न सहिए अर विषय-सुख सेईए, तौ नरकादिककी प्राप्ति हो है, तहां बहुत दुख होगा । इत्यादि विचारविषै परीषहनिविषै अनिष्टबुद्धि रहै है । केवल नरकादिकके भयतैं वा सुखके लोभतैं तिनकौं सहै है । सो



ए सर्व कषायभाव ही हैं । बहुरि ऐसा विचार हो है—जे कर्म बांधे, ते भोगेविना छूटते नाहीं । तातें मोकों सहने आए । सो ऐसे विचारतें कर्मफल चेतनारूप प्रवर्तें है । बहुरि पर्यायदृष्टितें जो परीषहादिकरूप अवस्था हो है, ताकों आपकै भई मानै है । द्रव्यदृष्टितें अपनी वा शरीरादिककी अवस्थाकों भिन्न न पहिचानै है । ऐसैं ही नानाप्रकार व्यवहार विचारतें परीषहादिक सहै है । बहुरि यानें राज्यादि विषयसामग्रीका त्याग किया है, वा इष्ट भोजनादिकका त्याग किया करै है । सो जैसैं कोऊ दाहज्वरवाला वायु होनेके भयतें शीतलवस्तु सेवनका त्याग करै है, परंतु यावत् शीतल वस्तुका सेवन रुचै, तावत् वाकै दाहका अभाव न कहिए । तैसैं रागसहित जीव नरकादिकके भयतें विषयसेवनका त्याग करै है, परंतु यावत् विषयसेवन रुचै, तावत् रागका अभाव न कहिए । बहुरि जैसैं अमृतका आस्वादी देवकों अन्य भोजन स्वयमेव न रुचै, तैसैं स्वरसका आस्वादकरि विषयसेवनकी रुचि याकै न हो है । या प्रकार फलादिककी अपेक्षा परीषहसहनादिकों सुखका कारण जानै है । अर विषयसेवनादिकों दुखका कारण जानै है । बहुरि तत्कालविषै परीषह सहनादिकतें दुख होना मानै है । विषयसेवनादिकतें सुख मानै है । बहुरि जिनतें सुख दुख होना मानिए, तिनविषै इष्ट अनिष्ट बुद्धितें राग द्वेषरूप अभिप्रायका अभाव होय नाहीं । बहुरि जहां रागद्वेष हैं, तहां चारित्र होय नाहीं । तातें यह द्रव्यलिङ्गी विषयसेवन छोरि तपश्चरणादि करै है, तथापि असंयमी है । सिद्धांतविषै असंयत देशसंयत सम्यग्दृष्टीतें भी याकों हीन कछा है । तातें उनकै चौथा पांचवाँ

गुणस्थान है, याकै पहला ही गुणस्थान है। यहां कोऊ कहै— असंयत देशसंयत सम्यग्दृष्टीकै कषायनिकी प्रवृत्ति विशेष है, अर द्रव्यलिंगी मुनिकै थोरी है, यातैं असंयत देशसंयत सम्यग्दृष्टी तौ सोलहवां स्वर्गपर्यंत ही जाय अर द्रव्यलिंगी उपरिम त्रैवेयकपर्यंत जाय। तातैं भावलिंगी मुनितैं तौ द्रव्यलिंगीकौं हीन कहौ, असंयत देशसंयत सम्यग्दृष्टीतैं याकौं हीन कैसें कहिए। ताका समाधान—

असंयत देशसंयत सम्यग्दृष्टिकै कषायनिकी प्रवृत्ति तौ है, परंतु श्रद्धानविषै किसी ही कषायके करनेका अभिप्राय नाहीं। बहुरि द्रव्यलिंगीकै शुभकषाय करनेका अभिप्राय पाईए है। श्रद्धानविषै तिनकौं भले जानै है। तातैं श्रद्धानअपेक्षा असंयत सम्यग्दृष्टीतैं भी याकै अधिक कषाय है। बहुरि द्रव्यलिंगीकै योगनिकी प्रवृत्ति शुभरूप धनी हो है। अर अघातिकर्मनिविषै पुण्य पापबंधका विशेष शुभ अशुभ योगनिकै अनुसार है। तातैं उपरिम त्रैवेयकपर्यंत पहुंचै है, सो किञ्चु कार्यकारी नाहीं। जातैं अघातिया कर्म आत्मगुणके घातक नाहीं। इनके उदयतैं ऊंचे नीचेपद पाए तौ कहा भया। ए तौ बाह्य संयोगमात्र संसारदशाके स्वांग हैं। आप तौ आत्मा है, तातैं आत्मगुणके घातक ए कर्म हैं तिनका हीनपना कार्यकारी है। सो घातिया कर्मनिका बंध बाह्य प्रवृत्तिकै अनुसार नाहीं। अंतरंग कषायशक्तिकै अनुसार है। याहीतैं द्रव्यलिंगीतैं असंयत देशसंयत सम्यग्दृष्टिकै घातिकर्मनिका बंध थोरा है। द्रव्यलिंगीकै तौ सर्व घातिकर्मनिका बंध बहुत स्थिति अनुभाग लिए होय। अर असंयत देशसंयत सम्यग्दृष्टिकै मि-

ध्यात्व अनंतानुबंधी आदि कर्मनिका तौ बंध है ही नहीं। अवशेषनिका बंध हो है, सो स्तोक स्थिति अनुभाग लिए हो है। बहुरि द्रव्यलिंगीकै कदाचित् गुणश्रेणीनिर्जरा न होय, सम्यग्दृष्टिकै कदाचित् हो है। देशसकलसंयम भए निरंतर हो है। याहीतैं यह मोक्षमार्ग भया है। तातैं द्रव्यलिंगी मुनि असंयत देशसंयत सम्यग्दृष्टीतैं हीन कह्या है। सो समयसारविषै द्रव्यलिंगी मुनिका हीनपना गाथा वा टीका कलशानिविषै प्रगट किया है। बहुरि पंचास्तिकायकी टीकाविषै जहां केवल व्यवहारावलंबीका कथन किया है, तहां व्यवहार पंचाचार होतैं भी ताका हीनपना ही प्रगट किया है। बहुरि प्रवचनसारविषै संसारतत्त्व द्रव्यलिंगीकौ कह्या। बहुरि परमात्माप्रकाशादि अन्य शास्त्रनिविषै भी इस व्याख्यानकौ स्पष्ट किया है। बहुरि द्रव्यलिंगीकै जो जप तप शील संयमादि क्रिया हैं, तिनकौ भी अकार्यकारी इन शास्त्रनिविषै जहां दिखाये हैं, सो तहां देखि लेना। यहां ग्रंथ वधनेके भयतैं नहीं लिखिए है। ऐसैं केवल व्यवहाराभासके अवलंबी मिथ्यादृष्टी तिनका निरूपण किया।

अब निश्चय व्यवहार दोऊ नयनिके आभासकौ अवलंबै हैं, ऐसे मिथ्यादृष्टी तिनका निरूपण कीजिए है—

जे जीव ऐसा मानै हैं—जिनमतविषै निश्चय व्यवहार दोय नय कहे हैं, तातैं हमकौ तिन दोऊनिका अंगीकार करना। ऐसैं विचारि जैसैं केवल निश्चयाभासके अवलंबीनिका कथन किया था, तैसैं तौ निश्चयका अंगीकार करै हैं अर जैसैं केवल व्यवहाराभासके अवलंबीनिका कथन किया था, तैसैं व्यवहारका अंगीकार करै हैं।

यद्यपि ऐसैं अंगीकार करनेविषैं दोऊ नयनिविषैं परस्पर विरोध है, तथापि करैं कहा, सांचा तो दोऊ नयनिका स्वरूप भास्या नाहीं, अर जिनमतविषैं दोय नय कहे, तिनिविषैं काहूकौं छोड़ी भी जाती नाहीं । तातैं भ्रम लिए दोऊनिका साधन साधै हैं, ते भीजीव मिथ्यादृष्टी जानने ।

अब इनिकी प्रवृत्तिका विशेष दिखाईए है—अंतरंगविषैं आप तौ निर्द्धार करि यथावत् निश्चय व्यवहार मोक्षमार्गकौ पहिचान्या नाहीं । जिनआज्ञा मानि निश्चय व्यवहाररूप मोक्षमार्ग दोय प्रकार मानै है । सो मोक्षमार्ग दोय नाहीं । मोक्षमार्गका निरूपण दोय प्रकार है । जहां सांचा मोक्षमार्गकौं मोक्षमार्ग निरूपण सो निश्चय मोक्षमार्ग है । अर जहां जो मोक्षमार्ग तौ है नाहीं, परंतु मोक्षमार्गका निमित्त है, वा सहचारी है, ताकौं उपचार-करि मोक्षमार्ग कहिए, सो व्यवहार मोक्षमार्ग है । जातैं निश्चय व्यवहारका सर्वत्र ऐसा ही लक्षण है । सांचा निरूपण सो निश्चय, उपचार निरूपण सो व्यवहार, तातैं निरूपण अपेक्षा दोय प्रकार मोक्षमार्ग जानना । एक निश्चयमोक्षमार्ग है, एक व्यवहारमोक्षमार्ग है । ऐसैं दोय मोक्षमार्ग मानना मिथ्या है । बहुरि निश्चय व्यवहार दोऊनिकूं उपादेय मानै हैं, सो भी भ्रम है । जातैं निश्चय व्यवहारका स्वरूप तौ परस्पर विरोध लिए है । जातैं समयसारविषैं ऐसा कह्या है—

“व्यवहारो भूदत्थो भूदत्थो देसिऊण सुद्वणओ ।”

याका अर्थ—व्यवहार अभूतार्थ है । सत्य स्वरूपकौं न निरूपै है । किसी अपेक्षा उपचारकरि अन्यथा निरूपै है । बहुरि सुद्ध

नय जो निश्चय है, सो भूतार्थ है । जैसा वस्तुका स्वरूप है, तैसा निरूपै है । ऐसैं इनि दोऊनिका स्वरूप तो विरुद्धता लिए है । बहुरि तू ऐसैं मानै है, जो सिद्धसमान शुद्ध आत्माका अनुभवन सो निश्चय अर व्रत शील संयमादिरूप प्रवृत्ति सो व्यवहार, सो ऐसा तेरै मानना ठीक नाहीं । जातैं कोईद्रव्यभावका नाम निश्चय कोईका नाम व्यवहार, ऐसैं है नाहीं । एक ही द्रव्यके भावकों तिसस्वरूप ही निरूपण करना, सो निश्चय नय है । उपचारकरि तिस द्रव्यके भावकों अन्यद्रव्यके भावस्वरूप निरूपण करना, सो व्यवहार है । जैसैं माटीके घड़ेकों माटीका घड़ा निरूपिए सो निश्चय, अर घृतसंयोगका उपचारकरि वाकों ही घृतका घड़ा कहिए, सो व्यवहार । ऐसैं ही अन्यत्र जानना । तातैं तू किसीको निश्चय मानै, किसीको व्यवहार मानै, सो भ्रम है । बहुरि तेरे मानने विषै भी निश्चय व्यवहारकै परस्पर विरोध आया । जो तू आपकों सिद्ध मान शुद्ध मानै है, तौ व्रतादिक काहेकों करै है । जो व्रतादिकका साधनकरि सिद्ध भया चाहै है, तो वर्तमानविषै शुद्धआत्माका अनुभवन मिथ्या भया । ऐसैं दोऊ नयनिकै परस्पर विरोध है । तातैं दोऊ नयनिका उपादेयपना बनै नाहीं । यहां प्रश्न—जो समयसारादिविषै शुद्ध आत्माका अनुभवकों निश्चय कह्या है । व्रत तप संयमादिककों व्यवहार कह्या है, तैसैं ही हम मानै हैं । ताका समाधान—

शुद्ध आत्माका अनुभव सांचा मोक्षमार्ग है । तातैं वाकों निश्चय कह्या । यहां स्वभावतैं अभिन्न परभावतैं भिन्न ऐसा शुद्धशब्दका अर्थ जानना । संसारीकों सिद्ध मानना, ऐसा भ्रमरूप

अर्थ शुद्धशब्दका न जानना । बहुरि व्रत तप आदि मोक्षमार्ग है नाहीं, निमित्तादिककी अपेक्षा उपचारतैं इनकौं मोक्षमार्ग कहिए है, तातैं इनकौं व्यवहार कब्बा । ऐसैं भूतार्थ अभूतार्थ मोक्षमार्ग-पनाकरि इनकौं निश्चय व्यवहार कहे हैं । सो ऐसैं ही मानना । बहुरि ए दोऊ ही सांचे मोक्षमार्ग हैं । इन दोऊनिकौं उपादेय मानना, सो तौ मिथ्याबुद्धि ही है । तहां वह कहे है—श्रद्धान तौ निश्चयका राखै हैं, अर प्रवृत्ति व्यवहाररूप राखै हैं, ऐसैं हम दोऊनिकौं अंगीकार करै हैं । सो भी बनै नाहीं । जातैं निश्चयका निश्चयरूप व्यवहारका व्यवहाररूप श्रद्धान करना युक्त है । एक ही नयका श्रद्धान भए एकांतमिथ्यात्व हो है । बहुरि प्रवृत्तिविषै नयका प्रयोजन ही नाहीं । प्रवृत्ति तौ द्रव्यकी परणति है । तहां जिस द्रव्यकी परणति होय, ताकौं तिसहीकी प्ररूपिए सो निश्चय-नय अर तिसहीकौं अन्य द्रव्यकी प्ररूपिए, सो व्यवहारनय; ऐसैं अभिप्राय अनुसार प्ररूपणतैं तिस प्रवृत्तिविषै दोऊ नय बनै हैं । किछू प्रवृत्ति ही तौ नयरूप है नाहीं । तातैं या प्रकार भी दोऊ नयका ग्रहण मानना मिथ्या है । तौ कहा करिए, सो कहिए है—निश्चयनयकरि जो निरूपण किया होय, ताकौं तौ सत्यार्थ मानि ताका श्रद्धान अंगीकार करना अर व्यवहारनयकरि जो निरूपण किया होय, ताकौं असत्यार्थ मानि ताका श्रद्धान छोड़ना । सो ही समयसारविषै कब्बा है—

सर्वत्राध्यवसायमेवमखिलं त्याज्यं यदुक्तं जिनै—  
 स्तन्मन्ये व्यवहार एव निखिलोऽप्यन्याश्रयस्त्याजितः ।  
 सम्यग्निश्चयमेकमेव परमं निष्कम्प्यमाक्रम्य किं  
 शुद्धज्ञानघने महिम्नि न निजे बध्नन्ति सन्तो धृतिम्॥१

याका अर्थ—जातें सर्व ही हिंसादि वा अहिंसादिविषै अध्य-  
वसाय हैं सो समस्त ही छोड़ना, ऐसा जिनदेवनिकरि कखा है ।  
तातें मैं ऐसैं मानौ हौं, जो पराश्रित व्यवहार है, सो सर्व ही  
छुड़ाया है । सन्तपुरुष एक निश्चयहीकों भलै प्रकार निश्चयपनै  
अंगीकारकरि शुद्धज्ञानघनरूप निजमहिमाविषै स्थिति क्यों न  
करै हैं । भावार्थ—यहां व्यवहारका तौ त्याग कराया, तातें  
निश्चयकों अंगीकारकरि निजमहिमारूप प्रवर्त्तना युक्त है । बहुरि  
षट्पाहुड़विषै कखा है—

जो सुत्तो ववहारे सो जोई जागदे सकज्जम्मि ।

जो जागदि ववहारे सो सुत्तो अप्पणे कज्जे ॥ १ ॥

याका अर्थ—जो व्यवहारविषै सूता है, सो जोगी अपने  
कार्यविषै जागै है । बहुरि जो व्यवहारविषै जागै है, सो अपने  
कार्यविषै सूता है । तातें व्यवहारनयका श्रद्धान छोड़ि निश्चय-  
नयका श्रद्धान करना योग्य है । व्यवहारनय स्वद्रव्य परद्रव्यकों  
वा तिनके भावनिकों वा कारण कार्यादिककों काहूकों काहूविषै  
मिलाय निरूपण करै है । सो ऐसे ही श्रद्धानतें मिथ्यात्व है ।  
तातें याका त्याग करना । बहुरि निश्चयनय तिनहीकों यथावत्  
निरूपै है, काहूकों काहूविषै न मिलावै है । ऐसे ही श्रद्धानतें  
सम्यक्त हो है । तातें याका श्रद्धान करना । यहां प्रश्न—जो ऐसैं  
है, तौ जिनमार्गविषै दोऊ नयनिका ग्रहण करना कखा है, सो  
कैसैं । ताका समाधान—

जिनमार्गविषै कहीं तौ निश्चयनयकी मुख्यता लिए व्याख्यान है  
ताकों तौ 'सत्यार्थ ऐसैं ही है', ऐसा जानना । बहुरि कहीं व्यव-

हारनयकी मुख्यता लिए व्याख्यान है, ताकौं 'ऐसैं है नाहीं—  
निमित्तादि अपेक्षा उपचार किया है', ऐसा जानना । इस प्रकार  
जाननेका नाम ही दोऊ नयनिका ग्रहण है । बहुरि दोऊ नय-  
निके व्याख्यानकौं समान सत्यार्थ जानि ऐसैं भी है, ऐसैं भी है,  
ऐसा भ्रमरूप प्रवर्त्तनेकरि तौ दोऊ नयनिका ग्रहण करना कब्या है  
नाहीं । बहुरि प्रश्न—जो व्यवहारनय असत्यार्थ है, तौ याका  
उपदेश जिनमार्गविषै काहेकौं दिया—एक निश्चयनयहीका  
निरूपण करना था । ताका समाधान—

ऐसा ही तर्क समयसारविषै किया है । तहां यह उत्तर  
दिया है—

जह णवि सक्कमणज्जो अणज्जभासं विणा उगाहेउं ।

तह ववहारेण विणा परमत्थुवएसणमसक्कं ॥ १ ॥

याका अर्थ—जैसैं अनार्य जो म्लेच्छ सो ताहि म्लेच्छभाषा  
विना अर्थ ग्रहण करावनेकौं समर्थ न हूजे । तैसैं व्यवहार विना  
परमार्थका उपदेश अशक्य है । तातैं व्यवहारका उपदेश है ।  
बहुरि इसही सूत्रकी व्याख्याविषै ऐसा कब्या है—**व्यवहारनयो  
नानुसर्त्तव्यः** । यह निश्चयके अंगीकार करावनेकौं व्यवहारकरि  
उपदेश दीजिए है । बहुरि व्यवहारनय है, सो अंगीकार करने  
योग्य नाहीं । यहां प्रश्न—व्यवहार विना निश्चयका उपदेश कैसैं  
न होय । बहुरि व्यवहारनय कैसैं अंगीकार करना, सो कहो ।  
ताका समाधान—

निश्चयनयकरि तौ आत्मा परद्रव्यतैं भिन्न स्वभावनिर्तैं अभिन्न  
स्वयंसिद्ध वस्तु है । ताकौं जे न पहिचानै, तिनकौं ऐसैं ही कब्या



करिए तौ वह समझै नाहीं । तब उनकौँ व्यवहारनयकरि शरीरादिक परद्रव्यनिकी सापेक्षकरि नर नारक पृथ्वीकायादिरूप जीवके विशेष किए । तब मनुष्य जीव है, नारकी जीव है, इत्यादि प्रकार लिए वाकै जीवकी पहचानि भई । अथवा अभेदवस्तुविषै भेद उपजाय ज्ञानदर्शनादि गुणपर्यायरूप जीवके विशेष किए, तब जाननेवाला जीव है, देखनेवाला जीव है, इत्यादि प्रकार लिए वाकै जीवकी पहिचानि भई । बहुरि निश्चयकरि वीतरागभाव मोक्षमार्ग है । ताकौँ जे न पहिचानै, ताकौँ ऐसैं ही कह्या करिए, तौ वह समझै नाहीं । तब उनकौँ व्यवहारनयकरि तत्त्वश्रद्धान-ज्ञानपूर्वक परद्रव्यका निमित्त भेटनेकी सापेक्षकरि व्रत शील संयमादिकरूप वीतरागभावके विशेष दिखाए, तब वाकै वीतराग-भावकी पहचानि भई । याही प्रकार अन्यत्र भी व्यवहारविना निश्चयका उपदेशका न होना जानना । बहुरि यहां व्यवहारकरि नर नारकादिपर्यायहीकौँ जीव कह्या, सो पर्यायहीकौँ जीव न मानि लेना । पर्याय तौ जीव पुद्गलका संयोगरूप है । तहां निश्चयकरि जीवद्रव्य जुदा है, ताहीकौँ जीव मानना । जीवका संयोगतैं शरीरादिककौँ भी उपचारकरि जीव कह्या, सो कहने मात्र ही है । परमार्थतैं शरीरादिक जीव होते नाहीं । ऐसा ही श्रद्धान करना । बहुरि अभेदआत्माविषै ज्ञानदर्शनादि भेद किए, सो तिनकौँ भेदरूप ही न मानि लेने । भेद तौ समझावनेके अर्थ हैं । निश्चयकरि आत्मा अभेद ही है । तिसहीकौँ जीववस्तु मानना । संज्ञा संख्यादिकरि भेद कहे, सो कहने मात्र ही हैं । परमार्थतैं जुदे जुदे हैं नाहीं । ऐसा ही श्रद्धान करना । बहुरि

परद्रव्यका निमित्त मेटनेकी अपेक्षा व्रत शील संयमादिककौं मोक्षमार्ग कक्षा । सो इनहीकौं मोक्षमार्ग न मानि लेना । जातैं परद्रव्यका ग्रहण त्याग आत्मकै होय, तौ आत्मा परद्रव्यका कर्त्ता हर्त्ता होय । सो कोई द्रव्य कोई द्रव्यकै आधीन है नाहीं । तातैं आत्मा अपने भाव रागादिक हैं, तिनकौं छोड़ि वीतरागी हो है । सो निश्चयकरि वीतराग भाव ही मोक्षमार्ग है । वीतराग भावनिकै अर व्रतादिकनिकै कदाचित् कार्यकारणपनो है । तातैं व्रतादिककौं मोक्षमार्ग कहे, सो कहने मात्र ही है । परमार्थतैं बाह्यक्रिया मोक्षमार्ग नाहीं, ऐसा ही श्रद्धान करना । ऐसैं ही अन्यत्र भी व्यवहारनयका अंगीकार करना जानि लेना । यहां प्रश्न—जो व्यवहारनय परकौं उपदेशविषै ही कार्यकारी है कि, अपना भी प्रयोजन साधै है । ताका समाधान—

आप भी यावत् निश्चयनयकरि प्ररूपित वस्तुकौं न पहिचानै, तावत् व्यवहारमार्गकरि वस्तुका निश्चय करै । तातैं नीचली दशाविषै आपकौं भी व्यवहारनय कार्यकारी है । परंतु व्यवहारकौं उपचार मात्र मानि वाकै द्वारि वस्तुका ठीक करै, तौ कार्यकारी होय । बहुरि जो निश्चयवत् व्यवहार भी सत्यभूत मानि वस्तु ऐसैं ही है, ऐसा श्रद्धान करै, तौ उलटा अकार्यकारी होय जाय । सो ही पुरुषार्थसिद्धयुपायविषै कक्षा है—

अबुधस्य बोधनार्थं मुनीश्वरा देशयन्त्यभूतार्थम् ।

व्यवहारमेव केवलमवैति यस्तस्य देशना नास्ति ॥ ६ ॥

माणवक एव सिंहो यथा भवत्यनवगीतसिंहस्य ।

व्यवहार एव हि तथा निश्चयतां यात्यनिश्चयज्ञस्य ॥७॥

इनका अर्थ—मुनिराज अज्ञानीके समझानेकों असत्यार्थ जो व्यवहारनय ताकों उपदेश हैं । जो केवल व्यवहारहीकों जानै है, ताकों उपदेश ही देना योग्य नहीं है । बहुरि जैसें जो सांचा सिंहकों न जानै, ताकै बिलाव ही सिंह है, तैसें जो निश्चयकों न जानै, ताकै व्यवहार ही निश्चयपणाकों प्राप्त हो है । यहां कोई निर्विचार पुरुष ऐसें कहै—तुम व्यवहारकों असत्यार्थ हेय कहो हौ, तौ हम व्रत शील संयमादिका व्यवहार कार्य काहेकों करै—सर्व छोड़ि देवैंगे । ताकों कहिए है—किछू व्रतशील संयमादिकका नाम व्यवहार नहीं है । इनकों मोक्षमार्ग मानना व्यवहार है, सो छोड़ि दे । बहुरि ऐसा श्रद्धानकरि जो इनकों तौ बाह्य सहकारी जानि उपचारतैं मोक्षमार्ग कहा है । ए तौ परद्रव्याश्रित हैं । बहुरि सांचा मोक्षमार्ग वीतरागभाव है, सो स्वद्रव्याश्रित है । ऐसें व्यवहारकों असत्यार्थ हेय जानना । व्रतादिककों छोड़नेतैं तौ व्यवहारका हेयपना होता है नहीं । बहुरि हम पूछैं है—व्रतादिककों छोड़ि कहा करैगा । जो हिंसादिरूप प्रवर्त्तैगा, तौ तहां तौ मोक्षमार्गका उपचार भी संभव नहीं । तहां प्रवर्त्तनेतैं कहा भला होयगा, नरकादिक पावैगा । तातैं ऐसें करना, तौ निर्विचारपना है । बहुरि व्रतादिकरूप परणति मेटि केवल वीतराग उदासीन भावरूप होना बनै, तौ भलैं ही है । सो नीचली दशाविषै होय सकै नहीं । तातैं व्रतादिसाधन छोड़ि स्वच्छंद होना योग्य नहीं । या प्रकार श्रद्धानविषै निश्चयकों, प्रवृत्तिविषै व्यवहारकों, उपादेय मानना, सो भी मिथ्याभाव ही है ।

बहुरि यह जीव दोऊ नयनिका अंगीकार करनेके अर्थ

कदाचित् आपको शुद्ध सिद्धसमान रागादिरहित केवलज्ञानाद-  
 सहित आत्मा अनुभव है, ध्यानमुद्रा धारि ऐसे विचारविषय लागै  
 है। सो ऐसा आप नहीं, परंतु भ्रमकरि में ऐसा ही हों, ऐसा  
 मानि संतुष्ट हो है। कदाचित् वचनद्वारि निरूपण ऐसा ही करै  
 है। सो निश्चय तौ यथावत् वस्तुको प्ररूपै, प्रत्यक्ष जैसा आप  
 नहीं तैसा आपको मानना, सो निश्चय नाम कैसे पावै। जैसे  
 केवल निश्चयाभासवाला जीवके पूर्वे अयथार्थपना कछा था, तैसे  
 ही याके जानना। अथवा यह ऐसे मानै है, जो इस नयकरि  
 आत्मा ऐसा है, इस नयकरि ऐसा है, सो आत्मा तौ जैसा है  
 तैसा है ही, तिसविषय नयकरि निरूपण करनेका जो अभिप्राय है,  
 ताको न पहिचानै है। जैसे आत्मा निश्चयकरि तौ सिद्धसमान  
 केवलज्ञानादिसहित द्रव्यकर्म—नोकर्म—भावकर्मरहित है, व्यवहार-  
 नयकरि संसारी मतिज्ञानादिसहित वा द्रव्यकर्म—नोकर्म—भावकर्म-  
 सहित है, ऐसा मानै है। सो एक आत्माके ऐसे दोय स्वरूप तौ  
 होय नहीं। जिस भावहीका सहितपना तिस भावहीका रहितपना  
 एकवस्तुविषय कैसे संभवै। तातें ऐसा मानना भ्रम है। तौ कैसे  
 है—जैसे राजा रंक मनुष्यपनेकी अपेक्षा समान हैं, तैसे सिद्ध  
 संसारी जीवत्वपनेकी अपेक्षा समान कहे हैं। केवलज्ञानादि  
 अपेक्षा समानता मानिए, सो है नहीं। संसारीके निश्चयकरि  
 मतिज्ञानादिक ही हैं। सिद्धके केवलज्ञान है। इतना विशेष है—  
 संसारीके मतिज्ञानादिक कर्मका निमित्ततें है, तातें स्वभावअपेक्षा  
 संसारीके केवलज्ञानकी शक्ति कहिए, तौ दोष नहीं। जैसे रंक-  
 मनुष्यके राजा होनेकी शक्ति पाईए, तैसे यह शक्ति जाननी।

बहुरि द्रव्यकर्म नोकर्मपुद्गलकरि निपजे हैं, तातैं निश्चयकरि संसारीकै भी इनका भिन्नपना है। परंतु सिद्धवत् इनका कारण कार्यसंबंध भी न मानै, तौ भ्रम ही है। बहुरि भावकर्म आत्माका भाव है, सो निश्चयकरि आत्माहीका है। कर्मके निमित्ततैं हो है, तातैं व्यवहारकरि कर्मका कहिए है। बहुरि सिद्धवत् संसारीकै भी रागादिक न मानना, कर्महीका मानना यह भी भ्रम ही है। याही प्रकारकरि नयकरि एक ही वस्तुकोँ एक-भावअपेक्षा वैसा भी मानना, वैसा भी मानना, सो तौ मिथ्या-बुद्धि है। बहुरि जुदे भावनिकी अपेक्षा नयनिकी प्ररूपणा है, ऐसैं मानि यथासंभव वस्तुकोँ मानना सो सांचा श्रद्धान है। तातैं मिथ्यादृष्टी अनेकांतरूप वस्तुकोँ मानैं, परंतु यथार्थ भावकोँ पहिचानि मानि सकैं नाहीं, ऐसा जानना।

बहुरि इस जीवकै व्रत शील संयमादिकका अंगीकार पाईए है, सो व्यवहारकरि 'ए भी मोक्षके कारण हैं,' ऐसा मानि तिनकोँ उपादेय मानै है। सो जैसैं केवल व्यवहारावलंबी जीवकै पूवैं अय-थार्थपना कह्या था, तैसैं ही याकै भी अयथार्थपना जानना। बहुरि यह ऐसैं भी मानै है—जो यथायोग्य व्रतादि क्रिया तौ करनी योग्य है, परंतु इनविषै ममत्त्व न करना। सो जाका आप कर्ता होय, तिसविषै ममत्व कैसैं न करिए। अर आप कर्ता न है, तौ मुझकोँ करनी योग्य है, ऐसा भाव कैसैं किया। अर जो कर्ता है, तौ वह अपना कर्म भया, तब कर्ताकर्मसंबंध स्वयमेव ही भया। सो ऐसी मानि तौ भ्रम है। तौ कैसैं है—वाह्य व्रतादिक हैं, सो तौ शरीरादि परद्रव्यकै आश्रय हैं। परद्रव्यका

आप कर्त्ता है नहीं । तातैं तिसविषै कर्तृत्वबुद्धि भी न करनी । अर तहां ममत्व भी न करना । बहुरि व्रतादिकविषै ग्रहण त्यागरूप अपना शुभोपयोग होय, सो अपने आश्रय है । ताका आप कर्त्ता है, तातैं तिसविषै कर्तृत्वबुद्धि भी माननी । अर तहां ममत्व भी करना । बहुरि इस शुभोपयोगकौ बंधका ही कारण जानना, मोक्षका कारण न जानना । जातैं बंध अर मोक्षकै तौ प्रतिपक्षीपना है । तातैं एक ही भाव पुण्यबंधकौ भी कारण होय, अर मोक्षकौ भी कारण होय, ऐसा मानना भ्रम है । तातैं व्रत अत्रत दोऊ विकल्परहित जहां परद्रव्यके ग्रहण त्यागका किछू प्रयोजन नाही, ऐसा उदासीन वीतराग शुद्धोपयोग सोई मोक्षमार्ग है । बहुरि नीचली दशाविषै केई जीवनिकै शुभोपयोग अर शुद्धोपयोगका युक्तपना पाईए है । तातैं उपचारकरि व्रतादिक शुभोपयोगकौ मोक्षमार्ग कखा है । वस्तु-विचारतैं शुभोपयोग मोक्षका घातक ही है । जातैं मोक्षकौ कारण सोई मोक्षका घातक है, ऐसा श्रद्धान करना । बहुरि शुद्धोपयोगहीकौ उपादेय मानि ताका उपाय करना । शुभोपयोग अशुभोपयोगकौ हेय जानि तिनके त्यागका उपाय करना । जहां शुभोपयोग न होय सकै, तहां अशुभोपयोगकौ छोड़ि शुभहीविषै प्रवर्त्तना । जातैं शुभोपयोगतैं अशुभोपयोगविषै अशुद्धताकी अधिकता है । बहुरि शुद्धोपयोग होय, तब तौ परद्रव्यका साक्षी-भूत ही रहै है । तहां तौ किछू परद्रव्यका प्रयोजन ही नाही । बहुरि शुभोपयोग होय, तहां बाह्य व्रतादिककी प्रवृत्ति होय, अर अशुभोपयोग होय, तहां बाह्य अत्रतादिककी प्रवृत्ति होय । जातैं

अशुभोपयोगकै अर परद्रव्यकी प्रवृत्तिकै निमित्त नैमित्तिक संबंध पाईए है । बहुरि पहलै अशुभोपयोग छूटि शुभोपयोग होय, पीछें शुभोपयोग छूटि शुद्धोपयोग होय । ऐसी क्रमपरिपाटी है । बहुरि केई ऐसैं मानैं कि शुभोपयोग है, सो शुद्धोपयोगकौं कारण है । सो जैसैं अशुभोपयोग छूटि शुभोपयोग हो है, तैसैं शुभोपयोग छूटि शुद्धोपयोग हो है । ऐसैं ही कार्य कारणपना होय, तौ शुभोपयोगका कारण अशुभोपयोग ठहरै । अथवा द्रव्यलिङ्गीकै शुभोपयोग तौ उत्कृष्ट हो है, शुद्धोपयोग होता ही नाही । तातैं परमार्थतैं इनकै कारणकार्यपना है नाही । जैसैं रोगीकै बहुत रोग था, पीछें स्तोक रोग भया, तौ वह स्तोक रोग तौ निरोग होनेका कारण है नाही । इतना है स्तोक रोग रहें निरोग होनेका उपाय करै, तौ होय जाय । बहुरि जो स्तोक रोगहीकौं भला जानि ताका राखनेका यत्न करै, तौ निरोग कैसैं होय । तैसैं कषायीकै तीव्रकषायरूप अशुभोपयोग था, पीछें मंदकषायरूप शुभोपयोग भया, तौ वह शुभोपयोग तौ निःकषाय शुद्धोपयोग होनेकौं कारण है नाही । इतना है—शुभोपयोग भए शुद्धोपयोगका यत्न करै, तौ होय जाय । बहुरि जो शुभोपयोगहीकौं भला जानि ताका साधन किया करै, तौ शुद्धोपयोग कैसैं होय । तातैं मिथ्यादृष्टीका शुभोपयोग तौ शुद्धोपयोगकौं कारण है नाही । सम्यग्दृष्टीकै शुभोपयोग भए निकट शुद्धोपयोग प्राप्ति होय, ऐसा मुख्यपनाकरि कहीं शुभोपयोगकौं शुद्धोपयोगका कारण भी कहिए है । ऐसा जानना । बहुरि यह जीव आपकौं निश्चय व्यवहाररूप मोक्षमार्गका साधक मानै है । तहां पूर्वोक्त प्रकार आत्माकौं शुद्ध मान्या,

सो तौ सम्यग्दर्शन भया । तैसें ही जान्या सो सम्यग्ज्ञान भया । तैसें ही विचारविषै प्रवर्त्या सो सम्यक्चारित्र भया । ऐसें तौ आपकै निश्चय रत्नत्रय भया मानै । सो मैं प्रत्यक्ष अशुद्ध सो शुद्ध कैसें मानौ जानौ विचारौ हौं, इत्यादि विवेकरहित भ्रमते संतुष्ट हो है । बहुरि अरहंतादि विना अन्य देवादिककौ न मानै है, वा जैनशास्त्र अनुसार जीवादिकके भेद सीख लिए हैं, तिनही-कौ मानै है औरकौ न मानै, सो तौ सम्यग्दर्शन भया । बहुरि जैनशास्त्रनिका अभ्यासविषै बहुत प्रवर्ते है, सो सम्यग्ज्ञान भया । बहुरि व्रतादिरूप क्रियानिविषै प्रवर्ते है, सो सम्यक्चारित्र भया । ऐसें आपकै व्यवहार रत्नत्रय भया मानै । सो व्यवहार तौ उपचारका नाम है । सो उपचार भी तौ तब बनै, जब सत्यभूत निश्चय रत्नत्रयका कारणादिक होय । जैसें निश्चय रत्नत्रय सधै, तैसें इनकौ साधै, तौ व्यवहारपनो भी संभवै । सो याकै तौ सत्यभूत रत्नत्रयकी पहचानि ही भई नाहीं । यह ऐसें कैसें साधि सकै । आज्ञाअनुसारी हुवा देख्यादेखी साधन करै है । तातैं याकै निश्चय व्यवहार मोक्षमार्ग न भया । आगैं निश्चय व्यवहार मोक्षमार्गका निरूपण करैगे, ताका साधन भए ही मोक्षमार्ग होगा । ऐसें यह जीव निश्चयाभासकौ जानै मानै है । परंतु व्यवहार साधनैकौ भी भला जानै है, तातैं स्वच्छंद होय अशुभरूप न प्रवर्ते है । ब्रह्मादिक शुभोपयोगरूप प्रवर्ते है, तातैं अतिम त्रैवेयक पर्यंत पदकौ पावै है । बहुरि जो निश्चयाभासकी प्रबलतातैं अशुभरूप प्रवृत्ति होय जाय, तौ कुगतिविषै भी गमन होय परिणाम-निकै अनुसार फल पावै है । परंतु संसारका ही भोक्ता रहै है ।



सांचा मोक्षमार्ग पाए विना सिद्धपदकों न पावै है । ऐसैं निश्चया-  
भास व्यवहाराभास दोऊनिके अवलंबी मिथ्यादृष्टी तिनिका निरू-  
पण किया ।

अब सम्यत्त्वके सन्मुख जे मिथ्यादृष्टी तिनका निरूपण  
कीजिए है—

कोई मंदकषायादिकका कारण पाय ज्ञानावरणादि कर्मनिका  
क्षयोपशम भया, तातैं तत्त्वविचार करनेकी शक्ति भई । अर मोह  
मंद भया । तातैं तत्त्वादिविचारविषै उद्यम भया । बहुरि बाह्य-  
निमित्त देव गुरु शास्त्रादिकका भया, तिनकरि सांचा उपदेशका  
लाभ भया । तहां अपने प्रयोजनभूत मोक्षमार्गका, वा देवगुरु-  
धर्मादिकका वा जीवादि तत्त्वनिका, वा आपा परका, वा आपकों  
अहितकारी हितकारी भावनिका, इत्यादिकका उपदेशतैं सावधान  
होय, ऐसा विचार किया—अहो मुझकों तौ इन बातनिकी खबरि  
नाहीं, मैं भ्रमतैं भूलि पर्यायहीविषै तन्मय भया । सो इस  
पर्यायकी तौ थोरे ही कालकी स्थिति है । बहुरि यहां मोकों सर्व  
निमित्त मिले है । तातैं मोकों इन बातनिका ठीक करना । जातैं  
इनविषै तौ मेरा ही प्रयोजन भासै है । ऐसैं विचारि जो उपदेश  
सुन्या ताका निर्द्धार करनेका उद्यम किया । तहां उद्देश, लक्षण,  
निर्देश, परीक्षा द्वारकरि तिनका निर्द्धार होय । तातैं पहलै तौ  
तिनके नाम सीखै, बहुरि तिनके लक्षण जानै, बहुरि ऐसै संभवै  
है कि नाहीं, ऐसा विचारलि ए परीक्षा करने लगै । तहां नाम  
सीख लेना अर लक्षण जानि लेना ये दोऊ तौ उपदेशकै अनुसार  
हो है । जैसैं उपदेश दिया तैसैं याद करि लेना । बहुरि परीक्षाकरने-

विषै अपना विवेक चाहिए है । सो विवेककरि एकांत अपना उपयोगविषै विचारै—जैसे उपदेश दिया तैसे ही है कि अन्यथा है । तहां अनुमानादि प्रमाणकरि ठीक करै, वा उपदेश तौ ऐसे है अर ऐसे न मानिए तौ ऐसे होय । सो इनविषै प्रबल युक्ति कौन है अर निर्बल युक्ति कौन है । जो प्रबल भासै, ताको सांच जानै । बहुरि जो उपदेशतै अन्यथा सांच भासै वा संदेह रहै निर्द्धार न होय, तौ बहुरि विशेष ज्ञानी होय तिनको पूछै । बहुरि वह उत्तर दे, वाको विचारै । ऐसे ही यावत् निर्द्धार न होय, तावत् प्रश्न उत्तर करै । अथवा समान बुद्धिके धारक होय, तिनको आपकै जैसा विचार भया होय तैसा कहै । प्रश्न उत्तर परस्पर चर्चा करै । बहुरि जो प्रश्नोत्तरविषै निरूपण भया होय, ताको एकांतविषै विचारै । याही प्रकार अपने अंतरंगविषै जैसे उपदेश दिया था, तैसे ही निर्णय होय भाव न भासै, तावत् ऐसे ही उद्यम किया करै । बहुरि अन्यमतीनिकरि कल्पित तत्त्वनिका उपदेश दिया है, ताकरि जैन उपदेश अन्यथा भासै, संदेह होय, तौ भी पूर्वोक्त प्रकारकरि उद्यम करै । ऐसे उद्यम किए जैसे जिनदेवका उपदेश है, तैसे ही सांच है । मुझको भी ऐसे ही भासै है, ऐसा निर्णय होय । जातै जिनदेव अन्यथावादी हैं नाहीं । यहां कोऊ कहै—जिनदेव अन्यथावादी नाहीं हैं, तौ जैसे उनका उपदेश है, तैसे श्रद्धान करि लीजिए, परीक्षा काहेको कीजिए, ताका समाधान—

परीक्षा किए विना यह तौ मानना होय, जो जिनदेव ऐसे कहा है, सो सत्य है । परंतु उनका भाव आपको भासै नाहीं ।

बहुरि भाव भासे विना निर्मल श्रद्धान न होय । जाकी काहूका वचनहीकरि प्रतीति करिए, ताकी अन्यका वचनकरि अन्यथा भी प्रतीति होय जाय, तौ शक्तिअपेक्षा वचनकरि कीन्हीं प्रतीति अप्रतीतिवत् है । बहुरि जाका भाव भास्या होय, ताकौ अनेक प्रकारकरि भी अन्यथा न मानै । तातैं भाव भासैं प्रतीति होय सोई सांची प्रतीति है । बहुरि जो कहौगे, पुरुषप्रमाणतैं वचन प्रमाण कीजिए है, तौ पुरुषकी भी प्रमाणता स्वयमेव न होय । वाके कैई वचननिकी परीक्षा पहलैं करि लीजिए, तब पुरुषकी प्रमाणता होय । यहां प्रश्न—उपदेश तौ अनेक प्रकार, किस-किसकी परीक्षा करिए, ताका समाधान—

उपदेशविषै केई उपादेय केई हेय तत्त्व निरूपिए है । तहां उपादेय हेय तत्त्वनिकी तौ परीक्षा करि लेनी । जातैं इनविषै अन्यथापनों भए अपना बुरा हो है । उपादेयकौं हेय मानि लै, तौ बुरा होय, हेयकौं उपादेय मानि लै, तौ बुरा होय । बहुरि जो कहौगे, आप परीक्षा न करी, अर जिनवचनहीतैं उपादेयकौं उपादेय जानै, हेयकौं हेय जानै, तौ कैसैं बुरा होय । ताका समाधान—

अर्थका भाव भासे विना वचनका अभिप्राय न पहिचानै । यह तौ मानि ले, जो मैं जिनवचन अनुसार मानौं हौं । परंतु भाव भासे विना अन्यथापनो होय जाय । लोकविषै भी किंकरकौं किसी कार्यकौं भेजिए, सो वह उस कार्यका भाव जानै, तौ कार्यकौं सुधारै, जो भाव न भासै, तौ कहीं चूकि ही जाय । तातैं भाव भासनेके अर्थ हेय उपादेय तत्त्वनिकी परीक्षा अवश्य

करनी । बहुरि वह कहै है—जो परीक्षा अन्यथा होय जाय, तौ कहा करिए । ताका समाधान—

जिनवचन अर अपनी परीक्षा इनकी समानता होय, तब तौ जानिए सत्य परीक्षा भई । यावत् ऐसैं न होय तावत् जैसें कोई लेखा करै है, ताकी विधि न मिलै तावत् अपनी चूककों दूढ़ै । तैसें यह अपनी परीक्षाविषै विचार किया करै । बहुरि जो ज्ञेयतत्त्व हैं, तिनकी परीक्षा होय सकै, तौ परीक्षा करै । नाहीं, यह अनुमान करै, जो हेय उपादेय तत्त्व ही अन्यथा न कहै, तौ ज्ञेयतत्त्व अन्यथा किस अर्थ कहै । जैसें कोऊ प्रयोजनरूप कार्यनिविषै झूठ न बोलै, सो अप्रयोजनविषै झूठ काहेकों बोलै । तातैं ज्ञेयतत्त्वनिका परीक्षाकरि भी वा आज्ञाकरि स्वरूप जानिए । तिनका यथार्थ स्वरूप न भासै, तौ भी दोष नाहीं । याहीतैं जैन-शास्त्रनिविषै तत्त्वादिकका निरूपण किया, तहां तौ हेतुयुक्ति आदिकरि जैसें याकै अनुमानादिकरि प्रतीति आवै, तैसें कथन किया । बहुरि त्रिलोक गुणस्थान मार्गणा पुराणादिकका कथन आज्ञा अनुसार किया । तातैं हेयोपादेय तत्त्वनिकी परीक्षा करनी योग्य है । तहां जीवादिक द्रव्य वा तत्त्व तिनकों पहचानना । बहुरि त्यागने योग्य मिथ्यात्त्व रागादिक अर ग्रहणे योग्य सम्यग्दर्शनादिक तिनका स्वरूप पहचानना । बहुरि निमित्त नैमित्तादिक जैसें हैं, तैसें पहचानना । इत्यादि मोक्षमार्गविषै जिनके जानैं प्रवृत्ति होय, तिनकों अवश्य जाननै । सो इनकी तौ परीक्षा करनी । सामान्यपनैं हेतुयुक्तिकरि इनकों जाननै, वा प्रमाण नयनिकरि जाननै, वा निर्देश स्वाम्यत्वादिकरि, वा सत् संख्यादि-

करि इनका विशेष जानना । जैसी बुद्धि होय जैसा निमित्त बनै, तैसें इनकों सामान्य विशेषरूप पहचाननै । बहुरि इस जाननैका उपकारी गुणस्थानमार्गणादिक वा पुराणादिक वा व्रतादिक क्रियादिकका भी जानना योग्य है । यहां परीक्षा होय सकै, तिनकी परीक्षा करनी, न होय सकै ताका आज्ञा अनुसारि जानपना करना । ऐसें इस जाननेकै अर्थ कबहू आपही विचार करै है, कबहू शास्त्र बांचै है, कबहू सुनै है, कबहू अभ्यास करै है, कबहू प्रश्नोत्तर करै है । इत्यादिरूप प्रवर्तै है । अपना कार्य करनेका जाकै हर्ष बहुत है, तातैं अंतरंग प्रीतितैं ताका समाधान करै । या प्रकार साधनकरतैं यावत् सांचा तत्त्वश्रद्धान न होय, 'यह ऐसें ही है' ऐसी प्रतीति लिए जीवादि तत्त्वनिका स्वरूप आपकों न भासै, जैसें पर्यायविषै अहंबुद्धि है, तैसें केवल आत्मविषै अहंबुद्धि न आवै, हित अहितरूप अपनै भाव न पहिचानै, तावत् सम्यक्तके सन्मुख मिथ्यादृष्टी है । यह जीव थोरे ही कालमै सम्यक्तकों प्राप्त होगा । इस ही भवमै वा अन्य पर्यायविषै सम्यक्तकों पावैगा । इस भवमै अभ्यासकरि परलोक-विषै तिर्यचादिगतिविषै भी जाय—तौ तहां संस्कारके बलतैं देव गुरु शास्त्रका निमित्तविना भी सम्यक्त होय जाय । जातैं ऐसे अभ्यासके बलतैं मिथ्यात्वकर्मका अनुभाग हीन हो है । जहां वाका उदय न होय, तहां ही सम्यक्त होय जाय । मूल-कारण यह ही है । देवादिकका तौ बाह्य निमित्त है, सो मुख्य-ताकरि तौ इनके निमित्तहीतैं सम्यक्त हो है । तारतम्यतैं पूर्व अभ्यास संस्कारतैं वर्तमान इनका निमित्त न होय, तौ भी सम्यक्त होय सकै है । सिद्धांतविषै ऐसा सूत्र कखा है—

### “तन्निसर्गादधिगमाद्वा”

यह सो सम्यग्दर्शन निसर्ग वा अधिगमतैँ हो है । तहां देवा-  
दिक बाह्य निमित्तविना होय, सो निसर्गतैँ भया कहिए । देवा-  
दिकका निमित्ततैँ होय, सो अधिगमतैँ भया कहिए । देखो  
तत्त्वविचारकी महिमा, तत्त्वविचाररहित देवादिककी प्रतीति  
करै, बहुत शास्त्र अभ्यासै, व्रतादिक तपश्चरणादि करै, ताकैँ तौ  
सम्यक्त होनेका अधिकार नाही । अर तत्त्वविचारवाला इन विना  
भी सम्यक्तका अधिकारी हो है । बहुरि कोई जीवकैँ तत्त्वविचारकैँ  
होने पहलैँ किसी कारण पाय देवादिककी प्रतीति होय, वा व्रत  
तपका अंगीकार होय, पीछैँ तत्त्वविचार करै । परंतु सम्यक्तका  
अधिकारी तत्त्वविचार भए ही हो है । बहुरि काहूँकैँ तत्त्वविचार  
भए पीछैँ तत्त्वप्रतीति न होनेतैँ सम्यक्त तौ न भया, अर व्यवहार  
धर्मकी प्रतीति रुचि होय गई, तातैँ देवादिककी प्रतीति करै है,  
वा व्रत तपकौँ अंगीकार करै है । काहूँकैँ देवादिककी प्रतीति अर  
सम्यक्त युगपत् होय, अर व्रत तप सम्यक्तकी साथि भी होय, वा  
न भी होय, देवादिककी प्रतीतिका तौ नियम है । इस विना  
सम्यक्त न होय । व्रतादिकका नियम है नाही । घने जीव तौ  
पहलैँ सम्यक्त होय पीछैँ ही व्रतादिककौँ धारैँ हैं । काहूँकैँ युगपत्  
भी होय जाय है । ऐसैँ यह तत्त्वविचारवाला जीव सम्यक्तका  
अधिकारी है । परंतु याकैँ सम्यक्त होय ही होय, ऐसा नियम  
नाहीं । जातैँ शास्त्रविषैँ सम्यक्त होनेतैँ पहलैँ पंचलब्धिका होना  
कह्या है—क्षयोपशम, विशुद्धि, देशना, प्रायोग्य, करण । तहां  
जिसकौँ होतसंतैँ तत्त्वविचार होय सकैँ, ऐसा ज्ञानावरणादि

कर्मनिका क्षयोपशम होय । उदयकालकौ प्राप्त सर्वघाती स्पद्ध-  
 कनिके निषेकनिका उदयका अभाव सो क्षय, अर अनागतकाल-  
 विषै उदय आवने योग्य तिनहीका सत्तारूप रहना सो उपशम,  
 ऐसी देशघाती स्पद्धकनिका उदय सहित कर्मनिकी अवस्था ताका  
 नाम क्षयोपशम है । ताकी प्राप्ति सो क्षयोपशमलब्धि है । बहुरि  
 मोहका मंद उदय आवनेतैं मंदकषायरूप भाव होंय, तहां  
 तत्त्वविचार होय सकै, सो विशुद्धलब्धि है । बहुरि जिनदेवका  
 उपदेश्या तत्त्वका धारण होय, विचार होय, सो देशनालब्धि है ।  
 जहां नरकादिविषै उपदेशका निमित्त न होय, तहां पूर्वसंस्कारतैं  
 होय । बहुरि कर्मनिकी पूर्वसत्ता घटकरि अंतःकोटाकोटी सागर  
 प्रमाण रहि जाय, अर नवीनबंध अंतःकोटाकोटी प्रमाण ताकै  
 संख्यातवैं भागमात्र होय, सो भी तिस लब्धिकालतैं लगाय क्रमतैं  
 घटता होय, केतीक पापप्रकृतिनिका बंध क्रमतैं मिटता जाय,  
 इत्यादि योग्य अवस्थाका होना, सो प्रायोग्यलब्धि है । सो ए  
 च्यारौ लब्धि भव्य वा अभव्यकै होय हें । इन च्यारलब्धि भए  
 पीछैं सम्यक्त होय तौ होय, न होय तौ नहीं भी होय । ऐसैं  
 लब्धिसारविषै कह्या है । तातैं तिस तत्त्वविचारवालाकै सम्यक्त  
 होनैका नियम नाहीं । जैसे काहूकौ हितकी शिक्षा दई, ताकौ  
 वह जानि विचार करै, यह सीख दई सो कैसैं है । पीछै  
 विचारतां वाकै ऐसैं ही है, ऐसी प्रतीति होय जाय । अथवा  
 अन्यथा विचार होय, वा अन्य विचारविषै लागि तिस सीखका  
 निर्द्धार न करै, तौ प्रतीति नाहीं भी होय । तैसैं श्रीगुरां तत्त्वो-  
 पदेश दिया, ताकौ जानि विचार करै, यह उपदेश दिया, सो

कैसे है। पीछे विचार करनेतें वाकै 'ऐसे ही है' ऐसी प्रतीति होय जाय। अथवा अन्यथा विचार होय, वा अन्य विचारविषै लागि तिस उपदेशका निर्धार न करै, तौ प्रतीति नाही होय। ऐसा नियम है। याका उद्यम तौ तत्त्वविचारका करने मात्र ही है। बहुरि पांचई करणलब्धि भए सम्यक्त होय ही होय, ऐसा नियम है। सो जाकै पूर्वे कही थीं च्यारि लब्धि ते तौ भई होंय, अर अंतर्मूर्त्त पीछे जाकै सम्यक्त होनो होय, तिसही जीवकै करणलब्धि हो है। सो इस करणलब्धिवालकै बुद्धिपूर्वक तौ इतना ही उद्यम हो है—जिस तत्त्वविचारविषै उपयोगकौ तद्रूप होय लगावै, ताकरि समय समय परिणाम निर्मल होते जाय हैं। जैसे काहूकै सीखका विचार ऐसा निर्मल होनै लग्या, जाकरि याकै शीघ्र ही ताकी प्रतीति होय जासी। तैसे तत्त्वउपदेश ऐसा निर्मल होने लग्या, जाकरि याकै शीघ्र ही ताका श्रद्धान होसी। बहुरि इन परिणामनिका तारतम्य केवलज्ञानकरि देख्या, ताकरि निरूपण करणानुयोगविषै किया है। सो इस करणलब्धिके तीन भेद हैं—अधःकरण, अपूर्वकरण, अनिवृत्तिकरण। इनका विशेष व्याख्यान तौ लब्धिसार शास्त्रविषै किया है, तिसतें जानना। यहां संक्षेपसौ कहिए है—

त्रिकालवर्त्ता सर्वे करणलब्धिवाले जीव तिनके परिणामनिकी अपेक्षा ए तीन नाम हैं। तहां करण नाम तौ परिणामका है। बहुरि जहां पहले पिछले समयनिके परिणाम समान होंय, सो अधःकरण है। जैसे कोई जीवका परिणाम तिस करणके पहिले समय स्तोक विशुद्धता लिए भए, पीछे समय समय अनंतगुणी



विशुद्धताकरि बधते भए । बहुरि वाकै जैसेँ द्वितीय तृतीयादि समयनिविषै परिणाम होय, तैसेँ केई अन्य जीवनिकै प्रथम समयविषै ही होय । ताकै तिसतै समय समय अनंती विशुद्धताकरि बधते होय । ऐसेँ अधःप्रवृत्तकरण जानना । बहुरि जिसविषै पहले पिछले समयनिके परिणाम समान न होय, अपूर्व ही होय, बहुरि जैसेँ यहां अधःकरणवत् पहले समय होय तैसेँ कोई ही जीवकै द्वितीयादि समयनिविषै न होय बधते ही होय । तिस करणके परिणाम जैसेँ जिन जीवनिकै करणका पहला समय ही होय, तिन अनेक जीवनिकै परस्पर परिणाम समान भी होय, अर अधिक हीन विशुद्धता लिए भी होय । परंतु यहां इतना विशेष भया, जो इसकी उत्कृष्टतातै भी द्वितीयादि समयवालेका जघन्य परिणाम भी अनंतगुणी विशुद्धता लिए ही होय । ऐसेँ ही जिनकौं करण मांडे द्वितीयादि समय भया होय, तिनकै तिस समयवालोकै तौ परस्पर परिणाम समान वा असमान होय । परंतु ऊपरले समयवालोकै तिस समय समान सर्वथा न होय अपूर्व ही होय, ऐसेँ अपूर्वकरण जानना । बहुरि जिसविषै समान समयवर्ती जीवनिकै परिणाम समान ही होय, निवृत्ति कहिए परस्पर भेद ताकरि रहित होय । जैसेँ तिस करणका पहलै समय-विषै सर्व जीवनिका परस्पर समान ही होय, ऐसेँ ही द्वितीयादि समयनिविषै समानता परस्पर जाननी । बहुरि प्रथमादि समय-वालोकै द्वितीयादि समयवालोकै अनंतगुणी विशुद्धता लिए होय, ऐसेँ अनिवृत्तिकरण जानना । ऐसेँ ए तीन करण जानने । तहां पहलै अंतर्मुहूर्त कालपर्यंत अधःकरण होय, तहां च्यारि आवश्यक

हो हैं । समय समय अनंतगुणी विशुद्धता होय, बहुरि एक अंतर्मुहूर्त्तकरि नवीनबंधकी स्थिति घटती होय, सो स्थितिबंधा-पसरण होय, बहुरि समय समय प्रशस्त प्रकृतिनिका अनंत गुणा अनुभाग बधै, बहुरि समय समय अप्रशस्त प्रकृतिनिका अनुभाग-बंध अनंतवै भाग होय, ऐसैं च्यारि आवश्यक होंय । तहां पीछैं अपूर्वकरण होय । ताका काल अधःकरणके कालकै संख्यातवै भाग है । ताविषै ए आवश्यक और होंय । एक एक अंतर्मुहूर्त्तकरि सत्ताभूत पूर्वकर्मकी स्थिति थी, ताकौं घटावै सो स्थितिकांडक घात होय । बहुरि तिसतैं स्तोक एक एक अंतर्मुहूर्त्तकरि पूर्व-कर्मका अनुभागकौं घटावै, सो अनुभागकांडक घात होय । बहुरि गुणश्रेणिका कालविषै क्रमतैं असंख्यातगुणा प्रमाण लिए कर्म नि-र्जरने योग्य करिए, सो गुणश्रेणीनिर्जरा होय । बहुरि गुणसंक्रमण यहां नाहीं हो है । अन्यत्र अपूर्वकरण हो है, तहां हो है । ऐसैं अपूर्वकरण भए पीछैं अनिवृत्तिकरण होय । ताका काल अपूर्वकरणकै भी संख्यातवै भाग है । तिसविषै पूर्वोक्त आवश्यक सहित केता काल गए पीछैं अनिवृत्तिकरण करै है । अनिवृत्तिकर-णके काल पीछैं उदय आवने योग्य ऐसे मिथ्यात्वकर्म मुहूर्त्तमात्र निषेकनिका अभाव करै है, तिन परिणामनिकौं अन्य स्थितिरूप परिणमावै है । बहुरि अंतःकरणकरि पीछैं उपशमकरण करै है । अंतःकरणकरि अभावरूप किए निषेकनिके ऊपरि जो मिथ्यात्वके निषेक तिनकौं उदय आवनेकौं अयोग्य करै है । इत्यादिक क्रिया-करि अनिवृत्तिकरणका अंतसमयकै अनंतर जिन निषेकनिका अभाव किया था, तिनका उदयकाल आया, तब निषेकनि विना

उदय कौनका आवै । तातैं मिथ्यात्त्वकां उदय न होनेतैं प्रथमो-  
पशम सम्यक्तकी प्राप्ति हो है । अनादि मिथ्यादृष्टीकै सम्यक्त-  
मोहनीय मिश्रमोहनीयकी सत्ता नाहीं है । तातैं एक मिथ्यात्त्व-  
कर्महीकौ उपशमाय उपशमसम्यग्दृष्टी हो है । बहुरि कोई जीव  
सम्यक्त पाय पीछैं भ्रष्ट हो है, ताकी भी दशा अनादि मिथ्या-  
दृष्टीकी सी ही होय जाय है । यहां प्रश्न—जो परीक्षाकरि तत्त्व-  
श्रद्धान किया था, ताका अभाव कैसें होय । ताका समाधान—

जैसें किसी पुरुषकौ शिक्षा दई, ताकी परीक्षाकरि वाकै 'ऐसें  
ही है' ऐसी प्रतीति भी आई थी, पीछैं अन्यथा कोई प्रकारकरि  
विचार भया, तातैं उस शिक्षाविषै संदेह भया । 'ऐसें है कि  
ऐसें हैं' अथवा 'न जानों कैसें है,' अथवा तिस शिक्षाकौ झूठ  
जानि तिसतैं विपरीति भई, तब वाकै प्रतीति न भई । तब वाकै  
तिस शिक्षाकी प्रतीतिका अभाव होय, अथवा पूर्वे तौ अन्यथा  
प्रतीति थी ही, बीचिमैं शिक्षाका विचारतैं यथार्थ प्रतीति भई  
थी, बहुरि तिस शिक्षाका विचार किए बहुतकाल होय गया,  
तब ताकौ भूलि जैसें पूर्वे अन्यथा प्रतीति थी, तैसें ही स्वयमेव  
होय गई । तब तिस शिक्षाकी प्रतीतिका अभाव होय जाय ।  
अथवा यथार्थ प्रतीति पहलैं तौ कीन्ही, पीछैं न तौ किछू अन्यथा  
विचार किया, न बहुत काल भया । परंतु तैसा ही कर्म उदयतैं  
होनहारकै अनुसार स्वयमेवही तिस प्रतीतिका अभाव होय,  
अन्यथापना भया । ऐसें अनेक प्रकार तिस शिक्षाकी यथार्थ  
प्रतीतिका अभाव हो है । तैसें जीवकै जिनदेवका तत्त्वादिरूप  
उपदेश भया, ताकी परीक्षाकरि वाकै 'ऐसें ही है' ऐसा श्रद्धान

भया, पीछे पूर्वे जैसे कहे तैसे अनेक प्रकार तिस पदार्थश्रद्धानका अभाव हो है । सो यह कथन स्थूलपने दिखाया है । तारतम्यकरि केवलज्ञानविषै भासै है—इस समय श्रद्धान है, कि इस समय नाहीं है । जातैं यहां मूलकारण मिथ्यात्वकर्म है । ताका उदय होय, तब तौ अन्य विचारादिक कारण मिलौ वा मति मिलौ । स्वयमेव सम्यक्श्रद्धानका अभाव हो है । बहुरि ताका उदय न होय, तब अन्य कारण मिलो वा मति मिलो स्वयमेव सम्यक्श्रद्धान होय जाय है । सो ऐसे अंतरंग समयसंबंधी सूक्ष्मदशाका जानना छद्मस्थकै होता नाहीं । तातैं अपनी मिथ्या सम्यक् रूप अवस्थाका तारतम्य याकौ निश्चय होय सकै नाहीं । केवलज्ञानविषै भासै है । तिस अपेक्षा गुणस्थाननिकी पलटनि शास्त्रविषै कही है । या प्रकार जो सम्यक्ततैं भ्रष्ट होय, सो सादि मिथ्यादृष्टी कहिए । ताकै भी बहुरि सम्यक्तकी प्राप्तिविषै पूर्वोक्त पांचलब्धि हो हैं । विशेष इतना यहां कोई जीवकै दर्शनमोहकी तीन प्रकृतिकी सत्ता हो है । सो तिनकौ उपशमाय प्रथमोपशमसम्यक्ती हो है । अथवा काहूकै सम्यक्तमोहनीयका उदय आवै है, दोय प्रकृतिनिका उदय न हो है, सो क्षयोपशमसम्यक्ती हो है । याकै गुणश्रेणी आदि क्रिया न हो है । वा अनिवृत्तिकरण न हो है । बहुरि काहूकै मिश्रमोहनीयका उदय आवै है, दोय प्रकृतिनिका उदय न हो है । सो मिश्रगुणस्थानकौ प्राप्त हो है । याकै करण न हो है । ऐसे सादिमिथ्यादृष्टीकै मिथ्यात्व छूटै दशा हो है । क्षायिकसम्यक्तकौ वेदकसम्यक्दृष्टीही पावै है । तातैं याका कथन यहां न किया है । ऐसे सादि मिथ्यादृष्टीका जघन्य तौ मध्य अंतर्मुहूर्त्त-

मात्र उत्कृष्ट किञ्चिद्बुद्ध अर्द्धपुद्गल परिवर्तनमात्र काल जानना । देखो, परिणामनिकी विचित्रता कोई जीव तौ ग्यारवै गुणस्थान यथाख्यातचारित्र पाय बहुरि मिथ्यादृष्टी होय, किञ्चित् ऊन अर्द्ध-पुद्गल परिवर्तन कालपर्यंत संसारमें रूले, अर कोई नित्य निगो-दमैसौं निकसि मनुष्य होय, मिथ्यात्व छूटै पीछें अंतर्मुहूर्त्तमें केवलज्ञान पावै । ऐसैं जानि अपने परिणाम बिगारनेका भय राखना । अर तिनके सुधारनेका उपाय करना । बहुरि इस सादिमिथ्यादृष्टीकै थोरे काल मिथ्यात्वका उदय रहै, तौ बाह्य जैनीपना नाहीं नष्ट हो है । वा तत्त्वनिका अश्रद्धान व्यक्त न हो है । वा विना विचार किए ही वा स्तोक विचारहीतैं बहुरि सम्यक्तकी प्राप्ति होय जाय है । बहुरि बहुत काल मिथ्यात्वका उदय रहै, तौ जैसी अनादि मिथ्यादृष्टीकी दशा तैसी याकी दशा हो है । गृहीत मिथ्यात्वकौं भी ग्रहै है । निगोदादिविषै भी रूले है । याका किल्ल प्रमाण नाहीं । बहुरि कोई जीव सम्यक्ततैं अष्ट होय सासादन हो है । सो तहां जघन्य एक समय उत्कृष्ट छह आवली प्रमाण काल रहै है, सो याका परिणामकी दशा वचनकरि कहनेमें आवती नाहीं । सूक्ष्ममात्र काल कोई जातिके केवल-ज्ञानगम्य परिणाम हो हैं । तहां अनंतानुबंधीका तौ उदय हो है, मिथ्यात्वका उदय न हो है । सो आगम प्रमाणतैं याका स्वरूप जानना । बहुरि कोई जीव सम्यक्ततैं नष्ट होय, मिश्रगुणस्थानकौं प्राप्त हो है । तहां मिश्रमोहिनीयका उदय हो है । याका काल मध्य अंतर्मुहूर्त्तमात्र है । सो याका भी काल थोरा है, सो याकै भी परिणाम केवलज्ञानगम्य हैं । यहां इतना भासै है—जैसैं काहूकौं

सीख दई, तिसकों वह किछू सत्य किछू असत्य एकै काल मानै । तैसेँ तत्त्वनिका श्रद्धान अश्रद्धान एकै काल होय, सो मिश्रदशा है । केई कहै हैं—हमकों तौ जिनदेव वा अन्य देव सर्व ही बंदने योग्य हैं । इत्यादि मिश्रश्रद्धानकों मिश्रगुणस्थान कहै हैं, सो नाही । यह तौ प्रत्यक्ष मिथ्यात्वदशा है । व्यवहाररूप देवा-दिकका श्रद्धान भए भी मिथ्यात्व रहै है, तौ याकै तौ देव कुदे-वका किछू ठीक ही नाही । याकै तौ यह विनयमिथ्यात्व प्रगट है । ऐसेँ जानना । ऐसेँ सम्यक्तके सन्मुख मिथ्यादृष्टीनिका कथन किया । प्रसंग पाय अन्य भी कथन किया है । या प्रकार जैनमत-वाले मिथ्यादृष्टीनिका स्वरूप निरूपण किया । यहां नानाप्रकार मिथ्यादृष्टीनिका कथन किया है, ताका प्रयोजन यह जानना, जो इन प्रकारनिकों पहचानि आपविषै ऐसा दोष होय, तौ ताकों दूरिकरि सम्यक्श्रद्धानी होना । औरनिहीकै ऐसे दोष देखि कषायी न होना । जातैं अपना भला बुरा तौ अपने परिणामनितैं हो है । औरनिकों रुचिवान् देखै, तो कलु उपदेश देय तिनका भी भला करै । जातैं अपने परिणाम सुधारनेका उपाय करना योग्य है । सर्वप्रकारके मिथ्यात्वभाव छोड़ि सम्यग्दृष्टी होना योग्य है । जातैं संसारका मूल मिथ्यात्व है । मिथ्यात्व समान अन्य पाप नाही है । एक मिथ्यात्व अर ताकै साथ अनंतानुबंधीका अभाव भए इकतालीस प्रकृतिनिका तौ बंध ही मिट जाय । स्थिति अन्तःकोटाकोटी सागरकी रह जाय । अनुभाग थोरा ही रह जाय । शीघ्र ही मोक्षपदकों पावै । बहुरि मिथ्यात्वका सद्भाव

रहें अन्य अनेक उपाय किए भी मोक्ष न होय । तातैं जिस तिस उपायकरि सर्व प्रकार मिथ्यात्वका नाश करना योग्य है ।

इति मोक्षमार्गप्रकाशकनाम शास्त्रविषै जैनमतवाले मिथ्या-दृष्टीनिका निरूपण जामें ऐसा सातवाँ अधिकार संपूर्ण भया ॥ ७ ॥

अथ मिथ्यादृष्टी जीवनिकौ मोक्षमार्गका उपदेश देय तिनका उपकार करना यह ही उत्तम उपकार है । तीर्थकर गणधरादिक भी ऐसा ही उपाय करै हैं । तातैं इस शास्त्रविषै भी उनहीका उपदेशकै अनुसारि उपदेश दीजिए है । तहां उपदेशका स्वरूप जाननेकै अर्थ किछू व्याख्यान कीजिए है । जातैं उपदेशकौ यथावत् न पहिचानै, तौ अन्यथा मानि विपरीत प्रवर्तै, तातैं उपदेशका स्वरूप कहिए है—

जिनमतविषै उपदेश च्यारअनुयोगका दिया है । सो प्रथमानुयोग करणानुयोग चरणानुयोग द्रव्यानुयोग ए च्यार अनुयोग हैं । तहां तीर्थकर चक्रवर्त्ती आदि महान् पुरुषनिके चरित्र जिसविषै निरूपण किए होंय, सो प्रथमानुयोग है । बहुरि गुणस्थान मार्गणादिकरूप जीवका वा कर्मनिका वा त्रिलोकादिका जाविषै निरूपण होय, सो करणानुयोग है । बहुरि गृहस्थ मुनिके धर्म आचरण करनेका जाविषै निरूपण होय, सो चरणानुयोग है । बहुरि षट् द्रव्य सप्त तत्त्वादिकका वा स्वपरभेद विज्ञानादिकका जाविषै निरूपण होय, सो द्रव्यानुयोग है । अब इनका प्रयोजन कहिये है—

प्रथमानुयोगविषै तौ संसारकी विचित्रता, पुण्य पापका फल,

महंतपुरुषनिकी प्रवृत्ति इत्यादि निरूपणकरि जीवनिक्कौ धर्मविषै लगाए हैं । जे जीव तुच्छबुद्धि होंय, ते भी तिसकरि धर्मसन्मुख हो हैं । जातैं वै जीव सूक्ष्मनिरूपणकौ पहिचानैं नाहीं । लौकिक वार्तानिकौ जानैं । तहां तिनका उपयोग लागै । बहुरि प्रथमानु-योगविषै लौकिक प्रवृत्तिरूप निरूपण होय, ताकौं ते नीकैं समझि जांय । बहुरि लोकविषै तौ राजादिककी कथानिविषै पापका वा पुण्यका पोषण है, तहां महंत पुरुष राजादिक तिनकी कथा सुनै हैं । परंतु प्रयोजन जहां तहां पापकौं छांड़ि धर्मविषै लगावनेका प्रगट कहै हैं । तातैं ते जीव कथानिके लालचकरि तौ तिनकौं वाचैं सुनैं, पीछैं पापकौं बुरा धर्मकौं भला जानि धर्मविषै रुचिवंत हो हं । ऐसैं तुच्छ बुद्धीनिके समझावनेकौं यह अनुयोगतैं 'प्रथम' कहिए 'अव्युत्पन्न मिथ्यादृष्टी' तिनके अर्थ जो अनुयोग सो प्रथमानुयोग है । ऐसा अर्थ गोमट्टसारकी टीकाविषै किया है । बहुरि जिन जीवनिक्कै तत्त्वज्ञान भया होय, पीछैं इस प्रथमानुयो-गकौं बाचैं सुनैं, तौ तिनकौं यह तिनका उदाहरणरूप भासै है । जैसैं जीव अनादिनिधन है, शरीरादिक संयोगी पदार्थ हैं, ऐसैं यह जानै था । बहुरि पुराणविषै जीवनिक्के भवांतर निरूपण किए, ते तिस जाननेके उदाहरण भए । बहुरि शुभ अशुभ शुद्धोपयोगकौं जानै था, वा तिनके फलकौं जानै था । बहुरि पुराणनिविषै तिन उपयोगनिकी प्रवृत्ति अर तिनका फल जीवनिक्कै भया, सो निरूपण किया । सो ही तिस जाननेका उदाहरण भया । ऐसैं ही अन्य जानना । यहां उदाहरणका अर्थ यह जो जैसैं जानै था, तैसैं ही कोई जीवकै अवस्था भई, तातैं तिस



जाननेकी साखि भई । बहुरि जैसें कोई सुभट है, सो सुभटनिकी प्रशंसा अर कायरनिकी निंदा जाविषै होय, ऐसी कोई पुराण पुरुषनिकी कथा सुननेकरि सुभटपनाविषै अति उत्साहवान् हो है, तैसे धर्मात्मा है, सो धर्मीनिकी प्रशंसा अर पापीनिकी निंदा जाविषै होय, ऐसे कोई पुराणपुरुषनिकी कथा सुननेकरि अति-उत्साहवान् हो है । ऐसें यह प्रथमानुयोगका प्रयोजन जानना ।

बहुरि करणानुयोगविषै जीवनिकी वा कर्मनिकी विशेषता वा त्रिलोकादिककी रचना निरूपणकरि जीवनिकौ धर्मविषै लगाए हैं । जे जीव धर्मविषै उपयोग लगाया चाहैं, ते जीवनिका गुणस्थान मार्गणा आदि विशेष अर कर्मनिका कारण अवस्था फल कौन कौनकैं कैसें कैसें पाइए, इत्यादि विशेष अर त्रिलोक-विषै नरक स्वर्गादिकके ठिकाने पहचानि पापतैं विमुख होय धर्मविषै लागै हैं । बहुरि ऐसे विचारविषै उपयोग रमि जाय, तब पापप्रवृत्ति छूटि स्वयमेव तत्काल धर्म उपजै है । तिस अभ्यासकरि तत्त्वज्ञानकी प्राप्ति हो है । बहुरि ऐसा सूक्ष्म यथार्थ कथन जिनमतविषै ही है, अन्यत्र नाहीं, ऐसें महिमा जानि जिनमतका श्रद्धानी हो है । बहुरि जे जीव तत्त्वज्ञानी होय इस करणानुयोगकौ अभ्यासै हैं, तिनकौ यह तिसका विशेषणरूप भासै है । जो जीवादिक तत्त्व आप जानै है, तिनहीके विशेष करणानुयोगविषै किए हैं । तहां केई विशेषण तौ यथावत् निश्चयरूप हैं, केई उपचार लिए व्यवहाररूप हैं । केई द्रव्य क्षेत्र काल भावादिकका स्वरूप प्रमाणादिरूप हैं, केई निमित्त आश्रयादि अपेक्षा लिए हैं । इत्यादि अनेक प्रकारके विशेषण निरूपण किए हैं,

तिनकों जैसाका तैसा मानता, तिस करणानुयोगकों अभ्यासै है । इस अभ्यासतैं तत्त्वज्ञान निर्मल हो है । जैसें कोऊ यह तौ जानै था, यह रत्न है । परंतु उस रत्नके विशेष घने जाने निर्मल रत्नका पारखी होय, तैसं तत्त्वनिकों जानै था, ए जीवादिक हैं, परंतु तिन तत्त्वनिके घने विशेष जानै, तौ निर्मल तत्त्वज्ञान होय । तत्त्वज्ञान निर्मल भए आप ही विशेष धर्मात्मा हो है । बहुरि अन्य ठिकाने उपयोगकों लगाईए, तौ रागादिककी वृद्धि होय, छद्मस्थका एकाग्र निरंतर उपयोग रहै नाहीं । तातैं ज्ञानी इस कारणानुयोगका अभ्यासविषै उपयोगकौ लगावैं हैं । तिसकरि केवलज्ञानकरि देखे पदार्थनिका जानपना याकै हो है । प्रत्यक्ष अप्रत्यक्षहीका भेद है । भासनेविषै विरुद्ध है नाहीं । ऐसैं यह करणानुयोगका प्रयोजन जानना । 'करण' कहिए गणितकार्यकों कारण 'सूत्र' तिनका जाविषै 'अनुयोग' अधिकार होय, सो करणानुयोग है । इसविषै गणितवर्णनकी मुख्यता है, ऐसा जानना ।

बहुरि चरणानुयोगविषै नानःप्रकार धर्मके साधन निरूपणकरि जीवनिकों धर्मविषै लगाईए है । जे जीव हित अहितकों जानै नाहीं, हिंसादि कषाय कार्यनिविषै तत्पर होय रहे हैं, तिनकों जैसें वै पापकार्यनिकों छोड़ि धर्मकार्यविषै लागैं, तेसैं उपदेश दिया । ताकों जिनधर्म आचरण करनेकों सन्मुख भए, ते जीव गृहस्थधर्मका विधान सुनि आपतैं जैसा धर्म सधै, तैसा धर्म-साधनविषै लागैं हैं । ऐसैं साधनतैं कषाय मंद हो है । ताके फलतैं इतना तौ हो है, जो कुगतिविषै दुख न पावै अर सुगति-

विषै सुख पावै । बहुरि ऐसे साधनतैं जिनमतका निमित्त बन्या रहै । तहां तत्त्वज्ञानकी प्राप्ति होनी होय, तौ होय जावै । बहुरि जीवतत्त्वके ज्ञानी होयकरि चरणानुयोगकों अभ्यासै हैं, तिनकों ए सर्व आचरण अपने वीतरागभावके अनुसारी भासै हैं । एकोदेश वा सर्वदेश वीतरागता भए ऐसी श्रावकदशा ऐसी मुनिदशा हो है । जातैं इनकै निमित्त नैमित्तिकपनो पाईए है । ऐसैं जानि श्रावक मुनिधर्मके विशेष पहचानि जैसा अपना वीतरागभाव भया होय, तैसा अपने योग्य धर्मकों साधै है । तहां जेता अंशां वीतरागता हो है, ताकों कार्यकारी जानै है, जेता अंशां राग रहै है, ताकों हेय जानै है । संपूर्ण वीतरागताकों परमधर्म मानै है । ऐसैं चरणानुयोगका प्रयोजन है ।

बहुरि द्रव्यानुयोगविषै द्रव्यनिका वा तत्त्वनिका निरूपणकरि जीवनिकों धर्मविषै लगाईए है । जे जीवादिक द्रव्यनिकों पहिचानैं नाहीं, आपा परकों भिन्न जानैं नाहीं, तिनकों हेतु दृष्टांत युक्ति-करि वा प्रमाणनयादिककरि तिनका स्वरूप ऐसैं दिखाया, जैसैं याकै प्रतीति होय जाय । ताके अभ्यासतैं अनादि अज्ञानतादूरि होय, अन्यमत कल्पित तत्त्वादिक झूठ भासैं, तब जिनमतकी प्रतीति होय । अर उनके भावका अभ्यास राखै, तौ शीघ्र ही तत्त्वज्ञानकी प्राप्ति होय जाय । बहुरि जिनकै तत्त्वज्ञान भया होय, ते जीव द्रव्यानुयोगकों अभ्यासैं । तिनकों अपने श्रद्धानके अनुसारि सो सर्व कथन प्रतिभासै है । जैसैं काहनै किसी विद्याकों सीख लई । परंतु जो ताका अभ्यास किया करै तौ वह यादि रहै, न करै तौ भूलि जाय । तैसं याकै तत्त्वज्ञान भया,

परंतु जो द्रव्यानुयोगका अभ्यास किया करै, तौ वह तत्त्वज्ञान रहै, न करै तौ भूलि जाय । अथवा संक्षेपपनै तत्त्वज्ञान भया था, सो नानायुक्ति हेतु दृष्टांतादिककरि स्पष्ट होय जाय, तौ तिसविषै शिथिलता न होय सकै । बहुरि इस अभ्यासतै रागादि घटनेतै शीघ्र मोक्ष सधै । ऐसै द्रव्यानुयोगका प्रयोजन जानना ।

अब इन अनुयोगनिविषै किस प्रकार व्याख्यान है, सो कहिए है—

प्रथमानुयोगविषै जे मूलकथा हैं, ते तौ जैसी हैं तैसी ही निरूपित हैं । अर तिनविषै प्रसंग पाय व्याख्यान हो है, सो कोई तौ जैसाका तैसा हो है, कोई ग्रंथकर्ताका विचारकै अनुसार होय, परंतु प्रयोजन अन्यथा न हो है ।

ताका उदाहरण—जैसै तीर्थकर देवनिके कल्याणकनिविषै इंद्र आया, यह कथा तौ सत्य है । बहुरि इंद्र स्तुति करी, ताका व्याख्यान किया, सो इंद्र तौ और ही प्रकार स्तुति कीनी थी, अर यहां ग्रंथकर्ता और ही प्रकार स्तुति कीनी लिखी । परंतु स्तुतिरूप प्रयोजन अन्यथा न भया । बहुरि परस्पर किनिहूकै वचनालाप भया । तहां उनके और प्रकार अक्षर निकसे थे, यहां ग्रंथकर्ता अन्य प्रकार कहे । परंतु प्रयोजन एक ही दिखावै है । बहुरि नगर वन संग्रामादिकका नामादिक तौ यथावत् ही लिखै, अर वर्णन हीनाधिक भी प्रयोजनकौ पोषता निरूपै है । इत्यादि ऐसै ही जानना । बहुरि प्रसंगरूप कथा भी ग्रंथकर्ता अपना विचार अनुसार कहै । जैसै धर्मपरीक्षाविषै मूर्खनिकी कथा लिखी, सो ए ही कथा मनोवेग कही थी, ऐसा नियम नाहीं ।

परंतु मूर्खपनाकों ही पोषती कोई वार्त्ता कही, ऐसा अभिप्राय पोषै है । ऐसैं ही अन्यत्र जानना । यहां कोऊ कहै—अयथार्थ कहना तौ जैन शास्त्रनिविषै संभवै नाहीं । ताका उत्तर—

अन्यथा तौ वाका नाम है, जो प्रयोजन औरका और प्रगट करै । जैसैं काहूकों कछ्वा—तू ऐसैं कहियौ, वानैं वै ही अक्षर तौ न कहे, परंतु तिसही प्रयोजन लिए कछ्वा । ताकों मिथ्यावादी न कहिए । ऐसैं जानना—जो जैसाका तैसा लिखनेकी संप्रदाय होय, तौ काहूनै बहुत प्रकार वैराग्य चिंतवन किया था, ताका वर्णन सब लिखे ग्रंथ बधि जाय, अर किछू न लिखै, तौ भाव भासै नाहीं । तातैं वैराग्यकै ठिकानैं थोरा बहुत अपना विचारकै अनुसार वैराग्य पोषता ही कथन करै, सराग पोषता न करै । तहां प्रयोजन अन्यथा न भया, तातैं याकों अयथार्थ न कहिए । ऐसैं ही अन्यत्र जानना । बहुरि प्रथमानुयोगविषै जाकी मुख्यता होय, ताकों ही पोषै है । जैसैं काहूनै उपवास किया, ताका तौ फल स्तोक था बहुरि वाकै अन्यधर्म परिणतिकी विशेषता भई, तातैं विशेष उच्चपदकी प्राप्ति भई । तहां तिसकों उपवासहीका फल निरूपण करैं । ऐसैं ही अन्यत्र जानना । बहुरि जैसैं काहूनै शीलहीकी प्रतिज्ञा दृढ़ राखी, वा नमस्कार मंत्र स्मरण किया, वा अन्यधर्म साधन किया, ताकै कष्ट दूरि भए अतिशय प्रगट भए, तहां तिनहीका तैसा फल न भया अर अन्य कोई कर्म उदयतैं वैसे कार्य भए तौ भी तिनकों तिन शीलदिकका ही फल निरूपण करै । ऐसैं ही कोई पापकार्य किया, ताकै तिसहीका तौ तैसा फल न भया अर अन्य कर्म

उदयतै नीचगतिकौ प्राप्त भया, वा कष्टादिक भए, ताकौ तिस ही पापका फल निरूपण करै । इत्यादि ऐसैं ही जानना । यहां कोऊ कहै—ऐसा झूठा फल दिखावना तौ योग्य नहीं । ऐसे कथनकौ प्रमाण कैसें कीजिए । ताका समाधान—

जे अज्ञानी जीव बहुत फल दिखाए विना धर्मविषै न लागैं, वा पापतैं न डरैं, तिनका भला करनेकै अर्थ ऐसैं वर्णन करिए है । बहुरि झूठ तौ तब होय, जब धर्मका फलकौ पापका फल बतावैं, पापका फलकौ धर्मका फल बतावैं । सो तौ है नहीं । जैसें दश पुरुष मिलि कोई कार्य करैं, तहां उपचारकरि एक पुरुष भी किया कहिए, तौ दोष नहीं । अथवा जाके पितादिकनैं कोई कार्य किया होय, ताकौ एक जाति अपेक्षा उपचारकरि पुत्रादिक किया कहिए, तौ दोष नहीं । तैसें बहुत शुभ वा अशुभकार्यनिका फल भया, ताकौ उपचारकरि एक शुभ वा अशुभकार्यका फल कहिए, तौ दोष नहीं । अथवा और शुभ वा अशुभकार्यका फल भया होय, ताकौ एकजाति अपेक्षा उपचारकरि कोई और ही शुभ वा अशुभकार्यका फल कहिए, तौ दोष नहीं । उपदेशविषै कहीं व्यवहार वर्णन है, कहीं निश्चय वर्णन है । यहां उपचाररूप व्यवहार वर्णन किया है, ऐसैं याकौ प्रमाण कीजिए है । याकौ तारतम्य न मानि लेना । तारतम्य करणानुयोगविषै निरूपण किया है, सो जानना । बहुरि प्रथमानुयोगविषै उपचाररूप कोई धर्मका अंग भए संपूर्ण धर्म भया कहिए है । जैसें जीवनिकै शंका कांक्षादिक न भए, तिनकै सम्यक्त भया कहिए । सो एक कोई कार्यविषै शंका कांक्षा न किए ही तौ सम्यक्त न होय,

सम्यक्त तौ तत्त्वश्रद्धान भए हो है । परंतु निश्चय सम्यक्तका तौ व्यवहारविषै उपचार किया, बहुरि व्यवहार सम्यक्तका कोई एक अंगविषै संपूर्ण व्यवहार सम्यक्तका उपचार किया, ऐसैं उपचारकरि सम्यक्त भया कहिए । बहुरि कोई जैनशास्त्रका एक अंग जाने सम्यग्ज्ञान भया कहिए है, सो संशयादिरहित तत्त्वज्ञान भए सम्यग्ज्ञान होय, परंतु पूर्ववत् उपचारकरि कहिए । बहुरि कोई भला आचरण भए सम्यक्चारित्र भया कहिए है । तहां जानैं जैनधर्म अंगीकार किया होय, वा कोई छोटी मोटी प्रतिज्ञा गृही होय, ताकौं श्रावक कहिए, सो श्रावक तौ पंचमगुणस्थानवर्ती भए हो हैं । परंतु पूर्ववत् उपचारकरि याकौं श्रावक कह्या है । उत्तरपुराणविषै श्रेणिककौं श्रावकोत्तम कह्या, सो वह तौ असंयत था । परंतु जैनी था, तातैं कह्या । ऐसैं ही अन्यत्र जानना । बहुरि जो सम्यक्तरहित मुनिलिंग धारै, वा कोई द्रव्यां भी अतीचार लगावता होय, ताकौं मुनि कहिए । सो मुनि तौ षष्ठादि गुणस्थानवर्ती भए हो है । परंतु पूर्ववत् उपचारकरि मुनि कह्या है । समवसरणसभाविषै मुनिनिकी संख्या कही, तहां सर्व ही भावलिंगी मुनि न थे, परंतु मुनिलिंग धारनेतैं सबनिकौं मुनि कहे । ऐसैं ही सर्वत्र जानना । बहुरि प्रथमानुयोगविषै कोई धर्मबुद्धितैं अनुचित कार्य करै, ताकी भी प्रशंसा करिए है । जैसैं विष्णुकुमार मुनिनिका उपसर्ग दूरि किया, सो धर्मानुरागतैं किया, परंतु मुनिपद छोड़ि यह कार्य करना योग्य न था । जातैं ऐसा कार्य तौ गृहस्थधर्मविषै संभवै अर गृहस्थधर्मतैं मुनिधर्म ऊंचा है । सो ऊंचा धर्मकौं छोड़ि नीचा धर्म अंगीकार किया, सो अयोग्य है ।

परंतु वात्सल्य अंगकी प्रधानताकरि विष्णुकुमारजीकी प्रशंसाकरि इस छलकरि औरनिकों ऊंचा धर्म छोड़ि नीचा धर्म अंगीकार करना योग्य नहीं । बहुरि जैसे गुवालियानें मुनिकों अग्निकरि तपाया, सो करुणातैं यह कार्य किया । परंतु आया उपसर्गकों तौ दूर करें सहजअवस्थाविषै जो शीतादिककी परीषह होय है, तिसकों दूर भए रति मान लेनेका कारण हो है, सो तिनैं रति करनी नहीं, तातैं उलटा उपसर्ग होय । यातैं विवेकी तिनकै उपचार करते नहीं । गुवालिया अविवेकी था, करुणाकरि यह कार्य किया, तातैं वाकी प्रशंसा करी । औरकों धर्मपद्धतिविषै जो विरुद्ध होय, सो कार्य करना योग्य नहीं । बहुरि जैसे वज्रकरण राजा सिंहोदर राजाकों नम्या नहीं, मुद्रिकाविषै प्रतिमा राखी, सो बड़े बड़े सम्यग्दृष्टी राजादिककों नमैं, याका दोष नहीं, अर मुद्रिकाविषै प्रतिमा राखनेमें अविनय होय, यथावत् विधितैं ऐसी प्रतिमा न होय, तातैं इस कार्यविषै दोष है । परंतु वाकै ऐसा ज्ञान न था, धर्मानुरागतैं मैं औरकों नमों नहीं, ऐसी बुद्धि भई, तातैं वाकी प्रशंसा करी । इस छलकरि औरनिकों ऐसे कार्य करने युक्त नहीं । बहुरि केई पुरुषोंनैं पुत्रादिककी प्राप्तिकै अर्थ वा रोग कष्टादि दूर करनेके अर्थ चैत्यालय पूजनादि कार्य किए, नमस्कार मंत्र स्मरण किया । सो ऐसैं किए तौ निकांक्षित गुणका अभाव होय निदानबंधनामा आर्तध्यान होय । पापहीका प्रयोजन अंतरंगविषै है, तातैं पापहीका बंध होय । परंतु मोहित होयकरि भी बहुत पापबंधका कारण कुदेवादिकका तौ पूजनादि न किया, इतना गुण ग्रहणकरि वाकी प्रशंसा करिए



है। इस छलकरि औरनिकौं लौकिक कार्यनिके अर्थ धर्मसाधन करना युक्त नाहीं। ऐसैं ही अन्यत्र जानना। ऐसैं ही प्रथमानुयोग-विषै अन्य कथन भी होय, ताकौं यथासंभव जानि भ्रमरूप न होना।

अब करणानुयोगविषै किस प्रकार व्याख्यान है, सो कहिए है—जैसैं केवलज्ञानकरि जान्या तैसैं करणानुयोगविषै व्याख्यान है। बहुरि केवलज्ञानकरि तौ बहुत जान्या, परंतु जीवकौं कार्यकारी जीव कर्मादिकका वा त्रिलोकादिकका ही याविषै निरूपण हो है। बहुरि तिनका भी स्वरूप सर्व निरूपण न होय सकै, तातैं वचनगोचर होय छद्मस्थके ज्ञानविषै उनका किछू भाव भासै, तैसैं संकोचन करि निरूपण करिए है।

यहां उदाहरण—जीवके भावनिकी अपेक्षा गुणस्थानक कहे, ते भाव अनंतस्वरूप लिए वचनगोचर नाहीं। तहां बहुत भावनिकी एक जातिकरि चौदह गुणस्थान कहे। बहुरि जीव जाननेके अनेक प्रकार हैं। तहां मुख्य चौदह मार्गणाका निरूपण किया। बहुरि कर्मपरमाणू अनंतप्रकार शक्तियुक्त हैं, तिनविषै बहुतनिकी एक जाति करि आठ वा एकसौ अड़तालीस प्रकृति कहीं। बहुरि त्रिलोकविषै अनेक रचना हैं, तहां मुख्य केतीक रचना निरूपण करिए है। बहुरि प्रमाणके अनंत भेद तहां संख्यातादि तीन भेद वा इनके इकईस भेद निरूपण किए, ऐसैं ही अन्यत्र जानना। बहुरि करणानुयोगविषै यद्यपि वस्तुके द्रव्य क्षेत्र काल भावादिक अखंडित हैं, तथापि छद्मस्थकौं हीनाधिक ज्ञान होनेके अर्थ प्रदेश समय अविभागप्रतिच्छेदादिककी कल्पनाकरि

तिनका प्रमाण निरूपिए है । बहुरि एक वस्तुविषै जुदे जुदे गुणनिका वा पर्यायनिका भेदकरि निरूपण कीजिए है । बहुरि जीव पुद्गलादिक यद्यपि भिन्न भिन्न हैं, तथापि संबन्धादिककरि वा द्रव्यकरि निपज्या गति जाति आदि भेद तिनकौं एक जीवके निरूपे हैं, इत्यादि व्यवहार नयकी प्रधानता लिए व्याख्यान जानना । जातैं व्यवहारविना विशेष जानि सकै नाही । बहुरि कहीं निश्चयवर्णन भी पाईए है । जैसे जीवादिक द्रव्यनिका प्रमाण निरूपण किया, सो जुदे जुदे इतने ही द्रव्य हैं । सो यथासंभव जानि लेना । बहुरि करणानुयोगविषै कथन हैं, ते केई तो छद्मस्थकै प्रत्यक्ष अनुमानादिगोचर होंय, बहुरि जे न होंय तिनकौं आज्ञा प्रमाणकरि ही मानने । जैसे जीव पुद्गलके स्थूल बहुतकालस्थायी मनुष्यादि पर्याय वा घटादि पर्याय निरूपण किए, तिनका तौ प्रत्यक्ष अनुमानादि होय सकै, बहुरि समय समयप्रति सूक्ष्म परिणमन अपेक्षा ज्ञानादिकके वा स्निग्ध सूक्ष्मादिकके अंश निरूपण किए, ते आज्ञाहीतैं प्रमाण हो हैं । ऐसे ही अन्यत्र जानना । बहुरि करणानुयोगविषै छद्मस्थनिकी प्रवृत्तिकै अनुसार वर्णन नाही । केवलज्ञानगम्य पदार्थनिका निरूपण है । जैसे केई जीव तौ द्रव्यादिकका विचार करै हैं, वा व्रतादिक पालै हैं, परंतु अंतरंग सम्यक्त चारित्रशक्ति नाही, तातैं उनकौं मिथ्यादृष्टि, अब्रती कहिए है । बहुरि केई जीव द्रव्यादिकका वा व्रतादिकका विचार रहित हैं, अन्य कार्यनिविषै प्रवर्तैं हैं, वा निद्रादिकरि निर्विचार होय रहे हैं, परंतु उनके सम्यक्तादि शक्तिका सद्भाव है, तातैं उनकौं सम्यक्ती वा व्रती कहिए है । बहुरि कोई जीवकै

कषायनिकी प्रवृत्ति तौ घनी है, अर वाकै अंतरंग कषायशक्ति थोरी है, तौ वाकौ मंदकषाई कहिए है । अर कोई जीवकै कषायनिकी प्रवृत्ति तौ थोरी है, अर वाकै अंतरंग कषायशक्ति घनी है, तौ वाकौ तीव्रकषायी कहिए है । जैसे व्यंतरादिक देव कषायनितै नगरनाशादि कार्य करै, तौ भी तिनकै थोरी कषाय-शक्तितै पीतलेश्या कही । बहुरि एकेंद्रियादि जीव कषायकार्य करते दीखै नाहीं, तिनकै घनीशक्तितै कृष्णादि लेश्या कहीं । बहुरि सर्वार्थसिद्धिके देव कषायरूप थोरे प्रवर्त्तै, तिनकै बहुत कषायशक्तितै असंयम कखा, अर पंचम गुणस्थानी व्यापार अब्रह्मादि कषायकार्यरूप बहुत प्रवर्त्तै, ताकै मंदकषायशक्तितै देशसंयम कखा । ऐसे ही अन्यत्र जानना । बहुरि कोई जीवकै मन वचन कायकी चेष्टा थोरी होती दीसै, तौ भी कर्माकर्षण शक्तिकी अपेक्षा बहुत योग कखा । काहूकै चेष्टा बहुत दीखै, तौ भी शक्तिकी हीनतातै स्तोकयोग कखा । जैसे केवली गमनादि-क्रियारहित भया, तहां भी ताकै योग बहुत कखा । वेंद्रियादिक जीव गमनादि करै हैं, तौ भी तिनकै योग स्तोक कहे, ऐसे ही अन्यत्र जानना । बहुरि कहीं जाकी व्यक्त तौ किछू न भासै, तौ भी सूक्ष्मशक्तिके सद्भावतै ताका तहां अस्तित्व कखा । जैसे मुनिकै अब्रह्मकार्य किछू नाहीं, तौ भी नवम गुणस्थानपर्यंत मैथुनसंज्ञा कही । अहमिंद्रनिकै दुखका कारण व्यक्त नाहीं, तौ भी कदाचित् असाताका उदय कखा । नारकीनिकै सुखका कारण व्यक्त नाहीं, तौ भी कदाचित् साताका उदय कखा । ऐसे ही अन्यत्र जानना । बहुरि करणानुयोग सम्यग्दर्शन ज्ञान चारित्रादिक

धर्मका निरूपण कर्मप्रकृतीनिका उपशमादिककी अपेक्षा लिए सूक्ष्मशक्ति जैसें पाईए तैसें गुणस्थानादिविषै निरूपण करै है, वा सम्यग्दर्शनादिकके विषयभूत जीवादिक तिनका भी निरूपण सूक्ष्मभेदादि लिए करै है। यहां कोई करणानुयोगके अनुसारि आप उद्यम करै, तौ होय सकै नाहीं। करणानुयोगविषै तौ यथार्थ पदार्थ जनावनेका मुख्य प्रयोजन है। आचरण करावनेकी मुख्यता नाहीं। तातैं यह तौ चरणानुयोगके अनुसारि प्रवर्तै, तिसतैं जो कार्य होना होय सो स्वयमेव हीं हो है। जैसें आप कर्मनिका उपशमादि किया चाहै, तौ कैसें होय। आप तौ तत्त्वादिकका निश्चय करनेका उद्यम करै, तातैं स्वयमेव हीं उपशमादिक सम्यक्त होय। ऐसें ही अन्यत्र जानना। एक अंतर्मुहूर्त्तविषै ग्यारवां गुणस्थानसौं पड़ि क्रमतैं मिथ्यादृष्टी होय बहुरि चट्टिकरि केवलज्ञान उपजावै। सो ऐसें सम्यक्तादिकके सूक्ष्मभाव बुद्धिगोचर आवते नाहीं, तातैं करणानुयोगके अनुसारि जैसाका तैसा जानि तो ले, अर प्रवृत्ति बुद्धिगोचर जैसें भला होय, तैसें करै। बहुरि करणानुयोगविषै भी कहीं उपदेशकी मुख्यता लिए व्याख्यान हो है, ताकौं सर्वथा तैसें ही न मानना। जैसें हिंसादिकका उपायकौं कुमतिज्ञान कह्या, अन्य मतादिकके शास्त्राभ्यासकौं कुश्रुतज्ञान कह्या, बुरा दीसै भला न दीसै ताकौं विभंगज्ञान कह्या। सो इनकौं छोड़नेके अर्थ उपदेशकरि ऐसें कह्या। तारतम्यतैं मिथ्यादृष्टीके सर्व ही ज्ञान कुज्ञान हैं, सम्यग्दृष्टीके सर्व ही ज्ञान सुज्ञान हैं। ऐसें ही अन्यत्र जानना। बहुरि कहीं स्थूलकथन किया होय, ताकौं तारतम्यरूप न जानना। जैसें

व्यासतैं तिगुणी परिधि कहिए, सूक्ष्मपनैं किछू अधिक तिगुणी हो है । ऐसैं ही अन्यत्र जानना । बहुरि कहीं मुख्यताकी अपेक्षा व्याख्यान होय, ताकौं सर्व प्रकार न जानना । जैसैं मिथ्यादृष्टी सासादन गुणस्थानवालोंकौं पापजीव कहे, असंयतादिक गुणस्थानवालोंकौं पुण्यजीव कहे, सो मुख्यपनैं ऐसैं कहे, तारतम्यतैं दोऊनिकै पाप पुण्य यथासंभव पाईए है । ऐसैं ही अन्यत्र जानना । ऐसैं ही और भी नाना प्रकार पाईए है, ते यथासंभव जानने । ऐसैं करणानुयोगविषै व्याख्यानका विधान दिखाया ।

अब चरणानुयोगविषै किस प्रकार व्याख्यान है, सो दिखाईए है—

चरणानुयोगविषै जैसैं जीवनिकै अपनी बुद्धिगोचर धर्मका आचरण होय, सो उपदेश दिया है । तहां धर्म तौ निश्चयरूप मोक्षमार्ग है, सोई है । ताकै साधनादिक उपचारतैं धर्म है, सो व्यवहारनयकी प्रधानताकरि नाना प्रकार उपचारधर्मके भेदादिकका याविषै निरूपण करिए है । जातैं निश्चय धर्मविषै तौ किछू ग्रहण त्यागका विकल्प नाहीं अर याकै नीचली अवस्थाविषै विकल्प छूटता नाहीं, तातैं इस जीवकौं धर्मविरोधी कार्यानिक्कौं छुड़ावनेका धर्मसाधनादि कार्यानिके ग्रहण करावनेका उपदेश याविषै है । सो उपदेश दोय प्रकार करिए है । एक तौ व्यवहारहीका उपदेश दीजिए है, एक निश्चयसहित व्यवहारका उपदेश दीजिए है । तहां जिन जीवनिकै निश्चयका ज्ञान नाहीं है, वा उपदेश दिए भी होता न दीसै, ऐसे मिथ्यादृष्टी जीव किछू धर्मकौं सन्मुख भए तिनकौं व्यवहारहीका उपदेश दीजिए

है । बहुरि जिन जीवनिकै निश्चय व्यवहारका ज्ञान है, वा उपदेश दिए तिनका ज्ञान होता दीसै है, ऐसे सम्यग्दृष्टी जीव वा सम्यक्तकौ सन्मुख मिथ्यादृष्टी जीव तिनकौं निश्चयसहित व्यवहारका उपदेश दीजिए है । जातैं श्रीगुरु सर्व जीवनिके उपकारी हैं । सो असंज्ञी जीव तौ उपदेश ग्रहणे योग्य नाहीं, तिनका तौ उपकार इतना ही किया और जीवनिकौं तिनकी दयाका उपदेश दिया । बहुरि जे जीव कर्मप्रबलतातैं निश्चयमार्गकौं प्राप्त होय सकैं नाहीं, तिनका इतना ही उपकार किया, जो उनकौं व्यवहार धर्मका उपदेश देय कुगतिके दुःखनिका कारण पापकार्य लुड़ाय सुगतिके इंद्रियनिके सुखका कारण पुण्यकार्य तिसविषै लगाया । जेता दुख मिथ्या, तेता ही उपकार भया । बहुरि पापीकै तौ पापवासना ही रहै, अर कुगतिविषै जाय तहां धर्मका निमित्त नाहीं । तातैं परंपराय दुखहीकौं पावौ करै । अर पुण्यवानकै धर्मवासना रहै अर सुगति विषै जाय, तहां धर्मके निमित्त पाईए, तातैं परंपराय सुखकौं पावै । अथवा कर्मशक्ति हीन होय जाय, तौ मोक्षमार्गकौं भी प्राप्त होय जाय । तातैं व्यवहार उपदेशकरि पापतैं लुड़ाय पुण्यकार्यनिविषै लगाईए है । बहुरि जे जीव मोक्षमार्गकौं प्राप्त भए वा प्राप्त होने योग्य हैं, तिनका ऐसा उपकार किया जो उनकौं निश्चयसहित व्यवहारका उपदेश देय मोक्षमार्गविषै प्रवर्ताए । श्रीगुरु तौ सर्वका ऐसा ही उपकार करैं । परंतु जिन जीवनिका ऐसा उपकार न बनै, तौ श्रीगुरु कहा करैं । जैसा बन्या तैसा ही उपकार किया । तातैं दोय प्रकार उपदेश दीजिए है । तहां व्यवहारविषै तो बाह्य क्रियानिहीकी

प्रधानता हैं। तिनका तौ उपदेशतैं जीव पापक्रिया छोड़ि पुण्य-  
 क्रियानिविषै प्रवर्तै। तहां क्रियानिकै अनुसार परिणाम भी  
 तीव्रकषाय छोड़ि किछू मंदकषायी होय जांय। सो मुख्यपनैं तौ  
 ऐसैं है। बहुरि काहूके न होय, तौ मति होहु। श्रीगुरु तौ  
 परिणाम सुधारनेके अर्थ बाह्यक्रियानिकौ उपदेशै हैं। बहुरि  
 निश्चयसहित व्यवहारका उपदेशविषै परिणामनिहीकी प्रधानता  
 है। ताका उपदेशतैं तत्त्वज्ञानका अभ्यासकरि वा वैराग्यभावनाकरि  
 परिणाम सुधरै, तहां परिणामकै अनुसारि बाह्यक्रिया भी सुधरि  
 जाय। परिणाम सुधरें बाह्यक्रिया भी सुधरै ही सुधरै। तातैं  
 श्रीगुरु परिणाम सुधारनेकौ मुख्य उपदेशै हैं। ऐसैं दोय प्रकार  
 उपदेशविषै व्यवहारहीका उपदेश होय। तहां सम्यग्दर्शनके अर्थ  
 अरहंत देव, निर्ग्रथ गुरु, दया धर्मकौ ही मानना। बहुरि जीवादिक  
 तत्त्वनिका व्यवहारस्वरूप कछा है, ताका श्रद्धान करना, शंकादि  
 पच्चीस दोष न लगावने, निःशंकितादिक अंग अथवा संवेगादिक  
 गुण पालने, इत्यादिक उपदेश दीजिए है। बहुरि सम्यग्ज्ञानके  
 अर्थ जिनमतके शास्त्रनिका अभ्यास करना, अर्थ व्यंजनादि  
 अंगनिका साधन करना, इत्यादि उपदेश दीजिए है। बहुरि  
 सम्यक्चारित्रकै अर्थ एकोदेश सर्वोदेश हिंसादि पापनिका त्याग  
 करना, व्रतादि अंगनिकौ पालने इत्यादि उपदेश दीजिए है।  
 बहुरि कोई जीवकौ विशेष धर्मका साधन न होता जानि, एक  
 आखड़ी आदिकका ही उपदेश दीजिए है। जैसे भीलकौ कागलाका  
 मांस छुड़ाया, गुवालियाकौ नमस्कार मंत्र जपनेका उपदेश दिया,  
 गृहस्थकौ चैत्यालय पूजा प्रभावनादि कार्यका उपदेश दिया,

इत्यादि जैसा जीव होय, ताकाँ तैसा उपदेश दीजिए है । बहुरि जहां निश्चयसहित व्यवहारका उपदेश होय, तहां सम्यग्दर्शनके अर्थ यथार्थ तत्त्वनिका श्रद्धान कराईए है । तिनका जो निश्चय स्वरूप है, सो भूतार्थ है । व्यवहारस्वरूप है, सो उपचार है । ऐसा श्रद्धान लिए वा स्वरका भेदविज्ञानकरि परद्रव्यविषै रागादि छोड़नेका प्रयोजन लिए तिन तत्त्वनिका श्रद्धान करनेका उपदेश दीजिए है । ऐसे श्रद्धानतैं अरहंतादिविना अन्य देवादिक झूठ भासैं, तब स्वयमेव तिनका मानना झूटै है, ताका भी निरूपण करिए है । बहुरि सम्यग्ज्ञानके अर्थ संशयादिरहित तिनही तत्त्वनिका तैसैं ही जाननेका उपदेश दीजिए है, तिस जाननेकाँ कारण जिनशास्त्रनिकाँ अभ्यास है । तातैं तिस प्रयोजनके अर्थ जिनशास्त्रनिका भी अभ्यास स्वयमेव हो है, ताका निरूपण करिए है । बहुरि सम्यक्चारित्रके अर्थ रागादि दूरि करनेका उपदेश दीजिए है । तहां एकदेश वा सर्वदेश तीव्ररागादिकका अभाव भए तिनके निमित्ततैं होतीं जे एकदेश सर्वदेश पापक्रिया, तातैं झूटै है । बहुरि मंदरागतैं श्रावकमुनिनिकै व्रतनिका प्रवृत्ति हो है । बहुरि मंदरागादिकनिका भी अभाव भए शुद्धोपयोगकी प्रवृत्ति हो है, ताका निरूपण करिए है । बहुरि यथार्थ श्रद्धान लिए सम्यग्दृष्टीनिकै जैसैं यथार्थ कोई आखड़ी हो है, वा भक्ति हो है, वा पूजा प्रभावनादि कार्य हो है, वा ध्यानादिक हो है, तिनका उपदेश दीजिए है । जैसा जिनमतविषै सांचा परंपराय मार्ग है, तैसा उपदेश दीजिए है । ऐसैं दोय प्रकार उपदेश चरणानुयोगविषै जानना ।



बहुरि चरणानुयोगविषै तीव्रकषायनिका कार्य छुड़ाय मंद-  
 कषायरूप कार्य करनेका उपदेश दीजिए है । यद्यपि कषाय  
 करना बुरा ही है, तथापि सर्वकषाय न छूटते जानि जेता कषाय  
 घटै तितना ही भला होगा, ऐसा प्रयोजन तहां जानना । जैसे  
 जिनि जीवनिकै आरंभादि करनेकी वा मंदिरादि बनावनेकी वा  
 विषय सेवनेकी वा क्रोधादि करनेकी इच्छा सर्वथा दूर न  
 होती जानै, तिनकों पूजा प्रभावनादिक करनेका वा चैत्यालयादि  
 बनावनेका वा जिनदेवादिककै आगैं शोभादिक नृत्य गानादि-  
 करनेका वा धर्मात्मा पुरुषनिकी सहायादि करनेका उपदेश दीजिए  
 है । जातैं इनविषै परंपराय कषायनिका पोषण न हो है ।  
 पापकार्यनिविषै परंपराय कषायपोषणा हो है, तातैं पापकार्यनितैं  
 छुड़ाय इन कार्यनिविषै लगाईए है । बहुरि थोरा बहुत जेता  
 छूटता जानै, तितना पापकार्य छुड़ाय सम्यक्त वा अणुव्रतादि  
 पालनेका तिनकों उपदेश दीजिए है । बहुरि जिन जीवनिकै  
 सर्वथा आरंभादिककी इच्छा दूर भई, तिनकों पूर्वोक्त पूजनादिक  
 कार्य वा सर्व पापकार्य छुड़ाय महाव्रतादि कार्यनिका उपदेश  
 दीजिए है । बहुरि जिनकै किंचित् रागादिक छूटता न जानै,  
 तिनकों दया धर्मोपदेश प्रतिक्रमणादि कार्य करनेका उपदेश  
 दीजिए है । जहां सर्वराग दूर होय, तहां किछू करनेका कार्य  
 ही रखा नाही । तातैं तिनकों किछू उपदेश ही नाही । ऐसा  
 क्रम जानना ।

बहुरि चरणानुयोगविषै कषायी जीवनिकों कषाय उपजायकरि  
 भी पापकों छुड़ाईए है, अर धर्मविषै लगाईए है । जैसे पापका

फल नरकादिकके दुख दिखाय तिनकौं भय कषाय उपजाय पापकार्य छुड़ाईए है । बहुरि पुण्यका फल स्वर्गादिकके सुख दिखाय तिनकौं लोभकषाय उपजाय धर्मकार्यनिविषै लगाईए है । बहुरि यह जीव इंद्रियविषय शरीर पुत्र धनादिकके अनुरागतै पाप करै है, धर्म पराञ्छुख रहै है, तातै इंद्रियविषयनिकौं मरण कलेशादिकके कारण दिखावनेकरि तिनविषै अरतिकषाय कराईए है । शरीरादिककौं अशुचि दिखावनेकरि तहां जुगुप्साकषाय कराईए है, पुत्रादिककौं धनादिकके ग्राहक दिखाय तहां द्वेष कराईए है, बहुरि धनादिककौं मरण कलेशादिकका कारण दिखाय, तहां अनिष्ट बुद्धि कराईए है । इत्यादि उपायतै विषयादिविषै तीव्रराग दूरि होनेकरि तिनकै पापक्रिया छूटि धर्मविषै प्रवृत्ति हो है । बहुरि नामस्मरण स्तुतिकरण पूजा दान शीलादिकतै इस लोकविषै दरिद्रकष्ट दूरि हो है, पुत्र धनादिककी प्राप्ति हो है, ऐसैं निरूपणकरि तिनकै लोभ उपजाय तिन धर्म कार्यनिविषै लगाईए है । ऐसैं ही अन्य उदाहरण जाननै । यहां प्रश्न—जो कोई कषाय छुड़ाय कोई कषाय करावनेका प्रयोजन कहा ? ताका समाधान—

जैसैं रोग तौ शीतांग भी है अर ज्वर भी है । परंतु कोईकै शीतांगतै मरण होता जानै, तहां वैद्य है सो वाकै ज्वर होनेका उपाय करै । ज्वर भए पीछैं वाकै जीवनेकी आशा होय, तब पीछैं ज्वरके भी मेटनेका उपाय करै । तैसैं कषाय तौ सर्व ही हेय हैं, परंतु कोई जीवनि कषायनितै पापकार्य होता जानै, तहां श्रीगुरु हैं सो उनकै पुण्यकार्यकौं कारणभूत कषाय होनेका

उपाय करें, पीछें वाकै सांची धर्मबुद्धि जानै, तत्र पीछें तिस कषाय मेटनेका उपाय करें, ऐसा प्रयोजन जानना । बहुरि चरणा-न्योगविषै जैसे जीव पापकों छोड़ि धर्मविषै लगै, तैसें अभिप्राय लिये अनेक युक्तिकरि वर्णन करिए है । तहां लौकिक दृष्टान्त युक्तिकरि न्यायपद्धतिके द्वारा समझाइए है । बहुरि कहीं अन्यमतके भी उदाहरणादि दीजिए है । जैसे सूक्तमुक्तावली-विषै लक्ष्मीकों कमलवासिनी कही, वा समुद्रविषै विष और लक्ष्मी उपजै हैं, तिस अपेक्षा विषकी भगिनी कही । ऐसें ही अन्यत्र कहिए है । तहां कोई उदाहरण झूठे हू हैं, परन्तु सांच प्रयोजनकों पोषै हैं । तहां दोष नाही । यहां कोऊ कहै,—झूठका तौ दोष लागै है । ताका समाधान—जो झूठ है और सांचे प्रयोजनकों पोषै है, तौ उसको झूठ न कहिए है और जो सांचे भी हैं और झूठे प्रयोजनकों पोषै तो वह झूठ ही हैं । ऐसें अलंकारयुक्त नामादिकविषै वचन अपेक्षा झूठ सांच नाही, प्रयोजन अपेक्षा झूठ सांच है । जैसें तुच्छशोभासहित नगरीकों इंद्रपुरीकै समान कहिए है, सो झूठ है । परंतु शोभाका प्रयोजनकों पोषै है, तातैं झूठ नाही । बहुरि “इस नगरीविषै छत्रहीकै दंड है अन्यत्र नाही” ऐसा कब्हा, सो झूठ है । अन्यत्र भी दंड देना पाईए है, परंतु तहां अन्यायवान् थोरे हैं न्यायवानकों दंड न दीजिए है, ऐसा प्रयोजनकों पोषै है, तातैं झूठ नाही । बहुरि बृहस्पतिका नाम ‘सुरगुरु’ लिखैं वा मंगलका नाम ‘कुज’ लिखैं, सो ऐसे नाम अन्यमत अपेक्षा हैं । इनका अक्षरार्थ है, सो झूठा है । परंतु वह नाम तिस पदार्थकों प्रगट

करै है, तातैं झूठा नहीं । ऐसैं अन्य मतादिकके उदाहरणादि दीजिये है, सो झूठ हैं, परंतु उदाहरणादिकका तौ श्रद्धान करावना है नहीं, श्रद्धान तौ प्रयोजनका करावना है, सो प्रयोजन सांचा है, दोष है नहीं । बहुरि चरणानुयोगविषै छद्मस्थकी बुद्धिगोचर स्थूलपनाकी अपेक्षा लोकप्रवृत्तिकी मुख्यता लिए उपदेश दीजिए है । बहुरि केवलज्ञानगोचर सूक्ष्मपनाकी अपेक्षा न दीजिए है । जातैं तिसका आचरण न होय सकै है । और यहां आचरण करावनेका प्रयोजन है । जैसे अणुव्रतीकै त्रसहिंसाका त्याग कइया, अर वाकै स्त्रीसेवनादि कार्यविषै त्रसहिंसा हो है । यह भी जानै है—जिनवानी विषै यहां त्रस कहे हैं । परंतु याकै त्रस मारनेका अभिप्राय नहीं, अर लोकविषै जाका नाम त्रसघात है, ताकौं करै नहीं । तातैं तिस अपेक्षा वाकै त्रसहिंसाका त्याग है । बहुरि मुनिकै स्थावरहिंसाका भी त्याग कइया, सो मुनि पृथ्वी जलादिविषै गमनादि करै हैं, तहां सर्वथा त्रसका भी अभाव नहीं । जातैं त्रसजीवकी भी अवगाहना ऐसी छोटी हो है, जो दृष्टिगोचर न होवै । अर तिनकी स्थिति पृथ्वी जलादि विषै ही है, सो मुनि जिनवानीतैं जानै हैं, वा कदाचित् अवधि ज्ञानादिकरि भी जानै हैं । परंतु याकै प्रमादतैं स्थावर त्रसहिंसाका अभिप्राय नहीं । बहुरि लोकविषै भूमि खोदना अप्रासुक जलतैं क्रिया करनी इत्यादि प्रवृत्तिका नाम स्थावरहिंसा है, अर स्थूल त्रसनिके पीड़नेका नाम त्रसहिंसा है, ताकौं न करै । तातैं मुनिकै सर्वथा हिंसाका त्याग कहिए है । बहुरि ऐसैं ही अनृत स्तेय अब्रह्म परिग्रहका त्याग कइया । अर केवलज्ञानका

जाननेकी अपेक्षा असत्यवचनयोग वारवां गुणस्थान पर्यंत कक्षा । अदत्त कर्मपरमाणु आदि परद्रव्यका ग्रहण तेरवां गुणस्थान पर्यंत है । वेदका उदय नवमगुणस्थानपर्यंत है । अंतरंगपरिग्रह दशमगुणस्थानपर्यंत है । बाह्यपरिग्रह समवसरणादि केवलीकै भी हो हैं । परंतु प्रमादतैं पापरूप अभिप्राय नाहीं, अर लोकप्रवृत्तिविषै तिन क्रियानिकरि यह झूठ बोलै है, चोरी करै है, कुशील सेवै है, परिग्रह राखै है, ऐसा नाम पावै, वै क्रिया इनकै हैं नाहीं । तातैं अनृतादिकका इनकै त्याग कहिए है । बहुरि जैसें मुनिके मूलगुणनिविषै पंचइंद्रियनिके विषयका त्याग कक्षा । सो जानना इंद्रियनिका मिटै नाहीं, अर विषयनिविषै रागद्वेष सर्वथा दूर भया होय, तौ यथाख्यात-चारित्र होय जाय, सो भया नाहीं । परंतु स्थूलपनैं विषयइच्छाका अभाव भया अर बाह्य विषय सामग्री मिलावनेकी प्रवृत्ति दूर भई, तातैं याकै इंद्रियविषयका त्याग कक्षा । ऐसैं ही अन्यत्र जानना । बहुरि व्रती जीव त्याग वा आचरण करै है, सो चरणानुयोगकी पद्धति अनुसारि वा लोकप्रवृत्तिकै अनुसारि करै है । जैसें काहनैं ब्रसहिंसाका त्याग किया है, तहां चरणानुयोगविषै वा लोकविषै जाकौं ब्रसहिंसा कहिए है, ताका त्याग किया, केवलज्ञानकरि जो ब्रस देखिए है, तिनिका त्याग बने नाहीं । तहां ब्रसहिंसाका त्याग किया, तिसरूप मनका विकल्प न करना मनकरि त्याग है, वचन न बोलना सो वचनकरि त्याग है, कायकरि न प्रवर्तना, सो कायकरि त्याग है । ऐसैं अन्य त्याग वा ग्रहण हो है, सो ऐसी पद्धति लिए ही हो है, ऐसा जानना ।

यहां प्रश्न—जो करणानुयोगविषै केवलज्ञान अपेक्षा तारतम्य कथन है, तहां छठे गुणस्थानवालेकै सर्वथा बारह अविरतिनिका अभाव कह्या, सो कैसेँ कह्या । ताका उत्तर—

अविरति भी योगकषायविषै गर्भित थे, परंतु तहां भी चरणानुयोग अपेक्षा त्यागका अभाव तिसहीका नाम अविरति कह्या है । तातैं तहां तिनका अभाव है । मनअविरतिका अभाव कह्या, सो मुनिकैं मनके विकल्प हो हैं, परंतु स्वेच्छाचारी मनका पापरूप प्रवृत्तिका अभावतैं मनअविरतिका अभाव कह्या, ऐसा जानना । बहुरि चरणानुयोगविषै व्यवहार लोकप्रवृत्ति अपेक्षा ही नामादिक कहिए है । जैसेँ सम्यक्तीकाँ पात्र कह्या, मिथ्यातीकाँ अपात्र कह्या । सो यहां जाकैं जिनदेवादिकका श्रद्धान पाईए, सो तौ सम्यक्ती, जाकैं तिनका श्रद्धान नाहीं, सो मिथ्याती जानना । जातैं दान देना चरणानुयोगविषै कह्या है, सो चरणानुयोगहीकी अपेक्षा सम्यक्त मिथ्यात्व ग्रहण करिए है । करणानुयोग अपेक्षा सम्यक्त मिथ्यात्व ग्रहें वो ही जीव ग्यारवैं गुणस्थान अर वो ही अंतर्मुहूर्त्तमें पहिले गुणस्थान आवै, तहां दातार पात्र अपात्रका कैसेँ निर्णय करि सकै । बहुरि द्रव्यानुयोग अपेक्षा सम्यक्त मिथ्यात्व ग्रहें मुनि संघविषै द्रव्यलिगी भी हैं, भावलिगी भी हैं । सो प्रथम तौ तिनका ठीक होना कठिन है । जातैं बाह्यप्रवृत्ति समान है । अर जो कदाचित् सम्यक्तीकाँ कोई चिह्नकरि ठीक पड़ै अर वह बाकी भक्ति न करै, तब औरनिकै संशय होय, जो याकी भक्ति क्यौँ न करी । ऐसेँ वाका मिथ्या-दृष्टीपना प्रगट होय, तब संघविषै विरोध उपजै । तातैं यहां

व्यवहार सम्यक्त मिथ्यात्वकी अपेक्षा कथन जाननैं । यहां कोई प्रश्न करै—सम्यक्ती तौ द्रव्यलिंगीकौ आपतैं हीनगुणयुक्त मानै है, ताकी भक्ति कैसैं करै । ताका समाधान—

व्यवहारधर्मका साधन द्रव्यलिंगीकै बहुत है अर भक्ति करनी सो भी व्यवहार ही है । तातैं जैसें कोई धनवान् होय, परंतु जो कुलविषै बड़ा होय ताकौं कुल अपेक्षा बड़ा जानि ताका सत्कार करै, तैसें आप सम्यक्तगुणसहित है, परंतु जो व्यवहारधर्मविषै प्रधान होय, ताकौं व्यवहारधर्म अपेक्षा गुणाधिक मानि ताकी भक्ति करै है । ऐसा जानना । बहुरि ऐसें ही जो जीव बहुत उपवासादि करै, ताकौं तपस्वी कहिए है । यद्यपि जो कोई ध्यान अध्ययनादि विशेष करै है, सो उत्कृष्ट तपस्वी है । तथापि चरणानुयोगविषै बाह्यतपहीकी प्रधानता है । तातैं तिसहीकौं तपस्वी कहिए है । याही प्रकार अन्य नामादिक जाननैं । ऐसें ही अन्य अनेक प्रकार लिए चरणानुयोगविषै व्याख्यानका विधान जानना ।

अब द्रव्यानुयोगविषै कहिए है—

जीवनिकै जीवादि द्रव्यनिका यथार्थ श्रद्धान जैसें होय, तैसें विशेष युक्ति हेतु दृष्टान्तादिकका यहां निरूपण कीजिए है । जातैं याविषै यथार्थ श्रद्धान करावनेका प्रयोजन है । तहां यद्यपि जीवादि वस्तु अभेद हैं, तथापि तिनविषै भेदकल्पनाकरि व्यवहारतैं द्रव्य गुण पर्यायादिकका भेद निरूपण कीजिए है । सो भी युक्त है । बहुरि प्रतीति अनावनेकै अर्थ अनेक युक्तिकरि उपदेश दीजिए है, अथवा प्रमाणनयकरि उपदेश दीजिए है,

बहुरि वस्तुका अनुमान प्रत्यभिज्ञानादिक करनेकौं हेतु दृष्टांतादिक दीजिए है । ऐसैं तहां वस्तुकी प्रतीति करावनेका उपदेश दीजिए है । बहुरि यहां मोक्षमार्गका श्रद्धान करावनेकै अर्थ जीवादि तत्त्वनिका विशेष युक्ति दृष्टांतादिकरि निरूपण कीजिए है । तहां स्वपरभेदविज्ञानादिक जैसैं होय, तैसैं जीव अजीवका निर्णय कीजिए है । बहुरि वीतरागभाव जैसैं होय, तैसैं आस्रवादिकका स्वरूप दिखाईए है । बहुरि तहां मुख्यपनैं ज्ञान वैराग्यकौं कारण आत्मानुभवनादिक ताकी महिमा गाईए है । बहुरि द्रव्यानुयोगविषै निश्चय अध्यात्म उपदेशकी प्रधानता होय, तहां व्यवहार-धर्मका भी निषेध कीजिए है । जे जीव आत्मानुभवनके उपायकौं न करै हैं, अर बाह्य क्रियाकांडविषै मग्न हैं, तिनकौं तहांतैं उदासकरि आत्मानुभवनादिविषै लगावनेकौं व्रत शील संयमादिकका हीनपना प्रगट कीजिए है । तहां ऐसा न जानि लेना, जो इनकौं छोड़ि पापविषै लगना । जातैं तिस उपदेशका प्रयोजन अशुभविषै लगावनेका नाहीं है । शुद्धोपयोगविषै लगावनेकौं शुभोपयोगका निषेध कीजिए है । यहां कोऊ कहै कि—अध्यात्म-शास्त्रनिविषै पुण्य पाप समान कहे हैं, तातैं शुद्धोपयोग होय तौ भला ही है, न होय तौ पुण्यविषै लगो वा पापविषै लगो । ताका उत्तर—

जैसैं शूद्रजातिअपेक्षा जाट चांडाल समान कहे, परंतु चांडालतैं जाट किछू उत्तम है । यह अस्पृश्य है, वह स्पृश्य है । तैसैं बंधकारण अपेक्षा पुण्य पाप समान हैं, परंतु पापतैं पुण्य किछू भला है । वह तीव्रकषायरूप है, यह मंदकषायरूप है । तातैं



पुण्य छोड़ि पापविषै लगना युक्त नाही, ऐसा जानना । बहुरि जे जीव जिनबिम्बभक्त्यादि कार्यनिविषै ही मग्न हैं, तिनकों आत्मश्रद्धानादि करावनेकों “देहविषै देव है, देहुराविषै नाही” इत्यादि उपदेश दीजिए है । तहां ऐसा न जानि लेना, जो भक्ति छुड़ाय भोजनादिकतैं आपकों सुखी करना । जातैं तिस उपदेशका प्रयोजन ऐसा नाही है । ऐसैं ही अन्य व्यवहारका निषेध तहां किया होय, ताकों जानि प्रमादी न होना । ऐसा जानना,—जे केवल व्यवहारविषै ही मग्न हैं, तिनकों निश्चयरुचि करावनेकै अर्थ व्यवहारकों हीन दिखाया है । बहुरि तिन ही शास्त्रनिविषै सम्यग्दृष्टीके विषय भोगादिककों बंधकारण न कह्या, निर्जराका कारण कह्या । सो यहां भोगनिका उपादेयपना न जानि लेना । तहां सम्यग्दृष्टीकी महिमा दिखावनेकों जे तीव्रबंधके कारण भोगादिक प्रसिद्ध थे, तिन भोगादिककों होतसतैं भी श्रद्धानशक्तिके बलतैं मंदबंध होने लगा, ताकों तौ गिन्या नाही अर तिसही बलतैं निर्जरा विशेष होने लगी, तातैं उपचारतैं भोगनिकों भी बंधका कारण न कह्या, निर्जराका कारण कह्या । विचार किए भोग निर्जराके कारण होय, तौ तिनकों छोड़ि सम्यग्दृष्टी मुनिपदका ग्रहण काहेकों करै । यहां इस कथनका इतना ही प्रयोजन है—देखो, सम्यक्तकी महिमा जाके बलतैं भोग भी अपने गुणकों न करि सकै हैं । या प्रकार और भी कथन होय, तौ ताका यथार्थपना जानि लेना । बहुरि द्रव्यानुयोगविषै भी चरणानुयोगवत् ग्रहण त्याग करावनेका प्रयोजन है । तातैं छद्मस्थके बुद्धिगोचर परिणामनिकी अपेक्षा ही तहां कथन

कीजिए है । इतना विशेष है, जो चरणानुयोगविषै तौ बाह्य-क्रियाकी मुख्यताकरि वर्णन करिए है, अर द्रव्यानुयोगविषै आत्म-परिणामनिकी मुख्यताकरि निरूपण कीजिए है—करणानुयोगवत् सूक्ष्मवर्णन न कीजिए है । ताके उदाहरण कहिए है—

उपयोगके शुभ अशुभ शुद्ध ऐसैं तीन भेद कहे । तहां धर्मानु-रागरूप परिणाम सो शुभोपयोग, पापानुराग वा द्वेषरूप परिणाम सो अशुभोपयोग, अर रागद्वेषरहित परिणाम सो शुद्धोपयोग, ऐसैं कह्या । सो इस छद्मस्थके परिणामनिकी अपेक्षा यह कथन है । करणानुयोगविषै कषायशक्ति गुणस्थानादिविषै संक्लेश विशुद्ध परिणाम निरूपण किया है, सो विवक्षा यहां नाहीं है । करणानुयोगविषै तौ रागादिरहित शुद्धोपयोग, यथाख्यातचारित्र भए होय, सो मोहका नाश भए स्वयमेव होगा । नीचली अवस्थावाला शुद्धोपयोग साधन कैसैं करै । अर द्रव्यानुयोगविषै शुद्धोपयोग करनेहीका मुख्य उपदेश है, तातैं यहां छद्मस्थ जिस कालविषै बुद्धिगोचर भक्ति आदि वा हिंसा आदि कार्यरूप परिणामनिकौ छुड़ाय आत्मानुभवनादि कार्यनिविषै प्रवचैं, तिस काल ताकौ शुद्धोपयोगी कहिए । यद्यपि यहां केवलज्ञानगोचर सूक्ष्म रागादिक हैं, तथापि ताकी विवक्षा यहां न कही, अपनी बुद्धि-गोचर रागादिक छोड़ि तिस अपेक्षा याकौ शुद्धोपयोगी कह्या है । ऐसैं ही स्वपरश्रद्धानादिक भए सम्यक्तादिक कहे, सो बुद्धिगोचर अपेक्षा निरूपण है । सूक्ष्म भावनिकी अपेक्षा गुणस्थानादिविषै सम्यक्तादिकका निरूपण करणानुयोगविषै पाईए है । ऐसैं ही अन्यत्र जानै । तातैं द्रव्यानुयोगके कथनकी करणानुयोगतैं विधि

मिलया चाहिए, सो कहीं तौ मिलै कहीं न मिलै । जैसे यथा-  
ख्यातचारित्र भए, तौ दोऊ अपेक्षा शुद्धोपयोग है, बहुरि नीचली  
दशाविषै द्रव्यानुयोग अपेक्षा तौ कदाचित् शुद्धोपयोग होय  
अर करणानुयोग अपेक्षा सदा काल कषायअंशके सद्भावतैं  
शुद्धोपयोग नाही । ऐसैं ही अन्य कथन जानि लेना । बहुरि  
द्रव्यानुयोगविषै परमतविषै कहे तत्त्वादिक तिनकौ असत्य दिखा-  
वनेकै अर्थ तिनका निषेध कीजिए है, तहां द्वेषबुद्धि न जाननी ।  
तिनकौ असत्य दिखाय सत्य श्रद्धान करावनेका प्रयोजन जानना ।  
ऐसैं ही और भी अनेक प्रकारकरि द्रव्यानुयोगविषै व्याख्यानका  
विधान किया है । या प्रकार च्यारौ अनुयोगके व्याख्यानका  
विधान कइया, सो कोई ग्रंथविषै एक अनुयोगकी, कोई विषै  
दोयकी, कोई विषै तीनकी, कोई विषै च्यारौकी प्रधानता लिए  
व्याख्यान हो है । सो जहां जैसा संभवै, तहां तैसा समझ लैना ।

अब इन अनुयोगनिविषै कैसी पद्धतिकी मुख्यता पाईए है,  
सो कहिए है—

प्रथमानुयोगविषै तौ अलंकारशास्त्रनिकी वा काव्यादि शास्त्र-  
निकी पद्धति मुख्य है । जातैं अलंकारादितैं मन रंजायमान  
होय । सूधी बात कहैं ऐसा उपयोग लागै नाही, जैसा अलं-  
कारादि युक्तिसहित कथनतैं उपयोग लागै । बहुरि परोक्ष  
बातकौ किछू अधिकताकरि निरूपण करिए, तौ वाका स्वरूप  
नीकैं भासै । बहुरि करणानुयोगविषै गणित आदि शास्त्रनिकी  
पद्धति मुख्य है । जातैं तहां द्रव्य क्षेत्र काल भावका प्रमाणादिक  
निरूपण कीजिए है । सो गणित ग्रंथनिकी आम्नायतैं ताका सुगम

जानपना हो है। बहुरि चरणानुयोगविषै सुभाषित नीतिशास्त्रनिकी पद्धति मुख्य है। जातैं यहां आचरण करावना है, सो लोक-प्रवृत्तिकै अनुसार नीतिमार्ग दिखाए वह आचरण करै। बहुरि द्रव्यानुयोगविषै न्यायशास्त्रनिकी पद्धति मुख्य है। जातैं यहां निर्णय करनेका प्रयोजन है अर न्यायशास्त्रनिविषै निर्णय करनेका मार्ग दिखाया है। ऐसैं इन अनुयोगनिविषै पद्धति मुख्य है। और भी अनेक पद्धति लिं व्याख्यान इनविषै पाईए है। यहां कोऊ कहै—अलंकार गणित नीति न्यायका तौ ज्ञान पंडितनिकै होय, तुच्छबुद्धि समझैं नाहीं, तातैं सूधा कथन क्यों न किया। ताका उत्तर—

शास्त्र है सो मुख्यपनैं पंडित अर चतुरनिके अभ्यास करने योग्य है। सो अलंकारादि आम्राय लिं कथन होय, तौ तिनका मन लागै। बहुरि जे तुच्छबुद्धि हैं, तिनका पंडित समझाय दें। अर जे न समझि सकैं, तौ तिनका मुखतैं सूधा ही कथन कहैं। परंतु ग्रंथनिमें सूधा कथन लिखें विशेषबुद्धि तिनका अभ्यासविषै न प्रवर्तैं। तातैं अलंकारादि आम्राय लिं कथन कीजिए है। ऐसैं इन च्यारि अनुयोगनिका निरूपण किया। बहुरि जिनमत-विषै घने शास्त्र तौ इन च्यारों अनुयोगनिविषै गर्भित हैं। बहुरि व्याकरण न्याय छंद कोषादिक शास्त्र वा वैद्यक ज्योतिष वा मंत्रादि शास्त्र भी जिनमतविषै पाईए है। तिनका कहा प्रयोजन है, सो सुनहु—

व्याकरण न्यायादिकका अभ्यास भए अनुयोगरूप शास्त्रनिका अभ्यास होय सकै है। तातैं व्याकरणादिक शास्त्र कहे हैं। कोऊ

कहै,—भाषारूप सूधा निरूपण करते तौ व्याकरणादिकका कहा प्रयोजन था । ताका उत्तर—

भाषा तौ अपभ्रंशरूप अशुद्ध वाणी है । देश देशविषै और और है । सो महंतपुरुष शास्त्रनिविषै ऐसी रचना कैसें करें । बहुरि व्याकरण न्यायादिककरि जैसा यथार्थ सूक्ष्म अर्थ निरूपण हो है, तैसा सूधी भाषाविषै होय सकै नाहीं । तातैं व्याकरणादि आम्नायकरि वर्णन किया है । सो अपनी बुद्धिअनुसार थोरा बहुत इनका अभ्यासकरि अनुयोगरूप प्रयोजनभूत शास्त्रनिका अभ्यास करना । बहुरि वैद्यकादि चमत्कारतैं जिनमतकी प्रभावना होय वा औषधादिकतैं उपकार भी बनै, अथवा जे जीव लौकिक कार्यविषै अनुरक्त हैं, ते वैद्यकादिक चमत्कारतैं जैनी होय पीछैं सांचा धर्म पाय अपना कल्याण करैं । इत्यादि प्रयोजन लिए वैद्यकादि शास्त्र कहे हैं । यहां इतना है—ए भी जिनशास्त्र हैं, ऐसा जानि इनका अभ्यासविषै बहुत लगना नाहीं । जो बहुत बुद्धितैं इनका सहज जानना होय, अर इनकाँ जाने आपकै रागादिक विकार बधते न जानै, तौ इनका भी जानना होहु । अनुयोग शास्त्रवत् ए शास्त्र बहुत कार्यकारी नाहीं । तातैं इनका अभ्यासका विशेष उद्यम करना युक्त नाहीं । यहां प्रश्न—जो ऐसे है, तौ गणधरादिक इनकी रचना काहेकाँ करी । ताका उत्तर—

पूर्वोक्त किंचित् प्रयोजन जानि इनकी रचना करी । जैसें बहुत धनवान् कदाचित् स्तोककार्यकारी वस्तुका भी संचय करै । बहुरि थोरा धनवान् उन वस्तुनिका संचय करै, तौ धन तौ तहां

लगि जाय, बहुतकार्यकारी वस्तुका संग्रह काहेतैं करै । तैसें बहुत बुद्धिमान् गणधरादिक कथंचित् स्तोककार्यकारी वैद्यकादि शास्त्रनिका भी संचय करैं । थोरा बुद्धिमान् उनका अभ्यासविषै लगै, तौ बुद्धि तौ तहां लगि जाय, अर उत्कृष्ट कार्यकारी शास्त्रनिका अभ्यास कैसें करै । बहुरि जैसें मंदरागी तौ पुराणादिविषै शृंगारादि निरूपण करै, तौ भी विकारी न होय । तीव्ररागी तैसें शृंगारादि निरूपै, तौ पाप ही बांधै । तैसें मंदरागी गणधरादिक हैं, ते वैद्यकादि शास्त्र निरूपैं, तौ भी विकारी न होंय, अर तीव्ररागी तिनका अभ्यासविषै लगि जाय, तौ रागादिक बधाय पापकर्मकौ बांधै । ऐसैं जानना । या प्रकार जैनमतके उपदेशका स्वरूप जानना ।

अब इनविषै दोषकल्पना कोई करै है, ताका निराकरण करिए है—

कोई जीव कहै है—प्रथमानुयोगविषै शृंगारादिकका वा संग्रामादिकका बहुत कथन करैं, तिनके निमित्तचैं रागादिक बधि जाय, तातैं ऐसा कथन न करना था । ऐसा कथन सुनना नाहीं । ताकौ कहिए है—कथा कहनी होय, तब तौ सर्व ही अवस्थाका कथन किया चाहिए । बहुरि जो अलंकारादिकरि बधाय कथन करै हैं, सो पंडितनिके वचन युक्ति लिएं ही निकसैं । अर जो तू कहैगा, संबंध मिलावनेकौ सामान्य कथन किया होता, बधायकरि कथन काहेकौ किया । ताका उत्तर—

जो परोक्षकथनकौ बधाय कहे विना वाका स्वरूप भासै नाहीं । बहुरि पहलैं तौ भोग संग्रामादि ऐसैं किए, पीछैं सर्वका

त्यागकरि मुनि भए, इत्यादि चमत्कार तब ही भासै, जब वधाय कथन कीजिए । बहुरि तू कहै है, ताके निमित्ततैं रागादिक बधि जांय, सो जैसें कोऊ चैत्यालय बनावै, सो वाका तौ प्रयोजन तहां धर्मकार्य करावनेका है । अर कोई पापी तहां पापकार्य करै, तौ चैत्यालय बनावनेवालाका तौ दोष नाही । तैसें श्रीगुरु पुराणादिविषै शृंगारादि वर्णन किए, तहां उनका प्रयोजन रागादि करावनेका तौ है नाही—धर्मविषै लगावनेका प्रयोजन है । अर कोई पापी धर्म न करै, अर रागादिक ही बधावै, तौ श्रीगुरुका कहा दोष है । बहुरि जो तू कहै—जो रागादिकका निमित्त होय, सो कथन ही न करना था । ताका उत्तर—

सरागी जीवनिका मन केवल वैराग्यकथनविषै लागै नाही, तातैं जैसें बालककौ पतासाकै आश्रय औषधि दीजिए, तैसें सरागीकौ भोगादिकथनकै आश्रय धर्मविषै रुचि कराईए है । बहुरि तू कहैगा—ऐसें है, तौ विरागी पुरुषनिकौ तौ ऐसे ग्रंथनिका अभ्यास करना युक्त नाही । ताका उत्तर—

जिनकै अंतरंगविषै रागभाव नाही, तिनकै शृंगारादि कथन सुनें रागादि उपजै ही नाही । यह जानै, ऐसें ही यहां कथन करनेकी पद्धति है । बहुरि तू कहैगा—जिनकै शृंगारादि कथन सुनें रागादि होय आवै, तिनकौ तौ वैसा कथन सुनना योग्य नाही । ताका उत्तर—

जहां धर्महीका तौ प्रयोजन अर जहां तहां धर्मकौ पोषै, ऐसे जैनपुराणादिक तिनविषै प्रसंग पाय शृंगारादिकका कथन किया, ताकौ सुने भी जो बहुत रागी भया, तौ वह अन्यत्र कहां विरागी

होगा, पुराण सुनना छोड़ि और कार्य भी ऐसा ही करैगा, जहां बहुत रागादि होय । तातैं वाकै भी पुराण सुनें थोरा बहुत धर्म-बुद्धि होय तौ होय और कार्यनितैं यह कार्य भला ही है । बहुरि कोई कहै—प्रथमानुयोगविषै अन्य जीवनिकी कहानी है, वातैं अपना कहा प्रयोजन सधै है । ताकाँ कहिए है—

जैसेँ कामीपुरुषनिकी कथा सुनें आपकै भी कामका प्रेम बधै है, तैसेँ धर्मात्मा पुरुषनिकी कथा सुनें आपकै धर्मकी प्रीति विशेष बधै है । तातैं प्रथमानुयोगका अभ्यास करना योग्य है । बहुरि केई जीव कहै हैं—करणानुयोगविषै गुणस्थान मार्गणादिकका वा कर्मप्रकृतिनिका कथन किया, वा त्रिलोकादिकका कथन किया, सो तिनकाँ जानि लिया 'यह ऐसेँ है' 'यह ऐसेँ हैं' यामें अपना कार्य कहा सिद्ध भया । कै तौ भक्ति करिए, कै व्रत दानादि करिए, कै आत्मानुभवन करिए, इनतैं अपना भला होय । ताकाँ कहिए है—

परमेश्वर तौ वीतराग हैं । भक्ति किएँ प्रसन्न होयकरि किछु करते नाहीं । भक्ति करतैं मंदकषाय हो है, ताका स्वयमेव उत्तम फल हो है । सो करणानुयोगकै अभ्यासविषै तिसतैं भी अधिक मंद कषाय होय सकै है, तातैं याका फल उत्तम हो है । बहुरि व्रतदानादिक तौ कषाय घटावनेके बाह्य निमित्तका साधन हैं, अर चरणानुयोगका अभ्यास किएँ तहां उपयोग लगी जाय, तब रागादिक दूरि होंय, सो यह अंतरंग निमित्तका साधन है । तातैं यह विशेष कार्यकारी है । व्रतादिक धारि अध्ययनादि कीजिए है । बहुरि आत्मानुभव सर्वोत्तम कार्य है । परंतु सामान्य



अनुभवविषै उपयोग थँभै नहीं, अर न थँभै तब अन्य विकल्प होय । तहां करणानुयोगका अभ्यास होय, तौ तिस विचारविषै उपयोगकौं लगावै । यह विचार वर्तमान भी रागादिक घटावै है । अर आगामी रागादिक घटावनेका कारण है । तातैं यहां उपयोग लगावना । जीव कर्मादिकके नाना प्रकार भेद जानैं, तिनविषै रागादिकरनेका प्रयोजन नहीं, तातैं रागादि बधै नहीं । वीतराग होनेका प्रयोजन जहां तहां प्रगट है, तातैं रागादि मिटावनेकौं कारण है । यहां कोऊ कहै—कोई तौ कथन ऐसा ही है, परंतु द्वीप समुद्रादिकके योजनादि निरूपे, तिनमें कहा सिद्धि है । ताका उत्तर—

तिनकौं जानैं किछू तिनविषै इष्ट अनिष्ट बुद्धि न होय, तातैं पूर्वोक्त सिद्धि हो है । बहुरि वह कहै है,—ऐसैं है, तौ जिसतैं किछू प्रयोजन नहीं, ऐसा पाषाणादिककौं भी जानैं तहां इष्ट अनिष्टपनो न मानिए है, सो भी कार्यकारी भया । ताका उत्तर—

सरागी जीव रागादि प्रयोजनविना काहूकौं जाननेका उद्यम न करै । जो स्वयमेव उनका जानना होय, तौ अंतरंग रागादिकका अभिप्रायके वशकरि तहांतैं उपयोगकौं छुड़ाया ही चाहै है । यहां उद्यमकरि द्वीप समुद्रादिककौं जानै है, तहां उपयोग लगावै है । सो रागादि घटें ऐसा कार्य होय । बहुरि पाषाणादिकविषै इस लोकका कोई प्रयोजन भासि जाय, तौ रागादिक होय आवैं । अर द्वीपादिकविषै इस लोकसम्बन्धी कार्य किछू नहीं । तातैं रागादिकका कारण नहीं । जो स्वर्गादिककी रचना

सुनि तहां राग होय, तौ परलोकसंबंधी होय । ताका कारण पुण्यकौं जानै, तब पाप छोड़ि पुण्यविषै प्रवर्तै । इतना ही नफा होय । बहुरि द्वीपादिकके जानें यथावत् रचना भासै, तब अन्यमतादिकका कछा झूठ भासै, सत्य श्रद्धानी होय । बहुरि यथावत् रचना जाननैकरि भ्रम मिटें उपयोगकी निर्मलता होय, तातैं यह अभ्यास कार्यकारी है । बहुरि केई कहै हैं—करणानुयोगविषै कठिनता घनी, तातैं ताका अभ्यासविषै खेद होय । ताकौं कहिए है—

जो वस्तु शीघ्र जाननेमें आवै, तहां उपयोग उलझै नाहीं, अर जानी वस्तुकौं वारंवार जाननेका उत्साह होय नाहीं, तब पापकार्यनिविषै उपयोग लगि जाय । तातैं अपनी बुद्धि अनुसार कठिनताकरि भी जाका अभ्यास होता जानै, ताका अभ्यास करना । अर जाका अभ्यास होय ही सकै नाहीं, ताका कैसें करै । बहुरि तू कहै है—खेद होय, सो प्रमादी रहनेमें तौ धर्म है नाहीं । प्रमादतैं सुखिया रहिए, तहां तौ पाप होय । तातैं धर्मकै अर्थ उद्यम करना ही युक्त है । या विचारि करणानुयोगका अभ्यास करना ।

बहुरि केई जीव कहै हैं—चरणानुयोगविषै बाह्य व्रतादि साधनका उपदेश है, सो इनतैं किछू सिद्धि नाहीं । अपने परिणाम निर्मल चाहिए, बाह्य चाहो जैसें प्रवर्त्ता । तातैं या उपदेश-तैं पराङ्मुख रहै हैं । तिनिकौं कहिए है—आत्मपरिणामनिकै और बाह्य प्रवृत्तिकै निमित्त नैमित्तिक सम्बन्ध है । क्योंकि छद्म-स्थकै क्रिया परिणामपूर्वक हो है । कदाचित् विना परिणाम हू

कोई क्रिया हो है, सो परवशतैं हो है । अपने उद्यमकरि कार्य करिए अर कहिए परिणाम इसरूप नाही है, सो यह भ्रम है । अथवा बाह्य पदार्थनिका आश्रय पाय परिणाम होय सकै हैं । तातैं परिणाम भेटनेकै अर्थ बाह्यवस्तुका निषेध करना समय-सारादिविषै कहा है । इस ही वास्तै रागादिभाव घटे बाह्य ऐसे अनुक्रमतैं श्रावक मुनिधर्म होय हैं । अथवा ऐसैं श्रावक मुनिधर्म अंगीकार किए पंचम षष्ठम गुणस्थाननिविषै रागादि घटावनेरूप परिणामनिकी प्राप्ति होय है । ऐसा निरूपण चरणानुयोगविषै किया । बहुरि जो बाह्य संयमतैं किछू सिद्धि न होय, तौ सर्वार्थ-सिद्धिके वासी देव सम्यग्दृष्टी बहुतज्ञानी तिनकै तौ चौथा गुणस्थान होय, अर गृहस्थ श्रावक मनुष्यकै पंचम गुणस्थान होय, सो कारण कहा । बहुरि तीर्थकरादिक गृहस्थपद छोड़ि काहेकौं संयम ग्रहैं । तातैं यह नियम है—बाह्य संयम साधनविना परिणाम निर्मल न होय सकै हैं । तातैं बाह्य साधनका विधान जाननेकौं चरणानुयोगका अभ्यास अवश्य किया चाहिए ।

बहुरि केई जीव कहैं हैं—जो द्रव्यानुयोगविषै व्रतसंयमादि व्यवहारधर्मका हीनपना प्रगट किया है । सम्यग्दृष्टीके विषय भोगादिककौं निर्जराका कारण कहा है । इत्यादि कथन सुनि जीव हैं, सो स्वच्छन्द होय पुण्य छोड़ि पापविषै प्रवचेंगे, तातैं इनका बाचना सुनना युक्त नाही । ताकौं कहिए है—जैसैं गर्दभ मिश्री खाएं मरै, तौ मनुष्य तौ मिश्री खाना न छोड़ै । तैसैं विपरीतबुद्धि अध्यात्मग्रंथ सुनि स्वच्छन्द होय, तौ विवेकी तौ अध्यात्मग्रंथनिका अभ्यास न छोड़ै । इतना करै—जाकौं स्वच्छंद

होता जानै, ताकौं जैसें वह स्वच्छन्द न होय, तैसें उपदेश दे ।  
 बहुरि अध्यात्मग्रंथनिविषै भी स्वच्छन्द होनेका जहां तहां निषेध  
 कीजिए है, तातैं जो नीकैं तिनकौं सुनै, सो तौ स्वच्छन्द होता  
 नाहीं । अर एक बात सुनि अपने अभिप्रायतैं कोऊ स्वच्छन्द होय,  
 तौ ग्रंथका तौ दोष है नाहीं, उस जीवहीका दोष है । बहुरि जो  
 झूठा दोषकी कल्पनाकरि अध्यात्मशास्त्रका बांचना सुनना निषेधि  
 तौ मोक्षमार्गका मूल उपदेश तौ तहां ही है । ताका निषेध किं  
 मोक्षमार्गका निषेध होय । जैसें मेघवर्षा भए बहुत जीवनि  
 कल्याण होय, अर काहूकै उलटा टोटा पड़ै तौ तिसकी मुख्य-  
 ताकरि मेघका तौ निषेध न करना । तैसें सभाविषै अध्यात्म  
 उपदेश भए बहुत जीवनिकौं मोक्षमार्गकी प्राप्ति होय अर काहूकै  
 उलटा पाप प्रवर्तै, तौ तिसकी मुख्यताकरि अध्यात्मशास्त्र-  
 निका तौ निषेध न करना । बहुरि अध्यात्मग्रंथनितैं कोऊ  
 स्वच्छंद होय, सो तौ पहलैं भी मिथ्यादृष्टी था, अब भी मिथ्या-  
 दृष्टी ही रखा । इतना ही टोटा पड़ै, जो सुगति न होय कुगति  
 होय । अर अध्यात्म उपदेश नहीं भए बहुत जीवनिकै मोक्षमा-  
 र्गकी प्राप्ति अभाव होय, सो यामैं घने जीवनिका घना बुरा  
 होय । तातैं अध्यात्म उपदेशका निषेध न करना । बहुरि कोऊ  
 कहै है—जो द्रव्यानुयोगरूप अध्यात्म उपदेश है, सो उत्कृष्ट  
 है । सो ऊंची दशाकौं प्राप्त होय, तिनकौ कार्यकारी है, नीचली  
 दशावालोको तौ व्रत संयमादिकका ही उपदेश देना योग्य है ।  
 ताकौं कहिए है—जिनमतविषै तौ यह परिपाटी हैं, जो पहलैं  
 सम्यक्त होय पीछैं व्रत होय । सो सम्यक्त स्वपरका श्रद्धान भए

होय, अर सो श्रद्धान द्रव्यानुयोगका अभ्यास किए होय । तातैं पहलैं द्रव्यानुयोगकै अनुसार श्रद्धानकरि सम्यग्दृष्टी होय, पीछैं चरणानुयोगकै अनुसार व्रतादिक धारि व्रती होय । ऐसैं मुख्यपनै तौ नीचली दशाविषै ही द्रव्यानुयोग कार्यकारी है, गौणपनै जाकौं मोक्षमार्गकी प्राप्ति होती न जानिए, ताकौं पहलैं कोई व्रतादिकका उपदेश दीजिए है । जातैं ऊंची दशावालौकौं अध्यात्म उपदेश अभ्यास योग्य है, ऐसा जानि नीचलीदशावालौकौं तहांतैं पराबुख होना योग्य नाहीं । बहुरि जो कहौगे, ऊंचा उपदेशका स्वरूप नीचली दशावालौकौं भासै नाहीं । ताका उत्तर—

और तौ अनेक प्रकार चतुराई जानैं अर यहां मूर्खपना प्रगट कीजिए, सो युक्त नाहीं । अभ्यास किए स्वरूप नीकें भासै है । अपनी बुद्धि अनुसार थोरा बहुत भासै, परंतु सर्वथा निरुद्यमी होनेकौं पोषिए, सो तौ जिनमार्गका द्वेषी होना है । बहुरि जो कहौगे, अवार काल निकृष्ट है, तातैं उत्कृष्ट अध्यात्मका उपदेशकी मुख्यता न करी । ताकौं कहिए है, अवार काल साक्षात् मोक्ष होनेकी अपेक्षा निकृष्ट है, आत्मानुभवनादिककरि सम्यक्तादिकका होना अवार मनै नाहीं । तातैं आत्मानुभवनादिककै अर्थ द्रव्यानुयोगका अवश्य अभ्यास करना । सोई षट्पाहुड़विषै ( मोक्षपाहुड़में ) कथा है—

अज्जवि तिरयणसुद्धा अप्पाज्जाऊण जंति सुरलोये ।

लोयंते देवत्तं तच्छ चुया णिब्बुदिं जंति ॥ ७७ ॥

याका अर्थ—अबहू त्रिकरणकरि शुद्ध जीव आत्माकौं

ध्यायकरि स्वर्गलोकविषै प्राप्त हो हैं, वा लोकांतिकविषै देवपणो पावै हैं । तहांतैं च्युत होय मोक्ष जाय हैं । तातैं इस कालविषै भी द्रव्यानुयोगका उपदेश मुख्य चाहिए । बहुरि कोई कहै है—  
द्रव्यानुयोगविषै अध्यात्मशास्त्र हैं, तहां स्वपरभेद विज्ञानादिकका उपदेश दिया, सो तौ कार्यकारी भी घना अर समझिमें भी शीघ्र आवै । परंतु द्रव्यगुणपर्यायादिकका वा अन्यमतके कहे तत्त्वा-  
दिकका निराकरणकरि कथन किया, सो तिनका अभ्यासतैं विकल्प विशेष होय । बहुत प्रयास किए जाननेमें आवैं । तातैं इनका अभ्यास न करना । तिनकौं कहिए है—

सामान्य जाननेतैं विशेष जानना बलवान् है । ज्यों ज्यों विशेष जानै त्यों त्यों वस्तुस्वभाव निर्मल भासै, श्रद्धान दृढ़ होय, रागादि घटै, तातैं तिस अभ्यासविषै प्रवर्तना योग्य है । ऐसैं च्याख्यों अनुयोगनिविषै दोषकल्पनाकरि अभ्यासतैं पराङ्मुख होना योग्य नाही ।

बहुरि व्याकरण न्यायादिक शास्त्र हैं, तिनका भी थोरा बहुत अभ्यास करना । जातैं इतका ज्ञानविना बड़े शास्त्रनिका अर्थ भासै नाही । बहुरि वस्तुका भी स्वरूप इनकी पद्धति जानें जैसा भासै, तैसा भाषादिककरि भासै नाही । तातैं परंपरा कार्यकारी जानि इनका भी अभ्यास करना । परंतु इनहीविषै फंसि न जाना । किछू इनका अभ्यासकरि प्रयोजनभूत शास्त्र-  
निका अभ्यासविषै प्रवर्तना । बहुरि वैद्यकादि शास्त्र हैं, तिनतैं मोक्षमार्गविषै किछू प्रयोजन ही नाही । तातैं कोई व्यवहार धर्मका अभिप्रायतैं विनाखेद इनका अभ्यास होय जाय, तौ उपकारादि

करना, पापरूप न प्रवर्तना । अर इनका अभ्यास न होय तौ मति होहु, बिगार किछू नाहीं । ऐसैं जिनमतके शास्त्र निर्दोष जानि तिनका उपदेश मानना ।

अब शास्त्रनिविषै अपेक्षादिककौं न जानें परस्पर विरोध भासै, ताका निराकरण कीजिए है । प्रथमादि अनुयोगनिकी आमना-यकै अनुसारि जहां जैसे कथन किया होय, तहां तैसें जानि लेना अर अनुयोगका कथनतैं अन्यथा जानि संदेह न करना । जैसे कहीं तौ निर्मल सम्यग्दृष्टीहीकै शंका कांक्षा विचिकित्साका अभाव कह्या, कहीं भयका आठवां गुणस्थान पर्यंत, लोभका दशमा पर्यंत, जुगुप्साका आठवां पर्यंत उदय कह्या । तहां विरुद्ध न जानना । श्रद्धानपूर्वक तीव्र शंकादिकका सम्यग्दृष्टीकै अभाव भया, अथवा मुख्यपनै सम्यग्दृष्टी शंकादि न करै, तिस अपेक्षा चरणानुयोगविषै शंकादिकका सम्यग्दृष्टीकै अभाव कह्या । बहुरि सूक्ष्मशक्ति अपेक्षा भयादिकका उदय अष्टमादि गुण-स्थान पर्यंत पाईए है । तातैं करणानुयोगविषै तहां पर्यंत तिनका सद्भाव कह्या । ऐसैं ही अन्यत्र जानना । पूवैं अनुयोग-निका उपदेशविधानविषै कैई उदाहरण कहे हैं, ते जानने, अथवा अपनी बुद्धितैं समझि लैने । बहुरि एक ही अनुयोगविषै विविक्षाके वशतैं अनेकरूप कथन करिए है । जैसे करणानु-योगविषै प्रमादनिका सप्तम गुणस्थानविषै अभाव कह्या, तहां कषाय प्रमादके भेद कहे । बहुरि तहां ही कषायादिकका सद्भाव दशमादि गुणस्थान पर्यंत कह्या, तहां विरुद्ध न जानना । जातैं यहां प्रमादनिविषै तौ जे शुभ अशुभ भावनिका अभि-

प्रायः लियं कषायादिकं ह्येयं, तिनका ग्रहणं है। सो सप्तम गुणस्थानविषै ऐसा अभिप्राय दूर भया, तातैं तिनका तहां अभाव कखा। बहुरि सूक्ष्मादिभावनिकी अपेक्षा तिनहीका दशमादि गुणस्थान पर्यंत सद्भाव कखा है। बहुरि चरणानुयोगविषै चोरी परस्त्री आदि सप्तव्यसनका त्याग प्रथम प्रतिमाविषै कखा, बहुरि तहां ही तिनका त्याग द्वितीय प्रतिमाविषै कखा। तहां विरुद्ध न जानना। जातैं सप्तव्यसनविषै तौ चोरी आदि कार्य ऐसैं ग्रहे हैं, जिनकरि दंडादिक पावै, लोकविषै अतिनिंदा होय ! बहुरि व्रतनिविषै चोरी आदि त्याग करनेयोग्य ऐसैं कहे हैं, जे गृहस्थधर्मविषै विरुद्ध ह्येयं, वा किंचित् लोकनिंघ ह्येयं। ऐसा अर्थ जानना। ऐसैं ही अन्यत्र जानना। बहुरि नाना भावनिकी सापेक्षतैं एक ही भावकौं अन्य अन्य प्रकार निरूपण कीजिए है। जैसैं कहीं तौ महाव्रतादिक चारित्रके भेद कहे, कहीं महाव्रतादि होतैं भी द्रव्यलिंगीकौं असंयमी कखा, तहां विरुद्ध न जानना। जातैं सम्यग्ज्ञान-सहित महाव्रतादिक तौ चारित्र है, अर अज्ञानपूर्वक व्रतादिक भएँ भी असंयमी ही है। बहुरि जैसैं पंच मिथ्यात्वनिविषै भी विनय कखा, अर बारह प्रकार तपनिविषै भी विनय कखा, तहां विरुद्ध न जानना। जातैं विनय करने योग्य न्हीं, तिनका भी विनयकरि धर्म मानना, सो तौ विनय मिथ्यात्व है अर धर्मपद्धतिकरि जे विनय करने योग्य हैं, तिनका यथायोग्य विनय करना, सो विनय तप है। बहुरि जैसैं कहीं तौ अभिमानकी निंदा करी, कहीं प्रशंसा करी, तहां विरुद्ध न जानना।



जातें मानकषायतैं आपकौं ऊंचा मनावनेकै अर्थ विनयादि न करै, सो अभिमान तौ निंघ ही है, अर निर्लोभपनातैं दीनता आदि न करै, सो अभिमान प्रशंसा योग्य है । बहुरि जैसे कहीं चतुराईकी निंदा करी, कहीं प्रशंसा करी, तहां विरुद्ध न जानना । जातैं मायाकषायतैं काहूका ठिगनेकै अर्थ चतुराई कीजिए, सो तौ निंघ ही है अर विवेक लिं यथासंभव कार्य करनेविषै जो चतुराई होय, सो श्लाघ्य ही है । ऐसैं ही अन्यत्र जानना । बहुरि एक ही भावकी कहीं तौ उसतैं उत्कृष्टभावकी अपेक्षाकरि निंदा करी होय, अर कहीं तिसतैं हीनभावकी अपेक्षाकरि प्रशंसा करी होय, तहां विरुद्ध न जानना । जैसे किसी शुभ-क्रियाकी जहां निंदा करी होय, तहां तौ तिसतैं ऊंची शुभ-क्रिया वा शुद्धभाव तिनकी अपेक्षा जाननी, अर जहां प्रशंसा करी होय, तहां तिसतैं नीची क्रिया वा अशुभक्रिया तिनकी अपेक्षा जाननी । ऐसैं ही अन्यत्र जानना । बहुरि ऐसैं ही काहू जीवकी ऊंचे जीवकी अपेक्षा निंदा करी होय, तहां सर्वथा निंदा न जाननी । काहूकी नीचे जीवकी अपेक्षा प्रशंसा करी होय, तौ सर्वथा प्रशंसा न जाननी । यथासंभव वाका गुण दोष जानि लैना । ऐसैं ही अन्य व्याख्यान जिस अपेक्षा लिं किया होय, तिस अपेक्षा वाका अर्थ समझना । बहुरि एक ही शब्दका कहीं तौ कोई अर्थ हो है, कहीं कोई अर्थ हो है, तहां प्रकरण पहचानि वाका संभवता अर्थ जानना । जैसे मोक्षमार्गविषै सम्यग्दर्शन कह्या । तहां दर्शन शब्दका अर्थ श्रद्धान है, अर उपयोगवर्णनविषै दर्शन शब्दका अर्थ सामान्य ग्रहण

मात्र है, अर इन्द्रियवर्णनविषै दर्शन शब्दका अर्थ नेत्रकरि देखने मात्र है । बहुरि जैसेँ सूक्ष्मवादरका अर्थ वस्तुनिका प्रमाणादिक कथनविषै छोटा प्रमाण लिणं होय, ताका नाम सूक्ष्म अर बड़ा प्रमाण लिणं होय, ताका नाम वादर, ऐसा अर्थ होय । अर पुद्गलस्कंधादिका कथनविषै इंद्रियगम्य न होय, सो सूक्ष्म, इंद्रियगम्य होय सो वादर, ऐसा अर्थ है । जीवादिकका कथनविषै ऋद्धि आदिका निमित्तविना स्वयमेव रुकै नाहीं, ताका नाम सूक्ष्म, रुकै ताका नाम वादर, ऐसा अर्थ है । वस्त्रादिकका कथनविषै महीनताका नाम सूक्ष्म, मोटाका नाम वादर, ऐसा अर्थ है । करणानुयोगके कथनविषै पुद्गलस्कंधके निमित्ततैं रुकै नाहीं, ताका नाम सूक्ष्म है अर रुक जाय ताका नाम वादर है । बहुरि प्रत्यक्ष शब्दका अर्थ लोकव्यवहारविषै तौ इंद्रियनिकरि जाननेका नाम प्रत्यक्ष है, प्रमाणभेदनिविषै स्पष्ट व्यवहार प्रतिभासका नाम प्रत्यक्ष है, आत्मानुभवनादिविषै आपविषै अवस्था होय, ताका नाम प्रत्यक्ष है । बहुरि जैसेँ मिथ्यादृष्टीकै अज्ञान कह्या, तहां सर्वथा ज्ञानका अभाव न जानना, सम्यग्ज्ञानके अभावतैं अज्ञान कह्या है । बहुरि जैसेँ उदीरणा शब्दका अर्थ जहां देवादिककै उदीरणा न कही, तहां तौ अन्य निमित्ततैं मरण होय, ताका नाम उदीरणा है । अर दश करणनिका कथनविषै उदीरणा करण देवायुकै भी कह्या । तहां तौ उपरिके निषेकनिका द्रव्य उदयावलीविषै दीजिए, ताका नाम उदीरणा है । ऐसेँ ही अन्यत्र यथासंभव अर्थ जानना । बहुरि एक ही शब्दका पूर्व शब्द जोड़ें अनेक प्रकार अर्थ हो है । वा उस ही शब्दके अनेक अर्थ हैं ।

तहां जैसा संभवै, तैसा अर्थ जानना । जैसे 'जीतै' ताका नाम 'जिन' है । परंतु धर्मपद्धतिविषै कर्मशत्रुकों जीतै, ताका नाम 'जिन' जानना । यहां कर्मशत्रु शब्दकों पूर्वे जोड़ें जो अर्थ होय, सो ग्रहण किया, अन्य न किया । बहुरि जैसे 'प्राण धारै' ताका नाम 'जीव' है । जहां जीवन मरणका व्यवहार अपेक्षा कथन होय, तहां तौ इंद्रियादि प्राण धारै, सो जीव है । बहुरि द्रव्यादिकका निश्चय अपेक्षा निरूपण होय, तहां चैतन्यप्राणकों धारै, सो जीव है । बहुरि जैसे समय शब्दके अनेक अर्थ हैं । तहां आत्माका नाम समय है, सर्व पदार्थनिका नाम समय है, कालका नाम समय है, समयमात्र कालका नाम समय है, शास्त्रका नाम समय है, मतका नाम समय है । ऐसे अनेक अर्थनिविषै जैसा जहां संभवै, तैसा तहां अर्थ जान लेना । बहुरि कहीं तौ अर्थ अपेक्षा नामादिक कहिए है, कहीं रूढ़िअपेक्षा नामादिक कहिए है । जहां रूढ़िअपेक्षा नाम लिख्या होय, तहां वाका शब्दार्थ न ग्रहण करना । वाका रूढ़िरूप अर्थ होय, सो ही ग्रहण करना । जैसे सम्यक्तादिककों धर्म कखा । तहां तौ यह जीवकों उत्तम-स्थानविषै धारै है, तातैं याका नाम सार्थक है । बहुरि धर्मद्रव्यका नाम धर्म कखा, तहां रूढ़ि नाम है । याका अक्षरार्थ न ग्रहणा । इस नाम धारक एक वस्तु है, ऐसा अर्थ ग्रहण करना । जैसे ही अन्यत्र जानना । बहुरि कहीं जो शब्दका अर्थ होता हो, सो तौ न ग्रहण करना अर जहां जो प्रयोजनभूत अर्थ होय, सो ग्रहण करना । जैसे कही किसीका अभाव कखा होय, अर तहां किंचित् सद्भाव पाईए, तौ तहां सर्वथा अभाव न ग्रहण

करना । किंचित् सद्भावकौ न गिणि अभाव कखा है, ऐसा अर्थ जानना । सम्यग्दृष्टीकै रागादिकका अभाव कखा, तहां ऐसै अर्थ जानना । बहुरि नोकषायका अर्थ तौ यह,—‘कषायका निषेध’ सो तौ अर्थ न ग्रहण करना, अर यहां क्रोधादि सारिखे ए कषाय नाहीं, किंचित् कषाय हैं, तातैं नोकषाय हैं । ऐसा अर्थ ग्रहण करना । ऐसैं ही अन्यत्र जानना । बहुरि जैसैं कहीं कोई युक्तिकरि कथन किया होय, तहां प्रयोजन ग्रहण करना । समयसारका कलशाविषै यह कखा—“धोबीका दृष्टान्तवत् परभावका त्यागकी दृष्टि यावत् प्रवृत्तिकौ न प्राप्त भई, तावत् यह अनुभूति प्रगट भई” । सो यहां यह प्रयोजन है—परभावका त्याग होतैं ही अनुभूति प्रगट हो है । लोकविषै काहूकौ आवतैं ही कोई कार्य भया होय, तहां ऐसैं कहिए,—“जो यह आया ही नाहीं, अर यह कार्य होय गया ।” ऐसा ही यहां प्रयोजन ग्रहण करना । ऐसैं ही अन्यत्र जानना । बहुरि जैसैं प्रमाणादिक किडू कखा होय, सोई तहां न मानि लेना, तहां प्रयोजन होय सो जानना । ज्ञानार्णवविषै ऐसा कखा है—“अवार दोय तीन सत्पुरुष हैं” ।” सो नियमतैं इतने ही नाहीं । यहां ‘थोरे हैं’ ऐसा प्रयोजन जानना । ऐसैं ही अन्यत्र जानना । इस ही रीति लिएं और

- १ दुःप्रज्ञाबललुप्तवस्तुनिचया विज्ञानशून्याशयाः  
 विद्यन्ते प्रतिमन्दिरं निजनिजस्वार्थोद्यता देहिनः ।  
 आनन्दाभृतसिन्धुशीकरचर्यैर्निर्वाप्य जन्मज्वरं  
 ये मुक्तेर्षदनेन्दुवीक्षणपरास्ते सन्ति द्वित्रा यदि ॥ २४ ॥

भी अनेक प्रकार शब्दनिके अर्थ हो हैं, तिनकों यथासंभव जानने । विपरीत अर्थ न जानना । बहुरि जो उपदेश होय, ताकों यथार्थ पहचानि जो अपने योग्य उपदेश होय, ताका अंगीकार करना । जैसे वैद्यकशास्त्रनिविषै अनेक औषधि कही हैं, तिनकों जानै, अर ग्रहण तिसहीका करै, जाकरि अपना रोग दूरि होय । आपकै शीतका रोग होय, तौ उष्ण औषधिका ही ग्रहण करै, शीतल औषधिका ग्रहण न करै । यह औरनिकों कार्यकारी है, ऐसा जानै । तैसें जैनशास्त्रनिविषै अनेक उपदेश हैं, तिनकों जानै, अर ग्रहण तिसहीका करै, जाकरि अपना विकार दूरि होय । आपकै जो विकार होय, ताका निषेध करन-हारा उपदेशकों ग्रहै, तिसका पोषक उपदेशकों न ग्रहै । यह उपदेश औरनिकों कार्यकारी है, ऐसा जानै । यहां उदाहरण कहिए है—जैसें शास्त्रविषै कहीं निश्चयपोषक उपदेश है, कहीं व्यवहारपोषक उपदेश है । तहां आपकै व्यवहारका आधिक्य होय, तौ निश्चयपोषक उपदेशका ग्रहण करि यथावत् प्रवर्तै, अर आपकै निश्चयका आधिक्य होय, तौ व्यवहारपोषक उपदेशका ग्रहणकरि यथावत् प्रवर्तै । बहुरि पूर्वे तौ व्यवहारश्रद्धानतैं आत्मज्ञानतैं भ्रष्ट होय रखा था, पीछें व्यवहारउपदेशहीकी मुख्यताकरि आत्मज्ञानका उद्यम न करै, अथवा पूर्वे तौ निश्चय-श्रद्धानतैं वैराग्यतैं भ्रष्ट होय स्वच्छन्द होय रखा था, पीछें निश्चय उपदेशहीकी मुख्यताकरि विषयकषाय पोषै । ऐसें विपरीत उपदेश ग्रहें बुरा ही होय । बहुरि जैसें आत्मानुशासनविषै ऐसा कब्हा—“जो तू गुणवान् होय, दोष क्यों लगावै है । दोष-

वान् होना था, तौ दोषमय ही क्यों न भयाँ ।” सो जो जीव आप तौ गुणवान् होय अर कोई दोष लगाता होय, तहां दोष दूर करनेके अर्थ तिस उपदेशकौ अंगीकार करना । बहुरि आप तौ दोषवान् होय, अर इस उपदेशका ग्रहणकरि गुणवान् पुरुष-निकौ नीचा दिखावै, तौ बुरा ही होय । सर्व दोषमय होनेतैं तौ किंचित् दोषरूप होना बुरा नाहीं है । तातैं तुझतैं तौ भला है । बहुरि यहां यह कब्बा—“तू दोषमय ही क्यों न भयाँ” सो यह तर्क करी है । किछू सर्व दोषमय होनेकै अर्थ यह उपदेश नाहीं है । बहुरि जो गुणवानकै किंचित् दोष भएँ भी निंदा है, तौ सर्वदोषरहित तौ सिद्ध हैं, नीचली दशाविषै तौ कोई गुण कोई दोष होय ही होय । यहां कोऊ कहै—ऐसैं है, तौ “मुनिर्लिंग धारि किंचित् परिग्रह राखै, सो भी निगोद जायँ ।” ऐसा षट्पाहु-डविषै कैसैं कब्बा है ? ताका उत्तर—

ऊंची पदवी धारि तिस पदविषै संभवता नीच कार्य करै, तौ प्रतिज्ञा भंगादि होनेतैं महादोष लागै है । अर नीची पदवीविषै तहां संभवता गुण दोष होय, तौ होय, तहां वाका दोष ग्रहण करणा योग्य नाहीं । ऐसा जानना । बहुरि उपदेशसिद्धांतरत्न-

१ हे चन्द्रमः किमिति लाञ्छनवानभूस्त्वं  
तद्वान् भवेः किमिति तन्मय एव नाभूः ।  
किं ज्योत्स्नयामलमलं तव घोषयन्त्या  
स्वर्भानुवन्ननु तथा सति नाऽसि लक्ष्यः ॥ १४१ ॥

२ जह जायरूवसरिसो तिलनुसमत्तं ण गहदि अत्थेसु ।  
जइ लेइ अप्पबहुअं तत्तो पुण जाइ णिग्गोयं ॥ १८ ॥

मालाविषै कबा—“आज्ञा अनुसार उपदेश देनेवालाका क्रोध भी क्षमाका भंडार है<sup>१</sup> ।” सो यह उपदेश वक्ताका ग्रहवा योग्य नहीं । इस उपदेशतैं वक्ता क्रोध किया करै, तौ बुरा ही होय । यह उपदेश श्रोतानिका ग्रहवा योग्य है । कदाचित् वक्ता क्रोधकरिकै भी सांचा उपदेश दे, तौ श्रोता गुण ही मानै । ऐसैं ही अन्यत्र जानना । बहुरि जैसे काहूकै अतिशीतांग रोग होय, ताकै अर्थ अति उष्ण रसादिक औषधि कही हैं । तिस औषधिकौं जाकै दाह होय, वा तुच्छ शीत होय, सो ग्रहण करै, तौ दुख ही पावै । तैसैं काहूकै कोई कार्यकी अतिमुख्यता होय, ताकै अर्थ तिसके निषेधका अति खींचकरि उपदेश दिया होय, ताकौं जाकै तिस कार्यकी मुख्यता न होय, वा थोरी मुख्यता होय, सो ग्रहण करै, तौ बुरा ही होय । यहां उदाहरण—जैसैं काहूकौं शास्त्राभ्यासकी अतिमुख्यता अर आत्मानुभवका उद्यम ही नहीं, ताकै अर्थ बहुत शास्त्राभ्यासका निषेध किया । बहुरि जाकै शास्त्राभ्यास नहीं, वा थोरा शास्त्राभ्यास है, सो जीव तिस उपदेशतैं शास्त्राभ्यास छोड़ै अर आत्मानुभवविषै उपयोग रहै नहीं, तब वाका तौ बुरा ही होय । बहुरि जैसे काहूकै यज्ञ खानादिकरि हिंसातैं धर्म माननेकी मुख्यता है, ताके अर्थ “जो पृथ्वी उलटै, तौ भी हिंसा किणं पुण्यफल न होय,” ऐसा उपदेश दिया । बहुरि जो जीव पूजनादि कार्यनिकरि किंचित् हिंसा लगावै, अर बहुत गुण उपजावै, सो जीव इस उपदेशतैं पूजनादि

१ रोसोवि खमाकोसो सुत्तं भासंत जस्सण्धणस्य (?) ।

उस्सूत्तेण खमाविय दोस महामोहआवासो ॥ १४ ॥

कार्य छोड़ै, अर हिंसारहित सामायिकादि धर्मविषै उपयोग लागै नाहीं, तब वाका तौ बुरा ही होय । ऐसैं ही अन्यत्र जानना । बहुरि जैसैं कोई औषधि गुणकारी है । परंतु आपके यावत् तिस औषधितैं हित होय, तावत् तिसका ग्रहण करै । जो शीत मिटें भी उष्ण औषधिका सेवन किया ही करै, तौ उलटा रोग होय । तैसैं कोई कार्य है, परंतु आपके यावत् तिस धर्मकार्यतैं हित होय, तावत् तिसका ग्रहण करै । जो ऊंची दशा होतैं नीची दशा-संबंधी धर्मका सेवनविषै लागै, तौ उलटा विगार ही होय । यहां उदाहरण—जैसैं पाप मेटनेकै अर्थ प्रतिक्रमणादि धर्मकार्य कहे, बहुरि आत्मानुभव होतैं प्रतिक्रमणादिकका विकल्प करै, तौ उलटा विकार वधै, याहीतैं समयसारविषै प्रतिक्रमणादिककौं विष कख्या है । बहुरि जैसैं अन्नतीके करने योग्य प्रभावनादि धर्मकार्य कहे, तिनकौं व्रती होयकरि करै, तौ पाप ही बांधै । व्यापारादि आरंभ छोड़ि चैत्यालयादि कार्यनिका अधिकारी होय, सो कैसैं बनै । ऐसैं ही अन्यत्र जानना । बहुरि जैसैं पाकादिक औषधि पुष्टकारी हैं, परन्तु ज्वरवान् ग्रहण करै, तौ महादोष उपजै । तैसैं ऊंचा धर्म बहुत भल है, परंतु अपने विकारभाव दूरि न होय, अर ऊंचा धर्म ग्रहै, तौ महादोष उपजै । यहां उदाहरण—जैसैं अपना अशुभविकार न छूट्या, अर निर्विकल्प दशाकौं अंगीकार करै, तौ उलटा विकार वधै । जैसैं व्यापारादि करनेका विकार तौ न छूट्या अर त्यागका भेषरूप धर्म अंगीकार करै, तो महादोष उपजै । बहुरि जैसैं भोजनादि विषयनिविषै आसक्त होय अर आरंभत्यागादि धर्मकौं अंगीकार करै, तौ बुरा



ही होय । ऐसैं ही अन्यत्र जानना । याही प्रकार और भी सांचा विचारतैं उपदेशकौं यथार्थ जानि अंगीकार करना । बहुरि विस्तार कहांताई करिए । अपनैं सम्यग्ज्ञान भए आपहीकौं यथार्थ भासै । उपदेश तौ वचनात्मक है । बहुरि वचनकरि अनेक अर्थ युगपत् कहे जाते नाहीं । तातैं उपदेश तौ एक ही अर्थकी मुख्यता लिएं हो है । बहुरि जिस अर्थका जहां वर्णन है, तहां तिसहीकी मुख्यता है । दूसरे अर्थकी तहां ही मुख्यता करै, तौ दोऊ उपदेश दृढ़ न होय । तातैं उपदेशविषै एक अर्थकौं दृढ़ करै । परंतु सर्व जिनमतका चिह्न स्याद्वाद है । सो 'स्यात्' पदका अर्थ 'कथंचित्' है । तातैं उपदेश होय ताकौं सर्वथा न जानि लेना । उपदेशका अर्थकौं जानि तहां इतना विचार करना, यह उपदेश किस प्रकार है, किस प्रयोजन लिएं है, किस जीवकौं कार्यकारी है । इत्यादि विचारकरि तिस अर्थका ग्रहण करै, पीछैं अपनी दशाविषै जो उपदेश जैसे आपकौं कार्यकारी होय, तिसकौं तैसें आप अंगीकार करै । अर जो उपदेश जानने योग्य ही होय, तौ ताकौं यथार्थ जानि ले । ऐसैं उपदेशका फलकौं पावै । यहां कोई कहै—जो तुच्छबुद्धि इतना विचार न करि सकै, सो कहा करै । ताका उत्तर—

जैसे व्यापारी अपनी बुद्धिकै अनुसारि जिसमें समझै, सो थोरा वा बहुत व्यापार करै । परंतु नफा टोटाका ज्ञान तौ अवश्य चाहिए । तैसें विवेकी अपनी बुद्धिकै अनुसारि जिसमें समझै, सो थोरा वा बहुत उपदेशकौं ग्रहै, परंतु मुझकौं यह कार्यकारी है, यह कार्यकारी नाहीं, इतना तौ ज्ञान अवश्य चाहिए । सो

कार्य तौ इतना है—यथार्थ श्रद्धानज्ञानकरि रागादि घटावना । सो यह कार्य अपनै सधै, सोई उपदेशका प्रयोजन ग्रहै । विशेष ज्ञान न होय, तौ प्रयोजनकों तौ भूलै नाहीं । यह तौ सावधानी अवश्य चाहिए । जिसमें अपना हितकी हानि होय, तैसें उपदेशका अर्थ समझना योग्य नाहीं । या प्रकार स्याद्वाददृष्टि लिङ् जैनशास्त्रनिका अभ्यास किं अपना कल्याण हो है ।

यहां कोई प्रश्न करै—जहां अन्य अन्य प्रकार न संभवै, तहां तौ स्याद्वाद संभवै । बहुरि एक ही प्रकारकरि शास्त्रनिविषै विरुद्ध भासै, तहां कहा करिए । जैसे प्रथमानुयोगविषै एक तीर्थकरकी साथि हजारों मुक्ति गए बताए, करणानुयोगविषै छह महीना आठसमयविषै छसै आठ जीव मुक्ति जांय, ऐसा नियम किया । प्रथमानुयोगविषै ऐसा कथन किया—देव देवांगना उपजि पीछें मरि साथि ही मनुप्यादि पर्यायविषै उपजे । करणानुयोगविषै देवका सागरों प्रमाण देवांगनाका पत्थों प्रमाण आयु कखा । इत्यादि विधि कैसें मिलै । ताका उत्तर—

करणानुयोगविषै कथन है, सो तौ तारतम्य लिङ् है । अन्य अनुयोगनिविषै कथन प्रयोजन अनुसारि है । तातें करणानुयोगका कथन तौ जैसें किया है, तैसें ही है । औरनिका कथनकी जैसें विधि मिलै, तैसें मिलाय लैनी । हजारों मुनि तीर्थकरकी साथि मुक्ति गए बताए, तहां यह जानना—एक ही काल इतने मुक्ति गए नाहीं । जहां तीर्थकर गमनादि क्रिया मेटि स्थिर भए, तहां तिनकी साथ इतने मुनि तिष्ठे, बहुरि मुक्ति आगैं पीछें गए । ऐसें प्रथमानुयोग करणानुयोगका विरोध दूरि हो है । बहुरि देव

देवांगना साथि उपजे, पीछें देवांगना चयकरि बीचमें अन्य पर्याय धरै, तिनका प्रयोजन न जानि कथन किया। पीछें वह साथि मनुष्य पर्यायविषै उपजे, ऐसैं विधि मिलाएं विरोध दूरि हो है। ऐसैं ही अन्यत्र विधि मिलाय लैनी। बहुरि प्रश्न—जो ऐसैं कथननि-विषै भी कोई प्रकार विधि मिलै। परंतु कहीं नेमिनाथ स्वामीका सौरीपुरविषै कही द्वारावतीविषै जन्म कह्या, रामचंद्रादिककी कथा अन्य अन्य प्रकार लिखी। एकेन्द्रियादिककौं कहीं सासादन गुणस्थान लिख्या, कहीं न लिख्या, इत्यादि इन कथननिकी विधि कैसैं मिलै। ताका उत्तर—

ऐसैं विरोध लिं कथन कालदोषतैं भए हैं। इस कालविषै प्रत्यक्ष ज्ञानी वा बहुश्रुतनिका तौ अभाव भया, अर स्तोकबुद्धि ग्रंथ करनेके अधिकारी भए। तिनकै भ्रमतैं कोई अर्थ अन्यथा भासै, ताकौं तैसैं लिखैं, अथवा इस कालविषै कैई जैनमतविषै भी कषायी भए हैं, सो तिननैं कोई कारण पाय अन्यथा कथन लिख्या है। ऐसैं अन्यथा कथन भया, तातैं जैनशास्त्रनिविषै विरोध भासने लागा। सो जहां विरोध भासै, तहां इतना करना कि, इस कथन करनेवाले बहुत प्रमाणीक हैं कि, इस कथन करनेवाले बहुत प्रमाणीक हैं। ऐसा विचारकरि बड़े आचार्यादि-कनिका कह्या कथन प्रमाण करना। बहुरि जिनमतके बहुत शास्त्र हैं, तिनहीकी आज्ञाय मिलावनी। जो परंपराआज्ञायतैं मिलै, सो कथन प्रमाण करना। ऐसैं विचार किं भी सत्य असत्यका निर्णय न होय सकै, तौ जैसैं केवलीकौं भास्या है, तैसैं प्रमाण है, ऐसैं मान लेना। जातैं देवादिकका वा तत्त्वनिका निर्द्धार

मए विना तौ मोक्षमार्ग होय नहीं । तिनिका तौ निर्द्धार भी होय सकै है, सो कोई इनिका स्वरूप विरुद्ध कहै, तौ आपहीकौं भासि जाय । बहुरि अन्य कथनका निर्द्धार न होय, वा संशयादि रहै, वा अन्यथा जानपना होय जाय, अर केवलीका कह्या प्रमाण है, ऐसा श्रद्धान रहै, तौ मोक्षमार्गविषै विघ्न नहीं, ऐसा जानना । इहां कोई तर्क करै—जैसैं नाना प्रकार कथन जिनमत-विषै कह्या, तैसैं अन्यमतविषै भी कथन पाइए है, सो तुम्हारे मतके कथनका तो तुम तिस जिस प्रकार स्थापन किया, अन्य-मतविषै ऐसे कथनकौं तुम दोष लगावो हौ, सो यह तुम्हारै रागद्वेष है । ताका समाधान—

कथन तौ नाना प्रकार होय और प्रयोजन एकहीकौं पोषै, तौ कोई दोष है नहीं । अर कहीं कोई प्रयोजन पोषै, कहीं कोई प्रयोजन पोषै, तौ दोष ही है । सो जिनमतविषै तो एक प्रयोजन रागादि मेटनेका है, सो कहीं बहुत रागादि छुड़ाय थोरा रागादि करावनेका प्रयोजन पोष्या है, कहीं सर्व रागादि छुड़ावनेका प्रयोजन पोष्या है । परंतु रागादि बधावनेका प्रयोजन कहीं भी नहीं । तातैं जिनमतका कथन सर्व निर्दोष है । अर अन्यमतविषै कहीं रागादि मिटावनेके प्रयोजन लिएं कथन करैं, कहीं रागादि बधावनेका प्रयोजन लिएं कथन करैं । ऐसैं ही और भी प्रयोजनकी विरुद्धता लिएं कथन करै हैं । तातैं अन्यमतका कथन सदोष है । लोकविषै भी एक प्रयोजनको पोषते नाना वचन कहै, ताकौं प्रमाणीक कहिए है । अर प्रयोजन और और पोषती बात करै, ताकौं बावला कहिए है । बहुरि जिनमतविषै

नाना प्रकार कथन है, सो जुदी जुदी अपेक्षा लिए है, तहां दोष नहीं । अन्यमतविषै एक ही अपेक्षा लिए अन्य कथन करै, तहां दोष है । जैसे जिनदेवके वीतरागभाव हैं, अर समवसरणादि विभूति पाइए है, तहां विरोध नहीं । समवसरणादि विभूतिकी रचना इंद्रादिक करै हैं, इनके तिसविषै रागादिक नहीं, ताँतें दोऊ बातें संभवैं हैं । अर अन्यमतविषै ईश्वरकौ साक्षीभूत वीतराग भी कहैं, अर तिसहीकर किए काम क्रोधादि भाव निरूपण करैं, सो एक ही आत्माके वीतरागपनौ अर काम क्रोधादि भाव कैसे संभवैं । ऐसे ही अन्य जानना । बहुरि काल-दोषतैं जिनमतविषै एक ही प्रकारकरि कोई कथन विरुद्ध लिख्या है, सो यह तुच्छ बुद्धीनिकी भूलि है, किछू मतविषै दोष नहीं । सो भी जिनमतका अतिशय इतना है कि, प्रमाणविरुद्ध कोई कथन कर सकै नहीं । कहीं सौरीपुरविषै कहीं द्वारावतीविषै नेमिनाथ स्वामीका जनम लिख्या है, सो कोठै ही होहु, परंतु नगरविषै जनम होना प्रमाणविरुद्ध नहीं । अब भी होता दीसै है ।

बहुरि अन्यमतविषै सर्वज्ञादि यथार्थ ज्ञानीके किए ग्रंथ बतावैं, बहुरि तिनिविषै परस्पर विरुद्ध भासै । कहीं तौ बाल-ब्रह्मचारीकी प्रशंसा करैं, कहीं कहैं “पुत्रविना गति ही होय नहीं” सो दोऊ सांचा कैसे होय । सो ऐसे कथन तहां बहुत पाइए है । बहुरि प्रमाणविरुद्ध कथन तिनविषै पाइए है । जैसे वीर्य मुखविषै पड़नेतैं मछलीके पुत्र हूवो, सो ऐसे अवार काहूके होना दीसै नहीं । अनुमानतैं मिलै नहीं । सो ऐसे भी कथन

बहुत पाइए है । यहां सर्वज्ञादिककी भूलि मानिए, सो तौ कैसें भूलें । अर विरुद्ध कथन माननेमें आवै नाहीं । तातैं तिनिके मतविषै दोष ठहराइए है । ऐसा जानि एक जिनमतका ही उपदेश ग्रहण करने योग्य है । तहां प्रथमानुयोगादिकका अभ्यास करना । तहां पहिलै याका अभ्यास करना, पीछैं याका करना, ऐसा नियम नाहीं । अपने परिणामनिकी अवस्था देखि जिसके अभ्यासतैं अपने धर्मविषै प्रवृत्ति होय, तिसहीका अभ्यास करना । अथवा कदाचित् किसी शास्त्रका अभ्यास करै, कदाचित् किसी शास्त्रका अभ्यास करै । बहुरि जैसें रोजनामाविषै तौ अनेक रकम जहां तहां लिखी हैं, तिनिकों खातेमें ठीक खतावै, तौ लैना दैनाका निश्चय होय । तैसें शास्त्रनिविषै तौ अनेक प्रकारका उपदेश जहां तहां दिया है, ताकों सम्यग्ज्ञानविषै यथार्थ प्रयोजन लिं पहिचानै, तौ हित अहितका निश्चय होय । तातैं स्यात्पदकी सापेक्ष लिं सम्यग्ज्ञानकरि जे जीव जिनवचनविषै रमै हैं, ते जीव शीघ्र ही शुद्ध आत्मस्वरूपकों प्राप्त हो हैं । मोक्षमार्गविषै पहिला उपाय आगमज्ञान कहा है । आगमज्ञान विना और धर्मका साधन होय सकै नाहीं । तातैं तुमकों भी यथार्थबुद्धिकरि आगम अभ्यास करना । तुम्हारा कल्याण होगा ।

इति श्रीमोक्षमार्गप्रकाशक नाम शास्त्रमध्ये उपदेशस्वरूप-  
प्रतिपादक नामा आठवां अधिकार पूरण भया ।

अथ मोक्षमार्गका स्वरूप कहिए है—

दोहा ।

शिवउपाय करतें प्रथम, कारन मंगलरूप ।

विघनविनाशक सुखकरन, नमौ शुद्ध शिवभूप ॥ १ ॥

पहिलें मोक्षमार्गके प्रतिपक्षी मिथ्यादर्शनादिक तिनिका स्वरूप दिखाया । तिनिकौ तो दुःखरूप दुःखका कारन जानि हेय मानि तिनिका त्याग करना । बहुरि बीचमें उपदेशका स्वरूप दिखाया । ताकौ जानि उपदेशकौ यथार्थ समझना । अब मोक्षके मारग सम्यग्दर्शनादिक तिनिका स्वरूप दिखाइए है । इनिकौ सुखरूप सुखका कारण जानि उपादेय मानि अंगीकार करना । जातैं आत्माका हित मोक्ष ही है । तिसहीका उपाय आत्माकौ कर्तव्य है । तातैं इसहीका उपदेश इहां दीजिए है । तहां आत्माका हित मोक्ष ही है और नाहीं । ऐसा निश्चय कैसें होय, सो कहिए है—

आत्माके नाना प्रकार गुणपर्यायरूप अवस्था पाइए है । तिन-विषै और तौ कोई अवस्था होइ, किछू आत्माका बिगाड़ सुधार नाहीं । एक दुखसुखअवस्थातैं बिगाड़ सुधार है । सो इहां किछू हेतु दृष्टांत चाहिए नाहीं । प्रत्यक्ष ऐसें ही प्रतिभासै है । लोक-विषै जेते आत्मा हैं, तिनिकै एक उपाय यह पाइए है—दुख न होय सुख ही होय । बहुरि अन्य उपाय जेते करै हैं, तेते एक इस ही प्रयोजन लिएं करै हैं, दूसरा प्रयोजन नाहीं । जिनके निमित्ततैं दुख होता जानै, तिनिकौ दूरकरनेका उपाय करै । अर जिनके निमित्ततैं सुख होता जानै, तिनिके होनेका उपाय करै

है । बहुरि संकोच विस्तार आदिक अवस्था भी आत्माकै हो हैं, वा अनेक परद्रव्यका भी संयोग मिलै है । परंतु जिनतैं सुख दुख होता न जानै, तिनके दूर करनेका वा होनेका कुछ भी उपाय कोऊ करै नहीं । सो इहां आत्मद्रव्यका ऐसा ही स्वभाव जानना । और तौ सर्व अवस्थाकौं सहि सकै, एक दुखकौं सह सकता नहीं । परवश दुख होय तौ यह कहा करै, ताकौं भोगवै, परन्तु स्ववशपनै तौ किंचित् भी दुःखकौं न सहै । अर संकोच विस्तारदि अवस्था जैसी होय, तैसी होय, तिसकौं स्ववशपनै भी भोगवै, सो स्वभावविषै तर्क नहीं । आत्माका ऐसा ही स्वभाव जानना । देखो, दुःखी होय तब सूता चाहै, सो सोवनेमें ज्ञानादिक मंद हो जाय हैं, परन्तु जड़सारिखा भी होय दुखकौं दूर किया चाहै है, वा मूआ चाहै । सो मरनेमें अपना नाश मानै है, परन्तु अपना अस्तित्व खोकर भी दुःख दूर किया चाहै है । तातैं एक दुखरूप पर्यायका अभाव करना ही याका कर्तव्य है । बहुरि दुःख न होय, सो ही सुख है । सो यह भी प्रत्यक्ष भासै है । बाह्य कोई सामग्रीका संयोग मिले जाके अंतरंगविषै आकुलता है, सो दुखी ही है । जाकै आकुलता नहीं, सो सुखी है । बहुरि आकुलता हो है, सो रागादिक कषायभाव भए हो है । जातैं रागादि भावनिकरि यह तौ द्रव्यनकौं और भांति परिणमाया चाहै, अर वै द्रव्य और भांति परिणमैं, तब याकै आकुलता होय । तहां के तौ आपकै रागादिक दूर होय, के आप चाहै तैसें ही सर्वद्रव्य परिणमैं तौ आकुलता मिटै । सो सर्व द्रव्य तौ याकै आधीन नहीं । कदाचित् कोई द्रव्य जैसी



याकी इच्छा होय, तैसें ही परिणमै, तौ भी याकी सर्वथा आकुलता दूरि न होय । सर्व कार्य याका चाह्या ही होय, अन्यथा न होय, तब यह निराकुल रहै । सो यह तौ होय ही सकै नाहीं । जातैं कोई द्रव्यका परिणमन कोई द्रव्यके आधीन नाहीं । तातैं अपने रागादि भाव दूरि भएँ निराकुलता होय, सो यह कार्य बनि सकै है । जातैं रागादिक भाव आत्माका स्वभाव भाव तौ है नाहीं । उपाधिक भाव हैं, परनिमित्ततैं भएँ हैं, सो निमित्त मोहकर्मका उदय है । ताका अभाव भएँ सर्व रागादिक विलय होय जांय, तब आकुलताका नाश भएँ दुख दूरि होय, सुखकी प्राप्ति होय । तातैं मोहकर्मका नाश हितकारी है । बहुरि तिस आकुलताकौँ सहकारी कारण ज्ञानावरणादिकका उदय है । ज्ञानावरण दर्शनावरणके उदयतैं ज्ञानदर्शन संपूर्ण न प्रगटै है, तातैं याकै देखने जाननेकी आकुलता होय, अथवा यथार्थ संपूर्ण वस्तुका स्वभाव न जानै, तब रागादिरूप होय प्रवर्त्तै, तहां आकुलता होय । बहुरि अंतरंगके उदयतैं इच्छानुसार दानादि कार्य न बनै, तब आकुलता होय । इनका उदय है, सो मोहका उदय होतैं आकुलताकौँ सहकारी कारण है । मोहके उदयका नाश भएँ इनिका बल नाहीं । अंतर्मुहूर्त्तकारि आपोआप नाशकौँ प्राप्ति होय । परंतु सहकारी कारण भी दूरि होय जाय, तब प्रगटरूप निराकुल दशा भासै । तहां केवलज्ञानी भगवान् अनंत-सुखरूप दशाकौँ आस कहिए । बहुरि अघाति कर्मनिका उदयके निमित्ततैं शरीरादिकका संयोग हो है, सो मोहकर्मका उदय होतैं शरीरादिकका संयोग आकुलताकौँ बाह्य सहकारी कारण है ।

अंतरंग मोहका उदयतै रागादिक होय अर बाह्य अघाति कर्मनिके उदयतै रागादिककौ कारण शरीरादिकका संयोग होय, तब आकुलता उपजै है। बहुरि मोहका उदय नाश भए भी अघाति-कर्मका उदय रहै है, सो किछु भी आकुलता उपजाय सकै नाहीं। परंतु पूर्व आकुलताका सहकारि कारण था, तातै अघाति कर्मनिका भी नाश आत्माकौ इष्ट ही है। सो केवलीकै इनिके होतै किछु दुख नाहीं। तातै इनका नाशका उद्यम भी नाहीं। परंतु मोहका नाश भए ए कर्म आपै आप थोरे ही कालमें सर्व नाशकौ प्राप्त होय जाय हैं। ऐसै सर्व कर्मका नाश होना आत्माका हित है। बहुरि सर्व कर्मका नाशहीका नाम मोक्ष है। तातै आत्माका हित एक मोक्ष ही है—और किछु नाहीं, ऐसा निश्चय करना। इहां कोऊ कहै—संसार दशाविषै पुण्यकर्मका उदय होतै भी जीव सुखी हो है, तातै केवल मोक्ष ही हित है, ऐसा काहेकौ कहिए। ताका समाधान—

संसारदशाविषै सुख तौ सर्वथा है ही नाहीं, दुख ही है। परंतु काहूकै कबहू बहुत दुख हो है, काहूकै कबहू थोरा दुख हो है। सो पूर्वे बहुत दुख था, वा अन्य जीवनिकै बहुत दुख पाइए है, तिस अपेक्षातै थोरे दुखवालेकौ सुखी कहिए। बहुरि तिस ही अभिप्रायतै थोरे दुखवाला आपकौ सुखी मानै है। परमार्थतै सुख है नाहीं। बहुरि जो थोरा भी दुख सदा काल रहै है, तौ वाकौ भी हित ठहराइए, सो भी नाहीं। थोरे काल ही पुण्यका उदय रहै, तहां थोरा दुख हो है, पीछे बहुत दुख हो जाय। तातै संसारअवस्था हितरूप नाहीं। जैसे काहूकै

विषम ज्वर है, ताकै कबहू असाता बहुत हो है, कबहू थोरी हो है । थोरी असता होय, तब वह आपकों नीका मानै । लोक भी कहै—नीका है । परंतु परमार्थतैं यावत् ज्वरका सद्भाव है, तावत् नीका नाही है । तैसें संसारीकै मोहका उदय है । ताकै कबहू आकुलता बहुत हो है, कबहू थोरी हो है । थोरी आकुलता होय, तब वह आपकों सुखी मानै, लोक भी कहै—सुखी है । परमार्थतैं यावत् मोहका सद्भाव है, तावत् सुखी नाही । बहुरि संसार दशाविषै भी आकुलता घटें सुखी नाम पावै है । आकुलता बधे दुखी नाम पावै है । किछू बाह्य सामग्रीतैं सुख दुख नाही । जैसें काहू दरिद्रीकै किंचित् धनकी प्राप्ति भई । तहां किछू आकुलता घटनेतैं वाकौं सुखी कहिए, अर वह भी आपकों सुखी मानै । बहुरि काहू बहुत धनवान्कै किंचित् धनकी हानि भई, तहां किछू आकुलता बधनेतैं वाकौं दुखी कहिए । अर वह भी आपकों दुखी मानै है । ऐसें ही सर्वत्र जानना । बहुरि आकुलता घटना बधना भी बाह्य सामग्रीके अनुसार नाही । कषाय भावनिकै घटने बधनेके अनुसार है । जैसें काहूके थोरा धन है अर वाकै संतोष है, तौ वाकै आकुलता थोरी है । बहुरि काहूके बहुत धन है, अर वाकै तृष्णा है, तौ वाकै आकुलता घनी है । बहुरि काहूकौं काहनै बहुत बुरा कइया, अर वाकै थोरा क्रोध न भया, तौ आकुलता न हो है । अर थोरी बातें कहे ही क्रोध होय आवै, तौ वाकै आकुलता घनी हो है । बहुरि जैसें गऊके बछड़ेतैं किछू भी प्रयोजन नाही । परंतु मोह बहुत, तातैं वाकी रक्षा करनेकी बहुत आकुलता हो है । बहुरि सुभटकै शरीरादिकतैं घने कार्य

सधै हैं, परंतु रणविषै मानादिककरि शरीरादिकतैं मोह घटि जाय, तब मरनेकी भी थोरी आकुलता हो है । तातैं ऐसा जानना— संसार अवस्थाविषै भी आकुलता घटने बधनेहीतैं सुखदुख मानिए है । बहुरि आकुलताका घटना बधना रागादि कषाय घटने बधनेके अनुसार है । बहुरि परद्रव्यरूप बाह्य सामग्रीके अनुसार सुख दुख नाहीं । कषायतैं याकै इच्छा उपजै, अर याकी इच्छा अनुसारि बाह्य सामग्री मिलै, तब याका किछू कषाय उपशमनेतैं आकुलता घटै, तब सुख मानै । अर इच्छा-नुसार सामग्री न मिलै, तब कषाय बधनेतैं आकुलता बधै, तब दुख मानै । सो है तौ ऐसैं, अर यह जानै—मोकूं परद्रव्यके निमित्ततैं सुख दुख हो है । सो ऐसा जानना भ्रम ही है । तातैं इहां ऐसा विचार करना, जो संसार अवस्थाविषै किंचित् कषाय घटै सुख मानिए, ताकौं हित जानिए, तौ जहां सर्वथा कषाय दूर भए वा कषायके कारण दूरि भए परम निराकुलता होने करि अनंत सुख पाइए, ऐसी मोक्षअवस्थाकौं कैसैं हित न मानिए । बहुरि संसार अवस्थाविषै उच्च पदकौं पावै, तौ भी कै तौ विषय-सामग्री मिलावनेकी आकुलता होय, कै विषयसेवनकी आकुलता होय, कै और कोई क्रोधादि कषायतैं इच्छा उपजै, ताकौं पूरण करनेकी आकुलता होय, कदाचित् सर्वथा निराकुल होय सकै नाहीं । अभिप्रायविषै तौ अनेकप्रकार आकुलता बनी ही रहै । अर बाह्य कोई आकुलता मेटनेके उपाय करै, सो प्रथम तौ कार्य सिद्ध होय नाहीं । अर जो भवितव्य योगतैं वह कार्य सिद्ध होय जाय, तौ तत्काल और आकुलता मेटनेका उपायविषै लागै ।

ऐसैं आकुलता मेटनेकी आकुलता निरंतर रखा करै । जो ऐसी आकुलता न रहै, तो नये नये विषयसेवनादि कार्यनिविषै काहेकौं प्रवर्तै है । तातैं संसार अवस्थाविषै पुण्यका उदयतैं इंद्र अहमिन्द्रादि पदकौं पावै, तौ भी निराकुलता न होय, दुःखी ही रहै । तातैं संसारअवस्था हितकारी नाहीं ।

बहुरि मोक्ष अवस्थाविषै कोई प्रकारकी आकुलता रही नाहीं, तातैं आकुलता मेटनेका उपाय करनेका भी प्रयोजन नाहीं । सदा काल शांतरसकरि सुखी रहै है । तातैं मोक्षअवस्था ही हितकारी है । पूर्वैं भी संसार अवस्थाका दुखका अर मोक्ष अवस्थाका सुखका विशेष वर्णन किया है, सो इसही प्रयोजनके अर्थि किया है । ताकौं भी विचारि मोक्षका उपाय करना । सर्व उपदेशका तात्पर्य इतना है । इहां प्रश्न—जो मोक्षका उपाय काललब्धि आए भवितव्यानुसारि बनै है कि, मोहादिकका उपशमादि भए बनै है, अथवा अपने पुरुषार्थतैं उद्यम किए बनै है, सो कहौ । जो पहिले दोय कारण मिले बनै है, तौ हमकौं उपदेश काहेकौं दीजिए है । अर पुरुषार्थतैं बनै है, तौ उपदेश सर्व सुनै, तिन-विषै कोई उपाय कर सकै, कोई न करि सकै, सो कारण कहा । ताका समाधान—

एक कार्य होनेविषै अनेक कारण मिलै हैं । सो मोक्षका उपाय बनै है, तहां तौ पूर्वोक्त तीनों ही कारण मिलै हैं । अर न बनै है, तहां तीनों ही कारण न मिलै हैं । पूर्वोक्त तीन कारण कहे, तिनविषै काललब्धि वा होनहार तौ किल्लू वस्तु नाहीं । जिस कालविषै कार्य बनै, सोई काललब्धि और जो कार्य भया

सोई होनहार । बहुरि कर्मका उपशमादिक है, सो पुद्गलकी शक्ति है । ताका आत्मा कर्त्ता हर्त्ता नाही । बहुरि पुरुषार्थतैं उद्यम करिए है, सो यह आत्माका कार्य है । तातैं आत्माको पुरुषार्थकरि उद्यम करनेका उपदेश दीजिए है । तहां यह आत्मा जिस कारणतैं कार्यसिद्धि अवश्य होय, तिसकारणरूप उद्यम करै, तहां तौ अन्य कारण मिलैं ही मिलैं, अर कार्यकी भी सिद्धि होय ही होय । बहुरि जिस कारणतैं कार्यसिद्धि होय, अथवा नाही भी होय, तिस कारणरूप उद्यम करै, तहां अन्य कारण मिलैं तौ कार्यसिद्धि होय, न मिलैं तौ सिद्धि न होय । सो जिनमतविषै जो मोक्षका उपाय कब्जा है, सो इसतैं मोक्ष होय ही होय । तातैं जो जीव पुरुषार्थकरि जिनेश्वरका उपदेश अनुसार मोक्षका उपाय करै है, ताकै काललब्धि वा होनहार भी भया । अर कर्मका उपशमादि भया है, तौ यह ऐसा उपाय करै है । तातैं जो पुरुषार्थकरि मोक्षका उपाय करै है, ताकै सर्व कारण मिलै हैं, ऐसा निश्चय करना । अर वाकै अवश्य मोक्षकी प्राप्ति हो है । बहुरि जो जीव पुरुषार्थकरि मोक्षका उपाय न करै, ताकै काललब्धि होनहार भी नाही । अर कर्मका उपशमादि न भया है, तौ यह उपाय न करै है । तातैं जो पुरुषार्थकरि मोक्षका उपाय न करै है, ताकै कोई कारण मिलै नाही, ऐसा निश्चय करना । अर वाकै मोक्षकी प्राप्ति न हो है । बहुरि तू कहै है—उपदेश तौ सर्व सुनै हैं, कोई मोक्षका उपाय कर सकै, कोई न करि सकै, सो कारण कहा । सो कारण यह है कि—जो उपदेश सुनिकरि पुरुषार्थ करै है, सो तौ मोक्षका उपाय करि सकै है

अर पुरुषार्थ न करै, सो मोक्षका उपाय न कर सकै है । उपदेश तौ शिक्षामात्र है, फल जैसा पुरुषार्थ करै तैसा लागै । बहुरि प्रश्न—जो द्रव्यलिङ्गी मुनि मोक्षके अर्थि गृहस्थपनौ छोड़ि तपश्चरणादि करै हैं, तहां पुरुषार्थ तौ किया कार्य सिद्ध न भया, तातैं पुरुषार्थ किए तौ किछु सिद्धि नाहीं । ताका समाधान,—

अन्यथा पुरुषार्थकरि फल चाहै, तौ कैसें सिद्धि होय । तपश्चरणादि व्यवहार साधनविषै अनुरागी होय प्रवर्तै, ताका फल शास्त्रविषै तौ शुभबंध कखा है, अर यह तिसतैं मोक्ष चाहै है, तौ कैसें सिद्धि होय । यह तौ भ्रम है । बहुरि प्रश्न—जो भ्रमका भी तौ कारण कर्म ही है, पुरुषार्थ कहा करै । ताका उत्तर—

सांचा उपदेशतैं निर्णय किए भ्रम दूरि हो है । सो ऐसा पुरुषार्थ न करै है, तिसहीतैं भ्रम रहै है । निर्णय करनेका पुरुषार्थ करै, तौ भ्रमका कारण मोहकर्म ताका भी उपशमादि होय, तब भ्रम दूरि हो जाय । जातैं निर्णय करतां परिणामनिकी विशुद्धता होय, तिसतैं मोहका स्थिति अनुभाग घटै है । बहुरि प्रश्न—जो निर्णय करनेविषै उपयोग न लगावै है, ताका भी तौ कारण कर्म है । ताका समाधान,—

एकेन्द्रियादिककै विचार करनेकी शक्ति नाहीं, तिनकै तौ कर्महीका कारण है । याकै तो ज्ञानावरणादिकका क्षयोपशमतैं निर्णय करनेकी शक्ति प्रगट भई है । जहां उपयोग लगावै, तिसहीका निर्णय होय सकै है । परंतु यह अन्य निर्णय करनेविषै उपयोग लगावै, यहां उपयोग न लगावै । सो यह तौ याहीका

दोष है, कर्मका तौ किछू प्रयोजन नाहीं। बहुरि प्रश्न—जो सम्यक्त्वचारित्रका तौ घातक मोह है। ताका अभाव भए विना मोक्षका उपाय कैसें बनै। ताका समाधान—

तत्त्वनिर्णय करनेविषै उपयोग न लगावै, सो तो याहीका दोष है। बहुरि पुरुषार्थकरि तत्त्वनिर्णयविषै उपयोग लगावै, तब स्वयमेव ही मोहका अभाव भए सम्यक्त्वादिरूप मोक्षके उपायका पुरुषार्थ बनै है। सो मुख्यपनै तौ तत्त्वनिर्णयविषै उपयोग लगावनेका पुरुषार्थ करना। बहुरि उपदेश भी दीजिए है, सो इस ही पुरुषार्थ करावनेके अर्थि दीजिए है। बहुरि इस पुरुषार्थतैं मोक्षके उपायका पुरुषार्थ आपहीतैं सिद्ध होयगा। अर तत्त्वनिर्णय करनेविषै कोई कर्मका दोष है नाहीं। अर तू आप तौ महंत रखा चाहै, अर अपना दोष कर्मादिककें लगावै, सो जिनआज्ञा मानें तौ ऐसी अनीति संभवै नाहीं। तोकौं विषय कषायरूप ही रहना है, तातैं झूठ बोलै है। मोक्षकी सांची अभिलाषा होय, तौ ऐसी युक्ति काहेकौं बनावै। संसारके कार्यनिविषै अपना पुरुषार्थतैं सिद्ध न होती जानै, तौ भी पुरुषार्थकरि उद्यम किया करै, यहां पुरुषार्थ खोइ बैठै। सो जानिए है, मोक्षकौं देखादेखी उत्कृष्ट कहै है। याका स्वरूप पहचानि ताकौं हितरूप न जानै है। हित जानि जाका उद्यम बनै, सो न करै, यह असंभव है। इहां प्रश्न—जो तुम कछा सो सत्य, परंतु द्रव्य-कर्मके उदयतैं भावकर्म होय, भावकर्मतैं द्रव्यकर्मका बंध होय, बहुरि ताके उदयतैं भावकर्म होय, ऐसैं ही अनादितैं परंपराय है, तब मोक्षका उपाय कैसें होय सकै। ताका समाधान,—



कर्मका बंध वा उदय सदाकाल समान ही हूवा करै, तौ ऐसा ही है। परंतु परिणामनिके निमित्ततैं पूर्वबंधे कर्मका भी उत्कर्षण अपकर्षण संक्रमणादि होतैं तिनकी शक्ति हीन अधिक हो है। कर्मउदयके निमित्तकरि तिनका उदय भी तीव्र मंद हो है। तिनके निमित्ततैं नवीन बंध भी तीव्र मंद हो है। तातैं संसारी जीवनिक्कै कबहू ज्ञानादिक घने प्रगट हो हैं, कबहू थोरे प्रगट हो हैं। कबहू रागादि मंद हो है, कबहू तीव्र हो है। ऐसैं ही पलटनि हूवा करै है। तहां कदाचित् संज्ञी पंचेंद्रिय पर्याप्त पर्याय पाया, तब मनकरि विचार करनेकी शक्ति भई। बहुरि याकै कबहू तीव्र रागादिक होय, कबहू मंद होय। तहां रागादिकका तीव्र उदय होतैं तौ विषयकषायदिकके कार्यनिविषै ही प्रवृत्ति होय। बहुरि रागादिकका मंद उदय होतैं बाह्य उपदेशादिकका निमित्त बनै अर आप पुरुषार्थकरि तिन उपदेशादिकविषै उपयोगकौं लगावै, तौ धर्मकार्यविषै प्रवृत्ति होय। अर निमित्त बनै, वा आप पुरुषार्थ न करै, कोई अन्य कार्यनिविषै प्रवृत्तैं, परंतु मंदरागादि लिणं प्रवृत्तैं, ऐसे अवसरविषै उपदेश कार्यकारी है। विचारशक्तिरहित एकेंद्रियादिक हैं, तिनिकै तौ उपदेश समझनेका ज्ञान ही नाही। अर तीव्ररागादिसहित जीवनका उपदेशविषै उपयोग लागै नाही। तातैं जो जीव विचारशक्तिसहित होंय, अर जिनकै रागादि मंद होंय, तिनकौं उपदेशका निमित्ततैं धर्मकी प्राप्ति होय जाय, तौ ताका भला होय। बहुरि इस ही अवसरविषै पुरुषार्थ कार्यकारी है। एकेंद्रियादिक तौ धर्मकार्य करनेकौं समर्थ ही नाही, कैसैं

पुरुषार्थ करै । अर तीव्रकषायी पुरुषार्थ करै, सो पापहीको करै, धर्म कार्यका पुरुषार्थ होय सकै नाहीं । तातैं विचारशक्तिसहित होय, अर जिसकै रागादिक मंद होय, सो जीव पुरुषार्थकरि उपदेशादिकके निमित्ततैं तत्त्वनिर्णयादिविषै उपयोग लगावै, तौ याका उपयोग तहां लागै, तब याका भला होय । जो इस अवसरविषै भी तत्त्वनिर्णय करनेका पुरुषार्थ न करै, प्रमादतैं काल गमावै । कै तौ मंदरागादि लिणं विषयकषायनिके कार्यनिहीविषै प्रवर्त्तै, कै व्यवहार धर्मकार्यनिविषै प्रवर्त्तै, तब अवसर तौ जाता रहै, संसारविषै ही भ्रमण होय । बहुरि इस अवसरविषै जे जीव पुरुषार्थकरि तत्त्वनिर्णयकरनेविषै उपयोग लगावनेका अभ्यास राखैं, तिनिकै विशुद्धता बधै, ताकरि कर्मनकी शक्ति हीन होय । कितेक कालविषै आपोआप दर्शनमोहका उपशम होय, तब याकै तत्त्वनिविषै यथावत् प्रतीति आवै । सो याका तौ कर्तव्य तत्त्वनिर्णयका अभ्यास ही है । इसहीतैं दर्शनमोहका उपशम तौ स्वयमेव ही होय । यामैं जीवका कर्तव्य किछू नाहीं । बहुरि ताकौं होतैं जीवकै स्वयमेव सम्यग्दर्शन होय । बहुरि सम्यग्दर्शन होतैं श्रद्धान तौ यह भया—मैं आत्मा हौं, मुझको रागादिक न करने । परंतु चारित्रमोहके उदयतैं रागादिक हो हैं । तहां तीव्र उदय होय, तब तौ विषयादिविषै प्रवर्त्तै है, अर मंद उदय होय, तब अपने पुरुषार्थतैं धर्मकार्यनिविषै वा वैराग्यादिभावनाविषै उपयोगकौं लगावै है । ताके निमित्ततैं चारित्रमोह मंद होता जाय । ऐसैं होतैं देशचारित्र वा सकल-चारित्र अंगीकार करनेका पुरुषार्थ प्रगट होय । बहुरि चारित्रको

धारि अपना पुरुषार्थकरि धर्मविषै परिणतिकौ बधावै, तहां विशुद्धताकरि कर्मकी हीन शक्ति होय, ताँतै विशुद्धता बधै, ताकरि अधिक कर्मकी शक्ति हीन होय । ऐसैं क्रमतैं मोहका नाश करै, तब सर्वथा परिणाम विशुद्ध होय, तिनकरि ज्ञाना-वरणादिका नाश होय, तब केवलज्ञान प्रगट होय । तहां पीछैं विना उपाय अघातिया कर्मका नाशकरि शुद्ध सिद्धपदकौ पावै । ऐसैं उपदेशका तौ निमित्त बनै, अर अपना पुरुषार्थ करै, तौ कर्मका नाश होय । बहुरि जब कर्मका उदय तीव्र होय, तब पुरुषार्थ न होय सकै है । ऊपरले गुणस्थाननितैं भी गिर जाय है । तहां तौ जैसा होनहार तैसा ही होय । परंतु जहां मंद उदय होय, अर पुरुषार्थ होय सकै, तहां तौ प्रमादी न होना-सावधान होय अपना कार्य करना । जैसैं कोऊ पुरुष नदीका प्रवाहविषै पड़्या बहै है । तहां पानीका जोर होय, तब तौ वाका पुरुषार्थ किछू नाहीं । उपदेश भी कार्यकारी नाहीं । और पानीका जोर थोरा होय, तब तो पुरुषार्थकरि निकसना चाहै, तौ निकसि आवै । तिसहीकौ निकसनेकी शिक्षा दीजिए है । और न निकसै तौ होलै २ बहै, पीछैं पानीका जोर भए बह्या चल्या जाय । तैसैं ही यह जीवसंसारविषै भ्रमै है । तहां कर्मनिका तीव्र उदय होय, तब तौ याका पुरुषार्थ किछू नाहीं । ताकौ उपदेश भी कुछ कार्यकारी नाहीं । अर कर्मका मंद उदय होय, तब पुरुषार्थकरि मोक्षमार्गविषै प्रवर्तै, तौ मोक्ष पावै । तिसहीकौ मोक्षमार्गका उपदेश दीजिए है । अर वह मोक्षमार्गविषै न प्रवर्तै, तौ किंचित् विशुद्धता पाय पीछैं तीव्र उदय आए

निगोदादि पर्यायकों पावै । तातैं अवसर चूकना योग्य नाहीं । अब सर्व प्रकार अवसर आया है, ऐसा अवसर पावना कठिन है । तातैं श्रीगुरु दयाल होय मोक्षमार्गकों उपदेशैं, तिसविषै भव्य जीवनिकों प्रवृत्ति करनी ।

अब मोक्षमार्गका स्वरूप कहिए है—

जिनके निमित्ततैं आत्मा अशुद्ध दशाकों धारि दुखी भया, ऐसे जो मोहादिक कर्म तिनिका सर्वथा नाश होतैं केवल आत्माकी जो सर्व प्रकार शुद्ध अवस्थाका होना, सो मोक्ष है । ताका जो उपाय-कारण, सो मोक्षमार्ग जानना । सो कारण तौ अनेक प्रकार हो है । कोई कारण तौ ऐसे हो हैं, जाके भए विना तो कार्य न होय, अर जाके भए कार्य होय वा न भी होय । जैसे मुनि लिंग धारे विना तौ मोक्ष न होय, परंतु मुनिलिंग धारे मोक्ष होय भी अर नाहीं भी होय । बहुरि केई कारण ऐसे हैं, जो मुख्यपनै तौ जाके भए कार्य होय, अर काहूके विना भए भी कार्य सिद्ध होय । जैसे अनशनादि बाह्य तपका साधन किए मुख्यपनै मोक्ष पाइए है, परंतु भरतादिकके बाह्य तप किए विना ही मोक्षकी प्राप्ति भई । बहुरि केई कारण ऐसे हैं; जाके भए कार्य सिद्ध होय ही होय, और जाके न भए कार्य सिद्धि सर्वथा न होय । जैसे सम्यग्दर्शन ज्ञान चारित्रकी एकता भए तौ मोक्ष होय ही होय, अर तिनके न भए सर्वथा मोक्ष न होय । ऐसे ए कारण कहे, तिनविषै अतिशयकरि नियमतैं मोक्षका साधक जो सम्यग्दर्शनज्ञानचारित्रका एकीभाव, सो मोक्षमार्ग जानना । इनि सम्यग्दर्शन सम्यग्ज्ञान सम्यक्चारित्रनिविषै एक भी न होय, तो मोक्षमार्ग न होय । सोई तत्त्वार्थमूत्रविषै कहा है—

## सम्यग्दर्शनज्ञानचारित्राणि मोक्षमार्गः ॥ १ ॥

इंस सूत्रकी टीकाविषै कब्बा है—जो यहां मोक्षमार्गः ऐसा एक वचन कब्बा है, ताका अर्थ यह है—जो तीनों मिले एक मोक्षमार्ग है । जुदे २ तीन मार्ग नाहीं है । यहां प्रश्न—जो असंयत सम्यग्दृष्टिकै तौ चारित्र नाहीं, वाकै मोक्षमार्ग भया है कि न भया है । ताका समाधान—

मोक्षमार्ग वाकै होसी, यह तौ नियम भया । तातैं उपचारतैं वाकै मोक्षमार्ग भया भी कहिए । परमार्थतैं सम्यक्चारित्र भए ही मोक्षमार्ग हो है । जैसे कोई पुरुषकै किसी नगर चलनेका निश्चय भया । तातैं वाकै व्यवहारतैं ऐसा भी कहिए जो “यह तिस नगरकौ चल्या है ।” परमार्थतैं मार्गविषै गमन किए ही चलना होसी । तैसें असंयत सम्यग्दृष्टीकै वीतरागभावरूप मोक्षमार्गका श्रद्धान भया, तातैं वाकौ उपचारतैं मोक्षमार्ग कहिए, परमार्थतैं वीतरागभावरूप परिणमै ही मोक्षमार्ग होसी । बहुरि प्रवचनसारविषै भी तीनोंकी एकाग्रता भए ही मोक्षमार्ग कब्बा है । तातैं यह जानना—तत्त्वश्रद्धान विना तौ रागादि घटाए मोक्षमार्ग नाहीं अर रागादि घटाए विना तत्त्वश्रद्धानज्ञानतैं भी मोक्षमार्ग नाहीं । तीनों मिले साक्षात् मोक्षमार्ग हो है ।

अब इनका निर्देश अर लक्षण निर्देश अर परीक्षाद्वारा निरूपण कीजिए है । तहां “सत्यग्दर्शन सम्यग्ज्ञान सम्यक्चारित्र मोक्षमार्ग है,” ऐसा नाम मात्र कथन सो तौ ‘निर्देश’ जानना । बहुरि अतिव्याप्ति अव्याप्ति असंभवपनाकरि रहित होय, जाकरि इनकौ पहचानिए, सो ‘लक्षण’ जानना । ताका जो निर्देश कहिए, निरू-

पण सो 'लक्षण निर्देश' जानना । तहां जाकौं पहचानना होय, ताका नाम लक्ष्य है । उस विना औरका नाम अलक्ष्य है । सो लक्ष्य वा अलक्ष्य दोऊविषै पाइए, ऐसा लक्षण जहां कहिए तहां अतिव्यासिपनौ जानना । जैसे आत्माका लक्षण 'अमूर्त्तत्व' कइया । सो अमूर्त्तत्व लक्षण है, सो लक्ष्य जो है आत्मा तिसविषै भी पाइए है अर अलक्ष्य जो हैं आकाशादिक तिनविषै भी पाइए । तातैं यह 'अतिव्याप्त' लक्षण है । याकरि आत्मा पहचानैं आकाशादिक भी आत्मा होय जांय, यह दोष लागै । बहुरि जो कोई लक्ष्यविषै तौ होय अर कोईविषै न होय, ऐसा लक्ष्यका एकदेशविषै पाइए, ऐसा लक्षण जहां कहिए, तहां अव्यासिपना जानना । जैसे—आत्माका लक्षण केवलज्ञान कहिए, सो केवलज्ञान कोई आत्माविषै तौ पाइए, कोईविषै न पाइए, तातैं यह 'अव्याप्त' लक्षण है । याकरि आत्मा पहचानैं, स्तोकज्ञानी आत्मा न होय, यह दोष लागै । बहुरि जो लक्ष्यविषै पाइए ही नाहीं, ऐसा लक्षण जहां कहिए, तहां असंभवपणा जानना । जैसे आत्माका लक्षण जड़पना कहिए । सो प्रत्यक्षादि प्रमाणकरि यह विरुद्ध है । तातैं यह 'असंभव' लक्षण है । याकरि आत्मा मानैं पुद्गलादिक भी आत्मा होय जांय । अर आत्मा है, सो अनात्मा होय जाय, यह दोष लागै । ऐसेँ अतिव्याप्त अव्याप्त असंभवी लक्षण होय, सो लक्षणाभास है । बहुरि लक्ष्यविषै तौ सर्वत्र पाइए, अर अलक्ष्यविषै कहीं न पाइए, सो सांचा लक्षण है । जैसे आत्माका लक्षण चैतन्य है । सो यह लक्षण सर्व ही आत्माविषै तौ पाइए है, अनात्माविषै कहीं न पाइए । तातैं यह सांचा

लक्षण है। याकरि आत्मा मानें आत्मा अनात्माका यथार्थ ज्ञान होय, किछू दोष लागै नाहीं। ऐसैं लक्षणका स्वरूप उदाहरण-मात्र कखा।

अब सम्यग्दर्शनादिकका सांचा लक्षण कहिए है,—विपरीता-भिनिवेशरहित जीवादि तत्त्वार्थश्रद्धान सो सम्यग्दर्शनका लक्षण है। जीव, अजीव, आस्रव, बंध, संवर, निर्जरा, मोक्ष, ए सात तत्त्वार्थ हैं। इनका जो श्रद्धान 'ऐसैं ही है अन्यथा नाहीं' ऐसा प्रतीति भाव, सो तत्त्वार्थश्रद्धान है। बहुरि विपरीताभिनिवेश जो अन्यथा अभिप्राय ताकरि रहित सो सम्यग्दर्शन है। यहां विपरीताभिनिवेशका निराकरणके अर्थि 'सम्यक्' पद कखा है। जातैं 'सम्यक्' ऐसा शब्द प्रशंसावाचक है। सो श्रद्धानविषै विपरीताभिनिवेशका अभाव भए ही प्रशंसा संभवै है, ऐसा जानना। यहां प्रश्न—जो 'तत्त्व' अर 'अर्थ' ए दोय पद कहे, तिनिका प्रयोजन कहा। ताका समाधान,—

'तत्' शब्द है सो 'यत्' शब्दकी अपेक्षा लिए है। तातैं जाका प्रकरण होय, सो तत् कहिए, अर जाका जो भाव कहिए स्वरूप सो तत्त्व जानना। जातैं 'तस्य भावस्तत्त्वं' ऐसा तत्त्व शब्दका समास होय है। बहुरि जो जाननेमें आवै ऐसा 'द्रव्य' वा 'गुण पर्याय' ताका नाम अर्थ है। बहुरि 'तत्त्वेन अर्थ-स्तत्त्वार्थः' तत्त्व कहिए अपना स्वरूप, ताकरि सहित पदार्थ तिनिका श्रद्धान सो सम्यग्दर्शन है। यहां जो 'तत्त्वश्रद्धान' ही कहते, तौ जाका यह भाव (तत्त्व) है, ताका श्रद्धान विना केवल भावहीका श्रद्धान कार्यकारी नाहीं। बहुरि जो 'अर्थ-

श्रद्धान' ही कहते, तौ भावका श्रद्धान विना पदार्थका श्रद्धान भी कार्यकारी नाहीं । जैसें कोईकै ज्ञान दर्शनादिक वा वर्णादिकका तौ श्रद्धान होय—यह जानपना है, यह श्वेतवर्ण है, इत्यादि । परंतु ज्ञान दर्शन आत्माका स्वभाव है, सो मैं आत्मा हौं । बहुरि वर्णादि पुद्गलका स्वभाव है । पुद्गल मोतैं भिन्न जुदा पदार्थ है । ऐसा पदार्थका श्रद्धान न होय, तौ भावका श्रद्धान मात्र कार्यकारी नाहीं । बहुरि जैसें 'मैं आत्मा हौं' ऐसें श्रद्धान किया, परंतु आत्माका स्वरूप जैसा है, तैसा श्रद्धान न किया । तौ भावका श्रद्धान विना पदार्थका भी श्रद्धान कार्यकारी नाहीं । तातैं तत्त्वका-अर्थका श्रद्धान हो है, सो ही कार्यकारी है । अथवा जीवादिककौ तत्त्व संज्ञा भी है, अर्थ संज्ञा भी है तातैं 'तत्त्वमेवार्थस्तत्त्वार्थः' जो तत्त्व सो ही अर्थ, तिनका श्रद्धान सो सम्यग्दर्शन है । इस अर्थकरि कहीं तत्त्वश्रद्धानकौ सम्यग्दर्शन कहै, वा कहीं पदार्थ-श्रद्धानकौ सम्यग्दर्शन कहै, तहां विरोध न जानना । ऐसें 'तत्त्व' और 'अर्थ' दोय पद कहनेका प्रयोजन है । यहां प्रश्न—जो तत्त्वार्थ तौ अनंते हैं । ते सामान्य अपेक्षाकरि जीव अजीवविषै सर्व गर्भित भए, तातैं दोय ही कहने थे । आस्रवादिक तौ जीव अजीवहीके विशेष हैं, इनकौ जुदा जुदा कहनेका प्रयोजन कहा । ताका समाधान—

जो यहां पदार्थश्रद्धानका ही प्रयोजन होता, तौ सामान्यकरि वा विशेषकरि जैसें पदार्थनिका जानना होय, तैसें ही कथन करते । सो तौ यहां प्रयोजन है नाहीं । यहां तौ मोक्षका प्रयोजन हैं । सो जिन सामान्य वा विशेष भावनिका श्रद्धान किए मोक्ष



होय, अर जिनका श्रद्धान किए विना मोक्ष न होय, तिनहीका यहां निरूपण किया । सो जीव अजीव ए दोय तौ बहुत द्रव्यनकी एक जाति अपेक्षा सामान्यरूप तत्त्व कहे । सो ए दोय जाति जानें जीवके आपापरका श्रद्धान होय । तब परतैं भिन्न आपकौं जानै, अपना हितके अर्थि मोक्षका उपाय करै, अर आपतै भिन्न परकौं जानै, तब परद्रव्यतैं उदासीन होय रागादिक त्यागि मोक्षमार्ग-विषै प्रवर्तै । तातैं इन दोऊ जातिका श्रद्धान भए ही मोक्ष होय । अर दोऊ जाति जानें विना आपापरका श्रद्धान न होय, तब पर्यायबुद्धितैं संसारीक प्रयोजनहीका उपाय करै । परद्रव्यविषै रागद्वेषरूप होय प्रवर्तै, तब मोक्षमार्गविषै कैसें प्रवर्तै । तातैं इन दोय जातीनिका श्रद्धान न भए मोक्ष न होय । ऐसैं ए दोय तो सामान्य तत्त्व अवश्य श्रद्धान करने योग्य कहे । बहुरि आसवा-दिक पांच कहे, ते जीव पुद्गलके पर्याय हैं । तातैं ए विशेषरूप तत्त्व हैं । सो इन पांच पर्यायनिकौं जानें मोक्षका उपाय करनेका श्रद्धान होय । तहां मोक्षकौं पहिचानै, तौ ताकौं हित मानि ताका उपाय करै । तातैं मोक्षका श्रद्धान करना । बहुरि मोक्षका उपाय संवर निर्जरा है । सो इनकौं पहिचानै तौ जैसें संवर निर्जरा होय, तैसें प्रवर्तै । तातैं संवर निर्जराका श्रद्धान करना । बहुरि संवर निर्जरा तौ अभाव लक्षण लिए है, सो जिनका अभाव किया चाहिए, तिनकौं पहिचानना चाहिए । जैसें क्रोधका अभाव भए क्षमा होय । सो क्रोधकौं पहिचानै, तौ ताका अभाव करि क्षमा रूप प्रवर्तै । तैसें ही आसवका अभाव भए संवर होय अर बंधका एकदेश अभाव भए निर्जरा होय । सो आसव बंधकौं पहिचानै, तौ तिनिका

नाशकरि संवर निर्जरारूप प्रवर्तै । तातैं आस्रव बंधका श्रद्धान करना । ऐसैं इनि पांच पर्यायनिका श्रद्धान भए ही मोक्षमार्ग होय । इनिकौं न पहचानै, तौ मोक्षकी पहचान विना ताका उपाय काहेकौं करै । संवर निर्जराकी पहचान विना तिनिविषै कैसें प्रवर्तैं । आस्रव बंधकी पहचान विना तिनिकरि नाश कैसें करै । ऐसैं इन पांच पर्यायनिका श्रद्धान न भए मोक्ष न होय । या प्रकार यद्यपि तत्त्वार्थ अनंते हैं, तिनिका सामान्य विशेषकरि अनेक प्रकार प्ररूपण होय । परंतु यहां मोक्षका प्रयोजन है, तातैं दोग्य तो जातिअपेक्षा सामान्य तत्त्व अर पांच पर्यायरूप विशेष तत्त्व मिलाय सात ही तत्त्व कहे । इनिका यथार्थ श्रद्धानके आधीन मोक्षमार्ग है । इनि विना औरनिका श्रद्धान होहु वा मति होहु, वा अन्यथा श्रद्धान होहु, किसीके आधीन मोक्षमार्ग नाहीं । ऐसा जानना । बहुरि कहीं पुण्य पाप सहित नव पदार्थ कहे हैं । सो पुण्य पाप आस्रवादिकके ही विशेष हैं । तातैं साततत्त्वविषै गर्भित भए । अथवा पुण्यपापका श्रद्धान भए पुण्यकौं मोक्षमार्ग न मानै, वा स्वच्छंद होय पापरूप न प्रवर्तैं, तातैं मोक्षमार्गविषै इनिका श्रद्धान भी उपकारी जानि दोग्य तत्त्व विशेष मिलाय नव तत्त्व कहे । वा समयसारादिविषै इनकौं नव तत्त्व भी कहे हैं । बहुरि प्रश्न—इनिका श्रद्धान सम्यग्दर्शन कखा, सो दर्शन तौ सामान्य अवलोकन मात्र अर श्रद्धान प्रतीति मात्र, इनिकै एकार्थ-पनौ कैसें संभवै । ताका उत्तर—

प्रकरणके वशतैं धातुका अर्थ अन्यथा होय है । सो यहां प्रकरण मोक्षमार्गका है, तिसविषै 'दर्शन' शब्दका अर्थ सामान्य

अवलोकन मात्र ग्रहण न करना । जातैं चक्षु अचक्षु दर्शनकरि सामान्य अवलोकन सम्यग्दृष्टि मिथ्यादृष्टिके समान होय है । कुछ याकरि मोक्षमार्गकी प्रवृत्ति होती नाहीं । बहुरि श्रद्धान हो है, सो सम्यग्दृष्टीहीकै हो है । याकरि मोक्षमार्गकी प्रवृत्ति हो है । तातैं 'दर्शन' शब्दका अर्थ भी यहां श्रद्धान मात्र ही ग्रहण करना । बहुरि प्रश्न—यहां विपरीताभिनिवेशरहित श्रद्धान करना कह्या, सो प्रयोजन कहा । ताका समाधान—

अभिनिवेशनाम अभिप्रायका है । सो जैसा तत्त्वार्थश्रद्धानका अभिप्राय है, तैसा न होय अन्यथा अभिप्राय होय, ताका नाम विपरीताभिनिवेश है । सो तत्त्वार्थश्रद्धान करनेका अभिप्राय केवल तिनिका निश्चय करना मात्र ही नाहीं है । तहां अभिप्राय ऐसा है—जीव अजीवकों पहचानि आपकों वा परकों जैसाका तैसा मानै । बहुरि आस्रवकों पहचानि ताकों हेय मानै । बहुरि बंधकों पहचानि ताकों अहित मानै । बहुरि संवरकों पहचानि ताकों उपादेय मानै । बहुरि निर्जराकों पहचानि ताकों हितका कारण मानै । बहुरि मोक्षकों पहचानि ताकों अपना परमहित मानै । ऐसैं तत्त्वार्थश्रद्धानका अभिप्राय है । तिसतैं उलटा अभिप्रायका नाम विपरीताभिनिवेश है । सो सांचा तत्त्वार्थश्रद्धान भए याका अभाव होय । तातैं तत्त्वार्थश्रद्धान है, सो विपरीताभिनिवेशरहित है । ऐसा यहां कह्या है । अथवा काहूकै अभ्यास मात्र तत्त्वार्थश्रद्धान हो है । परंतु अभिप्रायविषै विपरीतपनौ नहीं छूटै है । कोई प्रकारकरि पूर्वोक्त अभिप्रायतैं अन्यथा अभिप्राय अंतरंगविषै पाइए है, तौ वाकै सम्यग्दर्शन न होय । जैसैं

द्रव्यलिंगी मुनि जिनवचनतैं तत्त्वनिकी प्रतीति करै । परंतु शरीराश्रित क्रियानिविषै अहंकार वा पुण्यास्रवविषै उपादेय-पना आदि विपरीत अभिप्रायतैं मिथ्यादृष्टी ही रहै है । तातैं जो तत्त्वार्थश्रद्धान विपरीताभिनिवेशरहित है, सोई सम्यग्दर्शन है । ऐसैं विपरीताभिनिवेशरहित जीवादि तत्त्वनिका श्रद्धानपना तौ सम्यग्दर्शनका लक्षण है । सम्यग्दर्शन लक्ष्य है । सोई तत्त्वार्थ-सूत्रविषै कछा है,—‘तत्त्वार्थश्रद्धानं सम्यग्दर्शनम्’ ॥ २ ॥ तत्त्वार्थनिका श्रद्धान सोई सम्यग्दर्शन है । बहुरि सर्वार्थसिद्धि नामा सूत्रनिकी टीका है, तिसविषै तत्त्वादिक पदनिका अर्थ प्रगट लिख्या है, वा सात ही तत्त्व कैसैं कहे सो प्रयोजन लिख्या है, ताके अनुसारतैं इहां किछू कथन किया है, ऐसा जानना ।

बहुरि पुरुषार्थसिद्धयुपायके विषै ऐसैं ही कछा है—

जीवाजीवादीनां तत्त्वार्थानां सदैव कर्त्तव्यम् ।

श्रद्धानं विपरीताभिनिवेशविविक्तमात्मरूपं तत् ॥२२॥

याका अर्थ—विपरीताभिनिवेशकरि रहित जीवअजीव आदि तत्त्वार्थनिका श्रद्धान सदाकाल करना योग्य है । सो यह श्रद्धान आत्माका स्वरूप है । दर्शनमोह उपाधि दूर भए प्रगट हो है, तातैं आत्माका स्वभाव है । चतुर्थादि गुणस्थानविषै प्रगट हो है । पीछैं सिद्ध अवस्थाविषै भी सदा काल याका सद्भाव रहै है, ऐसा जानना । यहां प्रश्न उपजै है—जो तिर्यचादि तुच्छज्ञानी केई जीव सात तत्त्वनिका नाम भी न जानि सकैं, तिनिकै भी सम्यग्दर्शनकी प्राप्ति शास्त्रविषै कही है । तातैं तत्त्वार्थश्रद्धानपना तुम सम्यक्त्वका लक्षण कछा, तिसविषै अव्यासिदूषण लागै है । ताका समाधान,—

जीव अजीवादिकका नामादिक जानौ वा मति जानौ, वा अन्यथा जानौ, उनका स्वरूप यथार्थ पहचानि श्रद्धान किए सम्यक्त्व हो है। तहां कोई सामान्यपनै स्वरूप पहचानि श्रद्धान करै, कोई विशेषपनै स्वरूप पहचानि श्रद्धान करै। तातैं तुच्छ-ज्ञानी तिर्यचादिक सम्यग्दृष्टी हैं, सो जीवादिकका नाम भी न जानै हैं, तथापि उनका सामान्यपनै स्वरूप पहचानि श्रद्धान करै हैं। तातैं उनकाँ सम्यक्त्वकी प्राप्ति हो है। जैसें कोई तिर्यच अपना वा औरनिका नामादिक तौ नाहीं जानै, परंतु आपहीविषै आपौ मानै है, औरनिकाँ पर मानै है। तैसें तुच्छज्ञानी जीव अजीवका नाम न जानै, परंतु ज्ञानादिकस्वरूप आत्मा है, तिसविषै आपौ मानै है। अर जो शरीरादिक हैं, तिनकाँ पर मानै है। ऐसा श्रद्धान वाकै हो है, सो ही जीव अजीवका श्रद्धान है। बहुरि जैसें सोई तिर्यच सुखादिकका नामादिक न जानै है, तथापि सुख अवस्थाकाँ पहचानि ताके अर्थ आगामी दुःखका कारणकाँ पहि-चानि ताका त्यागकाँ किया चाहै है। बहुरि जो दुःखका कारण बनि रखा है, ताके अभावका उपाय करै है। तातैं तुच्छज्ञानी मोक्षादिकका नाम न जानै, तथापि सर्वथा सुखरूप मोक्ष अव-स्थाकाँ श्रद्धान करि ताके अर्थ आगामी बंधका कारण रागादिक आस्रव ताके त्यागरूप संवरकाँ किया चाहै है। बहुरि जो संसार-दुःखका कारण है, ताकी शुद्धभावकरि निर्जरा किया चाहै है। ऐसें आस्रवादिकका वाकै श्रद्धान है। या प्रकार वाकै भी सप्ततत्त्वका श्रद्धान पाइए है। जो ऐसा श्रद्धान न होय, तौ रागादि त्यागि शुद्ध भाव करनेकी चाह न होय। सोई कहिए है—जो जीवकी

जाति न जानै, आपापरकों न पहचानै, तौ परविषै रागादिक कैसें न करै । रागादिककों न पहचानै, तो तिनका त्याग कैसें किया चाहै । सो रागादिक ही आस्रव हैं । रागादिकका फल बुरा न जानै, तौ काहेकों रागादिक छोड़्या चाहै । सो रागादिकका फल सोई बंध है । बहुरि रागादिक रहित परिणामकों पहिचानै है, तौ तिसरूप हुवा चाहै है । सो रागादिकरहित परिणामका ही नाम संवर है । बहुरि पूर्वे संसार अवस्थाका कारण कर्म है, ताकी हानिकों पहिचानै है, तौ ताकै अर्थि तपश्चरणादिकरि शुद्ध-भाव किया चाहै है । सो पूर्व संसारअवस्थाका कारण कर्म है, ताकी हानि सोई निर्जरा है । बहुरि संसार अवस्थाका अभाव-कों न पहिचानै, तौ संवर निर्जरारूप काहेकों प्रवर्तै । संसार अवस्थाका अभाव सो ही मोक्ष है । तातैं सातों तत्त्वनिका श्रद्धान भए ही रागादिक छोड़ि शुद्ध भाव होनेकी इच्छा उपजै है । जो इनिविषै एक भी तत्त्वका श्रद्धान न होय, तौ ऐसी चाह न उपजै । बहुरि ऐसी चाह तुच्छज्ञानी तिर्यचादि सम्यग्दृष्टिकै होय ही है, तातैं वाकै सप्ततत्त्वनिका श्रद्धान पाइए है । ऐसा निश्चय करना । ज्ञानावरणका क्षयोपशम थोरा होतैं विशेषपनै तत्त्वनिका ज्ञान न होवै, तथापि दर्शनमोहका उपशमादिकतैं सामान्यपनै तत्त्वश्रद्धानकी शक्ति प्रगट हो है । ऐसैं इस लक्षणविषै अब्याप्ति दूषण नाही है । बहुरि प्रश्न—जिसकालविषै सम्यग्दृष्टी विषयकषायनिके कार्यनिविषै प्रवर्तै है, तिसकालविषै सप्त तत्त्वनिका विचार ही नाही, तहां श्रद्धान कैसें संभवै । अर सम्यक्त्व रहै ही है, तातैं तिस लक्षणविषै अब्याप्ति दूषण आवै है । ताका समाधान,—

विचार है, सो तौ उपयोगके आधीन है । जहां उपयोग लागै, तिसहीका विचार है । बहुरि श्रद्धान है, सो प्रतीतिरूप है । तातैं अन्य ज्ञेयका विचार होतैं वा सोवना आदि क्रिया होतैं तत्त्वनिका विचार नाहीं, तथापि तिनकी प्रतीति बनी रहै है, नष्ट न हो है । तातैं वाकै सम्यक्त्वका सद्भाव है । जैसें कोई रोगी पुरुषकै ऐसी प्रतीति है—मैं मनुष्य हौं, तिर्यच नहीं हौं । मेरे इस कारणतैं रोग भया है । सो अब कारण भेदि रोगकौं घटाय निरोग होना । बहुरि वो ही मनुष्य प्रश्न विचारादिरूप प्रवर्तैं है, तब वाकै ऐसा विचार न हो है । परन्तु श्रद्धान ऐसें ही रखा करै है । तैसें इस आत्माकै ऐसी प्रतीति है—मैं आत्मा हौं, पुद्गलादि नहीं हौं, मेरे आस्रवतैं बंध भया है, सो अब संवरकरि निर्जरा करि मोक्षरूप होना । बहुरि सोई आत्मा अन्य विचारादिरूप प्रवर्तैं है, तब वाकै ऐसा विचार न हो है । परन्तु श्रद्धान ऐसा ही रखा करै है । बहुरि प्रश्न—जो ऐसा श्रद्धान रहै है, तौ बंध होनेके कारणनिविषै कैसें प्रवर्तैं है । ताका उत्तर—

जैसें कोई मनुष्य कोई कारणके वशतैं रोग बधनेके कारणनिविषै भी प्रवर्तैं । व्यापारादिक कार्य वा क्रोधादिक कार्य करै है, तथापि तिस श्रद्धानका वाकै नाश न हो है । तैसें सो ही आत्मा कर्म उदय निमित्तके वशतैं बंध होनेके कारणनिविषै भी प्रवर्तैं है । विषयसेवनादि कार्य वा क्रोधादि कार्य करै है, तथापि तिस श्रद्धानका वाकै नाश न हो है । याका विशेष निर्णय आगैं करैगे । ऐसा सप्ततत्वका विचार न होते भी श्रद्धानका सद्भाव

पाइए है । ताँतैं तहां अव्याप्तिपना नहीं है । बहुरि प्रश्न—ऊंची दशाविषै जहां निर्विकल्प आत्मानुभव हो है, तहां तौ सप्त तत्त्वादिकका विकल्प भी निषेध किया है । सो सम्यक्त्वके लक्षणका निषेध करना, कैसैं संभवै । अर तहां निषेध संभवै है, तो अव्याप्ति दूषण आया । ताका उत्तर—

नीचली दशाविषै सप्त तत्त्वनिके विकल्पनिषेधै उपयोग लगाया, ताकरि प्रतीतिकौ दृढ कीन्हीं, अर विषयादिकतैं उपयोग छुड़ाय रागादि घटाया, बहुरि कार्य सिद्ध भए कारणादिक भी निषेध कीजिए है । ताँतैं जहां प्रतीति भी दृढ भई, अर रागादिक दूर भए, तहां उपयोग भ्रमावनेका खेद काहेकौं करिए । ताँतैं तहां तिनिके विकल्पनिका निषेध किया है । बहुरि सम्यक्त्वका लक्षण तौ प्रतीति ही है । सो प्रतीतिका तौ निषेध न किया । जो प्रतीति छुड़ाई होय, तौ इस लक्षणका निषेध किया कहिए । सो तौ है नाहीं । सो तौ तत्त्वनिकी प्रतीति तहां भी बनी रहै है । ताँतैं यहां अव्याप्तिपना नाहीं है । बहुरि प्रश्न—जो छद्मस्थकै तौ प्रतीति अप्रतीति कहना संभवै है, ताँतैं तहां सप्त तत्त्वनिकी प्रतीति सम्यक्त्वका लक्षण कब्बा सो हम मान्या, परन्तु केवली सिद्ध भगवानकै तौ सर्वका जानपना समान रूप है । तहां सप्ततत्त्वनिकी प्रतीति कहना, संभवै नाहीं । अर तिनिकै सम्यक्त्व गुण पाइए ही है, ताँतैं तहां तिस लक्षणका अव्याप्तिपना आया । ताका समाधान—

जैसे छद्मस्थके श्रुतज्ञानके अनुसार प्रतीति पाइए हैं, तैसे केवली सिद्धभगवानके केवलज्ञानके अनुसार ही प्रतीति पाइए



है। जो सप्त तत्त्वनिका स्वरूप पहिले ठीक किया था, सो ही केवलज्ञानकरि जान्या। तहां प्रतीतिकौ परम अवगाढ़पनो भयो। याहीतैं परमअवगाढ़ सम्यक्त्व कखा। जो पूर्व श्रद्धान किया था, ताकौ झूठ जान्या होता, तौ तहां अप्रतीति होती। सो तौ जैसा सप्त तत्त्वनिका श्रद्धान छद्मस्थके भया था, तैसा ही केवली सिद्धभगवानके पाइए है। तातैं ज्ञानदिककी हीनता अधिकता होतैं भी तिर्यचादिक वा केवली सिद्ध भगवानकै सम्यक्त्व गुण समान ही कखा। बहुरि पूर्व अवस्थाविषै यह मानै था, संवर निर्जराकरि मोक्षका उपाय करना। पीछैं मुक्ति अवस्था भए ऐसैं मानने लगै, जो संवर निर्जराकरि हमारे मोक्ष भई। बहुरि पूर्व ज्ञानकी हीनताकरि जीवादिकके थोड़े विशेष जानै था, पीछे केवलज्ञान भए तिनके सर्व विशेष जानै। परन्तु मूलभूत जीवादिकके स्वरूपका श्रद्धान जैसा छद्मस्थके पाइए है, तैसा ही केवलीके पाइए है। बहुरि यद्यपि केवली सिद्ध भगवान् अन्यपदार्थनिकौ भी प्रतीति लिए जानै हैं, तथापि ते पदार्थ प्रयोजन-भूत नाहीं। तातैं सम्यक्त्वगुणविषै सप्त तत्त्वनिहीका श्रद्धान ग्रहण किया है। केवली सिद्धभगवान् रागादिरूप न परिणमें हैं। संसार अवस्थाकौ न चाहै हैं। सो यह इस श्रद्धानका बल जानना। बहुरि प्रश्न—जो सम्यग्दर्शन तौ मोक्षमार्ग कखा था, मोक्षविषै याका सद्भाव कैसे कहिए है। ताका उत्तर—कोई कारण ऐसा भी हो है, जो कार्य सिद्ध भए भी नष्ट न हो है। जैसे काहू वृक्षकै कोई एक शाखाकरि अनेक शाखायुक्त अवस्था भई, तिसकौ होतैं वह एक शाखा नष्ट न हो है। तैसें काहू आत्माकै

सम्यक्त्व गुणकरि अनेकगुणयुक्त मुक्त अवस्था भई, ताकौं होतैं सम्यक्त्व गुण नष्ट न हो है । ऐसैं केवली सिद्धभगवानकै भी तत्त्वार्थश्रद्धान लक्षण ही सम्यक्त्व पाइए है । तातैं तहां अव्याप्तिपनौ नाहीं है । बहुरि प्रश्न—मिथ्यादृष्टीकै भी तत्त्वश्रद्धान हो है, ऐसा शास्त्रविषै निरूपण है । प्रवचनसारविषै आत्मज्ञान-शून्य तत्त्वार्थश्रद्धान अकार्यकारी कहा है । तातैं सम्यक्त्वका लक्षण तत्त्वार्थश्रद्धान कहा है, तिसविषै अतिव्याप्ति दूषण लागै है । ताका समधान,—

मिथ्यादृष्टीकै जो तत्त्वश्रद्धान कहा है, सो नामनिक्षेपकरि कहा है । जामें तत्त्वश्रद्धानका गुण नाहीं, अर व्यवहारविषै जाका नाम तत्त्वश्रद्धान कहिए, सो मिथ्यादृष्टीकै हो है । अथवा आगमद्रव्यनिक्षेपकरि हो है । तत्त्वार्थश्रद्धानके प्रतिपादक शास्त्र-निकौं अभ्यास है, तिनिका स्वरूप निश्चय करनेविषै उपयोग नाहीं लगावै है, ऐसा जानना । बहुरि यहां सम्यक्त्वका लक्षण तत्त्वार्थश्रद्धान कहा है, सो भावनिक्षेपकरि कहा है । सो गुण-सहित सांचा तत्त्वार्थश्रद्धान मिथ्यादृष्टीके कदाचित् न होय । बहुरि आत्मज्ञानशून्य तत्त्वार्थश्रद्धान कहा है । तहां भी सोई अर्थ जानना । सांचा जीव अजीवादिकका जाकै श्रद्धान होय, ताकै आत्मज्ञान कैसें न होय । होय ही होय । ऐसैं कोई मिथ्यादृष्टीकै सांचा तत्त्वार्थश्रद्धान सर्वथा न पाइए है, तातैं तिस लक्षणविषै अतिव्याप्ति दूषण न लागै है ।

बहुरि जो यह तत्त्वार्थश्रद्धान लक्षण कहा, सो असंभवी भी नाहीं है । जातैं सम्यक्त्वका प्रतिपक्षी मिथ्यात्व ही है । याका

लक्षण इससे विपरीतता लिए है । ऐसैं अव्याप्ति अतिव्याप्ति असं-  
भवीपनाकरि रहित सर्व सम्यग्दृष्टीनिविषै तौ पाइए, अर कोई  
मिथ्यादृष्टीविषै न पाइए, ऐसा सम्यग्दर्शनका सांचा लक्षण तत्त्वार्थ-  
श्रद्धान है । बहुरि प्रश्न उपजै है—जो यहां सातौं तत्त्वनिके  
श्रद्धानका नियम कहो हौ, सो बनै नाहीं । जातै कहीं परतैं  
भिन्न आपका श्रद्धानहीकौं सम्यक्त्व कहै हैं । समयसारविषै  
'एकत्वे नियतस्य' इत्यादि कलशा लिखा है, तिसविषै ऐसा कह्या  
है,—जो इसका आत्माका परद्रव्यतैं भिन्न अवलोकन सो ही नियम-  
तैं सम्यग्दर्शन है । तातैं नव तत्त्वनिकी संततिकौं छोड़ि हमारै यह  
एक आत्मा ही होहु । बहुरि कहीं एक आत्माके निश्चयहीकौं  
सम्यक्त्व कहै हैं । पुरुषार्थसिद्धयुपायविषै 'दर्शनमात्मविनि-  
श्चितिः' ऐसा पद है । सो याका यह ही अर्थ है । तातैं जीव  
अजीवहीका वा केवल जीवहीका श्रद्धान भए भी सम्यक्त्व हो  
है । सातौं तत्त्वनिका श्रद्धानका नियम होता, तौ ऐसा काहेकौं  
लिखते । ताका समाधान,—

परतैं भिन्न आपका श्रद्धान हो है, सो आस्रवादिकका श्रद्धान-  
करि रहित हो है कि सहित हो है । जो रहित हो है, तौ मोक्षका  
श्रद्धान विना किस प्रयोजनके अर्थि ऐसा उपाय करै है । संवर

१ एकत्वे नियतस्य शुद्धनयतो व्यासुर्यदस्यात्मनः  
पूर्णज्ञानघनस्य दर्शनमिह द्रव्यान्तरेभ्यः पृथक् ।  
सम्यग्दर्शनमेतदेव नियमादात्मा च तावानयम्  
तन्मुक्तानवतत्त्वसन्ततिमिमांसात्मायमेकोऽस्तु नः ॥ ६ ॥

२ दर्शनमात्मविनिश्चितिरात्मपरिज्ञानमिष्यते बोधः ।  
स्थितिरात्मनि चारित्रं कुत एतेभ्यो भवति बन्धः ॥ २१६ ॥

निर्जराका श्रद्धान विना रागादिकरहित होय स्वरूपविषै उपयोग लगावनेका काहेकौ उद्यम राखै है । आस्रव बंधका श्रद्धान विना पूर्व अवस्थाकौ काहेकौ छाड़ै है । तातैं आस्रवादिकका श्रद्धानरहित आपापरका श्रद्धान करना संभवै नाहीं । बहुरि जो आस्रवादिकका श्रद्धानसहित हो है, तौ स्वयमेव सातौ तत्त्वनिके श्रद्धानका नियम भया । बहुरि केवल आत्माका निश्चय है, सो परका पररूप श्रद्धान भए विना आत्माका श्रद्धान न होय, तातैं अजीवका श्रद्धान भए ही जीवका श्रद्धान होय । बहुरि पूर्ववत् आस्रवादिकका भी श्रद्धान होय ही होय । तातैं यहां भी सातौ तत्त्वनिके ही श्रद्धानका नियम जानना । बहुरि आस्रवादिकका श्रद्धान विना आपापरका श्रद्धान वा केवल आत्माका श्रद्धान सांचा होता नाहीं । जातैं आत्मा द्रव्य है, सो तौ शुद्ध अशुद्ध पर्याय लिए है । जैसे तंतु अवलोकन विना पटका अवलोकन न होय, तैसें शुद्ध अशुद्ध पर्याय पहचाने विना आत्मद्रव्यका श्रद्धान न होय । सो शुद्ध अशुद्ध अवस्थाकी पहचानि आस्रवादिककी पहचानतैं हो है । बहुरि आस्रवादिकका श्रद्धान विना आपापरका श्रद्धान वा केवल आत्माका श्रद्धान कार्यकारी भी नाहीं । जातैं श्रद्धान करो वा मति करो, आप है सो आप ही है, पर है सो पर ही है । बहुरि आस्रवादिकका श्रद्धान होय, तौ आस्रवबंधका अभावकरि संवर निर्जरारूप उपायतैं मोक्षपदकौ पावै । बहुरि जो आपापरका भी श्रद्धान कराइए है, सो तिस ही प्रयोजनके अर्थि कराइए है । तातैं आस्रवादिकका श्रद्धानसहित आपापरका जानना वा आपका जानना कार्यकारी है । यहां प्रश्न—जो ऐसे

है, तौ शास्त्रनिविषै आपापरका श्रद्धान वा केवल आत्माका श्रद्धानहीकौ सम्यक्त्व कखा, वा कार्यकारी कखा । बहुरि नव तत्त्वकी संतति छोड़ि हमारे एक आत्मा ही होहु, ऐसा कखा । सो कैसैं कखा,—ताका समाधान,—

जाका सांचा आपापरका श्रद्धान वा आत्माका श्रद्धान होय, ताकै सातौं तत्त्वनिका श्रद्धान होय ही होय । बहुरि जाकै सांचा सात तत्त्वनिका श्रद्धान होय, ताकै आपापरका वा आत्माका श्रद्धान होय ही होय । ऐसा परस्पर अविनाभावीपना जानि आपापरका श्रद्धानकौ वा आत्मश्रद्धान होनेकौ सम्यक्त्व कखा है । बहुरि इस छलकरि कोई सामान्यपनै आपापरकौ जानि वा आत्माकौ जानि कृतकृत्यपनौ मानै, तौ वाकै भ्रम है । जातैं ऐसा कखा है—‘निर्विशेषो हि सामान्यो भवेत्खरविषाणवत्’ याका अर्थ यह, जो विशेषरहित सामान्य है सो गधेके सींगकी समान है । तातैं प्रयोजनभूत आस्रवादिक विशेषनिसहित आपापरका वा आत्माका श्रद्धान करना योग्य है। अथवा सातौं तत्त्वार्थनिका श्रद्धानकरि रागादिक मेटनेके अर्थ परद्रव्यनिकौ भिन्न भावै है, वा अपने आत्माहीकौ भावै है । ताकै प्रयोजनकी सिद्धि हो है । तातैं मुख्यताकरि भेदविज्ञानकौ वा आत्मज्ञानकौ कार्यकारी कखा है । बहुरि तत्त्वार्थश्रद्धान किए विना सर्व जानना कार्यकारी नाहीं । जातैं प्रयोजन तौ रागादिक मेटनेका है । सो आस्रवादिकका श्रद्धानविना यह प्रयोजन भासै नाहीं । तब केवल जाननेहीतैं मानकौ बधावै, रागादिक छाड़ै नाहीं, तब वाका कार्य कैसैं सिद्ध होय । बहुरि नवतत्त्वसंततिका छोड़ना कखा है । सो

पूर्व नवतत्त्वके विचार करि सम्यग्दर्शन भया, पीछें निर्विकल्पदशा होनेके अर्थि नवतत्त्वनिका भी विकल्प छोड़नेकी चाहि करी । बहुरि जाकै पहिलै ही नवतत्त्वनिका विचार नाही, ताकै तिस विकल्प छोड़नेका कहा प्रयोजन है । अन्य अनेक विकल्प आपकै पाइए है, तिनहीका त्याग करौ । ऐसैं आपापरका श्रद्धानविषै वा आत्मश्रद्धानविषै सप्ततत्त्व श्रद्धानविषै सप्ततत्त्वनिका श्रद्धानकी सापेक्षा पाइए है । तातैं तत्त्वार्थश्रद्धान सम्यक्त्वका लक्षण है । बहुरि प्रश्न—जो कहीं शास्त्रनिविषै अरहंतदेव निर्ग्रथ गुरु हिंसा-रहित धर्मका श्रद्धानकौं सम्यक्त्व कखा है, सो कैसें है । ताका समाधान,—

अरहंत देवादिकका श्रद्धान होनेतैं वा कुदेवादिकका श्रद्धान दूर होनेकरि गृहीत मिथ्यात्वका अभाव हो है । तिस अपेक्षा याकौं सम्यक्त्वी कखा है । सर्वथा सम्यक्त्वका लक्षण यह नाही । जातैं द्रव्यलिंगी मुनि आदि व्यवहार धर्मके धारक मिथ्यादृष्टी तिनिकै भी ऐसा श्रद्धान हो है । अथवा जैसें अणुव्रत महाव्रत होतैं देशचारित्र सकलचारित्र होय, वा न होय । परंतु अणुव्रत भए विना देशचारित्र कदाचित् न होय अर महाव्रत धारे विना सकलचारित्र कदाचित् न होय । तातैं इनि व्रतनिकौं अन्वयरूप कारण जानि कारणविषै कार्यका उपचारकरि इनकौं चारित्र कखा । तैसें अरहंत देवादिकका श्रद्धान होतैं, तौ सम्यक्त्व होय वा न होय । परंतु अरहंतादिकका श्रद्धान भए विना तत्त्वार्थश्रद्धान-रूप सम्यक्त्व कदाचित् होय । तातैं अरहंतादिकके श्रद्धान-कौं अन्वरूप कारण जानि कारणविषै कार्यका उपचारकरि इस

श्रद्धानकों सम्यक्त्व कखा है । याहीतैं याका नाम व्यवहारसम्यक्त्व हैं । अथवा जाकै तत्त्वार्थश्रद्धान होय, ताकै सांचा अरहंतादिकके स्वरूपका श्रद्धान होय ही होय । तत्त्वार्थश्रद्धान विना पक्षकरि अरहंतादिकका श्रद्धान करै, परंतु यथावत् स्वरूपकी पहचानलिये श्रद्धान होय नाहीं । बहुरि जाकै सांचा अरहंतादिकके स्वरूपका श्रद्धान होय, ताकै तत्त्वार्थ श्रद्धान होय ही होय । जातैं अरहंतादिकका स्वरूप पहचानें जीव अजीव आस-वादिककी पहचान हो है । ऐसैं इनकों परस्पर अविनाभावी जानि, कहीं अरहंतादिकके श्रद्धानकों सम्यक्त्व कखा है । यहां प्रश्न— जो नारकादिक जीवनिकै देवकुदेवादिकका व्यवहार नाहीं, अरतिनिके सम्यक्त्व पाइए है, तातैं सम्यक्त्व होतैं अरहंतादिकका श्रद्धान होय ही होय, ऐसा नियम संभवै नाहीं । ताका समाधान,—

सप्त तत्त्वनिका श्रद्धानविषै अरहंतादिकका श्रद्धान गर्भित है । जातैं तत्त्वश्रद्धानविषै मोक्षतत्त्वकों सर्वोत्कृष्ट मानै है । सो मोक्ष-तत्त्व तौ अरहंतसिद्धका लक्षण है । जो लक्षणकों उत्कृष्ट मानै, सो ताकै लक्ष्यको उत्कृष्ट मानै ही मानै । तातैं उनकों भी सर्वोत्कृष्ट मान्या औरकों न मान्या सो ही देवका श्रद्धान भया । बहुरि मोक्षका कारण संवर निर्जरा है, तातैं इनकों भी उत्कृष्ट मानै है । सो संवर निर्जराके धारक मुख्यपनै मुनि हैं । तातैं मुनिकों उत्तम मानै है औरकों न मानै है, सोई गुरुका श्रद्धान भया । और रागादिकरहित भावका नाम अहिंसा है, ताहीकों उपादेय मानै है औरकों न मानै है सोई धर्मका श्रद्धान भया । ऐसैं तत्त्वार्थ-श्रद्धानविषै अरहंतदेवादिकका भी श्रद्धान गर्भित है । अथवा जिस

निमित्ततैं इनके तत्त्वार्थ श्रद्धान हो है, तिस निमित्ततैं अरहं-  
तदेवादिकका भी श्रद्धान हो है । तातैं सम्यक्त्वविषै देवादिकके  
श्रद्धानका नियम हैं । बहुरि प्रश्न—जो केई जीव अरहंतादिकका  
श्रद्धान करै है, तिनके गुण पहचानै हैं, अर उनके तत्त्वश्रद्धान-  
रूप सम्यक्त्व न हो है । तातैं जाकै सांचा अरहंतादिकका श्रद्धान  
होय, ताकै तत्त्वश्रद्धान होय ही होय, ऐसा नियम संभवै नाहीं ।  
ताका समाधान,—

तत्त्वश्रद्धान विना अरहंतादिकके छियालीसआदि गुण जानै,  
है, सो पर्यायाश्रित गुण जानना भी न हो है । जातैं जीव अजीवकी  
जाति पहचाने विना अरहंतादिकके आत्माश्रित गुणनिकौं वा  
शरीराश्रित गुणनिकौं भिन्न भिन्न न जानै । जो जानै, तौ अपने  
आत्माकौं परद्रव्यतैं भिन्न कैसें न मानै । तातैं प्रवचनसारविषै  
ऐसा कखा है,—

जो जाणदि अरहंतं दब्बत्तगुणत्तपज्जयत्तेहिं ।

सो जाणदि अप्पाणं मोहो खलु जादि तस्स लयं ॥ १ ॥

याका अर्थ—यह जो अरहंतकौं द्रव्यत्व गुणत्व पर्यायत्वकरि  
जानै है, सो आत्माकौं जानै है । ताका मोह विलयकौं प्राप्त हो है ।  
तातैं जाकै जीवादिक तत्त्वनिका श्रद्धान नाहीं, ताकै अरहंतादि-  
कका भी सांचा श्रद्धान नाहीं । बहुरि मोक्षादिक तत्त्वनिका  
श्रद्धानविना अरहंतादिकका माहात्म्य यथार्थ न जानै । लौकिक  
अतिशयादिककरि अरहंतका तपश्चरणादिकरि गुणका अर  
परजीवनिकी अहिंसादिकरि धर्मकी महिमा जानै, सो ए पर्याया-  
श्रित भाव हैं । बहुरि आत्माश्रित भावनिकरि अरहंतादिकका



स्वरूप तत्त्वश्रद्धान भए ही जानिए है। तातैं जाकै सांचा अर-  
हंतादिकका श्रद्धान होय, ताकै तत्त्वश्रद्धान होय ही होय, ऐसा  
नियम जानना। या प्रकार सम्यक्त्वका लक्षण निर्देश किया। यहां  
प्रश्न—जो सांचा तत्त्वार्थश्रद्धान वा आपापरका श्रद्धान वा  
आत्मश्रद्धान वा देवधर्मगुरुका श्रद्धान सम्यक्त्वका लक्षण कछा।  
बहुरि इन सर्व लक्षणनिकी परस्पर एकता भी दिखाई, सो जानी।  
परंतु अन्य अन्य प्रकार लक्षण करनेका प्रयोजन कहा ताका उत्तर—

ए चार लक्षण कहे, तिनविषै सांची दृष्टिकरि एक लक्षण ग्रहण  
किए चारों लक्षणोंका ग्रहण हो है। तथापि मुख्य प्रयोजन जुदा  
जुदा विचारि अन्यअन्य प्रकार लक्षण कहे हैं। जहां तत्त्वार्थ-  
श्रद्धान लक्षण कछा है, तहां तौ यह प्रयोजन है जो इन तत्त्वनिकों  
पहिचानै, तौ यथार्थ वस्तुके स्वरूप वा अपने हित अहितका  
श्रद्धान करै तब मोक्षमार्गविषै प्रवर्तै। बहुरि जहां आपापरका भिन्न  
श्रद्धान लक्षण कछा है, तहां तत्त्वार्थश्रद्धानका प्रयोजन जाकरि  
सिद्ध होय, तिस श्रद्धानकों मुख्य लक्षण कछा है। जीव अजीवके  
श्रद्धानका प्रयोजन आपापरका भिन्न श्रद्धान करना है। बहुरि  
आत्मवादिकके श्रद्धानका प्रयोजन रागादि छोड़ना है। सो  
आपापरका भिन्न श्रद्धान भए परद्रव्यविषै रागादि न करनेका  
श्रद्धान हो है। ऐसै तत्त्वार्थश्रद्धानका प्रयोजन आपापरकेभिन्न  
श्रद्धानतैं सिद्ध होना जानि इस लक्षणकों कहा है। बहुरि जहां  
आत्मश्रद्धान लक्षण कछा है, तहां आपापरका भिन्नश्रद्धानका  
प्रयोजन इतना ही है—आपकों आप जानना। आपकों आप जानें  
परका भी विकल्प कार्यकारी नाहीं। ऐसा मूलभूत प्रयोजनकी

प्रधानता जानि आत्मश्रद्धानकों मुख्य लक्षण कखा है । बहुरि जहां देवगुरुधर्मका श्रद्धान लक्षण कखा है, तहां बाह्य साधनकी प्रधानता करी है । जातैं अरहंतदेवादिकका श्रद्धान सांचा तत्त्वार्थश्रद्धानकों कारण है । अर कुदेवादिकका श्रद्धान कल्पित अतत्त्वश्रद्धानका कारण है । सो बाह्य कारणकी प्रधानताकरि कुदेवादिकका श्रद्धान न करावनेके अर्थि देवगुरुधर्मका श्रद्धानकों मुख्य लक्षण कखा है । ऐसैं जुदे जुदे प्रयोजननिकरि मुख्यता करि जुदे जुदे लक्षण कहे हैं । इहां प्रश्न—जो ए चार लक्षण कहे, तिनविषै यह जीव किस लक्षणकों अंगीकार करै । ताका समाधान,—

मिथ्यात्वकर्मका उपशमादि होतैं विपरीताभिनिवेशका अभाव हो है । तहां च्यारों लक्षण युगपत् पाइए है । बहुरि विचार अपेक्षा मुख्यपनै तत्त्वार्थनिकों विचारै है । कै आपापरका भेद विज्ञान करै है । कै आत्मस्वरूपहीकों संभारै है । कै देवादिकका स्वरूप विचारै है । ऐसैं ज्ञानविषै तौ नाना प्रकार विचार होंय, परंतु श्रद्धानविषै सर्वत्र परस्पर सापेक्षपनो पाइए है । तत्त्वविचार करै है, तौ भेदविज्ञानादिकका अभिप्राय लिए करै है । ऐसैं ही अन्यत्र भी परस्पर सापेक्षपनौ है । तातैं सम्यग्दृष्टीकै श्रद्धानविषै च्यारों ही लक्षणनिका अंगीकार है । बहुरि जाकै मिथ्यात्वका उदय है, ताकै विपरीताभिनिवेश पाइए है । ताकै ए लक्षण आभास मात्र होंय, सांचे न होंय । जिनमतके जीवादिकतत्त्वनिकों मानै, औरकों न मानै, तिनके नाम भेदादिककों सीखै हैं, ऐसैं तत्त्वार्थश्रद्धान होय है । परंतु तिनका यथार्थ भावका

श्रद्धान न होय । बहुरि आपापरका भिन्नपनाकी बातें करै, अर वस्त्रादिकविषै परबुद्धिकों चितवन करै परंतु जैसे पर्यायविषै अहं-बुद्धि है, अर वस्त्रादिकविषै परबुद्धि है, तैसें आत्माविषै अहं-बुद्धि शरीरविषै परबुद्धि न हो है । बहुरि आत्माकों जिनवचनानुसार चिंतवै, परंतु प्रतीतिरूप आपकों आप श्रद्धान न करै है । बहुरि अरहंतादिक विना और कुदेवादिककों न मानै है । परंतु तिनके स्वरूपकों यथार्थ पहचानि श्रद्धान न करै है । ऐसें ए लक्षणाभास मिथ्यादृष्टीकै हो हैं । इनविषै कोई होय, कोई न होय । यहां इनकै भिन्नपनो भी न संभवै है । बहुरि इन लक्षणाभासनिविषै इतना विशेष है—जो पहिलै तौ देवादिकका श्रद्धान होय, पीछें तत्त्वनिका विचार होय, पीछें आपापरका चितवन करै, पीछें केवल आत्माकों चिंतवै । इस अनुक्रमतैं साधन करै, तौ परंपराय सांचा मोक्षमार्गकों पाय कोई जीव सिद्धपदकों भी पावै । बहुरि इस अनुक्रमका उलंघन करै, वाकै देवादिक माननेका कछू ठीक नाहीं । अर बुद्धिकी तीव्रतातैं तत्त्वातत्त्वविचारादिविषै प्रवर्तै है । तातैं आपकों ज्ञानी जानै है । अथवा तत्त्वविचारविषै भी उपयोग न लगावै है । अर आपापरका भेदविज्ञानी हुवा विचारै है । अथवा आपापरका भी ठीक न करै है अर आपकों आत्मज्ञानी मानै है । सो ए सर्व चतुराईकी बातें हैं । मानादिक कषायनिके साधन हैं । किछू भी कार्यकारी नाहीं । तातैं जो जीव अपना भला कस्या चाहै, तिसकों यावत् सांचा श्रद्धान दर्शनकी प्राप्ति न होय, तावत् इनकों भी अनुक्रमतैं अंगीकार करना । सो ही कहिए है—

पहलै तौ आज्ञादिककरि वा कोई परीक्षाकरि कुदेवादिकका मानना छोड़ि अरहंतदेवादिकका श्रद्धान करना । जातैं ऐसा श्रद्धान भए गृहीतमिथ्यात्वका तौ अभाव हो है । बहुरि मोक्ष-मार्गके विन्न करनहारे कुदेवादिकका निमित्त दूर हो है । मोक्ष-मार्गका सहाई अरहंतदेवादिकका निमित्त मिलै है, तातैं पहिलें देवादिकका श्रद्धान करना । बहुरि पीछैं जिनमतविषै कहे जीवा-दिक तत्त्वनिका विचार करना । नाम लक्षणादिक सीखने । जातैं इस अभ्यासतैं तत्त्वार्थश्रद्धानकी प्राप्ति होय । पीछैं आपापरका भिन्नपना जैसें भासै तैसें विचार किया करै । जातैं इस अभ्यासतैं भेदविज्ञान होय । बहुरि पीछैं आपविषै आपो माननेके अर्थि स्वरूपका विचार किया करै । जातैं इस अभ्यासतैं आत्मानुभवकी प्राप्ति हो है । बहुरि ऐसें अनुक्रमतैं इनकों अंगीकार करि पीछैं इनहीविषै कबहू देवादिकका विचारविषै, कबहू तत्त्वविचार-विषै, कबहू आपापरका विचारविषै, कबहू आत्मविचारविषै उप-योग लगावै । ऐसे अभ्यासतैं दर्शनमोह मंद होता जाय, तब कदाचित् सांचे सम्यग्दर्शनकी प्राप्ति हो है । जातैं ऐसा नियम तौ है नाहीं । कोई जीवकै कोई विपरीत कारण प्रबल बीचिमें होय जाय, तौ सम्यग्दर्शनकी प्राप्ति नाहीं भी होय । परंतु मुख्य-पनै घने जीवनिकै तौ इस ही अनुक्रमतैं कार्यसिद्धि हो है । तातैं इनकों ऐसें ही अंगीकार करना । जैसें पुत्रका अर्थी विवाहादि कारणनिकों मिलावै, पीछैं घने पुरुषनिकै तौ पुत्रकी प्राप्ति होय ही है । कबहूकै न होय, तौ नाहीं भी होय । परंतु याकों तौ उपाय करना ही । तैसें सम्यक्त्वका अर्थी इन कारणनिकों मिलावै,

पीछे घने जीवनिकै तौ सम्यक्त्वकी प्राप्ति होइ ही है । काहूकै न होय, तौ नाहीं भी होय । परंतु याकौं तौ जातैं कार्य बने, सोई उपाय करना । ऐसैं सम्यक्त्वका लक्षण निर्देश किया । यहां प्रश्न—जो सम्यक्त्वके लक्षण तौ अनेक प्रकार कहे, तिनविषै तुम तत्त्वार्थश्रद्धान लक्षणकौं मुख्य कब्जा, सो कारण कहा । ताका समाधान,—

तुच्छबुद्धीनकौ अन्य लक्षणनिविषै प्रयोजन प्रगट भासै नाहीं, वा भ्रम उपजै । अर इस तत्त्वार्थश्रद्धान लक्षणविषै प्रगट प्रयोजन भासै है, किछू भ्रम उपजै नाहीं । तातैं इस लक्षणकौं मुख्य किया है । सोई दिखाइए है—देवगुरुधर्मका श्रद्धानविषै तुच्छ-बुद्धीनिकौं यह भासै—अरहंतदेवादिककौं मानना, औरतौ न मानना । इतना ही सम्यक्त्व है । तहां जीव अजीवका बंधमोक्षके कारणकार्यका स्वरूप न भासै, तब मोक्षमार्ग प्रयोजनकी सिद्धि न होय । वा जीवादिकका श्रद्धान भए विना इस ही श्रद्धानविषै संतुष्ट होय आपकौं सम्यक्ती मानै । एक कुदेवादिकतैं द्वेष तौ राखै, अन्य रागादि छोड़नेका उद्यम न करै, ऐसा भ्रम उपजै । बहुरि आपापरका श्रद्धानविषै तुच्छबुद्धीनिकौं यह भासै कि, आप-परका ही जानना कार्यकारी है । इसतैं ही सम्यक्त्व हो है । तहां आस्रवादिकका स्वरूप न भासै । तब मोक्षमार्ग प्रयोजनकी सिद्धि न होय । वा आस्रवादिक श्रद्धान भए विना इतना ही जाननेविषै संतुष्ट होय, आपकौं सम्यक्ती मान स्वच्छंद होय रागादि छोड़नेका उद्यम न करै । ऐसा भ्रम उपजै । बहुरि आत्मश्रद्धान लक्षणविषै तुच्छबुद्धीनिकौं यह भासै कि, आत्माहीका विचार कार्यकारी है ।

इसहीतैँ सम्यक्त्व हो है । तहां जीव अजीवादिकका विशेष वा आसवादिकका स्वरूप न भासै, तब मोक्षमार्ग प्रयोजनकी सिद्धि न होय । वा जीवादिकका विशेष वा आसवादिकके स्वरूपका श्रद्धान भए विना इतने ही विचारतैँ आपकौँ सम्यक्ती मानि स्वच्छन्द होय रागादि छोड़नेका उद्यम न करै है । याकैँ ऐसा भ्रम उपजै है । ऐसा जान इन लक्षणनिकौँ मुख्य न किए । बहुरि तत्त्वार्थ-श्रद्धान लक्षणविषै जीव अजीवादिकका वा आसवादिकका श्रद्धान होय । तहां सर्वका स्वरूप नीकैँ भासै, तब मोक्षमार्गका प्रयोजनकी सिद्धि होय । बहुरि इस श्रद्धानके भए सम्यक्त होय । परंतु यह संतुष्ट न हो है । आसवादिकका श्रद्धान होनेतैँ रागादि छोड़ मोक्षका उद्यम राखै है । याकैँ भ्रम न उपजै है । तातैँ तत्त्वार्थ-श्रद्धान लक्षणकौँ मुख्य किया है । अथवा तत्त्वार्थश्रद्धान लक्षण-विषै तौ देवादिकका श्रद्धान वा आपापरका श्रद्धान वा आत्म-श्रद्धान गर्भित हो है । सो तो तुच्छ बुद्धीनकौँ भी भासे । बहुरि अन्य लक्षणनिविषै तत्त्वार्थश्रद्धानका गर्भितपनो विशेष बुद्धिमान होय, तिनहीकौँ भासै । तुच्छबुद्धीनिकौँ न भासै । तातैँ तत्त्वार्थ-श्रद्धान लक्षणकौँ मुख्य किया है । अथवा मिथ्यादृष्टीकैँ आभास मात्र ए होय । तहां तत्त्वार्थनिका विचार तो शीघ्रपनैँ विपरी-ताभिनिवेश दूर करनेकौँ कारण हो है । अन्य लक्षण शीघ्र कारण नाहीँ होय । वा विपरीताभिनिवेशका भी कारण होय जाय । तातैँ यहां सर्व प्रकार प्रसिद्ध जानि विपरीताभिनिवेश रहित जीवादि तत्त्वार्थनिका श्रद्धान सो ही सम्यक्त्वका लक्षण है, ऐसा निर्देश किया । ऐसैँ लक्षणनिर्देशका निरूपण किया । ऐसा

लक्षण जिस आत्माका स्वभावविषै पाइए है । सो ही सम्यक्त्वी जानना ।

अब इस सम्यक्त्वके भेद दिखाइए है, तहां प्रथम निश्चय व्यवहारका भेद दिखाइए है,—विपरीताभिनिवेशरहित श्रद्धानरूप आत्मपरिणाम सो तौ निश्चय समक्त्व है । जातै यह सत्यार्थ सम्यक्त्वका स्वरूप है । सत्यार्थहीका नाम निश्चय है । बहुरि विपरीताभिनिवेशरहित श्रद्धानका कारणभूत श्रद्धान सो व्यवहार सम्यक्त्व है । जातै कारणविषै कार्यका उपचार किया है । सो उपचारहीका नाम व्यवहार है । तहां सम्यग्दृष्टी जीवकै देवगुरुधर्मादिकका सांचा श्रद्धान है । तिसही निमित्ततै याकै श्रद्धानविषै विपरीताभिनिवेशका अभाव है । सो यहां विपरीताभिनिवेशरहित श्रद्धान सो तौ निश्चय सम्यक्त्व है, अर देवगुरुधर्मादिकका श्रद्धान है, सो व्यवहार सम्यक्त्व है । ऐसै एक ही कालविषै दोऊ सम्यक्त्व पाइए है । बहुरि मिथ्यादृष्टी जीवकै देवगुरुधर्मादिकका श्रद्धान आभास मात्र हो है । अर याकै श्रद्धानविषै विपरीताभिनिवेशका अभाव न हो है । जातै यहां निश्चय सम्यक्त्व तौ है नाहीं, अर व्यवहार सम्यक्त्व भी आभासमात्र है । जातै याकै देवगुरुधर्मादिकका श्रद्धान है, सो विपरीताभिनिवेशके अभावका साक्षात् कारण भया नाहीं । कारण भए विना उपचार संभवै नाहीं । जातै साक्षात् कारण अपेक्षा व्यवहार सम्यक्त्व भी याकै न संभवै है । अथवा याकै देवगुरुधर्मादिकका श्रद्धान नियमरूप हो है । सो विपरीताभिनिवेशरहित श्रद्धानका परंपरा कारणभूत है । यद्यपि नियमरूप कारण नाहीं, तथापि मुख्यपनै कारण है ।

बहुरि कारणविषै कार्यका उपचार संभवै है । तातैं मुख्यरूप परंपरा कारण अपेक्षा मिथ्यादृष्टीके भी व्यवहार सम्यक्त्व कहिए है । यहां प्रश्न—जो केई शास्त्रनिविषै देवगुरुधर्मका श्रद्धानकों वा तत्त्वश्रद्धानकों तौ व्यवहार सम्यक्त्व कखा है, अर आपापरका श्रद्धानकों वा केवल आत्माके श्रद्धानकों निश्चय सम्यक्त्व कखा है, सो कैसे हैं । ताका समाधान,—

देवगुरुधर्मका श्रद्धानविषै प्रवृत्तिकी मुख्यता है । जो प्रवृत्ति-विषै अरहंतादिककों देवादिक मानै, औरकों न मानै, सो देवादि-कका श्रद्धानी कहिए हैं । अर तत्त्वश्रद्धानविषै तिनके विचारकी मुख्यता है । जो ज्ञानविषै जीवादितत्त्वनिकों विचारै, ताकों तत्त्वश्रद्धानी कहिए है । ऐसैं मुख्यता पाइए है । सो ए दोऊ काहू जीवके सम्यक्त्वकों कारण तौ होय, परंतु इनका सद्भाव मिथ्यादृष्टीके भी संभवै है । तातैं इनकों व्यवहार सम्यक्त्व कखा है । बहुरि आपापरका श्रद्धानविषै वा आत्मश्रद्धानविषै विपरीताभिनिवेशरहितपना की मुख्यता है । जो आपापरका भेद-विज्ञान करै, वा अपने आत्माकों अनुभवै, ताके मुख्यपनै विपरीताभिनिवेश न होय । तातैं भेदविज्ञानीकों वा आत्मज्ञानीकों सम्यग्दृष्टी कहिए है । ऐसैं मुख्यताकरि आपापरका श्रद्धान वा आत्मश्रद्धान सम्यग्दृष्टीहीके पाइए है । तातैं इनकों निश्चय सम्यक्त्व कखा, सो ऐसा कथन मुख्यताकी अपेक्षा है । तारतम्यपनै ए च्यारों आभासमात्र मिथ्यादृष्टीके होय, सांचे सम्यग्दृष्टीके होय । तहां आभासमात्र हैं, सो नियम विना परंपरा कारण हैं । अर ए सांचे हैं, सो नियमरूप साक्षात् कारण हैं । तातैं इनकों



व्यवहाररूप कहिए । इनके निमित्ततैं जो विपरीताभिनिवेश-रहित श्रद्धान भया, सो निश्चय सम्यक्त्व है, ऐसा जानना । बहुरि प्रश्न—केई शास्त्रनिविषै लिखै हैं—आत्मा है, सो ही निश्चय सम्यक्त्व है, और सर्व व्यवहार है । सो कैसें है । ताका समाधान,—

विपरीताभिनिवेशरहित श्रद्धान भया, सो आत्माहीका स्वरूप है । तहां अभेदबुद्धिकरि आत्मा अर सम्यक्त्वविषै भिन्नता नाही । तातैं निश्चयकरि आत्माहीकाँ सम्यक्त्व कखा । और सर्व सम्यक्त्व तौ निमित्तमात्र है । वा भेदकल्पना किए आत्मा अर सम्यक्त्वकै भिन्नता कहिए है । तातैं और सर्व व्यवहार कखा । ऐसैं जानना । याप्रकार निश्चयसम्यक्त्व अर व्यवहार सम्यक्त्वकरि सम्यक्त्वके दोय भेद हो हैं । अर अन्य निमित्तादिककी अपेक्षा आज्ञा-सम्यक्त्वादि सम्यक्त्वके दश भेद कहे हैं, सो आत्मानुशासन-विषै कहा है,—

आज्ञामार्गसमुद्भवमुपदेशात्सूत्रबीजसंक्षेपात् ।

विस्तारार्थाभ्यां भवमवगाढपरमावगाढे च ॥ ११ ॥

याका अर्थ—जिनआज्ञातैं तत्त्वश्रद्धान भया होय, सो आज्ञा सम्यक्त्व है । यहां इतना जानना—“मोकोँ जिनआज्ञा प्रमाण है” इतना ही श्रद्धान सम्यक्त्व नाही है । आज्ञा मानना, तौ कारणभूत है । याहीतैं यहां आज्ञातैं उपज्या कखा है । तातैं पूवैं जिनआज्ञा माननैतैं पीछैं जो तत्त्वश्रद्धान भया, सो आज्ञा-सम्यक्त्व है । ऐसैं ही निर्ग्रन्थमार्गके अवलोकनतैं तत्त्वश्रद्धान भया होय, सो मार्गसम्यक्त्व है । बहुरि उत्कृष्ट पुरुष तीर्थकरा-दिक तिनके पुराणनिका उपदेशतैं जो उपज्या सम्यग्ज्ञान ताकरि

उत्पन्न आगमसमुद्रविषै प्रवीणपुरुषनिकरि उपदेश आदितैं भई जो उपदेशकदृष्टि सो उपदेशसम्यक्त्व है। मुनिके आचरणका विधानकौ प्रतिपादन करता जो आचारसूत्र ताहि सुनकरि श्रद्धान करना जो होय, सो सूत्रदृष्टि भलेप्रकार कही है। यह सूत्रसम्यक्त्व है। बहुरि बीज जे गणितज्ञानकौ कारण तिनकरि अनुपम दर्शनमोहका उपशमके बलतैं दुष्कर है जाननेकी गति जाकी ऐसा पदार्थनिका समूह ताकी भई है उपलब्धि श्रद्धानरूप परणति जाकै, ऐसा करणानुयोगका ज्ञानी भया, ताकै बीजदृष्टी हो है। यह बीजसम्यक्त्व जानना। बहुरि पदार्थनिकौ संक्षेपपनेतैं जानकरि जो श्रद्धान भया, सो भली संक्षेपदृष्टि है। यह संक्षेपसम्यक्त्व जानना। जो द्वादशांगवानीकौ सुन कीन्हीं जो रुचि श्रद्धान, ताहि विस्तारदृष्टी हे भव्य तू जानि। यह विस्तारसम्यक्त्व है। बहुरि जैनशास्त्रके वचनविना कोई अर्थका निमित्ततैं भई सो अर्थदृष्टी है। यह अर्थसम्यक्त्व जानना। बहुरि अंग अर अंगबाह्यसहित जैनशास्त्र ताकौ अवगाह करि जो निपजी, सो अवगाहदृष्टि है। यह अवगाहसम्यक्त्व जानना। ऐसैं आठ भेद तौ कारण अपेक्षा किए हैं। बहुरि श्रुतकेवलीके जो तत्त्वश्रद्धान है, ताकौ अवगाहसम्यक्त्व कहिए हैं। केवलज्ञानीके जो तत्त्वश्रद्धान है, ताकौ परमावगाहसम्यक्त्व कहिए है। ऐसैं दोय भेद ज्ञानका सहकारीपनाकी अपेक्षा किए हैं। या प्रकार दशभेद सम्यक्त्वके किए। तहां सर्वत्र सम्यक्त्वका स्वरूप तत्वार्थ श्रद्धान ही जानना। बहुरि सम्यक्त्वके तीन भेद किए हैं। १ औपशमिक, २ क्षायोपशमिक, ३ क्षायिक। ए

तीन भेद दर्शनमोहकी अपेक्षा किए हैं। तहां उपशमसम्यक्त्वके दोय भेद हैं। एक प्रथमोपशम सम्यक्त्व, दूसरा द्वितीयोपशम सम्यक्त्व। तहां मिथ्यात्वगुणस्थानविषै करणकरि दर्शनमोहकौ उपशमाय सम्यक्त्व उपजै, ताकौ प्रथमोपशम सम्यक्त्व कहिए है। तहां इतना विशेष है—अनादि मिथ्यादृष्टीकै तो एक मिथ्यात्व-प्रकृतिहीका उपशम होय है। जातैं याकै मिश्रमोहिनी अर सम्यक्त्वमोहिनीकी सत्ता है नाहीं। जब जीव उपशमसम्यक्त्व-कौ प्राप्त होय, तिस सम्यक्त्वके कालविषै मिथ्यात्वके परमाणुनिकौ मिश्रमोहिनीरूप वा सम्यक्त्वमोहिनीरूप परिणमावै है, तब तीन प्रकृतीनकी सत्ता हो है। तातैं अनादि मिथ्यादृष्टीकै एक मिथ्यात्वप्रकृतिही ही सत्ता है। तिसहीका उपशम हो है। बहुरि सादिमिथ्यादृष्टिकै काहूकै तीन प्रकृतीनकी सत्ता है, काहूकै एकहीकी सत्ता है। जाकै सम्यक्त्वकालविषै तीनकी सत्ता भई थी, सो सत्ता पाइए ताकै तीनकी सत्ता है। अर जाकै मिश्रमोहिनी सम्यक्त्वमोहिनीकी उद्वेलना होय गई होय, उनके परमाणु मिथ्यात्वरूप परिणम गए होय, ताकै एक मिथ्यात्वकी सत्ता है। तातैं सादि मिथ्यादृष्टीकै तीन प्रकृतीनिका वा एक प्रकृतीका उपशम हो है। उपशम कहा ? कहिए है—अनिवृत्ति-करणविषै किया अंतरकरणविधानतैं जे सम्यक्त्वकालविषै उदय आवनेयोग्य निषेक थे, तिनिका तौ अभाव किया, तिनिके परमाणु अन्यकालविषै उदय आवनेयोग्य निषेकरूप किए। बहुरि अनिवृत्तकरणहीविषै किया उपशमविधानतैं जे तिसकालविषै उदय आवनेयोग्य निषेक, ते उदीरणारूप होय इस कालविषै उदय न

आ सकें, ऐसे किए। ऐसैं जहां सत्ता तौ पाइए, अर उदय न पाइए, ताका नाम उपशम है। सो यह मिथ्यात्वतैं भया प्रथमो-पशम सम्यक्त्व, सो चतुर्थादि सप्तगुणस्थानपर्यंत पाइए है। बहुरि उपशम श्रेणीकौ सन्मुख होतैं सप्तगुणस्थानविषै क्षयोपशम-सम्यक्त्वतैं जो उपशम सम्यक्त्व होय, ताका नाम द्वितीयोपशम-सम्यक्त्व है। यहां करणकरि तीन ही प्रकृतीनिका उपशम हो है। जातैं यातैं तीनहीकी सत्ता पाइए यहां भी अंतःकरणविधानतैं वा उपशमविधानतैं तिनिके उदयका अभाव करै है। सोऽही उपशम है। सो यह द्वितीयोपशम सम्यक्त्व सप्तमादि ग्यारवां गुणस्थान-पर्यंत हो है। पड़ता हुवा कोई छठै पांचवैं चौथै गुणस्थान भी रहै है, ऐसा जानना। ऐसैं उपशम सम्यक्त्व दोय प्रकार है। सो यह सम्यक्त्व वर्तमानकालविषै क्षायिकवत् निर्मल है। याका प्रतिपक्षी कर्मकी सत्ता पाइए है, जातैं अन्तर्मुहूर्त कालमात्र यह सम्यक्त्व रहै है। पीछैं दर्शनमोहका उदय आवै है, ऐसा जानना। ऐसैं उपशम सम्यक्त्वका स्वरूप कखा। बहुरि जहां दर्शनमोहकी तीन प्रकृतिनिविषै सम्यक्त्वमोहनीका उदय पाइए है, ऐसी दशा जहां होय, सो क्षयोपशम है। जातैं समलतन्वार्थ श्रद्धान होय, सो क्षयोपशम सम्यक्त है। अन्य दोय प्रकारका उदय न होय, तहां क्षयोपक्षम सम्यक्त्व हो है, सो उपशम सम्यक्त्वका काल पूर्ण भए यह सम्यक्त्व हो है। वा सादि मिथ्यादृष्टीकै मिथ्यात्वगुण-स्थानतैं वा मिश्रगुणस्थानतैं भी याकी प्राप्ति हो है। क्षयोपशम कहा—सो कहिए है,—

दर्शनमोहकी तीन प्रकृतीनिविषै जो मिथ्यात्वका अनुभाग

है, ताके अनंतवै भाग मिश्रमोहिनीका है । ताके अनंतवै भाग सम्यक्त्वमोहिनीका है । सो इनविषै सम्यक्त्वमोहिनी प्रकृति देशघातिक है । याका उदय होतैं भी सम्यक्त्वका घात न होय । किंचित् मलीनता करै, मूलघात न कर सकै । ताहीका नाम देश-घाति है । सो जहां मिथ्यात्व वा मिश्रमिथ्यात्वका वर्त्तमानकाल-विषै उदय आवनेयोग्य निषेक तिनका उदय हुए विना ही निर्जरा होना, सो तौ क्षय जानना । और इनहीका आगामि-कालविषै उदय आवने योग्य निषेकनिकी सत्ता पाइए है, सो ही उपशम है । और सम्यक्त्वमोहिनीका उदय पाइए है, ऐसी दशा जहां होय सो क्षयोपशम है तातैं समलतत्त्वार्थश्रद्धान होय, सो क्षयोपशम सम्यक्त्व है । यहां जो मल लागै है, ताका तारतम्य स्वरूप तौ केवली जानै है, उदाहरण दिखावने के अर्थि चलमलिन-अगाढ़पना कब्या है । तहां व्यवहारमात्र देवादिककी प्रतीति तौ होय, परंतु अरहंतदेवादिविषै यह मेरा है, यह अन्यका है, इत्यादि भाव सो चलपना है । शंकादि मल लागै है, सो मलिन-पना है । यह शांतिनाथ शांतिका कर्त्ता है, इत्यादि भाव सो अगाढ़पना है । सो ऐसा उदाहरण व्यवहारमात्र दिखाए । परंतु नियमरूप नाहीं । क्षयोपशम सम्यक्त्वविषै जो नियमरूप कोई मल लागै है, सो केवली जानै है । इतना जानना—याके तत्त्वार्थ-श्रद्धानविषै कोई प्रकार करि समलपनो हो है । तातैं यह सम्यक्त्व निर्मल नाहीं है । इस क्षयोपशम सम्यक्त्वका एक ही प्रकार है । याविषै कलू भेद नाहीं है । इतना विशेष है—जो क्षायिक सम्यक्त्वकौ सन्मुख होतैं, अंतर्मुहूर्त्तकाल मात्र जहां मिथ्यात्वकी

प्रकृतिका लोप करै है, तहां दोय ही प्रकृतीनिकी सत्ता रहै है । पीछें मिश्रमोहिनीका भी क्षय करै है । तहां सम्यक्त्वमोहिनीकी ही सत्ता रहै है । पीछें सम्यक्त्वमोहिनीकी कांडकघातादि क्रिया न करै है । तहा कृतकृत्य वेदकसम्यग्दृष्टी नाम पावै है, ऐसा जानना । बहुरि इस क्षयोपशमसम्यक्त्वहीका नाम वेदकसम्यक्त्व है । जहां मिथ्यात्वमिश्रमोहिनीकी मुख्यता करि कहिए, तहां क्षयोपशमसम्यक्त्व नाम पावै है । सम्यक्त्व मोहिनीकी मुख्यताकरि कहिए, तहां वेदक नाम पावै है । सो कहने मात्र दोय नाम हैं, स्वरूपविषै भेद है नाहीं । बहुरि यह क्षयोपशम सम्यक्त्व चतुर्थादि सप्तम गुणस्थान पर्यंत पाइए है । ऐसैं क्षयोपशम सम्यक्त्वका स्वरूप कह्या ।

बहुरि तीनों प्रकृतीनिके सर्वथा सर्व निषेकनिका नाश भए अत्यंत निर्मल तत्त्वार्थश्रद्धान होय, सो क्षायिक सम्यक्त्व है । सो चतुर्थादि चार गुणस्थानविषै कहीं क्षायोपशम सम्यग्दृष्टीकै याकी प्राप्ति हो है । कैसैं हो है, सो कहिए है—प्रथम तीन करणकरि मिथ्यात्वके परमाणूनिकों मिश्रमोहिनीरूप परिणमावै वा सम्यक्त्व मोहिनीरूप परिणमावै, वा निर्जरा करै, ऐसैं मिथ्यात्वकी सत्ता नाश करै । बहुरि मिश्र आदि मोहिनीके परमाणूनिकों सम्यक्त्वमोहिनीरूप परिणमावै वा निर्जरा करै, ऐसैं मिश्रमोहिनीका नाश करै । बहुरि सम्यक्त्वमोहिनीका निषेक उदय आय खिरै, वाकी बहुत स्थिति होय, तौ ताकौं स्थितिकांडादिकरि घटावै । जहां अंतर्मुहूर्त्तस्थिति रहै, तब कृतकृत्य वेदकसम्यग्दृष्टी होय । बहुरि अनुक्रमतैं इन निषेकनिका नाश करि क्षायिक सम्यग्दृष्टी हो है ।

सो यह प्रतिपक्षी कर्मके अभावतैँ निर्मल है, वा मिथ्यात्वरूप रज ताके अभावतैँ वीतराग है । याका नाश न होय । जहांतैँ उपजै, तहांतैँ सिद्ध अवस्था पर्यंत याका सद्भाव है । ऐसैँ क्षायिक सम्यक्त्वका स्वरूप कखा । ऐसैँ तीन भेद सम्यक्त्वके कहै । बहुरि अनंतानुबंधी कषाय होतैँ सम्यक्त्वकी दोय अवस्था हो हैं । कै तो अप्रशस्त उपशम हो है, कै विसंयोजन हो है । तहां जो करणकरि उपशम विधानतैँ उपशम हो है, ताका नाम प्रशस्त उपशम है । उदयका अभाव ताका नाम अप्रशस्त उपशम है । सो अनंतानुबंधीका प्रशस्त तौ उपशम होय नाही, अन्य मोहकी प्रकृतिनका हो है । बहुरि इसका अप्रशस्त उपशम हो है । बहुरि जो तीन करणकरि अनंतानुबंधीनिके परमाणूनिक्कौँ अन्य चारित्रमोहिनीकी प्रकृतिरूप परिणमाई, तिसका सत्ता नाश करिए, ताका नाम विसंयोजन है । जो इनविषैँ प्रथमोपशम सम्यक्त्वविषैँ तौ अनंतानुबंधीका अप्रशस्त उपशम ही है । बहुरि द्वितीयोपशम सम्यक्त्वकी प्राप्ति पहिलैँ अनंतानुबंधीका विसंयोजन भए ही होय, ऐसा नियम कोई आचार्य लिखै हैं । कोई नियम नाही लिखै हैं । बहुरि क्षयोपशम सम्यक्त्वविषैँ कोई जीवकैँ अप्रशस्त उपशम हो है, वा कोईकैँ विसंयोजन हो है । बहुरि क्षायिक सम्यक्त्व है, सो पहलैँ अनंतानुबंधीका विसंयोजन भए ही हो है, ऐसा जानना । यहां यह विशेष है—जो उपशम क्षायोपशम सम्यक्त्विकैँ अनंतानुबंधीके विसंयोजनतैँ सत्ता नाश भया था । बहुरि वह मिथ्यात्वविषैँ आवै, तौ अनंतानुबंधीका बंधकौँ अर तहां वाकी सत्ताका सद्भाव हो है । बहुरि क्षायिकसम्यग्दृष्टी मिथ्यात्वविषैँ आवै नाही । तातैँ

वाकै अनंतानुबंधीकी सत्ता कदाचित् न होय । यहां प्रश्न—जो अनंतानुबंधी तौ चारित्रमोहकी प्रकृति है । सो सर्व निमित्त चारित्रहीकों घातै है । याकरि सम्यक्त्व घात कैसें संभवै । ताका समाधान—

अनंतानुबंधीके उदयतैं क्रोधादिकरूप परिणाम हो हैं । कुछ अतत्त्वश्रद्धान होता नाहीं । तातैं अनन्तानुबंधी चारित्रहीकों घातै है । सम्यक्त्वकों नाहीं घातै है । सो परमार्थतैं है तौ ऐसें ही परंतु अनंतानुबंधीके उदयतैं जैसें क्रोधादिक हौ हैं, तैसें क्रोधादिक सम्यक्त्व होतैं न होय । ऐसा निमित्त नैमित्तिकपना पाइए है । जैसें त्रसपनाकी घातक तौ स्थावरप्रकृति ही है । परंतु त्रसपना होतैं एकेन्द्रिय जाति प्रकृतिका भी उदय न होय, तातैं उपचारकरि एकेन्द्रिय प्रकृतिकों भी त्रसपनाकी घातक कहिए, तौ दोष नाहीं । तैसें सम्यक्त्वका घातक तौ दर्शनमोह है । परंतु सम्यक्त्व होतैं अनंतानुबंधी कषायनिका भी उदय न होय, तातैं उपचारकरि अनंतानुबंधीकै भी सम्यक्त्वका घातकपना कहिए, तौ दोष नाहीं । बहुरि यहां प्रश्न—जो अनंतानुबंधी चारित्रकों घातै है, तौ याकै गए किछू चारित्र भया । असंयत गुणस्थानविषै असंयम काहेकों कहो हो । ताका समाधान—

अनंतानुबंधी आदि भेद हैं, ते तीव्र मंदकषायकी अपेक्षा नाहीं हैं । जातैं मिथ्यादृष्टीकै तीव्रकषाय होतैं वा मंदकषाय होतैं अनंतानुबंधी आदि च्यारोंका उदय युगपत् हो है । तहां च्यारोंके उत्कृष्ट स्पर्द्धक समान कहे हैं । इतना विशेष है—जो अनंतानुबंधीके साथ जैसा तीव्र उदय अप्रत्याख्यानादिकका होय,



तैसा ताके गए न होय । ऐसैं ही अप्रत्याख्यानकी साथ प्रत्याख्यान संज्वलनका उदय होय, तैसा ताके गए न होय । बहुरि जैसा प्रत्याख्यानकी साथि संज्वलनका उदय होय, तैसा केवल संज्वलनका उदय न होय । तातैं अनंतानुबंधीके गए किछू कषायनिकी मंदता तौ हो है, परंतु ऐसी मंदता न होय जाकरि कोई चारित्र नाम पावै । जातैं कषायनिके असंख्यात लोकप्रमाण स्थान हैं । तिनिविषै सर्वत्र पूर्वस्थानतैं उत्तरस्थानविषै मंदता पाइए । परंतु व्यवहारकरि तिनि स्थाननिविषै तीन मर्यादा करीं । आदिके बहुत स्थान तौ असंयमरूप कहे, पीछैं केतेक देशसंयमरूप कहे, पीछैं केतेक सकलसंयमरूप कहे । तिनिविषै प्रथम गुणस्थानतैं लगाय चतुर्थ गुणस्थान पर्यंत जे कषायके स्थान हो हैं, सर्व असंयमहीके हो हैं । तातैं कषायनिकी मंदता होतैं भी चारित्र नाम न पावै हैं । यद्यपि परमार्थतैं कषायका घटना चारित्रका अंश है, तथापि व्यवहारतैं जहां ऐसा कषायनिका घटना होय, जाकरि श्रावकधर्म वा मुनिधर्मका अंगीकार होय तहां ही चारित्र नाम पावै है । सो असंयमविषै ऐसे कषाय घटैं नाहीं । तातैं यहां असंयम कहा है । कषायनिका अधिक हीनपना होतैं भी जैसैं प्रमत्तादिगुणस्थाननिविषै सर्वत्र सकलसंयम ही नाम पावै हैं, तैसैं मिथ्यात्वादि असंयतपर्यंत गुणस्थाननिविषै असंयम नाम पावै है । सर्वत्र असंयमकी समानता न जाननी । बहुरि यहां प्रश्न—जो अनंतानुबंधी सम्यक्त्वकौं न घातै है, तौ याके उदय होतैं सम्यक्त्वतैं भ्रष्ट होय सासादन गुणस्थानकौं कैसैं पावै है । ताका समाधान,—

जैसे कोई मनुष्यके मनुष्यपर्याय नाशका कारण तीव्ररोग प्रगट भया होय, ताको मनुष्यपर्यायका छोड़नहारा कहिए । बहुरि मनुष्यपना दूर भए देवादिपर्याय होय, सो तौ रोग अवस्थाविषै न भया । वहां तौ मनुष्यहीका आयु है । तैसें सम्यक्त्वके सम्यक्त्वका नाशका कारण अनंतानुबंधीका उदय प्रगट भया, ताको सम्यक्त्वका विरोधक सासादन कह्या । बहुरि सम्यक्त्वका अभाव भए मिथ्यात्व होय सो तौ सासादनविषै न भया । यहां उपशमसम्यक्त्वका ही काल है, ऐसा जानना । ऐसें अनंतानुबंधी चतुष्ककी सम्यक्त्व होतै अवस्था हो है । तातै सातप्रकृतिनिकै उपशमादिकतै भी सम्यक्त्वकी प्राप्ति कहिए है । बहुरि प्रश्न— सम्यक्त्वमार्गणाके छह भेद किए हैं, सो कैसें हैं । ताका समाधान—

सम्यक्त्वके तो भेद तीन ही हैं । बहुरि सम्यक्त्वका अभावरूप मिथ्यात्व है । दोऊनिका मिश्रभाव सो मिश्र है । सम्यक्त्वका घातकभाव सो सासादन है । ऐसें सम्यक्त्व मार्गणाकरि जीवका विचार किए छह भेद कहे हैं । यहां कोई कहे कि, सम्यक्त्वतै अष्ट होय मिथ्यात्वविषै आया होय, ताको मिथ्यात्वसम्यक्त्व कहिए । सो यह असत्य है । जातै अभव्यके भी तिसका सद्भाव पाइए है । बहुरि मिथ्यात्वसम्यक्त्व कहना ही अशुद्ध है । जैसें संयममार्गणाविषै असंयम कह्या, भव्यमार्गणाविषै अभव्य कह्या, तैसें ही सम्यक्त्वमार्गणाविषै मिथ्यात्व कह्या है । मिथ्यात्वको सम्यक्त्वका भेद न जानना । सम्यक्त्व अपेक्षा विचार करते केई जीवनिकै सम्यक्त्वका अभावतै ही मिथ्यात्व पाइए है । ऐसा अर्थ

प्रकट करनेके अर्थि सम्यक्त्वमार्गणाविषै मिथ्यात्व कहा है । ऐसैं ही सासादन मिश्र भी सम्यक्त्वके भेद नाहीं हैं । सम्यक्त्वके भेद तीन ही हैं, ऐसा जानना । यहां कर्मके उपशमादिकतैं उपशमादिक सम्यक्त्व कहे, सो कर्मका उपशमादिक याका क्रिया होता नाहीं । यह तौ तत्त्वश्रद्धान करनेका उद्यम करै, ताके निमित्ततैं स्वयमेव कर्मका उपशमादिक हो है । तब याकै तत्त्व-श्रद्धानकी प्राप्ति हो है । ऐसा जानना । याप्रकार सम्यक्त्वके भेद जानने । ऐसैं सम्यग्दर्शनका स्वरूप कहा ।


बहुरि सम्यग्दर्शनके आठ अंग कहे हैं । निःशांकित्व, निःकांक्षित्व, निर्विचिकित्सित्व, अमूढदृष्टित्व, उपबृंहण, स्थितिकरण, प्रभावना, वात्सल्य । तहां भयका अभाव अथवा तत्त्वनिविषै संशयका अभाव, सो निःशांकित्व है । बहुरि परद्रव्यादिविषै रागरूप बांछाका अभाव, सो निःकांक्षित्व है । बहुरि परद्रव्यादिविषै द्वेषरूप ग्लानिका अभाव सो निर्विचिकित्सित्व है । बहुरि तत्त्वनिविषै देवादिकविषै अन्यथा प्रतीतिरूप मोहका अभाव, सो अमूढदृष्टित्व है । बहुरि आत्मधर्म वा जिनधर्मका बधावना, ताका नाम उपबृंहण है । इसही अंगका नाम उपगूहन भी कहिए है । तहां धर्मात्मा जीवनिका दोष ढांकना, ऐसा ताका अर्थ जानना । बहुरि अपने स्वभावविषै वा जिनधर्म-विषै आपकौं वा परकौं स्थापन करना, सो स्थितिकरण अंग है । बहुरि अपने स्वरूपकी वा जिनधर्मकी महिमा प्रगट करनी, सो प्रभावना है । बहुरि स्वरूपविषै वा जिनधर्मविषै वा धर्मात्मा जीव-निविषै प्रीतिभाव सो वात्सल्य है । ऐसैं ए आठ अंग जानने । जैसे मनुष्यशरीरके हस्तपादादिक अंग हैं, तैसें ए सम्यक्त्वके अंग

हैं। यहां प्रश्न—जो केई सम्यक्त्वी जीवनिकै भी भय इच्छा ग्लानि आदि पाइए है, अर केई मिथ्यादृष्टीके न पाइए है। तारैं निःशंकितादि अंग सम्यक्त्वके कैसैं कहो हो। ताका समाधान,—

जैसैं मनुष्य शरीरके हस्तपादादि अंग कहिए है। तहां कोई मनुष्य ऐसा भी होय है, जाकै हस्तपादादिविषै कोई अंग न होय। तहां याकै मनुष्यशरीर तौ कहिए है, परंतु तिन अंगनि विना वह शोभायमान सकल कार्यकारी न होय। तैसैं सम्यक्त्वके निःशंकितादि अंग कहिए है। तहां कोई सम्यक्त्वी ऐसा भी होय, जाकै निःशंकितादिविषै कोई अंग न होय। ताकै सम्यक्त्व तौ कहिए, परंतु तिनिका अंगनिविना यह निर्मल सकल कार्यकारी न होय। बहुरि जैसैं बांदरेकै भी हस्तपादादि अंग हो हैं। परंतु जैसैं मनुष्यकै होय, तैसैं न हो हैं। तैसैं मिथ्यादृष्टीनिकै भी व्यवहाररूप निःशंकितादिक अंग हो हैं। परंतु जैसैं निश्चयकी सापेक्षा लिए सम्यक्त्वीकै होय, तैसैं न हो हैं। बहुरि सम्यक्त्वविषै पचीस मल कहे हैं,—आठ शंकादिक, आठ मद, तीन मूढता, षट् अनायतन, सो ए सम्यक्त्वीकै न होय। कदाचित् काहूकै मल लागैं सम्यक्त्वका नाश न हो है, तहां सम्यक्त्व मलिन ही हो है, ऐसा जानना।



समाप्त.



## परिशिष्ट १.

मोक्षमार्गप्रकाशकके पांचवें अध्यायमें जो वेदादिग्रन्थोंके प्रमाण उद्धृत करके जैनधर्मकी प्राचीनता प्रगट की है, उसीके सम्बन्धमें जैनसमाजके सुपरिचित विद्वान् कुंवार दिग्विजयसिंहजीने निम्नलिखित प्रमाण और भी संग्रह करके भेजे हैं, जो धन्यवादपूर्वक प्रकाशित किये जाते हैं—

अर्हन्विभर्षि सायकानि धन्वार्हन्निष्कं यजतंविश्वरूपम् ।  
अर्हन्निदं दयसे विश्वं भवभुवं न वा ओजीयो रुद्र त्वदस्ति ॥  
[ ऋग्वेद अष्टक २ अ० ७ वर्ग १७ ]

व्याख्या—(अर्हन्) हे अरहंतदेव आप अज्ञाननाशार्थ (सायकानि) बस्तुस्वरूप धर्मरूपीवाणोंको तथा (धन्व) उपदेशरूप धनुषको तथा (निष्कं) आत्मचतुष्टय अर्थात् अनन्तज्ञान अनंतदर्शन अनंतवीर्य और अनन्तसुखरूप आभूषणोंको (विभर्षि) धारण किये हो, तथा (अर्हन्) हे अरहंतदेव आप (विश्वरूपं) विश्वस्वरूप अर्थात् जिसमें समस्तविश्व प्रतिभासित होता है (तं) उस केवलज्ञानको (यज) यजन किये अर्थात् प्राप्त कियेहो। (अर्हन्) हे अर्हन्तदेव आप (इदं) इस (विश्वं) संसारके (भवभुवं) समस्तजीवोंकी (दयसे) रक्षा करतेहो (रुद्र) हे काम क्रोधादि बड़ेबड़े प्रबल शत्रुओंको रुलानेवाले (त्वद्) आपके समान और कोई भी (ओजीयो) बलवान (नवा अस्ति) नहीं हैं।

वाजस्यनु प्रसव आवभूवेमा च विश्व भुवनानि सर्वतः ।  
स नेमि राजा परियाति विद्वान प्रजां पुष्टि वर्धयमानो ॥

अस्मेस्वाहा [ यजुर्वेद अध्याय ९ मंत्र २५ ]

व्याख्या—(वाजस्य) भावयज्ञ अर्थात् आत्मस्वरूपको (प्रसवः) प्रगट करदेनेवाले ध्यानको (इमा) इस (विश्व) संसारके (भुवनानि) सर्वभूतजीवोंको (सर्वतः) सर्व प्रकारसे (आवभूव) यथार्थरूप कथनकरके (स) जो (नेमि) श्रीनेमिनाथजी बाईसवें तीर्थंकर (राजा) अपने केवल ज्ञानादि आत्मचतुष्टयके स्वामी (च) और (विद्वान) सर्वज्ञ (परियाति) प्रगट करते हैं जिनके दयामय उपदेशसे (प्रजां) जीवोंको (पुष्टि) आत्म-

स्वरूपकी पुष्टता (नु) शीघ्र (वर्धयमानो) बढ़तीहै (अस्मै) उस श्रीनेमि-  
नाथजीको (स्वाहा) आहुति प्रदानहो ।

**आतिथ्यरूपं मासरं महावीरस्य नम्रहुः ।**

**रूपमुपासदामेतत्तिस्रो रात्रीः सुरासुता ॥**

[यजुर्वेद, अध्याय १९ मंत्र १४.]

**व्याख्या—**(आतिथ्यरूपं) अतिथि स्वरूप पूज्य (मासरं) महिना  
आदिके उपवास करनेवाले (महावीरस्य) कामादिक प्रबल शत्रुओंके जीत-  
नेवाले वीर अर्थात् महावीर तीर्थंकर देवके (नम्रहुः) नम्र (रूपम्) स्वरू-  
पकी (उपासदाम्) उपासना करो जिससे (एतत्) ये (तिस्रो) तीनों  
(रात्रीः) अज्ञान अर्थात् संशय विपर्यय और अनध्यवसाय और (सुराः)  
मद अर्थात् धनमद शरीरमद और विद्यामदकी (असुता) उत्पत्ति नहीं होती  
है ।

## परिशिष्ट २.

इस ग्रन्थके छपचुकने पर हम को एक प्रति और मिली. जिससे मिलान  
करने पर मालूम हुआ कि, निम्नलिखित स्थानोंमें निम्नलिखित पंक्तियां छूट गई  
हैं । पाठक महाशयोंको चाहिये कि, स्वाध्याय करनेके पहिले इन पंक्तियोंको  
अपनी प्रतियोंमें यथास्थान बढ़ा लें—

पृष्ठ. पंक्ति. जिसके आगेछूटा है, छूटे हुए वाक्य.  
वहवाक्य.

२ ४ चिंतवन कीजिए है— जातै स्वरूप जाने विना यह जाण्या नहीं  
जाय जो मैं कौनकौं नमस्कार करूं ।  
तब उत्तम फल की प्राप्ति कैसें होय ।

७ २२ जिनके दर्शनादिकतै— स्वपरभेद विज्ञान हो है, कषायमंद होय  
शान्त भाव हो है ।

१५ ४ थोरे अंगनिके पाठी रहे— तिननै यह जानकरि जो भविष्यत काल-  
मैं हम सारिखेभी ज्ञानी न रहूंगे, तातै  
ग्रन्थरचना आरंभ करी अर द्वादशांगानु-

- कूल प्रथमानुयोग, करणानुयोग, चरणानु-  
योग, द्रव्यानुयोगके अनेक ग्रन्थ रचे ।
- २२ ३ मोकौं ज्ञान नाहीं— किसी विशेष ज्ञानी सौं पूछकर मैं तिहारे-  
ताँई उत्तर दूंगा । अथवा कोई समय पाय  
विशेष ज्ञानी तुमसौं मिलै, तौ पूछकर  
अपना संदेह दूर करना अर मोकौं हू  
बताय देना । जातैं ऐसा न होय तौ  
अभिमानके वशतैं अपनी पंडिताई जनाव-  
नेकौं प्रकरण विरुद्ध अर्थ उपदेशै । तातैं  
श्रोतानिका विरुद्ध श्रद्धान करनेतैं बुरा-  
होय जैनधर्मकी निंदा होय ।
- २४ १४ मैं कौन हौं— अर कहाँतैं आकर यहां जन्म धारया है  
अर मरकरि कहाँ जाऊंगा ।
- २१ ४ परमाणु भिन्न हो हैं— अर केई नए मिले हैं ।
- २६ २ आपही मिलै हैं— अर सूर्यास्तका निमित्त पाय आपही वि-  
छुरै हैं ।
- ४६ ९ मनरूप परमाणुनि— के परिणमनिकै अर मतिज्ञानकै निमित्त  
नैमित्तिक सम्बन्ध है. सो तिनकै
- ४६ २३ मनकै भी यथासंभव— निमित्त नैमित्तिकपणा
- ६३ ३ दुःखनिकौं सहै है— परन्तु ताका मूल कारण जानै नाहीं ।  
याकौं वैद्य दुःखका मूल कारण बतावैं.  
दुःखका स्वरूप बतावैं. याको किए उपा-  
यनिकौं झूठा दिखावैं तब सांचा उपाय  
करनेकी रुचि होय, तैसेही यह संसारी  
संसारमें दुखी होय रह्या है. परन्तु तिसका  
मूल कारण जानै नाहीं अर सांचा उपाय  
जानै नाहीं अर दुख भी सह्या जाय नाहीं  
तब आपकौं भासै सो ही उपाय करै है ।



- तातैं दुख दूर होय नाहीं । तब तड़पि तड़पि परवश हुआ दुःखनिकौँ सहै है ।
- ८६ २० दुखमिटै सुखीहोय— तातैं सम्यग्दर्शन ही दुख भेटनैका अर सुख करनेका सांचा उपाय है ।
- ८७ ९ उत्कृष्ट रहनेका काल— असंख्यात पुद्गल परावर्तन मात्र है अर पुद्गल परावर्तन काल
- ११६ २ आस्रवका तौ संवर करै अर तिनि अन्य पदार्थनिकौँ दुखदायक नाहीं— मानै है । तिनिहीकै न होनेका उपाय करै है सो अपने आधीन नाहीं ।
- १२२ २१ तामैं कछू विशेष नाहीं— अर यह ज्ञान केवल ज्ञान विषै भी जाय मिलै है, जैसे नदी समुद्रविषै मिलै है । यामैं कछू दोष नाहीं ।
- १२३ ८ कहिए है,— चारित्रमोहके उदयतैं कषायभाव होय, तिसका नाम मिथ्याचारित्र है । यहां अपनी स्वभावरूप प्रवृत्ति नाहीं । यह सुखी है. ऐसी
- १२४ १० मिथ्या चारित्र कहिए है— अर कषायभाव हो हैं, सो पदार्थनिकै इष्ट अनिष्ट माननेतैं हो हैं. सो इष्ट अनिष्ट मानना मिथ्या है ।
- १२४ ११ कैसेँ सो कहिए है— जो आपकौँ सुखदायक उपकारी होय ताकौँ इष्ट कहिए, अर जो
- १२६ १ कर्तव्य नाहीं— कर्मका कर्तव्य है ।
- १२७ १४ रागद्वेष करना मिथ्या है— जो परद्रव्य इष्ट अनिष्ट होता अर तहां रागद्वेष करता, तो मिथ्या नाम न पावता । वह तौ इष्ट अनिष्ट नाहीं ।
- १५२ २३ मरावै है । जो अपने अंगनिकरि संहार करै है, तो

- १५४ ७ कैंसैं संहार करैं है । अपने अंगनिकरि संहार करैं है कि इच्छा  
होतैं स्वयमेव ही संहार हो है ।
- २०६ ५ तैंसैं यह कार्य भया । यह सांच तौ तब होता, जैंसैं दिगम्बर  
आचार्यनिने अनेक ग्रन्थ रचे, सो सर्व  
गणधरकरि भाषित अंगप्रकीर्णकताके अनु-  
सार रचे अर तिनि सबनिमै ग्रन्थ कर्त्ता-  
का नाम सर्व आचार्यनिने अपना भिन्न  
भिन्न रक्खा अर तिनि ग्रन्थनिके नामहू  
भिन्न भिन्न रक्खे किसी ग्रन्थकाभी नाम  
अंगादिक नहीं रक्खा अर न यह लिख्या,  
जो ए गणधर देवने रचे है ।

## शुद्धिपत्र ।

शृष्ट	पंक्ति	अशुद्ध	शुद्ध
४	१७	निश्चल हो है	निश्चल हो हैं
४	२०	सावधान हो है	सावधान हो हैं
५	१	जीव याचकनिकों	जीवादिकनिकों
६	६	केवलीका प्राकृत-	केवलीका अधिकार है । प्राकृत-
७	६	परमेष्ट्र	परमेष्ठी
७	७	पंचपरमेष्ठी	पंचपरमेष्ठी
१२	१४	युगपति	युगपत्
१२	२३	मध्यकषायका	मन्दकषायका
१३	१०	अवनानेके	अनावानेके
१४	२२	गौत्तम	गोतम
२३	१६	रसैया	रसिया
२७	१०	जे मन ज्ञान रहित	जे मनुष्य ज्ञानरहित
२८	१०	कोईकूं	कोड़ीकों
३५	६	तावत् वहां सामग्री	तावत् बाह्य सामग्री
३८	२०	घातिया प्रकृतीनिका	घातिया अघातिया प्रकृतीनिका
३९	१७	प्रकृतिबंध अनुभाव बंध प्रदेशबंध बलवान् नाहीं	प्रकृतिबंध प्रदेशबंध बलवान् नाहीं ।
४२	२१	तीव्रबन्ध होनेतैं	तीव्र मन्द बन्ध होनेतैं
४९	११	चक्षुदर्शन है ।	चक्षुदर्शन वा अचक्षुदर्शन है
६४	१३	फूल सूंध्या शास्त्र जान्या	फूलसूंध्या पदार्थ स्पर्श्या खाद जान्या
६५	५	मच्छक	मच्छकै
६८	२३	बंधका कारण है सो	बंधका कारण है, विषम है सो
७४	२३	दुखी हो है	दुखी ही है
८०	१५	उल्लास	उच्छ्वास
८१	२१	भागनेकी	भोगनेकी

शृष्ट.	पंक्ति.	अशुद्ध.	शुद्ध.
९३	६	चाहै हैं	चुरावै हैं
११९	१२	भेद विपर्यय	भेदाभेद विपर्यय
१२१	१५	भया मिथ्यादर्शन	भया मिथ्याज्ञान अर मिथ्यादर्शन
१२४	१४	सुखदायक उपकारी	सुखदायक दुखदायक उपकारी
१२७	१९	भिन्न बाह्य	भिन्न भिन्न बाह्य
१३०	२०	दिखाए	सिखाए
१३१	६	सर्व	सगे
१३२	७	जुदा होय	बुरा होय

### शुद्धाद्ये नहीं ।

१३२	१७	निरूपण रूप अधिकार सम्पूर्ण भया ॥ ६ ॥	निरूपण रूप चौथा अधिकार सम्पूर्ण भया ॥ ४ ॥
१४४	१३	संग	संग्रह
१४९	२३	सुगंधादि वस्तु सहित	सुगंधादि सहित वस्तु
१५३	१८	अनिष्टता	अनिष्ट मानि
१५४	२०	न उपजैगे	नए उपजैगे
१५४	२२	न उपजैगे	नए उपजैगे
१५७	१६	बहुरि अवतार	अंश अवतार
१६१	६	पिंडादिक	दंडादिक
१६१	१०	पुण्यकारि	पुण्य पापकरि
१६२	१५	भावरूप	अभाव रूप
१६२	१६	जाति	जातै
१७५	८	मिहर	रहम
१७६	१२	शुद्ध निरूपणकरि	शुद्ध निरूपणकरि
१७८	१	अहंकार निपजना	अहंकारकरि निपजना

पृष्ठ.	पंक्ति.	अशुद्ध.	शुद्ध.
१८८	१९	मनरूप	ममरूप
१८९	५	कैह	कहै
१९२	५	पूर्वा परका	पूर्व पर्यायका
१९५	८	श्रेष्ठ	इष्ट
२१०	४	तीसरै नरक तीर्थकरका	तीसरै नरक पर्यन्त तीर्थकर प्रकृतिका
२३२	१७	बंदनादिकरि	चन्दनादिकरि
२३८	१७	हितका कर्तव्य नाही	हितका कर्ता नाही
२४८	१५	पुण्यवंत	पुण्यबन्ध

